




ა ა ა ი ა  
ა ს ა თ ი ა ნ ი




Г 2  
899.962.1—3  
• 871

მამი ასათიანის წიგნი „გეგუთის ძეგლები“ ეხება საქართველოს წარსულსა და თანამედროვეობას. ნაწარმოებთა ცენტრში დგას საშობლოსათვის თავდადებული იდამიანი, ასახულია მისი მაღალი მორალური თვისებები, გმირული შრომა-საქმიანობა, სიყვარული და მეგობრობა, ბრძოლა თაობათა ბედნიერებისათვის.



სიბრძნის





## გეგუთის ქალქები

კიბეები რომ აათავა ივანე მხარგრძელმა, მაშინ გადმოიხედა ზემოდან და გაოცებისაგან კინალამ ძირს გადმოვარდა კაცი. ადამიანთაგან თვალუნახავი რამე იხილა — რიონის პირისკენ, ცვრიან კოინდარში დედოფალი თამარი ფეხშიშველი დაიარებოდა. თვალეები რომ მოიფშენიდა, მხოლოდ მაშინ დაიჯერა, ნამდვილად მეფეთმეფე იყო. უბრალო ჩითის კაბა ეცვა, უქამრო, წელში ფარფაშა. გლეხის გოგოს ჰგავდა. ეშხი და სილამაზე კი უფრო მომატებოდა. კოჭებს ზევით გვირილის ორი ფურცელი მიჰკვროდა, თეთრი ხალებივით მოჩანდნენ შორიდან.

„ადამიანი მაინც ადამიანია, მეფეც ისაა, რაც გლეხი. მასაც მონატრებია ცვრიან ბალახში ფეხშიშველა სირბილი. განსხვავება ისაა, რომ მეფე ნამალევად სჩადის ამას, გლეხი კი ამქვეყნად არც სიხარულს მალავს და არც დარდს“.

ერთი კიდეც გადახედა მოკრძალებით თამარს და თეატრონის დარბაზისკენ გაუხვია. დღეს იქ სვანებს ელოდნენ. მეფემ ბრძანა, სვანური სიმღერები მომნატრებია, მომასმენინეთო.

მომღერლები ვიწრო აივანზე, დარბაზის წინ შეკგუფულიყვნენ.

— ივანე მხარგრძელი მობრძანდება, — თითქოს წყნარად თქვა ვილაყამ, სინამდვილეში კი მისი ხმა გრგვინვით წავიდა რიონის ნაპირისაკენ.

ივანეს უღვაშებში ჩაელიმა. სვანები უყვარდა ნაცად სარდალს. იცოდა, მათი ვეება ბეჭები უქმად როდი დაენახებოდ-

ნენ ბრძოლის ველზე მტერს. სადაც ისინი იყვნენ, გამარჯვებაც იქ იყო. თვითონაც მათეენ მიუწევდა ბრძოლის დროს გული. დარბაისლურად მიესალმა მათ. ოჯახებით მოიკითხა, ჯანი და მარილი უსურვა. სვანებმა პატივისცემის ნიშნად თავები მოკრძალებით დახარეს.

— თქვენი ხმა მონატრებია ქვეყნის მანათობელს, ამიტომ გიხმეთ.

— ღმერთმა მისი ხმა ნუ მოუშალოს საქართველოს. ჩვენ სიმღერას როგორ დავამადლით?! სვანეთში ხომ თამარზე იმღერის ყველა!

უცებ იფარელი მურზაყანი წისქვილის დოლაბრივით შემოტრიალდა. ანაზღად ყველას ქრუანტელმა დაუარა და მაშინვე სიცილი წასკდათ. მურზაყანსაც ღიმილი მოერია. მხარზე თვალბებრივად კაპუეტის შემოჯდომოდა და კიპკიპებდა.

— თამარის კაპუეტია, ალბათ, ბაზიერებს გამოპარვია. შენი ბეჭი მუხის ტოტი თუ ეგონა, — შესცინა ივანემ. მურზაყანი ბავშვივით გაწითლდა.

— შე კი შემაშინა, მეგონა, ეშმაკი შემომაჯდა მხარზე-მეთქი! — გამოაჩინა ვეფხვის კბილები, ახლა ენიშნათ მეზობლებს, ხელი ხანჯლისტარზე ჰქონდა დადებული.

„მართლაც, შეშინებია ამ დევივით კაცსო“, — იფიქრა მხარგრძელმა და მურზაყანს თვალი აარიდა.

ამ ხორხოცზე კიბეზე შოთამ შემოდგა ფეხი. ყველა გაილურსა. ივანემ სვანების მოკრძალებული სუნთქვით იგრძნო მოსულის სიღარბაისლე. შეხედა თუ არა, თვითონაც მიეგება.

— თქვენი სიცოცხლე, სიტყვის ჯადოქარო. დღეს ჩვენ სმენას დიდი სიამოვნება ელის.

— სვანთა სიმღერა ღვთიური სიმღერაა, აბა, ვის არ გაუხარდება ღილეს მოსმენა, მხედართმთავარო!

— როცა ღილეს ვისმენ, ჩემ თავს არ ვეკუთვნი, ასე მგონია. ყველა წმინდანი ამდგარა, იალბუზზე ხშიადი გაუტეხიათ და ზედაშის წინ ქვეყანას ადამიანის სიცოცხლისა და ვაჟკაცობის პიმნს უგალობენ-მეთქი.

— ჭეშმარიტად იქ, მაღალ მთებში არის დაბადებული ეს სიმღერა, — წყნარად თქვა შოთამ და სვანებს მიუბრუნდა: — გა-

მარჯობათ, მეგობრებო, სულს და გულს უხარის თქვენი მობრძანება!

— თქვენი დანახვა ჩვენს სახლის საძირკველს ამაგრებს და თავანს მალა სწევს, შოთა ბატონო! — თვითონაც წინ წამოდგა იფარელი.

შოთას თვალები გაუფართოვდა. უხერხულობა რომ დაეძლია, თეატრონის დარბაზის კარისაკენ გადადგა ნაბიჯი და ხელის კვრით შეაღო იგი. უჩვეულო სანახავე გამოჩნდა — ოდნავ ამალღებულ ადგილზე, აქეთ და იქით, რკინის გალიებში დედალ-მამალი ჭიქი აბრიალებდა თვალებს. სვანები შეიშმუშნენ. შეეტყოთ, ჭიქი მათ თვალებს არ ენახათ.

— ჩვენ, ალბათ, მათ გვერდით უნდა დავდგეთ და ვიმღეროთ ხომ? — ვერ მოითმინა სათქმელი იფარელმა.

— ნუ შიშობ, რკინის გალიაში არიან, თორემ დარბაზშიც რომ იყოთ, მაინც ვერსად გაექცევით უხანჯლოდ.

— თამარის დაზრდილია, ბოკვერები მოჰგვარეს ინდოეთიდან, — თქვა შოთამ და ტკბილისკვერი გაუწოდა ჭიქს. მეორემ ბრღლვინვა დაიწყო.

— მეორესაც უნდა, — ისევ გაიღიმა შოთამ და ახლა მასაც მოუხია დათაფლული კვერი, მერე სვანებისაკენ შემობრუნდა: — ორივე ბოკვერი ივანე მხარგრძელის საჩუქარია. მეტად გაახარა თამარი დიდმა სარდალმა.

— არ მეგონა, ასე თუ ესიამოვნებოდა, თორემ ინდოეთიდან ლომის ბოკვერებს წამოვიყვანდი.

— თამარს ვეფხვი და ჭიქი უყვარს. მათი სილამაზე ხიბლავს. დია, რომ ლამაზია ვეფხვი. უთვალავ ფერს ითვლის მისი ბეწვი!..— შოთას ახლა ხმაში ნალველი დაეტყო. მხარგრძელმა ერთი კი შეავლო თვალი. მაგრამ სიტყვა არ უთქვამს.

ცოტა ხნის შემდეგ თეატრონს ხალხი მოაწყდა. გლეხები არ იყვნენ მოპატიებულნი, მხოლოდ სამეგრელოს მთავარს მოუვიდა შვიდი ძმა ბოდოკიები. თამარის თხოვნით გეგუთში უნდა დასახლებულიყვნენ. თან პატარა და, ვარდიფინა ჩამოეყვანათ. ძმებს ცალკე გამოუყვეს სამოსახლო, სახლის მასალა, წყვილი ხარი, ძროხა და ცხენიც უსაჩუქრეს. ხვალ დილითვე უნდა მიეღობათ ეზოები ბოდოკიებს.

— დღეს აქ იყავით, სვანების სიმღერას უსმინეთო, — უბრძანა დადიანმა.

ვარდიფინა დაფეთებული შველის თვალებით იყურებოდა. ამდენი თავადი და აზნაური ჯერ არ ენახა ბავშვს. წერა-კითხვა დადიანის ქალიშვილმა ასწავლა. მის საწოლ ოთახში წაიკითხა ორივემ „ვეფხისტყაოსანი“. ახლა ერთი სული ჰქონდა, სანამ დედოფალს დაინახავდა. არა ნაკლებ კლავდა შოთას ნახვის სურვილი. მისთვის თამარი ნესტანი იყო, შოთა კი ტარიელი და ავთანდილი ერთად.

დარბაზი თანდათან შეივსო.

— დედოფალი მობრძანდებაო, — გაისმა უცებ და ხალხი ერთი კაცივით წამოდგა, ყველა აღმოსავლეთის კარებს. მისჩერებოდა, ის კი ჩრდილოეთიდან, აივნიდან შემოვიდა.

ვარდიფინა თვალს არ აშორებდა დედოფალს, მისი აზრი გამართლდა. თამარი სწორედ ისეთი იყო, ლამაზი კი არა, თვალთუნახავი სილამაზის ქალი, წყნარი, დარბაისელი. არა, ის ადამიანს არ ჰგავდა, ანგელოზი იყო გვირგვინმოსილი და ერის წინამძღოლი. გვერდით დავით სოსლანი მოჰყვებოდა, უკან მთელი ამალა. დადიანი ხელმარჯვნივ ახლდა დედოფალს. ვარდიფინას თვალები დაეწყურა.

„ნეტავი შოთა თუ არის სადმე?“ — კითხულობდა თავის ფიქრში. ყველას შეავლო თვალი. მაგრამ მის ოცნებაში ხორცშესხმულ პოეტს ვერავინ მიაგვანა. ალბათ, თბილისში დარჩაო, გაიფიქრა და თითქოს დაწყენარდა კიდევ.

სვანებმა სიმღერა წამოიწყეს. ვარდიფინას პირველად ესმოდა ასეთი მაღალი და მოგუგუნე სიმღერა. ჰაი დედასა! სისატურა მაინც სხვა იყო მისთვის. ანაზღად სარკმელს გააყოლა თვალი და გაოგნდა, ეზოში ორმოცდაათამდე არაბული შავი ცხენი შემორეკეს. ცხენები კი არა, ყელმოდერებული ირმები იყვნენ. ახლა ფეხებს არ იკითხავთ? გეგონებოდათ, კოჭში გადატყდებათო, წვრილი ძარღვები ძაფებივით დასჭიმვოდათ მაღალ წვივებზე. ვარდიფინამ იცოდა ცხენის ფასი. თვალი მოჰკრა თუ არა, სულიც იქით გაექცა. გულმა რეჩხი უყო, ცხენებთან დადიანის მეჭინბე ტრიალებდა. ახლა გაახსენდა დადიანის ქალწულის ნათქვამი, თამარმა ჩვენი ნაქები მეჭინბე



შორეულ არაბეთში გაგზავნა ცხენების ჩამოსაყვანადო. ერთი კი გაიხედ-გამოიხედა და კარებში გაძვრა.

სასახლეს დასავლეთით მოზრდილი ლობე მიჰყვებოდა. სწორედ იქ მირეკეს ცხენები. ეტყობოდათ, უნდოდათ თამარს საჯინბოში შეყვანამდე ენახა სახელდახელოდ.

ვარდიფინა ჩიქოვანს მიუახლოვდა.

— შემსვი, პატენი კიწი, ასეთი ცხენები ჩემ თვალებს არ უნახავს მის დღეშიო, — შეეხვეწა.

ჩიქოვანს სიცილი წასკდა.

— შენ კი არა, ძღაბო, მე არ მინახავს. ვისი ხარ, გოგო?! მარგალი ძღაბი ხარ ხომ?!

— კი პატენი. ბოდოკია ვარ. დადიამ ჩამომიყვანა. თქვენი გიცნობთ. პატარა ქალბატონმა მითხრა, თქვენი დასაკარგავში გამგზავრება.

— ბიჭოს, შენ რა იცი, ძღაბო, მართლაც დასაკარგავში ვიყავი. ამ ცხენებივით შავია იქაური ადამიანები. პირჯვარი ვიწერე, პირველად რომ ენახე.

— „ვეფხისტყაოსანი“ არ წაგიკითხავს? იქ წერია, ზანგები შავიაო. ქაჯებიც იმ ფერისაა, ალბათ. ცხენზე შემსვამ?!

— უყურე ამას?! შენ რა იცი, ძღაბო, ზანგებისა და ქაჯების?! ცხენზე მაინც ვერ შეგსვამ. მალე დედოფალი გამოვა, მეშინია, არ დაიწუნოს.

— ჰა, არ დაიწუნებს. ასეთი ცხენები დადიანსაც არ ჰყავს. მისანა ცხენოსანი კი აქ არავინ იქნება.

— მისანა ცხენოსანი აქ კი არაა, არაბეთშიც ნაკლებად იქნება. ცხენზე ფოთოლივით დააკვდება. ათი დღე-ღამე რომ იჭირითოს, თუ არ უნდა, ნაბდის ყური ბაყეებიდან არ გამოუცურდება.

— შემსვი, პატენი. ორ ნაბიჯს გავარონიებ და ისევ ჩამოვხტები!

— ჰა, არ თქვა, ძღაბო, მეორედ, ოდიში კი არაა, გოგო, აქ, თამარის სასახლეა, მეფეთა მეფის, დედოფალთა დედოფლის!

— მეც ვიქნები დედოფალი. საქართველოში არაა, თორემ, სხვაგან კი ვიქნები. ასე მითხრა დადიას მოურავის ბიჭმა. შენისანა ლამაზი ქალიშვილი დედოფალი გახდებაო. ყველას გავაქრისტიანებ და გავამეგრელებ.

ჩიქოვანი ისე ახორხოცდა, რომ ფეხზე ველარ დადგა, უნებლიეთ ჩაიმუხლა.

— ამდენი ქვეყანა მოვიარე და ასეთი გოგო არ მინახავს, — ამოღერლა როგორც იქნა, — მომკალი, გოგო, სიცილით და ის არის.

— რას იცინი, ტყვილი გგონია ხომ?! ცოტა დამაცადე, შოთას წიგნს სულ ზეპირად ვისწავლი, ჭკუისთვის ის მეყოფა. ბერძნული ვიცი. ხუცური ვიცი. მეგრული ხომ ვიცი და ქართულიც კარგად მეხერხება. დედოფალს მეტი რა უნდა?! შემხედე ერთი, ლამაზი არა ვარ თუ?!

ჩიქოვანმა უნებლიეთ შეათვალიერა. თორმეტ-ცამეტი წლისა თუ იქნებოდა, მაგრამ მის თხილის წნელივით ტანს ვერც ერთი ვაჟაკი ვერ აუვლიდა შეუთვალეირებლად. უმცროს ძმას დადიას ნაჩუქარი დარაიას მოსირმული ბაშლაყი წაართვა და თავზე არ იშორებდა, თვალწარმტაცად ლამაზი ჩანდა. დაკვირვებით ააყოლა თვალი და თავისთვის ჩაილაპარაკა: — ნამდვილად არა ერთ დედოფალს სჯობია აი ძღაბიო.

ჩიქოვანს კი დაეჭვებოდა; მიწისპირი ჰქონდა მოვლილი ფეხით.

— ცხენზე შემსვამ ხომ?! — ჩააცვიდა ვარდიფინა და თვალი თვალში გაუყარა.

— მომშორდი, შვილო, ხომ გითხარი, დედოფალს ველოდები.

ვარდიფინამ ერთი ისევ გახედა ჩიქოვანს. სიტყვა არ უთხრა, ნელა წაიწია ღობისაკენ, სადაც ორი ცხენი ერთმანეთს ყელგადაბმული ეთამაშებოდა. არც აცია, არც აცხელა, უცებ მოაელო სარს ხელი, ღობეზე შეფრინდა და სანამ ცხენი და ჩიქოვანი რასმეს მოიფიქრებდნენ, უკვე არაბულის ზურგზე იყო მოქცეული. უხედნავ ცხენს ერთი შეაკანკალა და ყალყზე შედგა.

ვარდიფინამ ფაფარში ჩაავლო ხელი. ცხენი გვერდიგვერდ წავიდა თვალების ბრიალით. ჯერ აქეთ ეცა, მერე იქით, ვარდიფინამ ფერდებში ამოკრა ქუსლები, ცხენი უფრო ათრთოლდა. გაგიჟდა, დაფეთდა, ერთი შეხტა და ჭიშკარს მიაშურა.

— მოკლავს ამ ოჯახდაქცეულსო! — ხმამაღლა იყვირა ჩიქოვანმა. ყვირილმა დარბაზამდე მიაღწია და იქ დატრიალდა, ყველა გარეთ გამოვარდა.

— ვაიმეო — ერთი კი დაიძანა უმცროსმა ძმამ და აივნი-  
დან ისკუბა. ცხენმა რომ მისკენ გამოქცეული ჩაბალახიანი კა-  
ცი დაინახა, უფრო გადაიჩრია, პაერს შეეპოტინა, მერე ადგილს  
მოწყდა და ღობეს მწერივით გადაევლო.

თამარმა შეჰკვივლა.

ღობის გადაღმა დიდი მინდორი იწყებოდა. სწორედ იქით  
მიუშვა ვარდიფინამ არაბული კვიცი. ყელიდან ბაშლაყი შეიხს-  
ნა, ტოტებმა პაერში გაიფრიალეს. მერე ყველამ დაინახა, რო-  
გორ მოახვია ყელზე ერთი ბოლო და მეორე ცხვირის ნესტოებ-  
თან აღვირვით შემოასალტა არაბულს.

— ძღაბი კი არა ქაჯია — ბუტბუტებდა ჩიქოვანი.

ექვსი ძმა არ განძრეულა. ღიმილით გასცქეროდნენ მხე-  
დარს.

— ტყეში არ შეუხვიოს იმ ოხერმა, — ჩაილაპარაკა ერთმა  
და დოინჯი შემოირტყა. უმცროსმა ჭიშკარს გადააბიჯა და მინ-  
დორზე გავიდა.

ვარდიფინა ცხენს მიაგელვებდა. ქუსლებს დეზებივით სცემ-  
და გვერდებზე და ისე მიერეკებოდა. თვალუწვდენი მინდორი  
უკვე გადაიარა და თანდათან დაუახლოვდა ძელქვის ტყეს.  
გვერდით ჩაუქროლა ახალ აგებულ პატარა ეკლესიას და ისევ  
მინდვრისაკენ შემოაბრუნა ცხენი. მესამედ უვლიდა წრეს. ეტ-  
ყობოდა, ცხენსაც მოეწონა მხედარი. ერთი ისე შესჭიხვინა  
თითქოს ეუბნებოდა, მაგრად იჯექი, არ გადმოვარდეთ. უეც-  
რად ვარდიფინამ ეკლესიასთან, ძელქვების ძირში მდგარი ჰა-  
ბუკი შეამჩნია, იგი გაფართოებული თვალებით მისჩერებოდა  
ქალიშვილს. ასეთი ლამაზი ყმაწვილი ჯერ არ ენახა. მეტად ჰა-  
ბუკი ჩანდა, თორემ მას რომ ჰყავდა წარმოდგენილი, სწორედ  
იმ შოთას ჰგავდა. ტანსაცმელი კი ცოტა უცნაური ეცვა, ხა-  
ლათზე სირმები ჰქონდა შემოვლებული, ბაშლაყი მასაც მეგ-  
რულად ჰქონდა გაკრული. სამი წყრთა ბეჭები უჩანდა. მის სა-  
ხეს რომ შეხედა, ვარდიფინა სიმღერის ხასიათზე დადგა. გა-  
ლთბა მოუნდა, — სისატურას თქმა მოუნდა. არა, უნდა გაიგოს,  
ვინ არის. მოულოდნელად მოსწია სადავე გაქანებულ ცხენს და  
უცებვე წყნარი ნაბიჯით შეიყვანა ძელქვებში. ყველა გაოცდა.

„არაბულ ცხენებს კეთილშობილი სისხლი აქვთ, კარგ ყმასა  
და მხედარს მაშინვე იგრძნობენო“, — გაიფიქრა ჩიქოვანმა.

— სადაური ხარ შენ? — ჰკითხა ვარდიფინამ ჰაბუკს.

ეტყობა, ახალგაზრდას გაუკვირდა გოგონას სითამამე, გოლებით ახედა, სიტყვა კი არ უთხრა.

— მუნჯი ხარ თუ რატომ არაფერს მეტყვი?!

— მუნჯი როდი ვარ, მაგრამ ჩემი ენა ჩემს გონებას ემორჩილება, ასე სჯობია.

ვარდიფინას ფერმა გადაჰკრა. ეს რომ სხვას ეთქვა, არაფრად ჩააგდებდა. ამ ჰაბუკისაგან კი მეტად ეწყინა.

— კარგი ბიჭი მეგონე, შენ კი მლანძღავ, არ გრცხვენია?

ჰაბუკი შეკრთა. ასეთ რამეს არ ელოდა, თითქოს დაიბნა კიდეც.

— რა ეთქვი გასალანძლავი! ვიხუმრე.

ვარდიფინამ უცებ ისკუპა ცხენიდან და მის წინ დაესო.

— იცოლე, შეჯდომის დროს მიშველე, წელან ღობიდან შევახტი. თქმით კი მითხარი ვინ ხარ, საიდან ხარ?!

— გონიოდან ვარ, ლაზი, გვარად გოდუაძე. ხომალდების წაყვანას ვსწავლობ. სახელად ვაშლია მქვია, ვაშლია გოდუაძე.

— გეგუთში ხომალდებს რა უნდა, ვაშლია?!

— სტუმრად ჩამოვედი. ბიძისშვილი მყავს აქ, წმინდა გიორგის ხატავს ამ ეკლესიაში, დედოფალმა იხმო.

— უთხარი მეც დამხატოს!

— ის ხატებს ხატავს და წმინდანებს. დედოფლის დახატვა სურს ძალიან.

— ჰოდა, მეც მალე გავხდები დედოფალი. ასე მითხრეს მთავრის სასახლეში.

— შენ ვინა ხარ? — წინ წამოიწია ჰაბუკი.

— მე ვინ ვარ და ვარდიფინა ვარ, გვარად ბოდოკია. თამარ დედოფალმა გეგუთში გვიბრძანა დასახლება. რაც შენ გნახე, აღარ მინდა გეგუთის ეზო-კარი. გონიოში წამოვალ, შენს ახლოს, მეც ვისწავლი ხომალდების წაყვანას.

ვაშლიამ გაოცებით შეხედა — „ჰკუაზე არ უნდა იყოსო“, — გაიფიქრა. ხმამალა კი შეეპასუხა:

— ქალებს ხომალდზე ვინ აუშვებს, გოგო?!

— ვითომდა რატომ! განა მე ვერ ვისწავლი ხომალდის წაყვანას?

სწორედ ამ დროს ვარდიფინას უმცროსი ძმა გამოჩნდა.

— ჩემი ძმა მოდის, იცოდე, არ წაეჩხუბო!

— მე ჩხუბი არ მიყვარს, — გაიღიმა ვაშლიამ, — ან რას ვერჩი, რისთვის უნდა ვეჩხუბოთ ერთმანეთს?!

— სად დაიქარგე, ძღაბო, მთელი სასახლე გააგიჟე. ყოველთვის შენ უნდა შეგვარცხვინო, დედოფალი გამწყარალა შენზე!

— დედოფალს მე რა დავუშავე. ცხენი გავუხედნე. ამისთვის ჩილდო მეკუთვნის. მატყუილებ, გამწყარალი ჩიქოვანი იქნება, დედოფალს გული არადროს არ მოსდის თურბე.

— ასე გგონია. შენს თავქარიანობას ვინ მოითმენს? ჩიქოვანი გამათრახებას გაირდება!

— ენა გააჩუმე, ბიჭო! შენ ეს გაიცანი, ხომალდების წამყვანია, ვაშლია გოდუაძე. ხომ კარგი ბიჭია? გონიოში მივყვები. იქაურია. როგორც კი დედოფალი გავხედები, ზღვების და ხომალდების სარდლად დავნიშნავ.

ვაშლიამ სიცილი ვერ შეიკავა. ვარდიფინას ძმა კი სირცხვილისაგან გაშრა.

— თუ ძმა ხარ, სულელი არ გეგონოს, ასეთი უკუღმართი ენა აქვს. ისე კი, რასაც ჩაიფიქრებს, უსათუოდ შეისრულებს.

— იღბლიანი ყოფილა, — ისევ გაიღიმა ვაშლიამ.

2 — იღბლიანი რომ არ ვიყო, შენ შემხვდებოდნი?! — გაუცინა ვარდიფინამ.

— წამოდი, გოგო, მთელი სასახლე გელის.

— ვაშლია, არ დამივიწყო. მე ყოველთვის მემახსოვრები, უჩემოდ არ წახვიდე.

ქაბუკმა არაფერი უპასუხა. მხოლოდ მის ძმას შეხედა და მხრები აიჩეჩა. ბოდოკიამ ერთი წუთით დას ხელი გაუშვა.

— შენ ხომ არ გგონია, მართლა უკან გამოგეკიდება ჩემი დაიკო? ასეთი გოგო დუნიაზე არ არის, იცოდე!

— არ იჩხუბოთ! — გაწყრა ვარდიფინა. — ვაშლიას კი, ჩემო ძმაო, ვერავის დავანებებ. ეს იცოდეს ყველამ! — მეტი არაფერი უთქვამს, ცხენი კუნძიან ძელქვას მიუახლოვა და თვალის დახამხამებაში ისევ ზურგზე მოექცა.

3 — აბა, გავსწიოთ სასახლისაკენ, ბოდოკიას ბიჭო!

ვაშლია გაშტერებული შესცქეროდა ცხენზე ამხედრებულქალიშვილს.

— ასეთი გოგო მართლაც არ მინახავს ჩემს სიცოცხლეში, — თავისთვის ჩაიჩურჩულა, — ასეთი ცოლი რომ შემხვდებოდეს, ყველა ზღვის ქარიშხალს დაეჯაბნი.

— ქაჯი ხარ თუ ძღაბი ხარ? — შემოხვდა ჩიქოვანი ჭიშკართან და თან მალულად ცხენს დაუწყუო თვალიერება.

— მეგრელი კაცი ცხენს როგორ დაუკავენს ცხენის მოყვარულ მხედარს! — იქით შეედავა ვარდიფინა ჭარმაგ კაცს.

— ეს ცხენი სადედოფლოა, ძღაბო, ჩემი კი არაა.

— ჰოდა მეც დედოფალს გავუხედნე. ქალია და ქალის მხედრობას მიეჩვევა.

თამარმა ყური მოჰკრა მის ნათქვამს და გაიღიმა.

— კარგი ქალი ყოფილხარ, — შეაგება სიტყვა, — ცხენისნობაც დიდებული გვაჩვენე. ნამდვილი მხედარი ყოფილხარ:

ვარდიფინას სახეზე სინათლე გადაეფინა, ძმას მიუბრუხდა:

— ხომ გითხარი, ბიჭო, თამარმა გაბრაზება არ იცის-მეთქი.

— გააჩუმე ეგ ენა! — ჩაუჩურჩულა ძმამ.

ივანე მხარგრძელი და შოთა ერთად ჩავიდნენ კიბეზე. ცხენების რემას დაუწყეს თვალიერება.

— ყველა უხედარია? — იკითხა ივანემ.

— არა, ბატონო, ერთი უკვე ბოდოკიას ქალმა დაგვაგალა დღეს, — გაეღიმა ჩიქოვანს.

— ჩინებული ცხენოსანი ყოფილა, — ჩაფიქრებით თქვა შოთამ.

— შოთა ბატონო, ნამდვილი მეგრელი ძღაბია უშიშარი და თამამი. — ვარდიფინას სიყვითლემ გადაუარა სახეზე.

— ბიჭო, შოთა რუსთაველი ეს არის? — მივარდა ძმას.

— მე რა ვიცი, ძღაბო! — თავი გააქნია ბიჭმა, მაგრამ შოთას თვალი ვერ მოაშორა.

ვარდიფინა ახლა ჩიქოვანს მივარდა.

— შენი ჭირიმე, პატენი, ნამდვილად მითხარი, ეს კაცი შოთა რუსთაველია?

— შოთაა, აბა, ვინ გეგონა.

— ღმერთო, მიშველე! — ბალახებში ჩაჯდა აკანკალებული გოგო.

— და იყო, ძღაბო, ფერი რამ დაგიკარგა?

— მართალი მითხარი, პატენი, ამან დაწერა „ვეფხისტყაოსანი“?

— აბა, ვინ დაწერა, ძღაბო, რას გეცხარ, რამ შეგიშალა სახე?

— მე რომ მეგონა, ისეთი არ ყოფილა.

თამარს ერთი სიტყვაც არ გამოჰპარვია.

- როგორი გეგონა, ქალწულო?! — ჰკითხა ვარდიფინას.

— წმიდა გიორგივით კაცი მეგონა, დედოფალო, მე უბედურს, ის კი ჩვეულებრივი ყოფილა! — უპასუხა და თვალები-ურცხლები გადმოსცვივდა.

შოთა ჯერ ილიმებოდა, მერე მოიღუშა.

— უბედური რად ხარ, ქალწულო? მოდი, გემთხვიო, ჩემო დანივო, ჯერ პატარა ხარ. ხანში რომ შეხვალ, უფრო ჩახვდები მოფლის იღუმალეხას.

ვარდიფინამ თვალეხი მოიწმინდა, თამარს მოკრძალებით შეხედა და თავისთვის წყნარად ჩაილაპარაკა: — დედოფალი კი ისეთივეა, როგორც სიზმარში მინახავსო.

— მართალია, დედოფალი სულ სხვაა, — მტკიცედ თქვა შოთამ, — რა კარგი ხარ, რომ ქვეყნის სათქმელი თქვი. ნეტავი შენს ძმებს, ასეთი იღუმალთმხილველი დაი რომ ჰყოლიხარი!

— დღეიდან სასახლეში იცხოვრებ, — ღიმილით უთხრა თამარმა.

— ღმერთო მომკალი! — წამოიკივლა ვარდიფინამ, — სასახლეში მე რა მინდა?! ჩემი შემხედვარე, დიდ დედოფალს გულს ჰემოეყრება. ჩემი უმცროსი ძმის გარდა კაცისშვილი ჯერ არ ეკობს.

ვიანი ქალი ჩანხარ: შეეჩვევი და მოგეწონება. სწავლით კი ბევრი უნდა ისწავლო.

— ყველაფერი ვიცი, დედოფალო, ბერძნული ვიცი, ჩვენმა მღვდელმა ხუცურით მასწავლა. მეგრული ხომ ვიცი და ვოცი. მხედრული ყველას მირჩევნია. სწავლა ჩემს ძმებს უნდათ. მეგრულის გარდა არაფერი იციან.

— ძმებიც ისწავლიან, — ისევ გაეღიმა დედოფალს.

ამ დროს აივანზე სახლთუხუცესი გამოვიდა. მოკრძალებით მიუახლოვდა თამარს და წყნარად რაღაც მოახსენა. თამარი ოდ-

ნავ გაფითრდა, ცოტა ხანი ჩაფიქრებული იყო, მერე დავითმა და ივანეს მიუბრუნდა:

— დარბაზის ერნი შეყარეთ, მტერს პასუხი უნდა გავცეთ.

— უი ჩემ დღეს, კიდევ ჩხუბი იქნება? — ცრემლნარტვი ხმით ჩაილაპარაკა ვარდიფინამ.

სხვას არავის გაუღია ხმა. თავდახრილი გაჰყვნენ დედოფალს და მის ამაღას.

• • •

გეგუთის წმიდა გიორგის ეკლესია ცამდე აწვდილ ძელქვების ტყეში იყო ჩადგმული. პატარა ეკლესია ლამაზად მოეხატათ. კაბუკი მხატვარი ახლა წმიდა გიორგის ხატავდა. ვეშაპი შავი უნდა ყოფილიყო და მის მოქნეულ კუდს ყალბით ჭარბად უსვამდა შავ საღებავს.

— ვეშაპი გინახავს? — მესამედ ეკითხებოდა ვაშლია ბიძაშვილს.

— დახატული მინახავს, ისე არა.

— მე კი მინახავს. დიდ ზღვაში ვნახე, ზურგიდან წყალი ისე ამოქუხს, გეგონება ცას შესწვდებო.

— არ შემოგიტიათ? ადამიანებს ერჩისო?

— ჩვენი გემის შეეშინდა. ზღვა ააღელვა, ისე გულმოსული გაიქცა.

— შენ გული მაგარი გაქვს, მე ზღვის მეშინია.

— ზღვა არაა საშიში. ამ ვეშაპს კი რომ ვუყურებ, ტანში მბურძგლავს.

— კარგია გეგუთი, მაგრამ სახლში წასვლამდე ერთი სული მაქვს.

— მე კი სამიღღემჩიოდ მინდა აქ დავრჩე.

— ვითომდა რა უნდა გააკეთო, ვაშლია, აქ?

— იმ გოგონამ მომკლა. მისი ნახვის შემდეგ ძილი არ მეკარება.

— ეტყობა, დამთხვეულია.

— ჭკუით დამთხვეულია, მაგრამ სახით, რომ ნახო, ანგელოზი გეგონება.



— ასეთი ანგელოზები ჯოჯოხეთში უფრო სახლობენ, ბი-  
ძაშვილო!

— ერთი შენ გენახა, ასე არ იტყოდო.

— შეგყვარებია და ეგ არის.

— ჰო, ალბათ, შემიყვარდა. სულ მელანდება ძილშიაც და  
ცხადშიც.

— ძილში რა ეშმაკად გინდა, ვაშლია, გოგო, ჰა!

— ნუ ხუმრობ, წასვლამდე თუ არ ვნახე, გული გამისკდება.

— მე კი არავინ მომივიდა თვალში, მხოლოდ ანგელოზება  
მილიმიან, როცა ვხატავ.

— ანგელოზი შეგყვარებია. ეს არის სვანები მომიყუ-  
ნენ — ნადირობის ქალღმერთი ჰყოლიათ, ჰაბუქს შეიყვარებს  
და არ გამოუშვებს თურმე ყინულეთიდან.

— ჰოდა, მეც მიტომ ვერ ვშორდები ამ ეკლესიებს. სულ  
მინდა ანგელოზები ვხატო.

— ახლა წმიდა გიორგის რომ ხატავ?

— წმიდა გიორგიც ანგელოზია. მხოლოდ მამაკაცია, ვაჟ-  
კაცი იყო, ვეშაპი დაამარცხა, მთელი სოფლის ლამაზი ქალები  
დაიხსნა დალუპვისაგან, ამიტომ ვხატავ.

— მეც მინდა ვარდიფინა გადავარჩინო. მას უჩემოდ სი-  
ცოცხლე არ შეუძლია, მე უნდა წავიყვანო.

— შენ სულ ზღვაზე დაცურავ და ქალი სად უნდა წაიყვა-  
ნო, ბიჭო!

— ჯერ გონიოში მივიყვან, როცა გემის უფროსი გავხდები,  
მაშინ თან წავიყვან. იცი, როგორი გულადია? არაფრის არ  
ემინია.

— ზღვაზე შეეშინდება.

— არ შეეშინდება.

— გაიხედე, ვილაც ცხენს მოაგელვებს აქეთ.

— მისი ძმაა, იცოდე არაფერი წამოგცდეს.

— მე ენა პირში მაქვს, გარეთ კი არა.

— კარგი ვაჟკაცი ჩანს, ძელქვებში გადმოუხვია.

— რატომ მოდის? ნუთუ ავადაა ვარდიფინა!

— ცხენოსანმა ეკლესიის ეზოში შემოაგელვა ცხენი.

— გამარჯობათ თქვენი! — შემოსძახა შორიდან.

— გაგიმარჯოს! — მიესალმნენ ბიძაშვილები.

— ვაშლია გოდუაძე რომელია?

— მე ვარ, რამ შეგაწუხათ?

ძუკუმ ელვასავით მიანათა თვალები. კარგა ხანს ჩუმად ათვალეირა, მერე თავისთვის ჩაილაპარაკა:

— ცული ქაბუჯი არ ჩანხარ. მე და შენ ან მოსისხლე მტრები ვიქნებით, ან ულალატო ძმები. შენ რომელი გირჩევნია?

ვაშლიამ ფეხი შეინაცვლა.

— ერთსაც და მეორესაც მიზეზი უნდა. შენ ჭერ არც ერთის მიზეზი არ მოგიცია.

— ვარდიფინამ მითხრა, ვაშლიას უძმეო. ის ისეთი მაკვარანცხი გოგოა, შენში სიკეთე რომ არ შეენიშნა, ამას არ მეტყუოდა.

ვაშლიამ მხრები აიჩეჩა. ძუკუს ფერმა გადაჰკრა.

— ვარდიფინა ჭერ ბავშვია, მაგრამ ის რომ იტყვის, მოწმენდილ ცაზე მენი გავარდება. ტყუილი მის ღლეში არ წამოცდენია.

— სხვა რა გითხრა ვარდიფინამ?

— ვაშლია გოდუაძე, ბოდოკიებთან თამაში წმიდა გიორგის არ გაუბედნია, იცოდე!

— სათამაშო რა მაქვს. ვარდიფინა მიყვარს, თუმცა ჭერ ბავშვი კია.

— თქვი, შე კაი კაცო! ორ-სამ წელიწადს კი არა, ტრფიალი კაცი ას წელს მოიციდის.

— მე კი მოვიციდი, ის თუ მომიციდის.

— ახლა ძმა ხარ ჩემი. მისი თავლები მე ვიქნები. არც მე ვიზამ მის გარდუვალს და არც ის იზამს ჩემს უკითხავად რამეს.

— ჩემი ბიძაშვილის ბედი შენს ხელში ყოფილა და ეს არის, — წამოიძახა მხატვარმა ანაზლად.

— ჩვენ შეიდი ძმა ვართ. შეიდივეს ბედი ვაშლიას უნდა ჩავაბაროთ. ვარდიფინა ჩვენი მზეც არის და მთვარეც, უმისოდ ღმერთმა ნუ გვაცოცხლოს.

— მანახეთ ერთი — შეეხვეწა მხატვარი ძუკუს.

— ორი ღლეა ავად არის. ღლეს დაგვიძახა და ვაშლიას ამბავი გვითხრა. მეც ამიტომ გამოვიქეცი აქეთ.

— ვაიმე უბედურს! — წამოიყვირა ვაშლიამ. — ძალა მეშველება აწი?

- წამოდი, შენი თვალთ ნახე, გაუხარდება!
- დედოფლის მესირცხვილება.
- დედოფალს ვინ გააგებინებს?! ვიჩუმათოთ!
- შენ ხომ არ წამოხვალ? — შეეკითხა ბიძაშვილს ვაშლია.
- მე მინდა ვნახო, თორემ შენ ქე ნახე და ის არის.



ჯვრის მონასტერში მას არავინ ელოდა როცა გაიგეს, ვინ იყო, გაოცდნენ.

ღრმად მოხუცი შოთა რუსთაველი იერუსალიმში ჩამოსულიყო.

— პიტიკოს კაცს ნეტავი რა ეოდვა დაედო ამსიმძიმე, ამხელა გზა რომ გამოუვლია?! — კითხულობდნენ ბერები.

— მასზე ეოდვილი ქვეყნად ადამიანი არ დაიბადება. „ვეფხისტყაოსნის“ ყოველი პწკარი ეოდვით არ არის სავსე?

— ვითომდა რათაო?!

— მკრეხელობაა, ღვთის უარყოფაა თავიდან ბოლომდე.

— სიბრძნით და მუსიკობით არის სავსე, ღვთის უარყოფა მე იქ ვერ ვნახე!

— თვითონ ნახა, ალბათ, და მიტომ მოაშურა წმიდა ჯვარს. თუ აპატია უფალმა ჩვენმა, ბედნიერი ყოფილა.

— ტაძრის გამშვენიერება განუზრახავს, მოხატვა და გამდიდრება შესამკობელით.

— კათალიკოსის ნებაცაა უთუოდ.

— დიდი თამარის სიეოცხლეში ძლიერნი ვიყავით. ახლა ურჯულოებიე მოგვეძალნენ და ბერძნებიე გვექიშებთან.

— შოთას ჩამოსვლა განაახლებს ქართველთა ამ ხატსაყუდელს.

— ქეშმარიტად დიღია მისი განზრახვა. იერუსალიმი ქრისტიანთა სასულისტქმო ადგილია.

— ღმერთმა უშველოს, ერის კაცი იყო. უკვდავება დაიმკვიდრა ერსა შინა, აქ კი, ჯვრის წმიდა ტაძარში, იმქვეყნიებდ შევებას მოიპოვებს, ალბათ.

— მეექვება, ამისათვის იყოს ჩამოსული. იქნება, ქართლის

გამაგრება და განმტკიცება ჩვენი საყუდელიდან ისურვა დიდმა შოთამ?!

— ვინ იცის, რას ფიქრობს ღვთის ტოლი ბრძენი?!

— ცას ვარსკვლავი არ დააკლდება, ასეთ ადამიანს — ფიქრი და ზრახვა კეთილი.

— ჩვენ მისი კეთილისმსურველნი ვართ. მის ახლოს ყოფნა ძალასა და ღონეს გვაძლევს უბრალო მოკვდავთ.

— ვითომ მარტო მობრძანდა ქართლიდან საუნჯე კაცი?

— არა, ორი მხლებელი მოჰყოლია, მოუცილებიათ და უკან გაბრუნებულან.

— ვინ იყვნენ ნეტავ?

— ერთი ამირბარი ყოფილა, მეორე ამირბარის ცოლისძმა. როგორც ამბობენ, ტაძრის მომხატავი უნდა ჩამოუყვანონ საქართველოდან.

— ძალიან იჩქარის რუსთაველი. ეტყობა, მოახლოებულნი განგების ეშინია.

— ამბობენ, შიში არ იცისო. სინამდვილეს ეკრძაღვის, ალბათ.

ამ საუბარში იყვნენ ჯერის მონასტრის ბერები, როცა შოთა, თავის სენაკში ხის ტახტზე წამოწოლილი, ფიქრს მისცემოდა. მხოლოდ ჰილობი ეფინა ნაჯახით ბლაგვად ნათალ თხმელის ფიცარს. რა არ იჭილა თავისი ცხოვრების მანძილზე, სად არ იარა?! ბოლოს მაინც ბერობის გზას მიენდო ამ ქვეყნიდან უშფოთველად გასაშორებლად! განა არ ერჩია ვარძიის ქვაბებში დაყუდებულყო — მამა-პაპის საფლავთა ახლოს?! არა, არ ჯობდა. იქ ისევ აუშფოთებდა სულს მამულის ბედი. ახლა ხომ აღარ იყო თამარი?! ქართლის ხმალი მოიღალა, პატრონი დაუსუსტდა, ისე ვეღარ ელავს და ჰკრის. ქვეყანას კი მხოლოდ და მხოლოდ პატრონი აღამაღლებს და განამდიდრებს. სუსტი და ცუდი წინამძღოლი ერის დოვლათს დასცემს, დააქნინებს, ძალღონეს წაართმევს, დააჩაჩანაკებს. ასე ყოფილა და ასე იქნება. მე უბედურს რა შემეძლო, მარტო გონიერებას რა შეუძლია ამქვეყნად?! არაფერი! მონა ვიყავ და მონადვე მივდივარ! ამა ქვეყნიდან. მწამდა თამარი, მისი სიტურფე და მისი მაღალი გონიერება. ის წავიდა სურვილდაუწყურებელი. ბევრი რამ შეძლო და მაინც გულნაკლული განშორდა თავის ქვეყანას. წავიდა

სულნათელი და ჩვენც დაეძაბუნდით, სხვა ჰაერმა დაბერა, ცხოვრების სხვა ტალღები შემოახეთქა ჩვენს ხომალდს. დიდ დავითთან ერთად თამარი უდარებელი პატრონი ჰყავდა საქართველოს. ისეთები ასში ერთი თუ გამოერევა ქვეყნის მმართველთა შორის. მან ჩაუდგა უძლეველობის ღონე ჩემს მამულს, მან გასტყორცნა მისი სახელი და დიდება ამ მიწის კიდით-კიდემდე. მისი სახელი შიშის ზარს სცემდა სამშობლოს მტრებს, იმედს აძლევდა მეგობარსა და მოყვარეს. ახლა აღზევებული აღმოსავლეთი წალექვას უქადის მიწის პირს. ვინ შეძლებს მის მოთრგუნვას? ძეხორციელი ვერ შეაეავებს მათ გრიგალისებურ ლტოლვას. ბნელეთი უახლოვდება ჩემს მიწა-წყალს. ახლა უნდა ძლიერი ხელმწიფე ჩემს ხალხს; გონიერი, შორსგამჭკრეტი და სამხედრო საქმეში დიდად გაწვრთნილი.

ამ ფიქრში იყო შოთა, როცა სენაკის კარი მოკრძალებით შეაღო ჰაბუკმა მსახურმა.

— წინამძღვარმა შემოგიტვალათ, მალე გეახლებითო.

— კრძალვით დაველოდები მის მობრძანებას. შენ ვინა ხარ, შვილო ჩემო, საიდან ხარ?

— მე, დიდო ბრძენო, გონიოდან ვარ, ათაბაგის ყმა გახლავართ. წიგნებს ვწერ.

— განგება შეგეწიოს, დიდი საქმისთვის მოგიკიდნია ხელი. ჯერ თუ რამე გიწერია ყრმაყაცს?!

— სახარებანი დამიწერია წინამძღვრის ბრძანებით, თქვენი თხზულებაც მინდოდა, მაგრამ... — ენა დაება ჰაბუკს. გაჩერდა, ფერიც დაეკარგა.

— შეგეშინდა თუ ნება არ მოგცეს? — თითქოს გაელიმა შოთას, თვალეში კი უნებლიე წყენა ჩაუდგა.

— არ შემშინებია, მაგრამ ტყავი არ მეყო. წინამძღვარს კი ვერ გავუბედე.

— შენ თუ წაგიკითხავს?

— ზეპირად ვიცი. გონიოში ყველამ ისწავლა, თუმცა წერათხზვა ბევრმა როდი იცოდა?!

— ჩემი მოსვლის უამს თქვენ აქ იყავით?

— აქ ვიყავი. ორი მხლებელი მოგყვავათ.

— ისინი გამოჩენილი ადამიანები არიან. ერთი ამირბარია,

მეორე უბადლო მეომარი. ამირბარი გონიოდანაა, თქვენებურია.

— ჩემებურია? ნუთუ ვაშლია გოდუაძე გახლდათ, შოთაე ბატონო?!

— სწორედ ის იყო, შვილო. დღედღეზე ისევ ველი. ტაძრის მომხატავი უნდა მომიყვანონ. ჯვარი შელანძღულა, ხელახლა უნდა გავამშვენიეროთ.

— თამარის შემდეგ ხარჯი არ მოგვევლია საქართველოდან, აბა, თვითონ რა უნდა იღონოს წინამძღვარმა?

— თუ არ დაიგვიანეს, სხვაც ბევრი რამ უნდა ჩამოიტანონ.

— რახან შეგპირდნენ, სიტყვას არ გატეხენ. ვაშლიას ძეუღლეს უქებენ — ბრძენი და ლამაზი ქალიაო.

— ახლა ისიც ხანში შევიდა. თოთხმეტი შვილის დედაა, ძალზე ლამაზი კი იყო. თამარსაც მოსწონდა.

— მამაჩემისაგან გამიგონია, თვითონაც მართავდა თურმე ხომალდს.

— კი, ნამდვილად მართავდა. ფიცხელ ომებშიაც ყოფილა. ვაჟკაცებზე ნაკლებ არ უბრძოლია. ვაშლიას რომ თან მოჰყვება, ისიც გონიოდანაა.

— მომხატველია?

— დიდი მხატვარია. თამარს უყვარდა მისი ნიჭიერებით.

— აბა, თქვენს სურათს დახატავს. „ვეფხისტყაოსანს“ მე გადავწერ, მან თქვენი სახე დახატოს.

— წიგნი თან არა მაქვს, ისე ძნელია.

— სულ ზეპირად ვიცი. თუ შემეშალა, გამისწორე, შოთა ბატონო.

— გაიხედე, ვილაც მოდის, შვილო.

— წინამძღვარია, თქვენთან მობრძანდება.

• • •

— მე მხოლოდ ასოებს ვხატავ, შენ კი — ღამიანის სახეებს.

— მეტად ზუსტია შენი ხაზი, დიდი ნიჭი გაქვს.

— საღებავის კი არაფერი ვიცი. მხოლოდ ოთხ ფერს ვარჩევ: შავს, თეთრს, წითელს და ლურჯს. მწვანე რომ მწვანეა, ისიც შერევა ლურჯ ფერში.

— მე ფერები მიყვარს. უიმათოდ ცსოვრება არ შემეძლია. გახსოვს, გონიო, ზღვის პირი?! დილით თუ დაღამების ეამს რამდენი ფერი ღვივის იმ დალოცვილში. სიმღერა მოგინდება, გალობა მოგეწყურვილება.

— ნუ გამახსენებ, თუ ძმა ხარ. რამდენი ხანია მენატრება მის ველ-მინდორი, მისი ციხის გოდოლებზე პოტინი.

— არა, ჯერ ვერ წავალთ. ხატების წერას რომ მოვათავებ, წინამძღვარს ეთხოვოთ, დროებით გამოგიშვებს.

— ვაშლია არ ჩამოვა აწი?!

— ვინ იცის, რა ამბავია საქართველოში. ახლა შოთაც ძალზე მოტყდა, გუშინ სენაკიდან გარეთ ვერ გამოვიდა. უცებ მოითენთა, ეტყობა, ამ წელს ვერ გადაიტანს.

— ქართლში წასვლა არ სურს. ვარდიფინაც გაიხსენა. მოიგონა, „ვეფხისტყაოსანი“ შორეული ზღვაოსნობის ეამს თავისი, ხელით რომ გადაწერა. თამარს უყვარდა თურმე ძალიან.

— ვარდიფინა სხვა ქალი ყოფილა. თამარის აღზრდილი სხვანაირი არც შეიძლება ყოფილიყო.

— განა რუსუდან დედოფალი თამარის აღზრდილი არ არის?.

— ვარდიფინა წმინდანია. ცხრა ვაჟი და ხუთი ქალი გაუზრდია. კარგი საქმეა. ისეთი ქალ-ვაჟები მტერსაც შეენატრება. ამბობენ, დედის ხატობაც დიდი აქვთო.

— ალბათ, ამიტომ უყვარს შოთას. ვის არ ეყვარება ასეთი ქართველი ქალი.

— ყველაზე მეტად ის უხარია ვარდიფინას, შოთამ რომ თქვა ლევკი ლომისა სწორია, ძუ იყოს თუნდა ზვადიანო. მეც ვაჟკაცების სწორი ვარ, ასეთი რამ სხვას ჯერ არავის უთქვამს მიწის პირზეო.

— ქმარი ძლიერ ყვარებია.

— ბევრჯერ თავი გაუწირავს მისთვის. ერთხელ, ფიცხელ ომში მძიმედ დაჭრეს ვაშლია. თერთმეტი ისარი გაუყარეს გულმკერდში. უთვალავ დაჭრილთა და მოკლულთა შორის თვალმოუხუჭავად ეძია სამი დღე-ღამე. იპოვა, უმკურნალა და ფეხზე დააყენა. როცა ჰკითხეს, რომ მომკვდარიყო რას იზამდიო, უპასუხა: არაფერს არ ვიზამდი, გვერდით მივეწვეობოდი, მასთან ერთად დავიმარხებოდიო!

— ვაშლისაც ძალზე უყვარს თურმე.

— რა დღესაც მას ვერ ნახავს, იმ დღეს მზე მისთვის აღარ ანათებს.

— აი, ბედნიერები ისინი ყოფილან.

— კი, ბედნიერები არიან. ვაშლია, ალბათ, მალე ჩამოვა, შოთას ასე მარტო არ მიატოვებს; ახლა ბოდოკიები?!

— ესენი ვინ არიან?

— ვარდიფინას ძმები, გლეხკაცები, ოდესლაც გეგუთში დაასახლეს თამარის ბრძანებით. ყოველი მათგანი თითო ლომია. მუქს რომ გაშლიან, მათ ხელის გულზე ლელობურთს ითამაშებს ერთი სოფელი. მიწა უყვართ, შრომის ხალხია. შოთაზე მზე ამოსდით.

— ალბათ, უზომოდ უყვართ ერთადერთი და.

— ერთი ჰყოლიათ და ისიც ერთი ქვეყნის ფასია. ეყვარებათ, აბა, რა იქნება.

— ხედავ, შოთას სენაკის კარი გაიღო, ერთი წავიდეთ, ვნახოთ მეფეთა სწორი.

— წავიდეთ, მგონი სტუმრები მოსულან კიდევ.

— აქედან არავინ ჩანს.

— ნაბადია კართან მიყუდებული. ეტყობა, ჩვენებურია.

ორივენი ზემო სენაკებისაკენ გაემართნენ. მზე ჩადიოდა. მისი სხივები მონასტერს ისე შემოხვეოდა, თითქოს ქვეყნის დატოვება ენანებო. აქედან კარგად მოჩანდა გეთსიმანიის ბაღი. ზეთისხილის რტოები მზეზე ისე ირხეოდნენ, გეგონებოდათ სხივებს იხვევენ ტანზეო.

სენაკის წინ, მართლაც, ნაბადი იყო მიყუდებული. კარის ზღურბლს მათი ლანდი დაეცა.

— ვინა ხართ, მოგვეშველეთ! — მოესმათ შიგნიდან უცნობის ხმა. სენაკში შეცვივდნენ და უცებ მეხდაკრულივით გაშეშდნენ. შოთა სკამლოგინზე იწვა, თვალები დაეხუჭა. მიცვალებულს ჰგავდა. თავით არქიმანდრიტი უჯდა, იქვე უცნობი ვაჟკაცი იდგა.

— ნუთუ ავად არის! — წამოცდა ერთს.

არქიმანდრიტმა თვალით ანიშნა, გაჩუმდითო.

შოთამ ამ ხმაზე თვალები გაახილა. ორივეს შეხედა და გაიღიმა.



— აქი ვაშლია მოდისო?! — ჰკითხა ვილაყას მოხუცის მიმკრალი ხმით.

— სულ მალე აქ გაჩნდებიან, მე წინ გამომიშვეს, — უქასუხა უცნობმა ჰაბუკმა.

— ვითომ მომისწრებენ?

— საცაა მოატანენ, — მტკიცედ თქვა უცნობმა და მონასტრის მძიმე ხის კარს გახედა. მართლაც, ვილაყამ ჰიშკრის ზარს ჩამოჰკრა. წყნარად აღულუნდა პატარა ზარი. მერე კარის კრიალს ცხენების თქარათქური მოჰყვა.

— ნუთუ მოვიდნენ? — ისევ წყნარად იკითხა შოთამ.

— უთუოდ ისინი არიან.

მონასტრის დიდი ეკლესიის წინ სამი ცხენოსანი გამოჩნდა. ძალზე დაღლილები ჩანდნენ. ტანსაცმელი სულ დამტვერილი ჰქონდათ. მოაღწიეს თუ არა კარიბჭეს, ჩამოქვეითდნენ და ფეხით წამოვიდნენ. ჰაბუკი წინ შეეგება.

— დაიგვიანეთ, — უჩურჩულა მოსულებს.

სამივეს მუხლი მოეკვეთა, ერთ ადგილას გაიყინენ.

— კიდევ კარგი, ცოცხალს რომ მოუხსწარიტ, საღამომდე შეიძლება ვერც კი მიაწიოს. სულ თქვენ სახელს ახსენებდა, ამირზარო, წუხს — ეტყობა, გრძნობს სიკვდილის სიახლოვეს და შენს მოსვლას ელოდება.

ვაშლიას ხმა არ ამოუღია, სენაკისაკენ წავიდნენ.

ფეხის ხმა გაიგონა თუ არა, შოთა ისევ გამოფხიზლდა, შემოსულებს მიაჩერდა და გაიღიმა. საამო იყო მისი ღიმილი, ნათელი და ბედნიერი.

— ვარდიფინა ხომ კარგადაა, ჩემი ნათლულები როგორ არიან?

მოსულთაგან ყველაზე ახალგაზრდა შოთას ფეხებთან ჩაემხო.

— აქა ვარ, ნათლია ბატონო, შენთან. დედამ კოცნით მოგიკითხა, — ჩაიღულღულა ცრემლმორეულმა.

შოთა შეკრთა. ოდნავ წამოიწია. დააჩერდა და იცნო.

— ამ სიშორეს არც უნდა წამოსულიყავი, შვილო. თუმცა... თუმცა მე მეტად მასიამოვნე. ბედნიერი იყავ შენ ხალხთან ერთად! — ისევ მიღულა თვალები. ეტყობა, დაიღალა, მოითენ-

თა. სუნთქვას მოუხშირა. მერე ანაზღად ღონე მოიკრიბა, წა-  
მოიწია.

— არ დამიმალოთ, რას იქს მამული ჩვენი. ვაითუ მტერთა  
სანაწარდოდ იქცა ქართლის მიწა-წყალი?!

ამირბარს და მის მზღებლებს თვალეზი აუგვიზგიზდათ.

— მამულს რა უჭირს. ვაი, რომ თქვენ ბრძანდებით სუსტად.  
წაყვანა გვინდოდა თქვენი, ვარდიფინამ გვიბრძანა — ვარძია.  
ელის თავის შვილსა და მამასო, — მოკრძალებით უპასუხა  
ვაშლიამ.

— გვიანდაა. მე თვითონ განვაგე ბედი ჩემი ასეთი ბოლო  
წუთისათვის. ამ ტაძარში ქართული სურნელოვანი ზედაზე და  
შირონი იშოვნება.

ვარდიფინას ვაჟი, შოთას ნათლული დემნა-ჭაბუკი წინ წა-  
მოდგა.

— ჩვენო ნათლია, დედამ ეს ყუთი მოგართვათ! — მოხუცო  
წელში გაიმართა, ყუთს ხელის კანკალით ახადა თავი. შიგ წიგ-  
ნად შეკრული „ვეფხისტყაოსანი“ იდო.

— თამარისეული ჩემი წიგნი!.. — ჩაიჩურჩულა, გადახსნა და  
ალმური მოედო, თამარის ხელწერა იცნო. ამ წიგნს ვარდიფინას  
შტოვებდა, როგორც უძვირფასეს განძს ძვირფასთა შორის.

მიიხედ-მოიხედა, თითქოს შველას სთხოვდა ყველას. მერე  
ისევ მიეყრდნო სასთუმალს. ღონე გამოელია. თვალი არ გა-  
უხელია, ისე ჩაილაპარაკა:

— როცა წმიდა მამებნის სახეებს დაასრულებ, მე, მონა-  
მოწაფე, მუხლმოდრეკით მიმახატე მათ ფერხით. თვალეზი  
თქვენ დამიხუჭეთ, გონიოდან ხართ. ბედნიერ კაცს ყოველთვის  
ახლობელი დაუხუჭავს თვალეზს. თქვენზე ახლობელი ვინ  
მყავს ახლა მე? იბედნიერეთ!.. როცა იქ ჩახვალთ, ჩემს მიწას  
ემთხვიეთ. დამილოცნია მართალი გულით მისი ველ-მინდორი,  
მისი ბალ-ვენახი, მისი მიწა-წყალი!

ყველამ დაინახა, როგორ გადმოუვარდა დიდ მოხუცს ორი  
კურცხალი და სასთუმალს დაეცა.

## არწივები ცაში აზრენილი კვდებინან

ლეგენდა რინოზი

ქართული ლექსის განუმეორებელ  
დიდოსტატსა და ლომკაცს  
გ ი ო რ გ ი ლ ე ო ნ ი ძ ე ს

ყველა ქვეყანას თავისი გული აქვსო ამბობს ეს თქმულემა. სწორედ ამ გულით გრძნობს ქვეყანა თურმე მამულის ტკივილსა და სიხარულს, თავისი ხალხის ბედნიერებას და უბედობას.

ეს გული არავის არ ენახვება, არავის არ ეჩვენება, არავის დაელანდება. იგი ქვეყნის ისეთ ადგილას დევს, სადაც ერის სასიცოცხლო ფესვები ჩაკირულა, მისი სუნთქვის პირველი ნატამალი დაბუდებულია. დევს იქ, ქვეყნის შუაგულში, ცის ლაყვარდოვან გუმბათსა და ქვესკნელთა შორის, ადამიანებისაგან თვალმიუკვლევად ადგილას და ფეთქავს. ფეთქავს ზომიერად, ძალუმად, შეუჩერებლივ. მისი ფეთქვის ჯანზეა დამყარებული ერის სიკეთე და ფათერაკი, ხალხის ღონე და კარგადყოფნა, ამ ქვეყნის სიკეთე და ბედნიერება.

კავკასიონის მაღალმწვერვალების ქვეშ, ფასის მთის კალთების ქვესკნელში, კლდის უტეხ ქანების კვართიან ძარღვებშუა, ლაყვარდისფერი ტბა ყოფილა.

ამ ტბაში ნაკვერჩხალდაყრილი კალმახები დანავარდობენ, მაღალყელიანი გედები დასცურავენ, ნისლშებურცილი, მარგალიტით სავსე ნიჟარები სახლობენ.

მის ნაპირზე საკვირველი ფერის ვარდები ყვავილობენ, უცნაური ხეები ხარობენ. მათ ტოტებზე უთვალავი იადონი თუ ბუღბუღი გალობს.

ტბის ფსკერი აღმასის კენჭებითაა მოფენილი. მისი კიდე-  
ნაპირი მთვარის ოქროს სხივებით მოვარაყებულა.

თქმულება ამასაც ამბობს: ამ ტბის კრიალა ტალღებში მხო-  
ლოდ ღმერთები ბანაობენო.

გათენების უამს, სწორედ მაშინ, როცა დღისა და ღამის გა-  
თიშვის წამი შეგუბთება, როცა, როგორც იტყვიან — მდინარე-  
ები და ზღვები ერთი წუთით მიიძინებენ და გაინაბებიან, მაშინ  
ცის კარი ნელა იხსნება, მისი გუმბათიდან ტბის ზედაპირამდე  
ლაქვარდის კიბე ჩამოცურდება და ღმერთებიც დიდებით, ამაყი  
სიღარბაისლით ჩამოეშვებიან ძირს. ჰო, როგორ ლივლივებს  
იმ დროს უხილავი ტბის ზედაპირი?! გარემოს ია-იის ფურც-  
ლის სურნელება მოედება, ტბის ფრინველები და თევზები გა-  
ილურსებიან, ხეები ტოტების რხევას შეაჩერებენ. წყნარად ბა-  
ნაობენ ისინი და თან ტბის ქვესკნელში აღმასის ხუფს ახდიან  
და უხილავ მოალმასებულსავე ორმოში ჩაყურსულ ქვეყნის  
გულს ჩააკვირდებიან. აღმასთა ელვარებას გასინჯავენ, თუ რამე  
ლექი შენიშნეს ახლომანლო, წამსვე გადაწმენდენ და მის ფეთ-  
ქვას ყურს დაუგდებენ. იგრძნობენ რა მის ზომიერ და ჭანით  
სავსე მოძრაობას, ერთხელ კიდევ ტალღებში გაეხვევიან, გა-  
ნინბანებიან და იმავე ლაქვარდის კიბით ზეცაში ამაღლდებიან.

ხალხს არც ის დავიწყებია ეთქვა: ქვეყნის გულს თავისი სა-  
ყონი ძარღვები სჭირდება, თავისი სისხლსადენი მილები აქვსო.  
რიონის პირველი წყაროც სწორედ იმ ადგილიდან გამოდის, სა-  
დაც ქვეყნის გული დევს. მაშასადამე, მისი საყონი ძარღვიც  
ის არის, მისი ლექის გამტანიც რიონის ტალღებია, მისი წუხი-  
ლის შემწელებელიც უთუოდ იგი იქნება. ამიტომ არის რიონი  
თითქმის მუდამ მღვრიე თუ ღრუბლოვანი, დარდდაკრული და  
ტალღამშფოთავი. მას დამდორებულს ვერასდროს ვერ ნახავთ,  
მის შხეფსა და წვეთს სუფთას ვერ მოიგულებთ. აბა, ქვეყნის  
გულის გამრეცხს რა შეაჩერებს, ან სუფთას და უტალახოს ვინ  
გახდის?! მისი შხეფი ხომ ყოველი ქართველი კაცის გულის ნა-  
ბანია, მისი დარდის შემწელებელია, მისი შფოთიანი ნაფიქრა-  
ლით არის შეფერილი, მისი აზრის ავ-კარგით არის შემღვრე-  
ული.

ჰოდა, გაუტეხელი კაცი ყოფილა ვამებ გულბანი. მისი სა-  
ხელი დასალიერადან დასალიერამდე ყოველმა მოსახლემ იცო-

და. თვალი სინათლესავით გამჟვალავი და გამჟვრიახი ჰქონია ეამეხს. მისი ნასროლი ისარი დღე-ღამის სავალ მანძილზე ხარიემს წააქცევდა. ჩრდილში თვალითუმჩნევ მზის სხივის ბეწვს გამოითვლიდა და აგიზგიზებულ ცეცხლში ნამის ნატამალს შეამჩნევდა. მკლავიც მაგარი ჰქონია გულბანს. მისი დაკრული ხმალი შეტოტებულ ვეფხვს სულის მოთქმამდე შუაზე გაჰკვეთდა. ძარღვი რა არის, ერთ ძარღვსაც არ დაუტოვებდა ჩაუსხეპელს, ისე სუფთად გაუვლიდა ხმალი ნადირის მთელ სხეულს. ნათელფენილ ქვეყანასაც იცნობდა და იღუმალებით საესე სამყაროს ნისლშებურვილ მოვლენებს გონებით წვდებოდა, სხვისთვის მიუწვდომელს მიწვდებოდა, გამოუცნობს შეიცნობდა.

ასეთ ძლიერ ვაჟკაცს ერთი რამ აწუხებდა, ჯერ კიდევ თავისი გულისტოლი ვერ მოენახა. თავისი ცხოვრების მეუღლისთვის ვერ მიეკვლია.

იგი ყველა ჩვენგანივით ადამიანი იყო და, აბა, უიმისობა ხომ ცხოვრებას ანახევრებს, აძაბუნებს, უხალისოს ხდის და შთამომავლობას ხეაღინდელ დღეს უკვეთავს.

უფრო დიდი დარდიც ჰქონია ეამეხს. თავისი მიწა-წყალი, თავისი მამული უზომოდ ყვარებია.

დილიდან დაღამებამდე მის ალერსში იყო, მის მთა-ველს ეფერებოდა, მის ტყესა და წყალს ელოლიაევებოდა.

მამულის ცვარ-ნამი გულზე ეკურებოდა, მისი მზის სხივი ბეჭებზე ეფინა. მისი სუნთქვით სუნთქავდა, მისი თვალის სინათლით იხედებოდა. აყვებოდა თურმე ფასის მთის ფესვკალთამდე მიუვალ ბილიკებს, გორაკებს გადავიდოდა, წყაროებს შესვამდა, ჯიხვს მოინადირებდა და მერმე ისევ თავდაღმა დაეშვებოდა.

ერთ საღამოს კლდის თავზე, ყველაზე ცივ წყაროსთან, სწორედ იმ აშხეფებულ წყაროსთან, მარგალიტივით რომ ცვივა, ეამეხმა უცხო ქალწული შენიშნა.

ქალს პირი დაებანა და თმებს ივარცხნიდა. უცხოდ ნაქსოვი სამოსი ეფინა ტანზე, ფეხზე ძელქვისაგან ტურფად ნათალი ქოშები ეცვა, თავზე მინდვრის ყვავილებისაგან დაწნული ცისარტყელა ეხურა.

ღამეს თავისი ძაღლონე დაემკვიდრებინა გარშემო და ირგ-

ვლივ ბნელოდა. მხოლოდ უცხო ქალწულის ახლოს საოცარი სინათლე მოქშუოდა.

ვამეხმა მისკენ გაიხედა, თვალს ძალა დაატანა და გაოცდა. ქალწულს ხელში ცოცხალი თევზი ეჭირა. ცივი მდინარის ბინადარს ნაკვერცხალდაყრილ ფარფლებიდან ქრუანტელმომგვრელი ნაზი სინათლე მოქშუოდა.

— კალმახი ჰყოლია პირფარეშად, — გაიფიქრა ვამეხმა და ახლო მიიწია.

ქალმა იგრძნო თუ არა უცხო ადამიანის სიახლოვე, თევზი წყაროს თვალში ჩაუშვა და უცებ თითქოს სანთელი ჩაეწოთ მდინარეში, ყველაფერი სიბნელემ მოიცვა. ამავე დროს გორაკ-გადაღმიდან მოისმა ყმაწვილის ჭირვეული ხმა:

— ღუნიადარ, ღუნიადარ, ველარაფერს ვხედავ, სანთელი მომინათე, საყვარელო, სანთელი!

— უიმე, სულ დამავიწყდა, — მოესმა ქალის შიშნარევი ჩურჩული ვამეხს. — ამ წუთში შენკენ მოვრბივარ, ძამიკო გულბააზ, — გასძახა ახლა ხმამაღლა ქალწულმა.

„ქალს ღუნიადარი რქმევია, ვაჟს კი გულბააზი“, — გაიფიქრა ვამეხმა.

მოისმა ფეხის ხმა და ვამეხმა სულ ახლოს იგრძნო ქალის ტანის სითბო და სურნელება. ჰაერის გარხევაც არ გამოეპარა ვაჟს. ცოტა ხნის შემდეგ ყველაფერი მიჩუმდა, მხოლოდ გაღმიდან მოისმა ჩურჩული.

— იქ ვილაც უცხო კაცია, ბიჭო!

— უცხოს აქ რა უნდა?! — გაიკვირვა ყმაწვილმა.

— ჩემი თვალით დავინახე, — ისევ წყნარად თქვა ქალწულმა.

— აქ ვერავენ ამოვიდოდა, ვამეხის გარდა.

— სწორედ ის უნდა იყოს!

— მართლა?! — გაუკვირდა და გაეხარდა ყმაწვილს: — ღუნიადარ, შენი ჭირიმე, ვნახოთ და გავეცნოთ!

— სსს, — გააჩუმდა ქალმა, — არ გაიმეორო, იქნებ ესმის კიდევ!

— შენი ჭირიმე, გავეცნოთ, ჰო, როგორ მინდა ვამეხის გაცნობა?! ხომ გახსოვს რა სთქვეს, მისი გაკეთებული ისარი იალბუზს მოსტეხს წვერსო.

ვამეხს გაელიმა.

— მე წავალ, შენ დარჩი, — გაჯიუტდა ქალი.

— რას ამბობ, აქ მიმატოვებ?!

— აბა, წავიღეთ!

მოისმა მათი ფეხის ხმა და ვამეხი მიხვდა, რომ ისინი ფერ-  
დობებს აყენენ ზემოთ.

„მართლაც წავიდნენ, — გაიფიქრა მან, — უნდა დავეწიო, გავიგო მათი ბინა და ვინაობა“.

იგი სწრაფად გაიქრა მათკენ.

მაგარი მუხლი და სწრაფი ნაბიჯი ჰქონია ვამეხს, არც ისინი აღმოჩნდნენ ბეჩავნი. იქ, სადაც მაღალი მწვერვალები მუდამ თოვლით არიან დაფიფქულნი და გაყინულნი, მხოლოდ იქ წამოეწია ვამეხი ღუნიადარს და გულბააზს.

თოვლის ელვარებისაგან გარშემო თეთრი სინათლე იდგა.

— ვაიმე!.. — წამოიძახა ღუნიადარმა, ვამეხის შავი და გონი-  
ერი, ირმისხელა თვალები რომ დაინახა. იგი ყმაწვილს გადა-  
ეჭვარა.

— რა დამიშავებია, ასე რომ გარბიხარ, ღუნიადარ?! ან ყმაწვილს რას ვერჩი, რომ გადაეფოფრე! — ბიჭი მკლავებში გამოუძვრა დას და ვამეხს წინ გადაუდგა.

— ვამეხი ხარ, ხომ? — შეაგება სიტყვა ყმაწვილმა, — ჰოი, როგორ ვნატრობდი შენთან შეხვედრას!

— ღუნიადარს რა დაეუშავე, ასე რომ გამირბის?

— მამაკაცის გეშინოდესო, — უთხრა პაპამ.

— შენი პაპა ვინ არის?

— ჩემს პაპას მამამზე ჰქვია, გივარგიანთა გვარისა ვარ.

— ჰოო, მამამზე ნახევრად ღმერთკაცია. ხალხის საყვარელი მოხუცია.

— ჰოდა, ღუნიადარიც და მეც მისი შვილიშვილები ვართ. მამა არა გეყავს, ღიღმა ზეავმა ჩაიტანა.

— ვიცი, გამიგონია. გონებას და მკლავს უჭებდნენ. მისმა ქალიშვილმა მე რისთვის უნდა ამარიდოს პირი?!

— უპასუხე, ღუნიადარ, უპასუხე. მე კი მშვილდისარს ხომ გამიკეთებ? — შეეკითხა ახლა ყმაწვილი ვამეხს.

— გაგიკეთებ, — დარწმუნებით უთხრა გულბააზს ვამეხ-  
მა, — უსათუოდ გაგიკეთებ. ჯიხვის ძარღვისგან ლარს დაგიგ-

რებს, ძელქვის ტოტს თაფლში მოგიხარშავ და შვილდს გაგიკოპიტებ, ისრის წვერს ალმასით მოგიკალავ.

— ოლოლი მე, — ტაში შემოჰკრა ბიჭმა, — იმით შავ ურჩხულს გულს გაუჰობ.

— დუნიადარ, ხმა გამეც, უბრად ნუ გამიშვებ!

— ჩემი სიტყვა თუ რამეთ მოგეხმარება?

— მომეხმარება კი არა, თვალში სინათლეს მომმატებს, ტანში ცხრა ვეფხის ძალას ჩამიდგამს. დუნიადარ, შენი ხმა ამიერიდან ჩემი სიცოცხლის ხმაა, ჩემი მზის ამოსვლის ეყენებია. უიშისოდ დღე არ მინდა გამითენდეს!

ქალიშვილს სახეზე ფერმა გადაჰკრა, ტანი შეუტოკდა.

— მეჩქარება, პაპა დაგვიანებისთვის გაგვიწყრება.

— შინ რათ არ მეპატიეები, დუნიადარ?! განა ჩემი სტუმრობა გერცხვინება?

— როგორ გეკადრებათ, მობრძანდით, პაპას გაეხარდება.

— იცოდე ქიშკართან დაგხვდები, — ატიკტიკდა ისევ გულბააზი, — როდის მოხვალთ, დამითქვით!

— მთვარე რომ დაილევა, სწორედ მაშინ მელოდეთ. მანამდე ზღვისპირეთი უნდა მოვიარო, ჩემი თვალთა იქ საჭირო.



ბაბუა მამამზეს ცხრაფად დაეკვართა შუბლზე ძარღვები, როცა გულბააზმა ვამეხთან შეხვედრა არ დაუშალა. ეტყობა, არ მოეწონა მოხუცს შვილიშვილებთან ვამეხის შეჩეხება და საუბარი.

— კეთილი ვაჟაკი უცხო ქალწულს ასე არ შეესიტყვებოდაო — იწყინა კიდეც.

ვამეხს სტუმრობაზე მინც უარი არ უთხრა.

კიბის თავზე შემოეგება უცხო ჰაბუცს.

— ჩემი შვილიშვილის მთხოვნელი პირობით უნდა შემეკრას, ისე ჩემი სახლიდან ქალწული ფეხს ვერ გადაადგამსო, — განაცხადა მამამზემ.

ვამეხი ჩაფიქრდა. რა უნდა ყოფილიყო ისეთი, ჰაბუცს უარი ეთქვა მის შესრულებაზე? დუნიადარ ხომ მისი სიცოცხლე იყო?



— ნუთუ ასე სუსტ კაცად მიგაჩნევარ, თქვენი სიტყვის გარდაუვალი ვქნაო? — გაოცდა ქაბუკი.

— ეგ არ მიკადრებია, შვილო! — გაეხსნა შუბლი მოხუცს. ეტყობა, თანდათან მოეწონა სასიძო. — მხოლოდ გეტყვი, ჯერ კიდევ ჩემი მამა-პაპანი არიან ღმერთებთან შეფიცულნი, ქვეყნის გული უნდა მონახონ, მიაკვლიონ, დაეპატრონონ და ჩვენს მიწაწყალზე შესაფერი ადგილი მოუნახონ.

ვამეხს ტანში გაცრა. ჯერ კიდევ პატარაობის ყამს მისი პაპაც უბარებდა შთამომავალს, სანამ ქვეყნის გულს ჩვენს მამულში არ მოვიგულებთ, ჩვენს მიწაწყალს მყარი ბალავარი არ ექნება და ცის თავანიც ყოველთვის ღრუბლიანი გვეხურებაო.

— ნუთუ ყველა პაპა-კაცი ამას უბარებს თავის მომავალსო! — გაიფიქრა ვამეხ გულბანმა.

— თქვენი სიტყვა ქვეყნის ხმაა, მამამზე ბატონო, მეცა და ჩემი შთამომავალიც მის აღსრულებას გადავეგებით. ჩვენთვის ჩვენი სამშობლოს ავ-კარგი ჩვენივე სიკვდილ-სიცოცხლე არ არის განა?!

— მაშინ ჩემსკენ მოიწი, მოგეხვევი, შვილო ჩემო, შენს ბექებს მოვუალერსებ და დავლოცავ. მალე გულბააზიც დაწვიფდება, დავაჟკაცდება, ისიც წამოგვეწევა!

ვამეხმა ორივე მუხლით ჩაიჩოქა მამამზის წინ.

— უიმე! — მოისმა გაოცებულნი და შეშინებული ღუნიადარის ხმა ყვავილნარიდან.

ვამეხს და ბაზუა მამამზეს ორივეს ღიმილი მოუვიდათ სახეზე, ორივე მიხვდნენ, როგორ გასთქვა თავისმა შიშმა ღუნიადარი. ქალწული, მართლაც, შეაშინა ვამეხის დაჩოქებამ. ღუნიადარს ეგონა, პაპამ უარი უთხრა ვამეხს და მანაც სახვეწწელად ჩაიჩოქა.

ვამეხმა თავი დახარა და ისე შეეკითხა მამამზეს:

— გამიგონია, ქვეყნის გულს ღმერთები დარაჯობენ. ნუთუ ისინი ასე იოლად დაგვანებებენ მისი თავისახლის გადაადგილებას?

მამამზე ჩაფიქრდა.

— დიახ, ძნელაა, შვილო. გაგონილი მაქვს, სამი ვაჟკაცის მამა უნდა გახდეს თავის შვილებთან ერთად ამ ზღაპრული საქმის გამკეთებელი, ისიც უთქვამთ, მოხუცი გაუძღვეს მამასთან ერთად ბიძა-ღისშვილებსო!

— დისშვილებსო?! — გაოცდა ვამეხნი.

— ჰო, შვილო, ალბათ, გულბააზის ბედიც იქვენთან არის.

— კი მაგრამ, მამამზე ბატონო, შვილები ჯერ სადღა არის.

— ღმერთი მოგცემთ, შვილო, ნუ გეშინია, მოესწრებით იეტყობა, ღმერთები მეც თქვენთან სამყოფელ დღეს მიგრძელდებენ.

ვამეხნი გაჩუმდა. თვლებში ღიმილი და ცეცხლის კვესი ერთად ჩაუდგა.

— გახსოვდეს, შვილო, — დაასრულა მამამზემ, — მაღალი შწვერვალეები აქვს კავკასიონს, მასზე დაბალი როდია ის მთები, რომელნიც ჩვენ უნდა გადავკვალეთ და მინიშნებულ ადგილას მივიდეთ. უსათუოდ უნდა მივიდეთ კი. გუმანით ვგრძნობ, ჩემმა შთამომავლობამ უნდა მოიტანოს ჩვენს მხარეში აღმასის ბუდეში ჩაბუდებული საგანძური. მისი ადგილი ჩვენი მაღალი მწვერვალების ფესვებქვეშ უნდა გაშენდეს. იცოდე, მის ბუდეს ღმერთებიც თან წამოყვებიან, განა უკეთეს ადგილსამყოფელს მონახავენ მიწის პირზე? ჰოდა, ასეა. სიტყვა სიტყვაა. ვაქცაცი სიტყვას ვერ გატეხავ. სამი ვაჟი გეყოლება, დამწიფდებიან, დავაქცადებიან. მეგზურად მე გამოგყვები, წინამძღოლი შენ იქნები. გულბააზიც უნდა იახლო, ჩემი სისხლისაა.

• •

დუნიადარი სულ გამოიცვალა. ვერც ბაბუა სცნობდა და ვერც ოჯახის სხვა წევრი.

დილიდან უხედნავ და გაველურებულ კვიციებს ამოარჩევდა ჯოგში, მოიმიზებებდა მე გავხედნიოდ და დილიდან საღამომდე აღარ ჩანდა. გულბააზი ეხვეწებოდა წამიყვანეო, მაგრამ სანამ მას დილის ტკბილი ძილი დაუფლებოდა, დუნიადარი უკვე ცხენზე იჯდა და ცას და მიწას მოედებოდა.

ორხელ მოაკითხა საცოლეს ვამეხმა და გაოცდა, როცა ორივეხელ შინ არ დახვდა.

— კვიციებს ხედნისო, — თავშეკავებით უთხრა საცოლის ძმამ, თუშეცა თითონაც ძალზე გაბრაზებული იყო დის საქციელზე.

ვამეხს უსიამოვნო ექვემა გაჰკრა.

მამამზეს ცხენის ჯოგები ძელქვის ტყისპირის მინდვრებზე  
შყავდა გაშვებული. სწორედ ძელქვების ტყიდან დაუწყო თვალ-  
თვალი ვამეხმა.

დუნიადარმა, მართლაც, მის თვალწინ შეარჩია ჯოგში უხელ-  
ნავი კვიცი. ნიგეზის ზეთში ახლად მოზელებილი და გამოყვანილი  
ხარის ტყავის ლეკვერთხით ქვედა ღრუნჩი ამოუაფშარა და,  
სანამ კვიცი გონს მოვიდოდა, ქალიშვილი ზურგზე მოევლო. ეს  
ისე სწრაფად გააკეთა, ვამეხს შურმაც კი გაჰკრა.

ძელქვებს ამოფარებულმა ვამეხმა კარგად შეხედა, რომ დუ-  
ნიადარმა ჯერ მინდორს შემოუარა, მერმე ჩრდილოეთისკენ  
დაუქავა სადავე გაგიჟებულ კვიცს.

— აქეთ საით მიდის, მთებში ჩაიჩეხება! — გაიფიქრა ვა-  
მეხმა და თავისი ცხენიც იქით გააფრინა, საითკენაც დუნიადა-  
რი მიაგელვებდა თავის მერანს.

თვალის მანძილზე მიყვება საქმრო საცოლეს. თითონ ხე-  
დავს და დუნიადარი კი აინუნშიაც არ არის, თუ ვამეხი მის-  
მდევარია დღეს. ქალწულის ხელში მორჩილი გახდა კვიცი.  
იგი თანდათან ნაგზურ ცხენივით დაემონა დუნიადარის ხელს.

ცივი მწვერვალების ძირამდე იფრინა ქალიშვილმა. ტყეები  
კარგა ხანია აღარ მოჩანდნენ, ბალახების შრიალიც უკან მო-  
იტოვა: თეთრი ყინულის მწვერვალების საბრძანებელში მიჰქ-  
როდა ახლა დუნიადარის კვიცი.

მხოლოდ აქა-იქ ენგისფრად მოჩანდნენ ცისკენ ატოტებუ-  
ლი მწვერვალები, ვეება კლდის ჩამოჩეხილი ფერდები. დანარ-  
ჩენი გარემო კი სულ ყინულებით იყო დაფარული. ერთი  
მწვერვალის ძირში შეაჩერა კვიცი დუნიადარმა. ხელისგული-  
სოდენა მინდორზე შხუილით ამოქშუოდა ყინულა წყლების  
გემრიელი ბოყინა შადრევენები. ერთი მათგანი ყველაზე უფრო  
ზევით ისროდა შხეფებს, მზის სხივთა შულოებად გადმოღვრა-  
ლი ფარდების რხევაში ცაში შეტყორცნილი შხეფები იყინე-  
ბოდნენ და ძირს მარგალიტის მძივებად ეშვებოდნენ. სწორედ  
ამ წყაროს ფესვთან ჩაიმუხლა დუნიადარმა. კლდეს მოფარე-  
ბულმა ვამეხმა კარგად შეამჩნია, თუ როგორ აივსო მარგალი-  
ტის მძივებით დუნიადარმა პეშვი და ბაშლაყის კალთაში ჩააბ-  
ნია.

— სათ უნდა ნეტავ? ეშმაკეულს ხომ არ დადობილებია

ჩემი მეუღლე?! — ახლა სულ სხვა ექვმა გაუცხელა შუბლი ვამეხს.

ვამეხი საფარიდან გამოვიდა. მისმა ფეხის ხმამ დუნიადარს ზრკოლით დაუარა ტანში.

— შენ შემოგველო! — უნებლიეთ წამოცდა ქალს.

ამ სიტყვებზე ვამეხს ტანზე ცეცხლი მოეკიდა. მიხვდა ბრძენი დევემირი, რაოდენ დიდი სიყვარული ჩაფესვოდა ქალწულს გულში.

— აქეთ რა ძალამ ამოგიყვანა, თვალისჩინო! — მოეფერა ვამეხი საცოლეს.

დუნიადარს სახეზე აღმური მოსდებოდა. ეტყობოდა, მისი იღუმლად აქ ამოსვლის გამეღვენება სირცხვილად დასწოლოდა მის ფიქრს.

— არ გამიწყრე, ჩემო მეუფე, — წყნარად თქვა მან, — ძველთაგან ვაეთა დედები სიქალწულეშივე ამოიძევენ აქ აღმასის კენჭებს, რათა მათ შთამომავლობას აღმასივით მჭრელი კბილი და მაგარი მკლავი გამოყვეს.

ვამეხს ღიმილი მოერიდა. ახლა გაახსენდა დედის ნათქვამი: შენი კბილის კენჭებიც აილამას ფესვთან ამონაყარ წყაროს შხეფების ძიძისიშვილებიაო.

დეკაკი ღიმილითვე მოადგა ხელისგულისოდენა მინდორს და დახედა. ამ პატარა ვაკეზე უთვალავი ფესვი გაეხსნა მჩქეფარე წყაროსთვლებს. ისინი ანთებული სანთლებივით შეღალადებდნენ ცას, შხეფებს კვამლივით აბოლებდნენ კრიალა ლურჯ ცის გუმბათს, ყოველ წყაროსთვალს გარშემო ზოგან ჟანგი შემორკალოდა. ზოგან კი აღმასის მთრთოლვარე ღიბრი დაფერილიყო. ვამეხი დაიხარა და პეშეში წვეთები დაიგროვა. თითქოს ჩხრიალი მოესმა დევკაცს. შხეფების სიცივემ ხელისგული სულ მთლად გაულიგვა, გაუყინა. „აღმასიც ცივიაო“ — გაიფიქრა ვამეხმა.

— აბა, ჩვენ ბიჭებს აღმასის კბილი დაყვება ხომ?! — გაეშალა სახე ჰაბუკს.

— პაპამ თქვა, კბილის სიმაგრე ჯანის ტოლიაო.

— მართალი უთქვამს მოხუც მამამზეს. ასეა, კბილი სხეულის რძით იკვებება, რამდენად თეთრია კბილი და მაგარი, იმდენად ჯანმრთელია ადამიანი.

— ჰოდა, აღმასზე მაგარი, აბა, რა არის! მეც იმიტომ ამოვ-  
ფონე აქეთ, — მორცხვად ჩაიჩურჩულა ღუნიადარმა, — ჩემს  
ბიჭებს აღმასის კბილმა მინდა ამოჭრას.

— ჩვენს ბიჭებს კბილიც აღმასის ექნებათ და ძვალცი, —  
გაიღიმა ვამეხმა.



ქორწილი გადაიხადეს. ცხრა თვის თავზე ბიჭი ეყოლათ. მე-  
ორე წელს მეორე ვაჟი მოემატათ, ხოლო მესამე თორმეტს  
თვის თავზე ისევ ვაჟის ახალი შიბაქი გამოთალა ვამეხმა თავი-  
სი ხელით.

უფროსს აია დაარქვეს, შუათანას ია და სულ ნაბოლარას  
ისაიას სახელი დაანათლეს.

იზრდებოდნენ ბიჭები, ყოველდღე მთვარესავით ივსებოდ-  
ნენ, ძვალს იმაგრებდნენ, სიმაღლეს იმატებდნენ, ბეჭებს იფარ-  
თობდნენ.

დილით და საღამოს ენგურის ცივსა და ნაკვერცხლებიან  
ტალღებში ბანაობდნენ. კალმახს ბადითა და ფაცერით იჭერდ-  
ნენ, ჭიხვსა და ირემს ფეხდაფეხ მისდევდნენ. დრო გადიოდა და  
ბაბუასა და მამის სიბრძნე მათს თვალეში მწიფდებოდა.  
გრძნობდა ვამეხ გულბანი, მის ვაჟებს მამულის დიდი საქმე  
დააკისრა განგებამ. პაპა თითქოს უფრო ახალგაზრდავდებოდა.  
მოხუც კაცს არც ბეჭის სისქე შეუმცირდა ჭერ და არც ძვლები  
გამოეფიტა. იღვა როგორც კავკასიონის მუხა. იღვა და არწი-  
ვის თვალით შეპყურებდა შვილიშვილების ზრდას.

გულბააზი უკვე თავისუფლად და მარტოდმარტო დაეხეტე-  
ბოდა მთა-ველად. ხანდახან დისწულები თუ გაპყვებოდნენ  
ქვეყნების სანახავად. ისიც დინჯად და გონიერად მიუძლოდა  
მათ. სანახავს ანახებდა, მოსაველეს მოაველეინებდა, ზღვას  
გადააცურებდა, მთებს გადაკვალავდა და შინ უხიფათოდ და-  
ბრუნებდა.

ღუნიადარს მზე ამოსდიოდა მამა-ძმაზე და ქმარ-შვილზე.  
ოჯახის შინა ძარღვი ის იყო.

დაუმწიფდათ ბიჭებს ბეჭები, ულვაში შეუწაბლისფერდათ,  
ხმა დაუბოხდათ, მკლავში დაგრეხილი ბაწრის გორგლები გა-

უმრავლდათ, მუხლი მგლისტოლი გაუხნდათ. გონიერებას კი ვერ აუწონიდათ.

ამღვრეულ მდინარეში თვალთ თევზს დაითვლიდნენ, მოღრუბლულ ცაზე ვარსკვლავთა სიმრავლეს გეტყოდნენ. მიწის წვენი ნოყიერების ძალაც იცოდნენ და ცის ნამისაგან სიცოცხლის თვალის გახელის დონის საიდუმლოებასაც გეტყოდნენ. დედ-მამასთან ერთად ბრძენი პაპაც გონების თვალის მანძილსა და სიღრმეს უწვრთნიდათ, უმახვილებდათ.

აია მალალი იყო, ბეჭფართე და არწივთვალემა, სარმით მუხას მოსტეხდა. მისი ნასროლი ისარი კავკასიონის მწვერვალებს სათითაოდ ყინულის მთისოდენ ქერქს ჩამოამსხვრევდა, ხმლის ერთი მოქნევით იალბუხს ფესვებს გადაუსხებდა. ია თითქო უფრო ნაზი ბიჭი იყო, ტანწერწეტი და მათრახივით მოქნილი. ერთი ფეხის დაკერით ცხრანაზადს გადაეველებოდა. თვალის ბეწვისაგან ნაგრეხ ძაფზე სირბილით გადაფრინდებოდა, იორდა ცხენს ფეხდაფეხ დაეწეოდა. ისაია კი მუხის ფესვივით ცხრაფად იყო ნაქსოვი, მუჭით შეტოტებულ დათვს შუბლის ძვალს ჩაუმტერევდა, მკლავებში მოქცეულ ვეფხვს მოჟეერავდა, მოასიკვდილებდა ძალღონით, მიწის ბურთს ბეჭით შეაბრუნებდა.

ასეთი იყვნენ სამივე ძმები და ასეთივენი დარჩნენ ბოლომდე.

გულბააზი ცხენოსნობას და გულადობას ასწავლიდათ, წყალში ცურვას და მთის წრიახებზე მსუბუქად სირბილს აჩვენებდათ. სიცივეში და სიცხეში. თანდათან აწრთობდა მათ სხეულს.

ერთ დილით მამამზემ ვამეხი მოიხმო. იმ წუთშივე გუმანით იგრძნო გულბააზმა, რისთვისაც იხმობდა სიძეს სიმამრი.

— დაჯეჭო, — უბრძანა მოხუცმა.

ვამეხი მოკრძალებით ჩამოჯდა სავარძელზე.

— დრო დადგა, შვილო, სათქმელი გითხრა.

— უთქმელად მიგიხვდი, მამამზე ბატონო! —

— არა, მე სხვა მინდა გითხრა. ხომ იცი, შვილო, არწივები ყოველთვის ცის გუმბათში შეფრენილი კვდებიან, ადამიანები მამულის სიკეთისათვის უნდა იღვეწოდნენ. თუ საჭიროა, უნდა სიკვდილს ერკინებოდნენ.

ვამეხმა დინჯად, მაგრამ გაოცებო ასწია თავი და თვალები მოხუცს მიაპყრო.

— კი, შვილო, ასეა. მურთხი და მუდო მიწის ბნელ სორო-ებში უცდიან თავის სიკვდილის დღეს. არწივთა მოდგმა კი ცის ლურჯ გუმბათში ამჯობინებს სულის ამოსვლის ეჟამს. მიმიხვდი ხომ, რაც გითხარი, შვილო?

— მიგიხვდი, მამამზე ბატონო, — მოკრძალებით ისევ დახარა თავი ვამეხმა.

— დუნიადარს მოეფერე, დედა, ცოლია, შვილია და დაც არის. ხომ იცი, შეიძლება არც ერთი არ დაუბრუნდეს უკან. ცოდოა, მძიმეა მისი ადგილი ამ მიწის პირზე.

— დუნიადარი ქართველი ქალია. მამულს თუ დაუთქვამს, ცრემლსაც კი შეიშრობს თვალზე.

— ჩემი შვილია! — ამაყად თქვა მოხუცმა.

— ჩემი მეუღლეა! — თავი აწია ისევ ვამეხმა და სიმამრს თვალი-თვალ შეხედა.

მამამზემ თითქოს ვერც კი გაიგონა, ისე განაგრძო:

— დიდ სათქმელს კი წასვლის წინ გეტყვი, იცოდე!

მეტი სიტყვა მოხუცმა არ თქვა. მხოლოდ ცას შეხედა და დარბაისლური ნაბიჯით მიაშურა თავის სადგომს. არც ვამეხმა შეუბრუნა სათქმელი. ისიც დაფიქრებით და წყნარად წავიდა ეზოს ბოლოსაკენ.



ცხრა თვეს ამზადებდა დუნიადარი ქმარ-შვილს და მამა-ძმას სამგზავროდ. თითოს შვიდ-შვიდი წინდა-პაიჭი მოუქსოვა, შვიდ-შვიდი ჩოხა-ახალუხი შეუქერა, შვიდ-შვიდი სხვადასხვა ფერის ჩაბალახი დაუქარგა.

აილამას ფესვებთან ამოხეთქილ ყინულ-წყალში აწრთობდნენ და ალმასით უკალავდნენ წვერს შუბსა და ისრებს, თაფლში ხარშავდნენ ჩრდილში წლობით გამომშრალ სამშვილდე მკლავებს. ყველანი უკვე მგზავრის ეჭვიანი თვალით უმზერდნენ ბილიკებსა და გზებს, მთებსა და ველებს.

წასვლის დროც დადგა.

გათენების ჟამს ღუნიადარი მამის საძინებელს მიაღდა. მო-  
ხუცი უკვე ფეხზე დახვდა.

— მამა ბატონო, შენი ფიქრის წინააღმდეგ არ წავსულვარ  
არასოდეს. ახლა კი უთუოდ სათქმელი უნდა გკადრო. სახლში  
მარტო არ დამედგომება, ან რა ჯანდაბა გამაჩერებს უთქვენოდ!  
მეც უნდა მიმგზავროთ, მეც უნდა წამიყვანოთ!

— ვიფიქრე, შვილო, ბევრი ვიფიქრე და ვერ გადავწყვი-  
ტე. ძნელია, უსაშველოდ ძნელია. ქმარს შეეკითხე, თქვენთვის  
მომინდვია. ვამეხი საზრიანი მამაკაცია. შენც მისი მეუღლე ხარ,  
რაც გიბრძანოს, ისა ჰქენი.

მთელი ოჯახი შეკრიბა ვამეხმა. ცოლისძმაც მოიხმო. ღუნია-  
დარის წაყვანა ეძნელებოდათ. დიდი დავა ატყდა.

ბოლო სიტყვა უმცროს ვაჟს ისაიას ერგო.

— დედის სურვილი ჩვენთვის კანონია, წამობრძანდეს და  
ჩვენს გამარჯვებაში მაგანაც წილი დაიდლოსო.

ცრემლმორეული მოეხვია ღუნიადარი ისაიას. თითონაც  
კინაღამ ცრემლი წამოცვივდა, დედის მტირალ სახეს რომ შეხე-  
და დევგმირმა ვაჟკაცმა; შერცხვა, გაწითლდა და უცებ გაშორ-  
და ყველას.



ცას თავანი როდი აქვს, მიწას კი კიდევ. იარეს და იარეს ჩვე-  
ნებურებმა. იარეს მთები, იარეს ველები, ასი ზღვა გასცურეს,  
ათასჯერ ასი ტბა მოინახულეს. მაღალი მწვერვალები - აქვს  
კავკასიონს, მაგრამ თურმე უფრო მაღალი მთებიც ყოფილა ამ  
მიწის პირზე ფესვდადგმული. იქაც მუხლი შედგეს, თავისი ფე-  
ხის კვალი დატოვეს, სასურველ საგანძურს ჯერ მაინც ვერ მი-  
აგნეს.

საოცარი ის იყო, მამამზე ბატონი არ იღლებოდა, ტოლს არ  
უღებდა შთამომავალს. ერთ გაუვალ უდაბნოში ერთადერთი  
წყარო იხილეს. იქვე პატარა ქოხში ადამის ჟამის მოხუცი დახვ-  
დათ. წვერ-ულვაში კოჭებამდე წვდებოდა. ხშირ, თოვლივით  
თეთრ წამწამ ქვეშ თვალები მაინც ორი ნაკვერცხალივით უღ-  
ვიოდა.



— ადამიანებს დიდი ხახია გადავეჩვიე, თქვენი წუხილი მითხარითო, — შემოაგებათ სიტყვა დამხდურმა.

მამამზემ ჯერ ვინაობა ჰკითხა, ჯანმრთელობა უქო და მხოლოდ მერმე შეეხმიანა თავის წუხილზე.

მოხუცმა შუბლი შეიკრა, თითქოს ვერ გაიგონაო, ყური ახლოს მოწია და სათქმელი ისევ გაამეორებინა.

— დიდი საქმე გაგიზრახავთ, — დინჯად თქვა მან, — ეტყობა, თქვენი მამული ძვირფას შვილებს ზრდის, შეისვენეთ, ცივი წყლით გული გაიგრილეთ, დილით გეტყვიო ჩემს სათქმელსო.

დილით კარგად გათენებული არ იყო, მზის სხივები ჯერ კიდევ ცის გუმბათზე იყო შეტოტებული, როცა მოხუცი ამ სხივებში ამალდა. ოქროსფრად დაღვრილ მბრწყინავ შულოებში გაეხვია, მამამზე თავისთან მოიხმო და უთხრა:

— ბედნიერი კაცი ხარ და ბედნიერი ერის შვილი იქნები. იცოდე, ყოველ ქვეყანას თავისი ბუდე და გული აქვს. აი, იქ, აქედან ასი დღის სავალზე, უცხო ტბის ნაპირს უცხო წალკოტია, სამყაროს გული იქა დევს, ყოველი ქვეყნის გულები მის გარშემო ხარობენ, წყნარად ფეშქავენ და თავისი ხალხის ჯანღონეს გამოხატავენ. დიდი განგების მეუფეთა პატრონი თუ ღირსად ჩაგთვლით, შეიძლება წაღების ნებაც მოგცეთ. თუ არ მოეწონეთ, უკან ცოცხალი ვერც ერთი ვერ დაბრუნდებით! — დაასკვნა მან და უჩინარი გახდა კიდევ.

გაოცდნენ მგზავრები. ცოტა შეიმუხლეს და ნაჩვენები გზით გაემგზავრნენ. ოთხმოცდაათი დღე რომ იარეს უდაბნოში, უკვე მოჰბერა გრილმა და ნაზმა სიომ. ეტყობა, ნანატრ ადგილს მიუახლოვდნენ. თანდათან სხვა ფერი დაედო გარემოს. მიწას ზურმუხტის ფერი მოეძალა, ცას — ფირუზის. ას დღეს რომ ერთი დღე აკლდა, უზარმაზარ ორ მთას მიაღდნენ. შუაში ვეება მქუხარე მდინარე ლურჯად მოლივლივებდა. მდინარის ორივე მხარეს, მარცხნივაც და მარჯვნივაც ბილიკი მიჰყვებოდა. კლდესა და წყალსშუა შუბმომარჯვებული პირტიტველა ვაყები იდგნენ დარაჯებად.

როგორც კი იმ ადგილს მიუახლოვდნენ, ნისლმა სქლად დაჰყარა მთელ ხევს. ორ ბიჯზე კვალი აღარ ჩანდა.

— წინ ვინ ბრძანდებით? — შეეხმიანა მამამზე მცველებს, —

ჩვენ მგზავრები ვართ, ჩვენი ქვეყნის გულის სამყოფელი მიგვასწავლეთ!

უცებ ისევ დაიწმინდა ნისლეთი. ამ მქუხარე მდინარეზე ადამიანთა თვალთა გასაკვირად ფირუზის ნაღი გაუნძრევლად იდგა, თითქოს ტალღებს არც კი ეხებოდა, ზედ უწვერულვამო ვაჟი შუბით ხელში გაყინულიყო.

— დიდი ხანია გელით, — წყნარად თქვა მან და მგზავრები ნაღში მიიპატიჟა.

ნაღი შეინძრა და მგზავრები კიდევ უფრო გაოცდნენ. იგი ამ ვეება და ბობოქარ ტალღებს ზემოთქენ მიარღვევდა. კი არ მიჰქროდა, მიფრინავდა. აიას, იას და ისაიას გულები უტოკავლად თავის ტოლ ვაჟკაცებს რომ უყურებდნენ, ისინი კი ხმას არ იღებდნენ. ბოლოს ისაიამ ვერ მოითმინა:

— მუნჯები ხომ არ ცხოვრობენ ამ წალკოტში, გამარჯობასაც კი არ გვეუბნებიან!

ვამეხმა წარბი შემართა, ეტყობა, არ მოეწონა ვაჟის თავშეუქავებლობა. დუნიადარი შეწუხდა. მამამზემ კი გაიღიმა.

— ალბათ, აქ ასეთი წესი და ადათი აქვთ! — ჩაილაპარაკა წყნარად მოხუცმა.

პირტიტველ შუბოსანსაც გაეღიმა.

— უდროოდ ნათქვამ სიტყვას, უთქმელობა სჯობია! — წყნარად თქვა მან.

მოულოდნელად გაიშალა მდინარე, გაიშალა და ტბად იქცა. გარშემო თვალსანეტარო ყვავილნარი და ხეების ტევრი გაღაიშალა. ფრინველთა გუნდები სტვენა-გალობით და ჭიკჭიკით აესებდნენ იქაურობას. ხის ტოტები ნაყოფისაგან მიწას ეფინა. მზის საოცარი შულოები ელოლიავებოდა ხესა და ბალახს. ათასფერ ყვავილებს ათი ათასი ფერის ნაზი პეპლები და ფუტკარი ესეოდა. ტბის შუაგულში ვეება აღმასის კოშკი იდგა. გარშემო უამრავი მომცრო აღმასისავე კოშკები ეხვია. არც ერთს კარი არ უჩანდა.

ფირუზის ნაღმა დიდ კოშკს სამჯერ შემოუარა. კოშკს მრავალწახნაგოვანი ოქროს ზოდის წიბოები აყვებოდა თავანამდე.

— ამ კოშკში სამყაროს დედო-გულია, — დარბაისლურად დაიწყო შუბოსანმა, — ჯერ იგი ადამიანთა თვალს არ უნახავს და არც ენახება. იმ მომცრო აღმასისავე კოშკებში ყოველი ქვე-

ყნის, ცალ-ცალკე ხალხების გული დევს, სანამ ერი სიკვდილის პირს მივიდოდეს, სანამ გული დაჰქივდებოდა და ავად გახდებოდა. თურმე მისი სიჯანმრთელე მისი ხალხის მამულიშვილობაზეა სასთუმალმიდებელი. თუ ხალხს თავისი ქვეყანა ძალუმაღ უყვარს, ფხიზელი თვალით და გონებით მართავს ქვეყანას, მაშინ მისი გულიც ჯანსაღად ფეთქავს; უმტკივნეულოდ ცემს, მაშინ ჭირი და სნება ვეღარ ჯაბნის. თუ მამულიშვილებმა მიწა-წყალზე გული აიყარეს, თავისას სხვისი ამჯობინეს, თავისი ქვეყნის მიწა-წყალი სხვას ანაცვალებს, მაშინ მისი გულიც ღუნდება, მის სისხლის ძარღვებს ჰკე ეკიდება, ჰქივდება და ავად ხდება. ასეთ ხალხს გადაშენება ელის. სიკვდილი არ ასცდება.

აი, დაუქვირდით, რამდენი კოშკია ცარიელი და შიგ მხოლოდ წყლის ტალღები ტლაშუნობენ. ისინი დროგადასულ ხალხთა გულების ადგილსამყოფელია. დაიღუპა ერი, სიკვდილმა მოუსწრაფა სიცოცხლე გულსაც. დაცარიელდა ის კოშკიც. ახლა ფარლალად დგას საცოდავად ამ უძირო და უნაპირო ტბაზე...

ეტყობა, მათმა მამულიშვილებმა თავის მიწა-წყალზე გული აიგდეს, ერთმანეთში სიყვარულის მაგიერ მტრობა თესეს, თავისი მამული სხვა ხალხის ქვეყანაზე გადაცვალებს. აი, მათი საფასურიც. ყველაფერი დასრულდა მათთვის. ყველაფერი დამთავრდა. აღარც მიწა, აღარც წყალი, აღარც შთამომავლობა.

თქვენმა ქვეყამ განგება და ღმერთები გააოცა, მოხიბლა. ვისაც თქვენსავით უყვარს მამული, ღირსია ქვეყნის გულიც ახლო ჰქონდეს.

მხოლოდ იცოდეთ, ჭირიც ბევრი შეგხვდებოდა და ლხინიც, გადაეცით თაობიდან თაობას, რამდენი ორგული და მოღალატე შემცირდება, იმდენი გამაგრდება და ჯანლონე გაუმრავლდება ქვეყნის გულსა და ხალხს. ისიც დაიხსომეთ, გულს თავის ლექის გამტანი მდინარის ფესვი უნდა მიუგდო. იმ მდინარეს სათავეცა და ჩასართავიც თქვენს მამულში უნდა ექნეს, იგი შეინახავს, ასაზრდოებს და გაწმინდავს მას.

დაასრულა სიტყვა შუბოსანმა ვაჟკაცმა და ნავი მეტად ლამაზ კოშკისაქენ გააფრინა.

ამ კოშკსაც არც კარები უჩანდა და არც სხვა შესასვლელი ნიშანი ჰქონდა.

ნავი მიადგა თუ არა, ყველა კედელი შეირხა, ნელ-ნელა ცისკენ აიწია და ლურჯად მოლივლივე ტალღებზე აღმასის მოციმციმე ზანდუკი გამოცურდა.

ექვსივემ კარგად დალანდა ცისფერ ნისლში გახვეული მფეთქავი გული.

ყველანი მუხლებზე დაეცნენ.

შუბოსანმა ცისკენ ამართა თავისუფალი მარჯვენა.



ენით გამოუთქმელი წეალება და შრომა გადახდათ ჩვენებურებს. იარეს და იარეს. სიხარული, სიცოცხლე, გამარჯვება მიუძღოდათ წინ. ამიტომ ყველაფერი აიტანეს, ყველა ღობე გადალახეს. უდაბნოში ცხელ გრიგალებს აოკებდა და აგრილებდა მათი მამულისადმი ესოდენ განუზომელი სიყვარული, ზღვებზე ქარიშხალს აწყნარებდა, ცაში აზიდულ მწვერვალებს ადაბლებდა, მუხლმისაწვდომს ხდიდა, ყინულს აღნობდა და ათბობდა სიარულის გასაადვილებლად, გაუვალ ტყეებს და ქაობებს გაუჭირვებლად გადუვლიდნენ ხოლმე. ტანიც მთელი მოიტანეს და სულიც ამალღებული დაურჩათ.

მოხუც მამამზეს მაინც დაეტყო სისუსტე, სიხალისე და ნიჩი დაეკარგა მოხუცს.

რამდენადაც უახლოვდებოდნენ თავის მიწა-წყალს, იმდენად დაღლა დაეტყო მის მუხლსა და თვალს. დუნიადარმა შეატყო მამას სისუსტე.

„განგება მშობელ მიწამდე დაგვაცლისო“, — გაიფიქრა მან და ამის შემდეგ ნაბიჯი არ მოუნაცვლებია მამამზეს ცხენს იქით.

შვილიშვილებმაც იგრძნეს მოხუცის დაღლა და ბედაურები პაპის ლურჯას ამოუყენეს გვერდიგვერდ.

სალამო ეამი იყო, როცა თავისი ქვეყნის საზღვარს მიაღწენენ. მამამზემ შესვენება ინება.

ვეება ძელქვის ხის ჩრდილში ჩაიმუხლა მოხუცმა. დუნიადარმა თავსასთუმალი შეუმზადა.

— აღარ მინდა, შვილო, ქვეყანა მოვიარეთ, ხომ ნახეთ, ძელქვის ხე ჩვენსავით მხოლოდ ჩვენს მიწაზე ხარობს. მე მინ-

და მის ფესვზე მივდო თავი, მამაჩემის მკლავივითაა იგი მიწაზე გართხმული. აი იქით შეხედეთ! ეს რა ამბავია?! — მოულოდნელად ისევ გაუბოხდა ხმა მამამზეს.

ყველამ იქით გაიხედა და თვითონაც გაოცდნენ: მაღლა გორაკიდან საზეიმოდ მორთული ხალხი მოდიოდა.

ვამეხმა მიმოიხედა.

— ვინ იყო ნეტავ ჩვენი მოსვლის მახარობელიო?! — შეეკითხა იგი მეუღლეს.

დუნიადარმა მხრები აიჩეჩა. ბიჭებიც აიწურენ. მარტო გულბააზმა ჩაილაპარაკა:

— განა განგება არ მიგვიძლოდა იქით წასვლისას, ალბათ, დაბრუნებაც მან აცნობა ხალხსო!

ულამაზესი ქალ-ვაჟები ჩამოდიოდნენ გორაკებიდან, ვაჟებს მკერდზე ჩალისფერი ყაჭის ძაფით არწივები ეხატათ, სატევრის თავებზე ლომისთავეები ესახებოდათ. ქალწულებს მტრედები ამოქარგათ კაბაზე ოქროსფერი ყაითანით.

მოდიოდნენ დინჯად, სიცოცხლით, ღიმილით სახეგაბადრულნი.

მამამზე მისჩერებოდა მათ და თითონაც იღიმებოდა.

— მაინც მოვალწიე აქამდე, აწი კი ჩემი სამუდამო მიძინების დრო არისო, — თითქმის ჩურჩულით თქვა მან.

ვამეხის ყურს არ გამოჰარვია მოხუცის ნათქვამი.

— ყველა სიკვდილის შვილი ვართ, მამამზე-ბატონო, — დაიბუხუნა მან, — მაგრამ თქვენთვის ჯერ აღრეა. განგებამ რაც დაგვავალა, ჯერ ის უნდა შევეასრულოთ.

მოხუცმა ისევ გაიღიმა, გულბააზი მამას გვერდით დაუდგა.

— გივარგიანთა გვარის ადამიანო, აკი თვითონ შენგან გამიგონია — მამულის სიყვარული სიკვდილს მოაცდევინებსო!

შვილიშვილებს შუბლი გაეშალათ.

მოხუცმა მხრები აწურა.

თანდათან მთელი ქვეყანა გამოეფინა კავკასიონის კალთებზე. ყოველ მოსულს მკლავის სისხლ ანთებული კერასხები ეჭირა-ხელში. საკმეველისა და თაფლის სურნელი ეფინებოდა ველ-მინდვრებს, მთების კალთებს და მწვერვალთა წვეროებს ხოლში ახვევდა. ცხრა წყვილი მოზვერი შეაბეს ძელქვის ხის-

გან გაკოპიტებულ ჰაეროვან ურემში. ყოველ მათგანს რქებზე წყვილი კელაპტარი აუნთეს.

ალმასის ზანდუკი ალმასითვე ნაქსოვ ფარდაგზე დადგეს, ძელქვის სამფეხა სყამი გააკოპიტეს და ურემზე ქვეყნის გულთან ერთად მხოლოდ მამამზე გივარგიანი დააბრძანეს.

შთამომავლობა ცხენდაცხენ ამოუდგა გვერდით მოხუცს.

ნელა დაიძრა პროცესია ზემოთკენ, კავკასიის მწვერვალთა საბინადროში. რაც უფრო ზემოთ მიიწევდნენ, მით უფრო მეტი ხალხი ეფინებოდა კავკასიონის კალთებზე. მიიწევდნენ ზურმუხტისფერ ნისლეტში, არწივთა სამფლობელოში. როცა ფასის მთის კალთებს მიაღწიეს, ხალხი შეჩერდა, შედგა. ყველამ შეამჩნია, თუ როგორ ჩაიმუხლა ცხრა წყვილმა მოზვერმა. ჩაიმუხლეს და ყველამ დაინახა, როგორ გაიხსნა მიწის პირი, როგორ ამოიქუხა მტრედის ფრთის ფერმა მდინარემ, იგი ჯერ ნელინელ გაიშალა და ვეება ტბად იქცა, მერმე მის ზემოთ მიწის პირი თითქოს ისევ შეიკრა, ისევ დაიხურა, ტბა მის ქვემოთ მოექცა. მხოლოდ მცირე მდინარის ფესვწყარომ დაიწყო დინება. მან ხალხის თვალწინ გაიკვლია გზა და ქვემოთ დაეშვა. როცა ხალხმა თვალი გააყოლა მდინარეს, კარგად დაინახა თუ როგორ შეუერთდა სხვები ამ პატარა ნაკადულს და როგორ იქცა იგი დიდ, მღელვარე და მშფოთვარე მდინარედ.

გაკვირვებული ხალხი ახლა ისევ ზემოთ ამობრუნდა.

ზემოთ კი აღარაფერი აღარ ჩანდა. აღარც მოზვერები და ურემი იყო, აღარც ალმასის ზანდუკი იდგა ახლომახლო. ისინი თვალით უნახავნი შეიქმნენ, გაუჩინარდნენ, ზესამყაროს მიეფარნენ. გარშემო მხოლოდ მაღალი და ცივი მწვერვალები გაყინულიყვნენ ცის ლურჯ ტატნობში.

ვერც მამამზე გივარგიანთა ოჯახი დაინახეს ადამიანებმა. თუმცა მათ ან კი რად უნდოდათ გამოჩენა. მათი შთამომავლობა ხომ მთელი საქართველოა, მთელი ჩვენი ხალხია, ჩვენი ერია. განა ყოველი ქართველი კაცის გულიც იქ არ ფეთქავს, თავისი ქვეყნის გულთან არ არის შეხორცებული?!

ლეგენდა მაინც ასე ბოლოვდება:

ცივია ალმასის ბუდე, ცივია ალმასის ტბა, მაგრამ გული მაინც თურმე თბილად ძევს და ფეთქავს შიგ, ფეთქავს წყნარად, ზომიერად, გაუჩერებლად.

მერე არ იტყვიტ რა ათბობს მას ამ ცივსა და მიუვალ მწვერვალთა ქვეშე? ყოველი ქართველი კაცის ძმობა და სიმტკიცე, შუბლის სინათლე და კარგი ადამიანობა; ყოველი ქართველი ვაჟკაცის და ქალწულის მამულისადმი დიდი, განუზომელი სიყვარული. ამიტომ არის, რომ მისი სითბო მწვერვალთა ყინულის წვერებს ათბობს და ალბობს. ისინიც წვეთ-წვეთად ჩამოდინდებიან ქვემოთ, რიონის ტალღებს ერთვიან და მთელი კოლხეთის დაბლობს ალბობენ და რწყავენ სასიცოცხლოდ.

აი, რატომ არის თურმე რიონი მუდამ ღრუბლისფერი და მშფოთვარე, მუდამ დაუდეგარი და ბობოქარი!

## მიაგულის სიყვარული

უშიშარი და გამჭრიახი კაცი ყოფილა მონადირე ბექნუ პირველი. ყველაზე მაღალ საჭიხვეებს მისი მუხლი სწვდებოდა. ქარაფების ბინადარ ნადირს მისი ნასროლი ტყვია არ ასცდებოდა. სახლში გამოუღეველად ჰქონდა მარილი და ქერის ფქვილი, არჩვისა და ჯიხვის ხორცი. ხევში მობალახე მისი ხარების რქები მთის წვერებზე შემორჩენილ ნისლს არხევდა თურმე. ადრე დაქვრივებულ ბექნუს ერთი ქალიშვილი ჰყოლია, სახელად მიაგულ. მისი თვალები სვანეთის კამკამაცის ფერი ყოფილა, წამწამები ჩამოდრუბლულ ენგურის ხევზე უფრო შავი. მიაგულის სილამაზეზე სვანი ვაჟკაცები ლექსებს მღეროდნენ.

ხომ მოგეხსენებათ სიმღერის ძალა და ამიტომ მთელ ზემო სვანეთში გასულიყო იმ ქალის ქება.

ბევრი ლამაზი და ბრგე ვაჟკაცია სვანეთში, მაგრამ მიაგულს გულის ტოლი ჯერ კიდევ ვერ მოენახა.

კვირიკედღეს უნახავს ოტიას მიაგულ. თეთნულდის თოვლზე თეთრი კანი ჰქონდა და ნაძვის ხესავით აშოლტილი ტანი. დევის ბეჭებიანი ოტია თოფის ლულაზე დაყრდნობილი იდგა. ახალგაზრდა კაცი ანთებული თვალებით მისჩერებოდა ბექნუ პირველის ასულს. ნანადირევი მოეტანა ვაჟკაცს. ვეება ხარჯიხვი გაუტყავებლად ეგდო მის ფეხებთან. სამ-სამი წყართა დაგრეხილი რქები ქარისაგან დაღეწილი მუხის ტოტებივით ეყარა მიწაზე. მონადირეები გოცებით ათვალეირებდნენ ნანადირეს.

— ჰაუ!.. — გაიკვირვა მიაგულმაც ჯიხვის სიდიდე. მისი თითები ისე შეეხო ჯიხვის რქებს, რომ პატრონისათვის არც შე-



უხედავს. როცა წამოდგა და ზევით აიხედა, ქალიშვილს ტანში გააჟრჟოლა.

სიტყვა არ უთქვამს მიაგულს, თრთოლვით გამობრუნდა და ნისლეტში აზიდულ ყინულოვან მთებს გასცქეროდა. ამ ცქერამ მონადირეს გულში აღუღებელი ტყვია ჩაასხა. იგი არც ნანადირევის ქებას უგდებდა ყურსა და არც მისი სილამაზით გაოცებული სხვა ქალების ჩურჩულს.

ხანგამოშვებით ოტია გრძნობდა მიაგულის მზერას და ბავშვივით წითლდებოდა.

გათენებისას ფერხული გააბეს, მერე სავაეკაცო ლოდი ასწიეს. შუბლგახურებული ოტია მარგველანი ძნელად ასაღებ ვეებერთელა მრგვალ ქვებს ბურთივით ათამაშებდა.

ხალხში აღტაცების ხმები ისმოდა. როცა „ლილე“ დააგუგუნეს, ოტიამ ისეთი ბანი თქვა, ხმამ ხალღეშურას სათავეს უწია.

გულდაკოდილი წამოვიდა მიაგულ სოფელში, ხალისი დაეკარგა, მის სახეს ღიმილი მოშორდა.

მშობელს უკვირდა აქამდე დაუდგარი ქალიშვილის თვინიერება. ჭიხვივით ლაღი მიაგულ საბელჩაბმული ცხვარივით მიჰყვებოდა ახლა მამას. გუმანი აიღო ბექნუ პირველმა; მისი ქალიშვილის გული სხვა ბუდეში გადაფრენილიყო.

— რა მოგივიდა, გოგო? — ყრუდ ჰკითხა ქალიშვილს.

ბექნუს ეგონა მიაგულ მოკრძალების გამო მაინც დაუმალავდა მეხზე უფრო საშიშ სიტყვას. ქალიშვილმა პირდაპირ შეხედა მშობელს.

— მამას ვერ მოატყუებს მიაგულ. ოტიას თვალებმა და ვაეკაცობამ მომხიბლა! — ჩაიჩურჩულა ქალიშვილმა.

ბექნუ პირველს თავზარი დაეცა.

იგი ნაღვლიანად მიაჩერდა მიაგულს, სიტყვა კი მაინც არ უთხრა და სატკივარი გულში ჩაიხვია. მამა-შვილი უბრაოდ ჩავიდა სოფელში. ძველმა მონადირემ მიაგული შინ დატოვა, თვითონ საქმე მოიმიზეზა და ისევ უკან დაბრუნდა.

გულბოლმიანი მიდიოდა ბექნუ ხალდესკენ. ისე იყო დარდისაგან შეკრული, რომ დანა კბილს არ უხსნიდა. იცოდა იფარეღმა მონადირემ, ოტია მარგველანი ცოლშვილიანი კაცი იყო, ცოლის მოღალატე კაცი კი მისი სიძე ვერ გახდებოდა.

ისიც სწამდა ძველ მონადირეს: ვაჟაკის თვალი ჭიხვსა და ქალის გულს ერთნაირად სჭრიდა და ნუსხავდა.

„მოვკლავ, როგორ გაბედა და მიაგულ მომინუსხა ცოლ-შვილიანმა კაცმა?!“ — ფიქრობდა გზადაგზა.

შხარას და აილამას წვეროებზე ჯერ კიდევ სინათლე არ ჩანდა, ზაერდოვან ცაზე ვარსკვლავები კრთოდა. ამ სიბნელეში ხეები უფრო ცივად და პირქუშად ჩანდნენ. ცაში აზიდული ყინულის მწვერვალები თეთრ ნაბადწამოხურული დევებივით იდგა. ხანდახან ცაში მოწყვეტილი ვარსკვლავი გაიელვებდა და ბექნუს ეჩვენებოდა, თითქოს იგი მწვერვალებს ეცემოდა.

სოფელ ხალდეს მისასვლელებთან ბექნუმ მინდორზე მიშვებული შეკაზმული ცხენი დაინახა. ახლოს მივიდა. ცხენიდან ჩამოხტარი ოტია მარგველანი გულმკერდით მიწას დამხოზობოდა და ოხრავდა. დამხედურმა მიმსვლელი ვერ შენიშნა.

სხვა საშველი არ იყო, ბექნუს გამარჯობა უნდა ეთქვა.

ძველ მონადირეს მის სიცოცხლეში პირველად გაუძნელდა გამარჯობის თქმა, რამდენჯერაც სიტყვის თქმა დააპირა, იმდენჯერ ენა დაემა. იგრძნო, თუ გამარჯობას ეტყოდა, ნათქვამს გულმოსულობაც გადააყვებოდა, გაცხელებული გული გაცივდებოდა, ბოლმა გაუქრებოდა.

რა უნდა ექნა ბექნუს? მწოლარე კაცს ქურდულად თოფს ხომ ვერ დაახლიდა?

მართალი რომ თქვას კაცმა, რა დამნაშავე იყო ოტია მარგველანი? სიტყვაც არ უთქვამს მიაგულისათვის. ლამაზი ვაჟაკი იყო და ქალიშვილს მოეწონა. რა მოხდა ასეთი? დღეობაზე მისმა ნანადირეებმა მთელი სვანეთი გააკვირვა, მისმა ძალ-ღონემ ქვეყანა მოხიბლა. ვითომ მიაგულ მოუნუსხავეს? მიაგულ კი არა, ბექნუც ვააოცა ოტიას ვაჟაკურმა სილამაზემ.

ამ ფიქრში იყო ძველი მონადირე, რომ ოტიამ ისე ამოიხვნეშა, ხევმა ხშიანად გაიმეორა მისი ოხვრა... ბექნუ გამოფხიზლდა, გულში ისევ შხამი ჩაუდგა. მწოლარეს ფეხი წაჰკრა.

ოტია გადმობრუნდა და მთასავით წამოდგა. იგი გაოცდა, როცა მოსული იცნო, უნებლიეთ გარემოს დაუწყო თვალიერება.

„მიაგულს ეძებსო“ — მიუხედა ბექნუ.

— შენ აქ სხვას ნუ ეძებ, მარგველანო, მართალი მითხარი, ოჯახი რად დამიქციე, ქალიშვილი რატომ მომიჯადოვე?!

ოტია, თითქოს მკერდში ხანჯალი ეტაკებინოს ვინმეს, შეინძრა.

— რა თქვი, ბექნუ ბატონო?!

— მიაგულ რატომ მომინუსხე-მეთქი!

ოტიამ ორი ნაბიჯი წინ წამოდგა, ბექნუს სახეზე დააკვირდა, მერე სივრცეს გახედა და წყნარად თქვა:

— მკითხავი და კუდიანი კი არ ვარ! მონუსხვით კი თვითონ მომნუსხა მიაგულმა. ხომ ხედავ, ეზოში მისული კაცი შინ ვერ შევსულვარ. მისმა თვალებმა საყვარელი ცოლის სახე მოსარიდებელი გამიხადა. ვერ მომიფიქრებია, საით წავიდე, ბექნუ! ჰკვიან კაცს გეძახიან და რამე მიშველე, რამე მასწავლე. რა ვუთხრა ცოლ-შვილს, არ ვიცი!

ძველი მონადირე მოალბო ოტიას გულწრფელმა ჩივილმა. სირბილე მაინც არ დაიმჩნია და ყრუდ წაილაპარაკა:

— ჰოდა, ცოლშვილიან კაცს გასათხოვარი ქალისათვის ავად არ უნდა შეგეხება. ხომ იცი, ვაჟკაცის თვალზე ჯიხვიც ინუსხება და თოფის სროლის მანძილზე მოდის.

— რას ამბობ, ბექნუ, მე მიაგულს ავად შეგეხდე? მისი ავი თვალით შემხედავს ქარაფზე ყინული გაუცურდება და უფსკრულში ჩაიჩეხება!

ბექნუმ მთის წვერებს გახედა. არ იცოდა, რა ეთქვა ძველ მონადირეს. უკვე თენდებოდა, მზე არ ჩანდა, მაგრამ მისი სხივები ოქროსფერ მდინარესავით მოედინებოდა აღმოსავლეთის კიდიდან. ნისლი მთების კალთებზე დაბერტყილიყო. უკვე ისმოდა შურთხების შორეული სტვენა და ჯიხვების ფრუტუნნი. სადღაც ყინულის ზეგები სკდებოდა და გრიალით ეშვებოდა ქვესკნელში.

— იცი, რა გითხრა, მარგველანო, მიაგულ გულიდან უნდა ამოიღო. ვაჟკაცი ცოლ-შვილს ვერ უღალატებს. ქვეყნის ფუძე ოჯახია და იმას მიხედვე, თუ ის შეგერყა, სიცოცხლე ჩაგიმწარდება, ხალხის ყბაში თავი არ ჩაიგდო!

ბექნუმ ეს ნელა და მტკიცე ხმით უთხრა ოტია მარგვე-

ლანს, მერე ცხენს მოახტა და ხალდეშურას ნაპირზე მიყო-  
ლებულ ბილიკს გაჰყვა.

საბალახოებზე უკვე ნახირი ბლაოდა. მწყემსები ძალღებს  
უსტვენდნენ. ტყიდან გარეული ქათმების კაკანი ისმოდა.  
ოტია მარგველანი გაშტერებული უყურებდა იფარისაკენ მი-  
მავალ ბეჭნუს.



ორი წელიწადი იტანჯებოდა ოტია მარგველანი და მიაგუ-  
ლის სახე მანც ვერ მოიშორა. ოჯახი გაღარიბდა, ჯიხვის და  
არჩვის ხორცი შემოაკლდა, ეზოში თივის ზვინები შემცირდა.  
განთქმულ მონადირეს ნადირობაც დაავიწყდა, ძროხა-ხარის  
მოვლაც.

გამოშტერდა კაცი.

სადაც უნდა გაევილო, მიაგულის ლანდი თან დასდევდა.  
ჯიხვს რომ თოფს დაუმიზნებდა, მისი თვალები მიაგულის თვა-  
ლებივით უყურებდნენ, მკლავი უღუნდებოდა ამ დროს, ხელმ  
უკანკალებდა, თოფის სასხლეტი თითებიდან უცდებოდა.

სათიბებში გავიდოდა, ცელს მოიქნევდა თუ არა, შეცბუნ-  
დებოდა, მოსათიბი ბალახი მიაგულის ნაწნავებად ეჩვენებოდა.  
შინ შემოვიდოდა და ცოლ-შვილის მზერა უძნელდებოდა.

ოტია მარგველანს ყველაზე უფრო მაინც ის კლავდა, რომ  
ცოლი არაფერს ეუბნებოდა. არყის ხესავით თეთრი ტანი  
ჰქონდა ოტიას მეუღლეს. სანამ მიაგულს ნახავდა, ცოლის შემ-  
ხედვარე ოტია მარგველანს ღამეც მზე ეგულებოდა შინ, ცო-  
ლის სიძულვილი გულში არც ახლა შეუშვია ოტიას. იშვიათი  
რამ მოხდა, თითქოს დარინე უფრო შეუყვარდა, თითქოს მისი  
სახე და ტანი უფრო მიშხიდველი გახდა. ხანდახან ეჩვენებო-  
და, რომ მიაგულ და დარინე ერთი და იგივე ქალი იყო. ელან-  
დებოდა კიდევ, რომ მისი შვილების დედა მიაგულ იყო და  
არა დარინე. ფიქრში შესულს ნამდვილად ეგონა დღეობაზე  
დარინე ნახა და არა მიაგულ. გაორებული იყო ახალგაზრდა  
მონადირე, დარინეს და მიაგულს ერთმანეთისაგან ვეღარ არ-  
ჩევდა, თვითონ გაორებულს ცოლი და მიაგულ ერთ არსებად  
ეხატებოდა.

მოითენებოდა ფიქრით, ხალდეშურას მინდერებზე გაწვე-  
ბოდა, რძიან სამყურა ბალახს ხელს ისე უსვამდა, თითქოს მია-  
გულის და დარინეს წარბ-წამწამს ეფერებოდა.

ერთი კი იძალა ოტიამ, ორი წელი იფარისკენ არ გაუხედავს.  
არც დღეობაში ჩავიდა კალაში. მიაგულის მეორედ ნახვას ერი-  
დებოდა.

მიაგული კი ყოველ დღეობაზე კვირიკეს მთაზე აღიოდა. ამ  
ხნის მანძილზე ცას იმდენი ნამი არ დასცვენია, რამდენიც მია-  
გულს ცრემლი მოსწყდა თვალებიდან. ავიდოდა საყდარზე,  
ოტიას ნადგომ ადგილზე დადგებოდა, მის ხელმონაკიდ სავაჟ-  
კაცო ლოდს მოეფერებოდა და ხალდესაკენ ყურებით თვალებს  
ჩაიღამებდა. წავიდოდნენ ყველანი, ის კი ისევ გასცქეროდა ქე-  
დებს. იცოდა ქალიშვილმა, მისი გულისმკვლელი იქ იმყო-  
ფებოდა. გულმოშხამული მამა ვერ მოითმენდა ბოლოს და და-  
იბუხუნებდა:

— ადექი, გოგო. მეც ნუ მომკალ და შენი თავიც ნუ და-  
იტანჯე!

ლასლასით წამოვიდოდა მიაგულ იფარისაკენ.

ასე გადიოდა დრო.

ოტია მარგველანის სოფლიდან ავი ამბები ესმოდა მია-  
გულს, ყველაზე ცუდი და შხამიანი ამბავი მაინც ერთ დღეს  
გაიგო მონადირის ქალიშვილმა.

სანადიროდ წასული ოტია მარგველანი ჯიხვს გამოჰკიდე-  
ბოდა. ქარაფ ყინულზე დასწევია ოტია და თვალი თოფის ნი-  
შანზე გაუმართავს. რქადაგრეხილი ჯიხვი ციცაბოზე მდგარა.  
თავი ნისლეთისაკენ მოელირა. ქვევით თვალგაუზომავი ყინუ-  
ლის ზეავეები ჩანდა, მის ქვემოთ ქვესკნელში ხალდეშურას  
წყაროების ბუდე-ფესვი ჩხრიალებდა.

ნისლი მთის კალთიდან კალთაზე გადადიოდა თურმე. სი-  
ჩქარე იყო საჭირო, მალე ენგურის ქაფისფერი ნისლი დაფა-  
რავდა ჯიხვის ტანს, უცებ ისევ თვალი გაშტერებია ოტიას.  
თოფის ნიშნის გასწვრივ ჯიხვის დაგრეხილ რქებს კანკალი  
დაუწყიათ. რამდენი დააკვირდა ნიშანში ამოღებულ ჯიხვს, იმ-  
დენად თვითონაც ათრთოლდა თურმე. ბოლოს, როცა ჩახმა-  
ხისათვის თითი ამოუდვია, გაოცებულა ვაჟკაცი ჯიხვის თვა-  
ლების მაგივრად მიაგულის თუ დარინეს თვალები მოლანდე-

ზია. ველარ გაუძლია მონადირეს: „აჰუ, ჩემს დღესო“, — აღმო-  
ხეთქია გულიდან. თოფი ხელიდან გაუგდია, მკლავები გაუშ-  
ლია და მიაგულ-დარინესაკენ წასულა მოსახვევნად. უნდო და  
ბოროტი ყინულის უფსკრულებია შხარასა და აილამას კალ-  
თებზე. ისინი ცივი არიან და არ იციან სიყვარული. დაუსაბა-  
მოში დაბადებულებს არასოდეს მზისაგან გული არ გალხო-  
ბიათ... ჰოდა, მარგველანს ყინულზე ფეხი დასხლტომია და  
უფსკრულში გადაჩეხილა.

მონადირეებს მხოლოდ მისი უკანასკნელი ძახილი გაუგო-  
ნიათ, დარინეს და მიაგულს უხმობდა თურმე.

ქმრის სიკვდილი დარინეს მალე გაუგია. ფეხშიშველს ურ-  
ბენია ციკაბომდე. ფეხის გულები დაუსისხლავს ყინულის  
წვეტებზე და გახელებულ ქალს იმ ადგილამდე მიუღწევია,  
სადაც მხოლოდ თოფი უნახავს და სხვა არაფერი.

უფსკრულში გასარკული ყინული ჩანდა, ქვევით კი ხალდე-  
შურა ლულულებდა.

— ჰაუ, ოტიავე — ეძახდა ქალი ქმარს, — რად მიმატოვე  
ასე უცებ, ჩემო სიცოცხლე! დარინე ვერ გაძლებს უშენოდა  
ვია ჩემს დღეს, შენს მკლავზე ღამენათევს მხოლოდ შენთან  
მაქვს ბინა!

ბარბაციო ძირს ჩამოსულა, ყინულის ზეავს ქვემოთ. იქ,  
სადაც ხალდეშურა ქვესკნელიდან გამოდის და მზეს პირველად  
შეხედავს, ახლაც დიდი ლოდი ძევს. იქამდე ფორთხვით მი-  
სულა, თოფის ლულა შუბლზე მიუდვია, ჩახმაზი გამოუსხლეტია  
და თვითონაც ხალდეშურას შხეფებით აბოლებულ ტალღებში  
ჩაეარდნილა. იმ ლოდს ქვემოთ ახლა ორი მჩქეფარე მყავე  
წყარო ამოჩუხჩუხებს მიწის გულიდან. ქვებზე სისხლის კვა-  
ლივით აჩნია წვეთების ენაგი. ამბობენ, დარინეს ცრემლებიაო.

გულმდულარედ მოუსმენია ეს ამბავი მიაგულს, ძაძა ჩაუ-  
ცვამს, თმა გაუშლია. ყოველ საღამოს იგი იფაროდან გაიპა-  
რებოდა თურმე, ენგურის პირს აპყვებოდა და მის ღრიალა  
ტალღებს ცრემლებს აფრქვევდა.

მდინარის მარჯვენა კიდეზე ჯდებოდა, სწორედ იქ, სა-  
დაც უზარმაზარი კლდე არის ენგურში ჩაგორებული, ეგონა —  
ოტიასა და დარინეს ტანზე ნასხურები ხალდეშურას წვეთები  
იქ ჩამოივლიდნენ. ეს, მართლაც, ასე იყო. მისი აფორიაქებული

შხეფები სწორედ ამ კლდესთან მოედინება. მის კალთებზე შედგებოდა მიაგულ, თლილ თითებს მდინარეში ჩაჰყოფდა და ისე ეალერსებოდა მის ტალღებს, თითქოს ოტიას მკერდს ეფერებოდა.

მიაგულმა ახლა მთელი გულით შეიყვარა დარინე, დარინე, რომელიც მასზე უწინ შეიტკბო ოტია მარგველანმა. დიდხანს ღრებოდა ენგურის პირას მიაგულ.

ჯავრში ჩავარდა ბექნუ პირველი. მიხვდა ძველი მონადირე, მისი ქალიშვილი უკურნებელი სენით რომ იყო შეპყრობილი.

— თავი ნუ მოიკალ, გოგო! — შეელაპარაკა ერთხელ მიაგულს მამა. — ოტია სატირელი არ არის. ფიქრგაურკვეველი კაცი იყო, ცოლ-შვილის მოღალატე. პატიოსანი ვაჟკაცის გულში ერთი ქალის სიყვარულის გარდა სხვა თვალმა არ უნდა ჩახედოს. ის კი...

მიაგულმა სიტყვა არ დააცალა მამას:

— მე მას კი არ ვგლოვობ, მამა, მე ჩემსავით ბედკრულ დარინეს დავტირი.

— როგორ თუ დარინეს?! — გაოცდა მონადირე.

— დიახ, დარინეს ვგლოვობ, ოტია მარგველანის ცოლს.

— მერე შენ ხომ ოტია გიყვარდა?

— კი მამაჩემო, ოტია მიყვარდა. იმ ბეჩავსაც ხომ ოტია უყვარდა. მე და დარინე ერთმა გრძნობამ შეგვავერთა, ერთფერი აღმოვჩნდით, ერთი კაცის სიყვარულმა დაგვლუპა. მისი გულიც მხოლოდ ერთი სიყვარულის დამტყევი იყო, მეორე არ ეტეოდა.

— შენ საიდან იცი, ქალო, დარინე ხომ არც კი გინახავს?!

მიაგულს თვალზე ცრემლი მოადგა.

— არა, არ მინახავს, ნეტავი ერთხელ მაინც შემეხედა. ამბობენ, ძალიან ლამაზი იყო. ისე კი ვიცნობ, მისმა გულმა გამაცნო, მისმა ფიქრმა და ტანჯვამ უხილავად დამაახლოვა, მისი გუნების სიმთელემ მის ღვიძლ დად გამხადა. რა ვუყოთ, რომ მასაც ის კაცი უყვარდა, ვინც მეც დამლუპა. ორივენი ერთი ფიქრისა და ერთი გულისა აღმოვჩნდით, ოტიას კი ამტყეყნად არც ფეხის დასადგმელი ადგილი ჰქონდა და არც.

წმინდა ცა ეხურა თავზე. ორი სატრფო ერთ გულში არ დაე-  
ტევა, არ მოთავსდებოდა. დაიღუპა კაცი და ჩვენც დაგვღუპა.

გარინდებული უსმენდა მამა მიაგულს.

— შენ რაღა ხარ, შვილო, დაღუპული, შენ შენი ბედი წინ  
გიდევს.

— არა, მამა, ჩემი ბედი ოტიასთან ერთად ხალდეშურას  
ტალღებს შეერთია.

— მეც დაგიღუპივარ, შვილო, და ეს არის ნუთუ მამა არ  
გებრალეობა?

მიაგულს ცრემლებმა ღვარივით გადმოხეთქა, იგი მამას  
მკერდზე მიეკრა.

— მებრალეობი, მამა, მებრალეობი, ვიცი, რომ ჩემს გარდა  
არავინ გყავს. მარტო მე ვარ შენი ნუგეში. იმიტომ უნდა ვი-  
ცოცხლო, შენთან უნდა დავრჩე — ქალიშვილმა ცოტა უკან  
დაიხია, ბექნუს თვალებში ჩახედა და ჩურჩულით განაგრძო:—  
მაგრამ ერთი სათხოვარი მაქვს, მამავ, იცოდე, უარი არ  
მითხრა.

— თქვი, შვილო, თუკი შევიძელ...

— შესძლებ, მამა... თუ მე გიყვარვარ, ამ კლდეზე, აი, ამ  
ენგურში ჩამოგორებულ ლოდზე კოშკი უნდა ამიშენო. მეც  
მოგვხმარები; ქვებს მოვზიდავ, კირს მოვზელ, ქვიშას მოვაგ-  
როვებ. ხომ ხედავ ამ კლდის კალთას, ყოველ წუთს მათი ნა-  
ბანი წყლით რომ ირეცხება. მეც ყოველ დღით ამ შხეფებით  
დავიბან ხელ-პირს: ხალდეშურას წვეთები შეგვაერთებს ორ  
დაღუპულსა და ერთ ტანჯულ ადამიანს. ასე სჯობს, მამა, ასე  
კარგი იქნება!

ბექნუ გაშტერებული უყურებდა ენგურის აქაფებულ ტალ-  
ღებს, აბობოქრებულნი რომ ასკდებოდნენ კლდეს და ისევ  
უკან იჩქაროდნენ.

— კარგი, შვილო, იყოს შენი ნება! — ოხვრით თქვა ბექ-  
ნუ პირველმა. მონადირემ მიაგულს მკლავეზე ხელი მოჰკი-  
და. — მხოლოდ იცოდე, ჩემო სიცოცხლე, — ნელა განაგრძო  
მან, — ცრემლს მოერიდე, ხომ იცი, ცრემლი ადამიანის გუ-  
ლის მჭამელია.

ერთხელ კიდევ ჩამოთოვა ხევებში და ერთხელ კიდევ ამ-  
წვანდა გორაკების კალთები, ბოცა ბექნუ პირველმა მაღალ-



ქონგურებიანი კოშკი ააშენა, კლდეკალთაზე შემდგარ მის ფუძეს ბალავერი არ დასჭირვებია. ჩრდილოეთიდან სახლიც მოუდგა ბექნუმ. ალბათ, თვითონაც უნდოდა ქალიშვილის ახლო ყოფილიყო.

მშვენიერი დილა-საღამო იცის ენგურის ხეცმა. დილით ნაზი და თხელი ნისლი დაეყრება შფოთიან მდინარეს. კლდეებზე და ერთმანეთზე შეხლილი ტალღები ცას შხეფებს ლალად ესვრიან. მის ცივ გიჟმაჟ ჩქერებზე ტანზე ბროწეულდაყრილი თევზები ნაგარდობენ. ამწვანებული მთები დილას და საღამოს მზის სხივით ივსება. ჩრდილოეთით კი ყინულოვანი მწვერვალებია. გორაკებზე არყის ხეები, წიფელები და ფიქვ-ნაძვები ცაში შეტყორცნილან.

ყოველ დილა-საღამოს ჩამოდის კოშკის კალთებთან მიაგულ, ბროლის თითებს ენგურის ტალღებში ჩაპყოფდა და ფიქრს მიეცემოდა. მდინარის სიღრმეში ხანდახან კალმახები გაიელვებდნენ. თვალი უშტერდებოდა მაშინ მიაგულს. ენგურის აქოჩრილ ტალღებზე ჯერ თითქოს ჩრდილივით გაჩნდებოდა რაღაც, მერე ეს ჩრდილი შედედდებოდა და ოტიად იქცეოდა. ერთი შეტრიალდებოდა წყლის ზედაპირზე ოტიას აჩრდილი და მერე მისკენ ხელგაშვერილი წამოვიდოდა. მიაგულ წუხდა, მაგრამ მკლავს არ მიაშველებდა. ვაჟკაცს ნაპირზე არ ამოიყვანდა, გვერდით არ მოისვამდა.

— ცოდვიანი კაცი ხარ, ორი ქალის სახე ჩაადე გულში და ორივე დაგვლუპე, — ჩურჩულებდა მიაგულ.

მაშინ კოშკის ქონგურზე მიყუდებულ ბექნუს ესმოდა, თუ როგორ ესაუბრებოდა უხილავ დარინეს მისი ქალიშვილი...

## აზხაზური თქმულება

ჩემს მეგობარს შოთა ძიძიგურს

— შუალამე თუ გადავიდა, დედი?!

— ჯერ აღრეა, ასტამურ! — უპასუხა დედის მაგიერ უფროსმა ძმამ და ქალამნების თასმებს დაუწყუო შეკვრა.

ქალარა დედა ნელა წამოდგა, კარი გამოაღო, ხელი სახეზე მოიჩრდილა, ძირს გაწოლილ წკვარამ ღამეს გახედა, დიდხანს უყურა, მერე ზევით ასწია თავი და ცას მიაპყრო თვალები.

— რამდენი ვარსკვლავია ამ ჩვენს დალოცვილ ცაზე, არსად ამდენი არ იქნება. დედა ენაცვალოთ! ჩემი ბიჭების თვალბივით ციმციმებენ. ალბათ, ეს ვეებერთელა ცის გუმბათი დედის კალთაა, ვარსკვლავები კი ჩვენი შვილების გამოხედვაა. აი, ორი წვრილი კიაფა ვარსკვლავი რომ ციმციმებს ცის კიდებზე, ჩემი შვილიშვილის თვალებია, — გამოეპასუხა თავის თავს დაჭილი.

— ეჰ, ქმარი რომ ცოცხალი მყოლოდა, რაღა მიჭირდა ბედშავს, ჩემზე ბედნიერი ქალი ამ ვარსკვლავეთის ქვეშ მართლაც არ იქნებოდა!.. — კვლავ ჩაილაპარაკა და, გულისპირზე ისე მოისვა ხელი, თითქოს ოდესღაც ქმრის ხელით მიბნეულ ქინძისთავს იმაგრებდა სამოსელზე. მერე ისევ ცას გახედა, თვალი მოაველო და შინ შებრუნდა.

— გათენებას ერთი ძილისპირი აკლია, შვილებო, წასვლის დროა, დამილოცნიხართ!

— სანამ ყაბალახებს დავიხურავდეთ, ძაღლი გამოუშვი, დედი! — შეეხვეწა უფროსი შვილი.

— კი, შვილო, კი, კიხალაშ დაძავეიწყდა, აბა, უძაღლოდ მონადირე ვინ გაიგონა?! — დაჯიღმა ისევ გამოაღო კარი, გარეთ გავიდა.

ძმებმა ყაბალახით თავი გაიკრეს, თოფი გადაიკიდეს და წასასვლელად მოემზადნენ.

— შუქზიარას არ დაემშვიდობებები? აკვანში ბავშვი არ გააღვიძო, ასტამურ, — წყნარად, მზრუნველად უთხრა უფროსმა.

— ბარემ მინდოდა, მაგრამ.. — ასტამური გამოღებულ კარის ზღურბლზე კრძალვით შეაჩერდა ძმას, მერე ხელი ჩაიქნია და ჩაილაპარაკა: — თვითონ შემეხვეწა, ბავშვს რომ აძინებდა, უჩემოდ არ წახვიდეო.

უფროსმა ძმამ კარი ცხვირწინ სიცილით მიუხურა.

— არ დაიგვიანო, დედა ჭიშკრამდე გაგვაცილებს.

დიდ ნიგვზის ძირში მათეს დედაზე წინ ძალი შემოეგება, ღამეზე შავი ვეფხო სიბნელეში უფრო დიდი მოჩანდა. იგი წინა ფეხებგართხმული შეაჩერდა პატრონის თვალებს და, რაკი მათში ალერსი შენიშნა, საკინძეზე შეეტოტინა.

— პატა! — შეუწყრა მათე. ძალიც უხასიათოდ ჩამოხტა მიწაზე და აქეთ-იქით მიიხედა. ბალახის ფხოქნა დაიწყო და ნიგვზის ტოტებს შეუყეფა.

— ასტამური მალე დაგვეწევა, — ჩუჩურჩულა მათემ. ძაღლს. პატარა ბიჭს აკოცებს, ვეფხო, ხომ უნდა დაემშვიდობოს ცოლ-შვილს.

მოახლოებულმა დედამ ჩურჩული გაიგონა.

— თქვენ კი გენაცვალეთ, რომ ასე გიყვართ ძმებს ერთმანეთი — ახლა დედამ ჩაიჩურჩულა და ცისკენ ხელები აღაპყრო: — ვაი შენს მუღულეს, მათეს და ასტამურის მამავ, მათ დავაყვაცებას რომ ვერ მოესწარ, შე უბედურო!

— ვის ელაპარაკები, დედი?

— თქვენს ლოცვას ვამბობ, შვილო. ხომ იცი ბიჭო, დედის გულს შვილებზე ფიქრი და ლოცვა ამავრებს.

— შუქზიარას და ბიჭს მიხედე, დედი. ჩვენ რა გავგიჟირდება, პირველად ხომ არ მივდივართ საჯიხველ!

— პირველად არა, მაგრამ რაღაც გული მიკვნესის, შვილო, — თითქოს ენა მოკვნეტოდეს, უცებ დედა ისე შეჩერდა. — ეს რა წამომტაო, — გაიფიქრა და უნებლიეთ კინა-

ლამ ხმამაღლა დააყოლა — ვაი, რომ ძუძუს თავებიც ამეწვა, ბიჭო.

მათე თვალების ბრიალით მიუახლოვდა დედას.

— დედა, თუ გული ცუდს გეუბნება, აღარ წავეალთ.

დედა ისევ შეჩერდა. სახლის კარს გახედა და წყნარად თქვა:

— ასტამურ არ იზამს, შეილო, ხომ იცი, ფიცხი ბიჭია, მერე შენი ბედი მაწუხებებს და ბევრი რამე მედარდება.

— მე რა მაქვს საწუხებელი?!

— სად გაგონილა, ბიჭო, უმცროსმა ქალი შეირთოს, უფროსი კი უქალოდ დარჩეს.

— ჰე, დედი, ნუ ჩქარობ, არ დავრჩები, ხომ იცი, თავს არ დავიჩაგრავ.

— ნუ გერიდება, შეილო, ძმისა, განა მას არ გაუხარდება შენი ქორწილი?!

მათეს გაეღიმა, მერე ოღნავ შეჩერდა და დაფიქრებით თქვა:

— დედი, ხომ იცი, ბევრი ხარჯია საჭირო. ახლახან ერთი ქორწილი გადავიხადეთ, მეორე ასე უცებ გაგვიძნელდება. ცოტა ხანი კიდევ და — ბედიც მოფრინდება ორივე ფრთით.

— ვიცი, შეილო; ვინც გიდევს გულში. მისი ტოლი ქალწული აფხაზეთში არ არის.

— მე სხვა მინდა, დედი, — გაიღიმა მათემ.

— ვიცი, შეილო, ვინც შენს გულს უნდა. დედის გულღვიძლი შეილის გულღვიძლთან უშორებელია, ვერ მომატყუებ, შეილო, ვერა.

— კარგი, დედაჩემო, ასტამურმა არ გაიგონოს. იდარდებს. აქაო და, ხელი შევეუშალო.

— კი, შეილო. ხელი მართლაც შეგიშალა. თუმცა მისი რა ბრალია, შენ დაიჭინე, საქვეყნო წესი დაარღვიე. უმცროს ძმას ქალი უმალ მოაყვანინე.

— ასტამურის მეტი ვინ გვყავს, დედი, ამქვეყნად. მისი ერთი დღის დარდი მეც დამადნობდა და შენც.

— ახლა, ბიჭო, შენ რომ დნები იმ ქალის სიყვარულით?

— ჩემი მოითმენს. — ჩაფიქრებით თქვა მათემ და სახლისკენ გაიხედა. ისევ სიწყნარე იყო, ჯერ არავინ ჩანდა.

— მარულაზე ვნახე, ცხენზე იჯდა, დალალები უზანგამდე უწევდა, თეთრი დარაიას ყაბალახით თავი აფხაზურად ებურა, თვალი ვერ მოვაშორე, ბიჭო!

მათე გაილურსა.

— ჩვენი პატარა ბიჭივით სხივნათელი თვალები აქვს.

— კარგი, დედი!

— დოღშიაც ყველას აჯობა, შვილო!

— გაჩერდი, დედი, გაჩერდი — ბავშვივით მოეხვია მათე დედას და შუბლზე აკოცა.

— კარგია ჩვენი შუქზიარა, მაგრამ იმ შენი რჩეულის ჩვენ სახლში დაგულება მეჩქარება, დედის გული მეუბნება, შვილო.

სახლის კარი გაიღო და ასტამურთან ერთად შუქზიარა სანათით ხელში გამოჩნდა. სინათლე სიბნელეში ფარშავანგის ფრთასავით გაიშალა და მწვანე ბალახში აკანკალდა.

— არაფერი თქვა, დედი, შუქზიარამ ექვი არ აიღოს, — ჩაიჩურჩულა მათემ და დედას ლოყაზე აკოცა.



თენდებოდა. კავკასიონის ცადაზიდული ყინულოვანი მწვერვალები ღრუბლებს ზემოდან დასცქეროდნენ ქვეყანას. ნისლი თანდათან ქვემოთ იწევდა. კრიალა ცის გუმბათის დიდებულ სილურჯეში მათათა თეთრი წვერები თვალისმომჭრელად ქათქათებდნენ. ჭერ კიდევ ბინდით მოცული ხევები ნისლში გარუჯულიყვნენ. ქვესკნელში შხეფაბოლებული მდინარეები კლდეებს ასკდებოდნენ. ცასა და ჩაბნელებულ ხევებს შორის ფერდობებზე შეფენილი ტყე შრიალებდა.

— ჰამ, ჰამ, — მოისმოდა ხევის პირზე ძაღლის ხმა და ყეფას იმეორებდნენ მთის კალთებზე ამოლტილი ტყეები.

— გაჩუმდი, ვეფხო, ახლა ხმამაღლა ყეფა აღარ შეიძლება, საჯიხვეებს ვუახლოვდებით, — უტევდნენ ძმები ძაღლს.

ვეფხო აქელებული შორდებოდა ხევის პირებს და სიჩქარით გარბოდა აღმადაკიდებულ ბილიკებზე.

ზევით და ზევით თეთრი სამყარო იწყებოდა. ჭერ აქა-იქ

თოვლის და მოხეტიალი ზეავების გუნდები გამოჩნდა, შემდეგ კი წრიახებზე დაკიდებული ყინულის უღნობი კლდეები. მზე ნელ-ნელა ამოიწია მწვერვალბგადაღმიდან. თვალისმომჭრელი სინათლის ბული დაიბნა ყინულის კალთებზე. ძმებმა სასაუზმოდ შეისვენეს.

— თითო არაყი დავლიოთ, ასტამურ, — ბრძანა უფროსმა.

— დავლიოთ, — ჩაფიქრებით თქვა უმცროსმა ძმამ.

მათე ასტამურს დააცქერდა.

— რამ ჩაგაფიქრა, შენი ბიჭი გაგახსენდა?!

— ოჰ, გამახსენდა, — გაიღიმა ასტამურმა, — რომ მოვდიოდით, პატარა ხელებით უღვაში დამაწიწყნა, — მოკრძალებით შეხედა უმცროსმა უფროსს:

— თუ კარგი ნადირობა გვექნა, ჩამოსვლისთანავე ნათლობა უნდა გადავიხადოთ.

— არა, ჯერ შენი ქორწილი უნდა მოვათავოთ, ხალხის ყბაში ვართ ჩავარდნილი. ამბობენ: უმცროსმა ქალი მოიყვანა, უფროსმა კი არაო.

— სხვას ყურს ნუ უგდებ, ჩემო ძმაო, ჩვენი ოჯახის საქმე ჩვენ ვიცით.

— დედასაც, იღბათ, გული ეთანაღრება, თვალი ვერ გამისწორებია მისთვის. შენიც მრცხვენია, მათე! ვიცი, ჩემს სულწასულობასაც აპატიეთ ყველაფერი.

— რას ამბობ, ბიჭო, სულწასულობა კი არა, ასე იყო საქირო. მე ჯერ არავეინ მიდევს გულში.

— ვითომ?!

— გეუბნები და დამიჯერე.

— მე კი მგონია, შენ ჩვენს ძმობას მოეფერე და ჩემი სულმოკლეობა სოფელს დაუმალე.

— გაგაუდი, ძმაო?! — მათემ ძმას ბეჭებზე მოხვია ხელი. — ასეთი რამ გულში არ ჩაიდო. მე ჯერ თვალში არავეინ ამომიჩემებია.

ასტამურმა ღიმილით და ოდნავ დაცივნით მოჭუტა თვალი:

— არც ხიმური მოგწონს, თარკილის ქალიშვილი?!

მათეს აღმურმა გადაუარა სახეზე. შუბლზე ოფლის ცვარმა გამოყოფა.

— ლამაზი ქალიაო, ხიმურზე ითქმის. ნაწნავები ბაშლა-

ყის ფრთებზე გრძელი აქვს. მისი ტანი სიარულის დროს ფშანში ამოსულ ლერწამივით ირხევა. ჩემმა შუქზიარამ გუშინწინ თვითონ მითხრა, მათეს შესციცივნებს თვალბშიო. ხომ იცი, ქალმა ქალისა იცის.

— ჰაუ, შუქზიარას თვალი დაცდენია. სად მე და სად ხიმური?

ასტამური გააკვირვა ძმის წამოძახილმა.

— ვითომ რატომაო?

მათემ უცებ ვერაფერი მოისაზრა და გაწითლებულმა ისეთი რამ წამოროშა, მერე თვითონაც ინანა.

— ხიმურს ჩვენი ძუძუმტე უნდა უყვარდეს.

გაოცებული ასტამური ქარივით წამოიჭრა.

— რომელი ძუძუმტე?

— ხირიფს თარბა.

ასტამურს თითქოს ქვა მოხვედროდეს შუბლში, ისე შეტოკდა.

— შეუძლებელია, — თითქოს თავისთვის ჩაილაპარაკა და მერე გულწრფელად დაატანა: — აბა, რაღა გვეშველება?!

მათეს სახეზე ღიმილი მოერია.

— რას ჩააცივდი თარკილების ქალიშვილს? ჩერ შენი ბიჭის ნათლობა გვიძევს წინ. მერე კი, ვნახოთ.

უმცროსმა ისევ ახედა უფროსს, შუბლზე ნამი შეამჩნია.

— არა, მათე, ნუ მატყუებ ასტამურს, ხირიფს თარბა შენ ამორჩეულს თვალს არ გაუმართავს.

— არც მე გაუმართავ მის საცოლეს თვალს.

ასტამურმა არაფერი უთხრა ძმას. ცოტა ხანს იყუჩა, მერე მთებს გახედა და წყნარად თქვა:

— მე კი სხვანაირად მეგონა. უკვე რძლად ვიგულებდი ხიმურს.

მზემ ქვეყანას მთელი ძალით დააცხუნა სხივები. ყინულის გარეკანს ცრემლი დაეტყო, მათემ თვალი შეავლო კალთებს: ნელ-ნელა წყდებოდნენ წვეთები სხივებით გამთბარ ყინულეთს და ვერცხლისწყლის ცვარებად ძირს ცვიოდნენ. ზოგან ისინი ერთმანეთს უერთდებოდნენ და პატარა ღარებს ქმნიდნენ. მზის სხივთა საოცარ ლივლივში ეს მარგალიტის შხეფები ბეწვისხელა ნაკადულად მიჩხრიალებდა ყინულის კედლებზე.

— ასტამურ, თოფებს ჩოხა გავაძროთ, — თქვა უფროსმა ძმამ.

— ჯერ აღრე არ არის, ვითომ? — იკითხა უმცროსმა.

— საჯიხვეთი უკვე იწყება. რა იცი, სად წავაწყდებით ჯოგს.

— კარგი, — არ შეედავა ასტამური, — შენი ნება იყოს.

ყანწები და ნარჩენი შოთები ხურჯინში ჩაალაგეს, თასმები გაიკრეს, თოფებს ჩოხა გააძრეს და ზევით გასწიეს.

შუადღემდე იარეს ძმებმა და „თეთრ ხევს“ მიალწიეს. გაღმა-გამოღმა ყინულის კალთები იყო აზიდული. ქვემოთ, ყინულის სქელ კედლებს ქვეშ მდინარე მიჩხრიალებდა. გადასასვლელზე გადახტომის დროს მათეს მოულოდნელად ფეხი დაუცდა და კოჭი შეუბრუნდა.

„ამიხდა, დედაჩემის ნათქვამიო“, — გაიფიქრა უფროსმა ძმამ, თქმით კი არაფერი უთქვამს.

ჯერ არ დაიმჩნია მათემ ეს ფათერაკი, მაგრამ ცოტა ხნის შემდეგ კოჭლობა დაიწყო.

— ფეხთ გაიხადე, ვნახოთ, რა გაქვს, — წამოიძახა ასტამურმა.

მათემ ქალამანი გაიხადა და კოჭს დახედა. ფეხი ორივე მხარეს შესიებული ჩანდა.

— ცუდი ნადირობა მოგვიხდა, მათე, უკან უნდა დავბრუნდეთ.

— არაფერია, სიარულს როგორმე შევძლებ, ასტამურ. მხოლოდ ვიჩქაროთ.

ფეხი გისივდება, მათე, ამ წრიახებს უნდა გავშორდეთ.

— თითო ჯიხვი თუ არ მოვინადირეთ, სოფელში ჩასვლა სირცხვილია, ბიჭო.

— უფეხოდ ჯიხვზე ნადირობა ვინ გაიგონა, ძმაო, ფათერაკის მეშინია.

— ასტამური! ნათლობა მალე უნდა გადავიხადოთ, უიმისობა არ იქნება.

უმცროს ძმას თითქოს მუხლებში გააკანკალა, ისეთმა ფერმა გადაუარა სახეზე.

„ნათლობა ეჩქარება“, — გაიფიქრა მან და კინალამ ხმამაღ-



ლა წამოიძახა — აბა, მიგიხვდი, უფროსო ძმავო, ჯერ ამან მოვილევო, მერე კი შენს ქორწილსაც გადავიხდით.

— კარგი, შენი ნება იყოს. მხოლოდ მეშინია, არ დავარდე! — ეს სიტყვები კი ხმამალა თქვა ასტამურმა.

ორივემ შემოიხვია ყაბალახები და ნელა დაიწყეს ციყაბობებზე სვლა.

წინ ახლა უმცროსი მიდიოდა. უკან მათე მიჰყვებოდა. უქირდა სიარული. სიძისგან თანდათან მატულობდა, ფეხი უხურდა. ასტამურის ნამალავად ჯერ პაჭიჭი გაიძრო, მერე ორ წინდიდან ერთი გაიხადა.

ვეფხო ისევ წინ გარბოდა, ახლა იგი ჰგუნებოდ იყო. არ ყფდა, კუღდაშვებულ მიჰყვებოდა ბილიკებს. ხანდახან მობრუნდებოდა, დაიკდიდა და მათეს შეხედავდა თვალბში, თითქოს წუხილს მიუხვდაო, ფეხით ყინულს მოფხაქნიდა და ისევ წინ გაიქცეოდა.

მზე გადაიხარა. ბინდდებოდა. ძმებს განზრახული ჰქონდათ ღამე საჯიხვე მთების მისასვლელზე გაეთიათ და ალიონს დაეწყათ ნადირობა. საღამო ხანს ნისლებმა ქვევიდან ზევით იწყეს სვლა. მხოლოდ მთის თეთრი წვერები იყო მზის სხივებში გახვეული. ნისლი თანდათან სქლად ეხვეოდა კალთებს, ქვევით აღარაფერი ჩანდა. უცებ, თითქოს მიწა გაირღვაო, ისეთი ხმაური მოისმა. გაღმა მთის მწვერვალს ვეება ყინულის კლდე მოსწყდა და ქვემოთ წამოვიდა. დაქანებული ზვავი გზაზე ყველაფერს ხვეტავდა, იხვევდა და საოცარი სისწრაფით იზრდებოდა. ძმებმა გახედეს მომსკდარ კლდეს და ფერი ეცვალათ, გრგვინით და ზატქით მოხეტქილი ყინულეთი თითქოს პირდაპირ გამოღმა მწვერვალისაკენ მოექანებოდა.

— გვერდით კალთაზე უნდა გადავინაცვლოთ, ასტამურ! — დასძახა მათემ და იქით გაიწია.

ასტამური მიხვდა უფროსი ძმის განზრახვას. თვითონაც იმ კალთისაკენ წავიდა, საითაც ზვავი ვერ მისწვდებოდა. მთელი ღღის მზის სიმხურვალით ყინულის ქერქი შემლხვალა ჩანდა.

ორი ნაბიჯი ძლივს გადადგეს ძმებმა, რომ ასტამურს მათეს კვნესა მოესმა.

უკან მოიხვდა.

მათე ყინულზე გაშლართულიყო.

ჭიხვივით გადმოხტა ასტამურ ძმისაკენ და მხრებში დასწვდა.

— ისევ ფეხი გადამიბრუნდა! — დაიკვნესა ძმამ.

— ვაი ჩვენს უბედურებას! — წამოიძახა ასტამურმა.

სიტყვა ვერ დაასრულა, რომ გაღმა მწვერვალიდან მომსკდარმა ზვავმა გამოღმა მთის კალთას ჩამოურბინა. თითქოს დედამიწა სკდებოდა და იფშვნებოდა, ყინულის კედლები მეხის სისწრაფით და გრიალით მიექანებოდა უფსკრულისაკენ. ვეება ნამსხვრევები აქეთ-იქით ცვიოდა.

ძმები უნებლიეთ ჩაეკრნენ ერთიმეორეს და ყინულზე გაწვნენ. ზვავთან ერთად საოცარმა სიცივემ ჩაიქროლა უფსკრულისაკენ: როცა ძმებმა თვალი გაახილეს, დაინახეს, რომ აზვირთებული თოვლის მდინარე შხუილით მიჰყვებოდა ზვავის ნაკვალევს.

— გადავრჩით! — წყნარად თქვა მათემ.

— გადავრჩით! — ლოცვასავით გაიმეორა ასტამურმა.

მწვერვალის ჩრდილო კალთაზე მინდორივით გაშლილი პატარა ფლატე მოჩანდა. მათემ იქით გაიწია, მაგრამ ისევ დაიკვნესა, ფეხის გადადგმაც ვერ შეძლო.

— მაჩვენე, ვნახო რა დაგეპართა! — წყნარად უთხრა ასტამურმა.

მათემ წინდის ყელი ჩაიწია და დახედა. სიმსიენე წვივზე ასულიყო, ფეხი მუხლისთავამდე აფუებულ პურის ცომივით მოჩანდა.

— ახლავე ქვევით უნდა, დავეშვათ! — დაასკვნა უმცროსმა ძმამ.

— ხელცარიელი უკან წასვლა ვერაფერი ბედნაა, ძმაო.

უცებ ორივე ძმას თვალები გაუშტერდა. სწორედ მათ ზემოთ, ვიწრო მწვერვალის თხემზე ჩიხვების ჯოგი გადმომდგარიყო, ერთ ადგილზე გაშეშებულიყვნენ, წინ ვეება ყოჩი იდგამისი რქები მზის ჩამავალ სხივქვეშ ნასისხლარ ხმლებივით ელავდა. ქვევიდან ისე მოჩანდა, თითქოს ცის თაღის გასამაგრებლად შებჯენოდა სამყაროს.

— რა ვიღონოთ? — აღმოხდა მათეს გულიდან.

ასტამურს თვალები გაუფართოვდა.

— წავალ, წამოვეპარები, — ჩაუჩურჩულა უფროს ძმას.

— უკვე ღამდება, — ბოლმით თქვა მათემ, — ასვლასაც ვერ მოვასწრებთ.

— მარტო წავალი — შეეხვეწა ძმას ასტამური.

— მარტო?! — თითქოს ბურანში იყო, ისე გაიმეორა უფროსმა და თან დასძინა: — არა, არ შეიძლება!

— მათე, გამიშვი, თორემ, არ ვიცი, რა მომივია!

— ღამდება-მეთქი — გაჯავრდა მათე.

— მოვასწრებ, ბიჭო, მოვასწრებ! — ასტამურსაც გაჯავრება დაეტყო ხმაში.

— ვერ მოასწრებ, ძმაო, — მტკიცედ თქვა უფროსმა.

— ნათლობა დაგავიწყდა?!

მათე გაჩუმდა. პასუხი არ გასცა.

— შენი ქორწილი?!

— ღამდება, ასტამურ. ხედავ, მზე უკვე ჩავიდა.

ასტამურმა ჯიხვებს გახედა. ისევ იმ ადგილზე იდგნენ.

— გავგიჟდები, თუ არ წავედი! — თქვა გადაწყვეტით მან და ყინულზე ხოხვით გასცურა.

— დაიღუპები, ბიჭო, ოჯახს დამიქცევ! — აღმოხდა მათეს.

ასტამურს ეს სიტყვები არ გაუგონია. იგი უკვე ზევიდან ბეწვივით დაკიდებულ ყინულის ღარს მიჰყვებოდა, რომელშიც კრიალა წყალი ყინულის ნატეხებს ქვევით მოარბენინებდა. ციცაბო ყინულის კედელი ძნელად სავლელი იყო. ასტამური ნელა, ფორთხვით მიიწევდა ზევით. მათე შიშით გაჰყურებდა მის მოძრაობას.

— ყინულზე ბზარს დაუკვირდი, ასტამურ, თვალმა არ მოგატყუოს! — ისევ გასძახა უფროსმა უმცროსს.

ასტამურმა ღარს დახედა და გააყრეოლა. ადგილ-ადგილ მკლავი ჩაეტეოდა, ისფთი ბზარები ჩანდა; ზევით გახედა ჯიხვებს და უცებ ყველაფერი გადაავიწყდა. აქედან მთელი ჯოგი უქლებლივ მოჩანდა. ეტყობოდა, ადამიანის სუნი ვერ აედოთ, პატარები ერთიმეორეს ხტომაში ეჯიბრებოდნენ.

— ან დავიღუპები, ან მამალ ჯიხვს მოვკლავ. ძირს ჩავიტან და მათეს გულს გავუხარებ.

ასტამურმა ისევ შეუპოვრად დაიწყო ზევით სვლა.

მათე ყინულის მინდორზე იწვა და ჯიხვებსაც და ძმასაც ჯერჯერობით კარგად ხედავდა. ფეხი ისე სტეხდა, ეგონა, ძვა-

ლი გამტეხიაო. უფროსი ძმის თვალი მაინც ზემოთ იყო მიჯაჭვული. მათემ კარგად შენიშნა, როგორ აფორთხდა ასტამური მწვერვალის ყინულოვან თხემზე და მუცლით გახობდა ზევით. სიბნელე მატულობდა. გარშემო ნელ-ნელა უჩინარდებოდნენ პატარა საგნები, ცის თაღზე ვარსკვლავები უფრო და უფრო მკაფიოდ ისახებოდნენ. ბინდბუნდში მთების ცადაღმართული უზარმაზარი მწვერვალები კიდევ უფრო დიდად მოჩანდნენ.

— ნეტავ მოასწრებდეს ქვევით ჩამოსვლას! — გმინავდა მათე.

ზევიდან ისევ ხრიალი მოისმა, მათეს ტკივილი დაავიწყდა და ძმას გახედა. სწორედ ის ღარი, რომელსაც ასტამური მიჯყვებოდა, მის ფეხებთან შუაზე გატყდა და ძირს ხრიალით წამოვიდა. მათემ სიბნელეში თვალი მოჰკრა უმცროსი ძმის ლანდს. ასტამურმა არააღამიანური ნახტომი გააქეთა და გვერდის კალთას ჩაებღაუქა. რიბირაბოში ისიც გამოჩნდა, როგორ ჩაიმუხლა პატარა ყინულის მინდორზე ჩიუტმა მონადირემ.

— გადარჩა, დაღუპვას გადარჩა! — გამშრალ ყელში ჩაიხრიალა მათემ. ცოტა ხნის შემდეგ ვეფხოს ლანდიც შენიშნა ქვევით მწოლარემ. ძალი ასტამურისკენ მიხობავდა.

„შუან ველარ დაბრუნდებიან!“ — ელვასავით გაჰკრა ამ ფიქრმა მათეს. „ჰაი, რომ მართალი გამოდგა დედის ეჭვი!“ — ახლა თითქოს სხვამ დაუდასტურა ბოლმით. სავსე კაცს ნაფიქრალი. გაღმა მწვერვალები ახლა მუქ, ვეება ლანდებივით აღიმართნენ. იქ, სადაც ჩიხვები იდგნენ, უფროსი მონადირის გამჭრიახმა თვალმა მაინც შენიშნა, რომ ახლა სიცარიელე იყო. ისინი სადღაც გაუჩინარდნენ. ცოტა ხნის შემდეგ ვეფხოს ყეფა მოესმა.

„გადაიკარგნენ, ძალი ისე ახლა არ დაჰყეფდა“ — ისევ შხამი ჩაეწვეთა გონებაში.

კვლავ ძაღლის ყეფა მოესმა. ამჯერად ხმა აშკარად იქიდან მოდიოდა, სადაც წელან ჩიხვები იდგნენ.

— ჰაუუ, ასტამურ! — გასძახა ბნელ სივრცეს.

— ჰაუუ, — ზედ მის თავს ზემოთ მოესმა ასტამურის ხმა. ყინულის თეთრ, პატარა მინდორზე ძალიც და მონადირეც

აჩრდილებად მოჩანდნენ. ცის თაღზე კი უთვალავი ვარსკვლავი ციმციმებდა.

— ჩამოსვლა არ გაბედო! — გასძახა უფროსმა ძმამ.

— ყინულის ერთ მტკაველზე ვდგევარ, გზა უნდა მოვძებნო.

— არ გაბედო-მეთქი დაიღუპები, უსათუოდ დაიღუპები!

— გავიყინებით, ბილიკი უნდა ვიპოვნო!

მათემ კარგად იცოდა, ზვავმომსკლარ მწვერვალზე ამ სიბნელეში ბილიკის ძებნა უცილობლად სიკვდილს ნიშნავდა.

— ასტამურ, დამიჯერე, ბიჭო, ქვეყნელში გადაიჩეხები!

პასუხის ნაცვლად ზემოდან ხვნეშა მოისმა. უფროსი ძმა მიხვდა, ყინულზე თითებჩაფრენილი ასტამური ფეხებით ეძებდა ბილიკს და ამიტომ ამოიხვნეშა.

— ვერ იპოვნე, ხომ?!

— ირგვლივ ყველგან უფსკრულის პირია.

— არ გაინძრე, გეხვეწები, ასტამურ, არ გაინძრე!

სივრცეში ისევ ხვნეშა გაისმა.

ვეფხომ ახლა გაბმით დაიწყო ყეფა.

„ყმუილი დაიწყო — გაიოცა მათემ, — ეს ცუდი ნიშანია“.

— ასტამური — თითქოს თვითონაც დაიყმუილა, ახლან ისე გასძახა უმცროს ძმას.

— რა გინდა, კაცო?! — ბრაზით ჩამოსძახა ასტამურმა და მათეს მოეჩვენა, რომ ძმა კი არა, სხვა კაცი ეხმიანებოდა.

— აჲ დაიძრა, ბიჭო, შეუჭზიარა მაინც შეიცოდდე!

— სწორედ ამიტომ უნდა მოვნახო ბილიკი, — ჩამოსძახა ზემოდან.

— შვილიც დაგავიწყდა?! დაიღუპები, ბიჭო!

— უნდა ჩამოვიდე-მეთქი!

— გადაითენე, ასტამურ, როგორმე გადაითენე.

— არ შემიძლია, ვიყინები.

— ხელები ისრისე, ვეფხოს ჩაეხუტე, ხომ იცი, ძაღლის ბალანს ნაპერწკალი აქვს და გაგათბობს.

— ეჰ, — ისევ ხვნეშა მოესმა მათეს პასუხის ნაცვლად.

— დილა ბილიკს მოგანახვინებს, ძმაო, ახლა კი...

ვეფხო ახლა გაბმით ყმუოდა. მათემ იგრძნო, რომ თრთო-

და, კანკალებდა. ძაღლის ხმა შემაზრზენად გაისმოდა ამ ცივი მწვერვალების სამეფოში.

— გაჩუმდი! — მოისმა ასტამურის ხმა.

ვეფხო მაინც განაგრძობდა ყმუილს. უცებ დარტყმის ხმა მოისმა და მათემ ყურთან ქმუილი იგრძნო, მერე უფსკრულში ჩაქანებული ძაღლის წკაფწკავი გაიგონა.

„ფეხი ჰკრა და გადაჩეხა!“ — ერთხანტელივით დაუარა ტანში ქვევით მწოლს. ცოტა ხნის შემდეგ ქვესკნელიდან ბრაგენის ხმა მოისმა, მერმე ყველაფერი დაჩუმდა.

„გაგიჟდა, ახლავე დაეშვება და დაიღუბება!“ — გაიფიქრა უფროსმა და ცალ მუხლზე წამოღგა.

ცის ტატნობზე მთვარე ამოვიდა. გარემო მთლად გაირინდა და გაცივდა. მხოლოდ ორი ადამიანის ხენეშა-სუნთქვა ისმოდა ამ ყინულეთში. ცალ მუხლზე დაყრდნობილი მათე ახლა ისე იტკირებოდა ზევით, თითქოს თოფს უმიზნებდა ძმას. თვალეზი ველურივით უელავდა, სახე გვერდზე მოღრეცილი ჰქონდა.

— ასტამურ, ჰა ასტამურ! — გასძახა ისევ უფროსმა სივრცეს. მის ხმას ახლა სიმტყიცე დაეტყო. ეტყობოდა, უმცროსმა ვერ იცნო მათეს ხმა, ისე მოულოდნელად და გაკვირვებით ჩამოსძახა:

— რა გინდა, კაცო?!

— სათქმელი უნდა გითხრა.

— რა სათქმელი? — კიდევ უფრო გაიკვირვა ასტამურმა.

— ვიცი, შენი წუთები დათვლილია.

— მეც ვიცი, — თითქოს უღარდელი ხმა მოისმა ზემოდან.

— ჰოდა, ჩემი გაიგონე.

— მესმის, ძმაო, — ახლა ასტამურის ხმას ნაღველი დაეტყო.

— ძმა კი არა, მტერი ხარ ჩემი.

— ჰა?!

— მტერი ხარ-მეთქი, მოსისხლე მტერი.

— მათე, რას ამბობ?!

— ამ ქვეყნად მე და შენ ერთად არ გვედგომებოდლა.

ზემოთ ყინულის ჩხრიალი გაისმა. მათე მიხვდა, ასტამური თითებიტ მაგრად ჩაებლაუჭა ყინულის კლდეცხვირს.

„მით უკეთესი“, — გაიფიქრა მან და ხმაში რკინა და ფოლადი ჩაისხა.

— ასტამურ-მეთქი, კარგად გამიგონე, სანამ შუქზიარას ჩემი თვალები დაინახავდა, შენი ძმა ვიყავ...  
ზევიდან უფრო ხმამაღალი ქშინვა გაისმა.

— გესმის თუ არა? — დაიგრგვინა მათემ.

— თქვი!

— იცი, ქალს რატომ არ ვირთავდი?!

— თქვი-მეთქი?

— შენი ცოლი მიყვარდა!

— არა, ტყუილია ვაი ჩემ დღეს, მათე შეიშალა, ღმერთო-მიშველე! — აბღავლდა ასტამური.

მათე ცოტა ხნით გაირინდა. მისი თვალები ახლა, მართლაც, ნადირის თვალებივით ეღავდა ამ თეთრად ჩაბნელებულ სამყაროში.

— ეს ტყუილი არ არის, მართალია! — მათეს ხმამ ისევ შეაზანზარა ყინულეთი.

— რას ამბობ, მათე, რას?!

— სიმართლეს ვამბობ. მე შენი ცოლი მიყვარდა..

— გაგიჟდა, ნამდვილად გაგიჟდა! — ისევ თავისთვის ჩაიხშიფნა.

— მე კი არა, შენ იყავ გიჟი შუქზიარა შემიყვარდა, შენ კი-ფერ მიხვდი. მორჩა და გათავდა!

— ამას რას მოვესწარი?!

— გათავდა, დღეიდან ველარაფერს ველარ შეესწრები.

— რა თქვი?

— გათავდა-მეთქი შენი დღეები.

— როგორ თუ გათავდა?!

— ამალამ შენ დაიღუპები.

— ჰა!

— დაიღუპები, შენს გარშემო უფსკრული იზრდება.

— მერე? — ახლა სხვანაირი შხამი ჩაეწვეთა ასტამურს-ხმაში.

— შენ კი ერთ მტკაველ ყინულზე დგახარ, უფსკრულიდან სიკვდილი გიწვდის ხელს.

— შენ რა ეშმაკი გახარებს?!

— შუქზიარა დამრჩება, ასტამურ.

— რას ამბობ, წყეულო?!

— მიხარია, როგორც იქნა, გზიდან ჩამოგიცილე. შენი ქონებაც მე დამრჩება, შენ ხომ ჩქმი მონახევრე ხარ.

„ნამდვილად შეიშალა!“ — ისევ დაეკვდა უმცროსი ძმა.

— არა გჯერა?

— გაჩუმდი, შეშლილო გველო!

— არ გაეჩუმდები, შენს გარშემო ყინულებით ქვესკნელია, ასტამურ, შენ კი დაუოკებელი კაცი ხარ. ერთ ადგილს, ვიცი, ვერ გაძლებ. გაინძრევი და დაილუპები.

— ასე ფიქრობ?!

— კი არ ვფიქრობ, მჯერა. შეუჭიარა მე დამრჩება. ისე კი ვერ მოგკლავდი, ძმა იყავ, ქვეყანა დამცინებდა, — ნაწყვეტ-ნაწყვეტად ესროდა ახლა მათე ასტამურს სიტყვებს.

— ვაი, ჩემს დღეს, ძმა კი არა, გველი მყოლია სახლში!

— ჩქარა, ნუ აყოვნებ, ცოტა გაინძერ, რომ უფსკრულში გადაიჩიხხო.

— მაშ, ჩემი სიკვდილი გინდა?!

— მინდა და ასეც მოხდება.

— ასე ფიქრობ? — ისევ შეეკითხა ასტამური.

— გაინძერ-მეთქი! — შებლაღვა მათემ.

— არა, რახან ასე გინდა, შეიძლება სხვა რამ ვილონო, — მოისმა ხმა.

ორივენი წუთითი დაჩუმდნენ. ცოტა ხნის შემდეგ მათეს ყინულზე თოფის დუგლუგის დარტყმის ხმა მოესმა.

„ალბათ, მუხლის ჩასადგამ ორმოს იღრმავებს“, — გაიფიქრა მან და ცას გახედა. ზევით ვარსკვლავები თანდათან ფერს ჰკარგავდნენ. აღმოსავლეთით გუმბათი შეთეთრებული ჩანდა. ნისლში გახვეული ყინული კი ისევ ჩუმად და გარინდებით სუნთქავდა.

„მალე გათენდება და შეიძლება მეშველოს!“ — ხელახლა გაიფიქრა მათემ.

• • •

დაჯილ შამფრიანის ქალი სევანეთიდან მოიყვანა მათენ და ასტამურის მამამ. აფხაზმა მონადირემ ღამე გაათია სევანეთში, მონადირისავე ოჯახში და მის ქალიშვილს თვალი დაადგა.



სვანეთიდან ქალის წამოყვანა არც ისე ადვილი საქმე იყო, შით უმეტეს, ლამაზი ქალისა. დაჯილის დღეობაზე გამოსვლა კი სვან ვაჟკაცებს ნათელს უმატებდა თვალებში.

საკრავზე დაამღერებდა დაჯილ და მის ხმას და სიმის კენესას თითქოს ერთი სიტყბო დაჰყოლოდათ ადამიანების საამებლად... იცეკვებდა და სვან ვაჟკაცებს აჯადოებდა მისი ტანის რხევა, მისი დალალები ნადირობის ღმერთქალს შეშურდებოდა, სწორედ ამიტომ იყო ძნელი დაჯილის სვანეთიდან მოყვანა. აფხაზმა მონადირემ თვალი მოავლო ქალს თუ არა, დაიფიქრა: — ჩემი ცოლი მარტო შენ იქნები ამქვეყნად!

ფიცი ფიცად დარჩებოდა, სვან მამაკაცებს რომ გაეგოთ მისი ფიქრი.

ვერც ის გაიხსენეს სვანმა ახალგაზრდებმა, გული რომ თვალის სინათლესთან აქვს ქალს შეერთებული.

შეხედა თუ არა დაჯილმა აფხაზ მონადირეს, გულმა უთხრა — აი შენი ბედი და იღბალიო.

არც შეიძლებოდა ქალწულს თემკვა არ მოსწონებოდა. მის თეთრ, მაგრამ მზით გარუჯულ სახეზე გრძელწამწამიანი შავი თვალები იმდენ ცეცხლს აფრქვევდა, რომ დაჯილს ეგონა, სვანეთის ყველა ყინულის წვერიც კი დადნებოდა მისი სითბოთი. ოდნავ კეხიან ცხვირს ქვემოთ ულვაშის შავი ზოლი ბიბინებდა. სწორი ნიკაპი და ფართო შუბლი მეტად ვაჟკაცურ იერს აძლევდა მის სახეს. კობტად შეკოპილი თეთრი ბაშილაცის ქვემოთ შავი თმის ერთი კონა თითქოს ნიავსაგრილებლად ჰქონდა გადმოშლილი. ნაცრისფერი შალის ჩოხა ტანზე ისე დასდგომოდა, გეგონებოდათ, ისიც მასთან ერთად დაბადებულიყოს. მის ბეჭებს ვაჟკაცის მკლავი ვერ შემოსწვდებოდა, წელს კი მუჭშიაც მოიქცევდა ქალწულის ხელი. შავი ყაითნით პირმოქობილი პაიჭები ეცვა, ამოკოპილი ქალამანი თეთრი თასმით ჰქონდა ამოკრული.

ვარსკვლავებივით ციმციმა თვალები შეანათა თემკვას დაჯილმა, ვეფხვივით ჩამოხედა ზევიდან ქალწულს მონადირემ. ორივე მიხვდა ერთმეორის გულისნადებს და ორივეს ერთი აზრი გაუჩნდა ფიქრად.

მხოლოდ სახლიდან გაპარვით შეიძლებოდა მათი დაქორწინება.

ორი კვირა იარა მთებზე თემჰვამ, ვითომდა სანადიროდ. ამ ხნის მანძილზე ზუთი დამე საპატარძლოს ქონგურმალალ კომკიან ქვიტიკირის სახლში გაათენა და მეექვსე დამეს სვანების ნამალეუვად დაჯილ ქალი აფხაზეთისაკენ გაიტაცა. განრისხებული შამფრიანები მუჭით კლდეებს ამტვრევდნენ. ორი წელი უტრიალებდნენ სიძის კარ-მიდამოს გარშემო სამტროდ, მაგრამ დაჯილმა მამა-ძმას ხელაკვრით შეუთვალა: — თემჰვას რომ ერთი თმაც ჩამოუვარდეს, მეც თავს მოვიკლავო.

ძალზე უყვარდათ ოჯახში დაჯილი. იგრძნეს შამფრიანებმა, მათ ქალიშვილს სვანი ქალის ჩვეული სიყვარულით შეჰყვარებოდა აფხაზი მონადირე.

აბა, სვან ქალს ვინ ამოუგდებდა გულიდან ქმრის სიყვარულს?! სიკვდილის მომტან მტრობას მშვიდობიანი სიყვარული არჩიეს გონიერმა შამფრიანებმა.

ერთ დილას დაჯილის მამა ქალიშვილის ჭიშკარს მიადგა. თავდახრილი სიძე სახლის ზღურბლზე შეეგება სიმამრს. დაჯილი აკვანში ჩაკრულ მოლულუნე მათე-ბიჭს ურწევდა. შვილიშვილი გაღებულ კარში შემოსულ მზის სხივსა და პაპას ღიმილით შესციცინებდა. ყველა წყენა ერთად დაავიწყდა დაჯილის მამას.

ეს იყო და ეს. ამის შემდეგ შამფრიანები გულდაგულ უვლიდნენ სიძის ეზო-გარემოს, რათა ვინმეს შიგ. სამტრო თვალით არ გადაეხედა.

ადამიანის ბედიც ვარსკვლავებით მოჭედილ მოკამკამე ცასა ჰგავს. ერთი წამი და ყველაზე დიდი ვარსკვლავი მოსწყდება ამ კრიალა ზეცას, სივრცეში გაიეღვებს და მის კვალსაც მერე ვერავინ დაინახავს. ასე დაემართა დაჯილსაც: ორი ჩვილი ბიჭის პატრონ ქალს თემჰვა უცაბედად დაეკარგა. დარჩა ახალგაზრდა ქვრივი და წყვილად გასაზრდელი მემკვიდრეები.

მას შემდეგ კარგა დრომ გაიარა. ძმისშვილი ივაკი შამფრიანი თვალსა და მკლავს არ აცილებდა ადრე დაქვრივებულ მამიდას, ბიჭები დამწიფდნენ და დავაჟაკდნენ, განთქმული მონადირენი დადგნენ. დედა ახლა ყოველთვის გულისფანქვალთ ელოდა თავისი ვაჟაკების ნადირობიდან დაბრუნებას.

ჯიხვის ხორცს სვანის ქალი აღტაცებაში მოჰყავდა.

— იმას სხვა გემო აქვს, შინ გაზრდილი ოთხფეხი, აბა, რა საჭმელია? — იტყოდა დაჯილ.

დედის მორჩილად გაზრდილმა შვილებმა იცოდნენ მისი ხასიათი და ოჯახში მარილდაყრილი და კვამლში გამომშრალი ჯიხვის ბეჭები გამოუღეველად ინახებოდა.

შვილებს რომ არ მოეტანათ, ივაკი შამფრიანი დაჯილ მამიდას ჯიხვის ხორცს შემოაკლებდა?!

სვანმა კაცმა თავგადაღებული და უღალატო ნათესაობა იცის. ძმები რომ ჰყოლოდა ივაკის, ისე არ ეყვარებოდა, როგორც მათე და ასტამური.

მართალია, აფხაზი მამიდაშვილებივით სხარტი და ლამაზი არ იყო ივაკი, მაგრამ მისი ბეჭების ჩრდილში ხუთი კაცი მოიგრილებდა. სამწყურთიან სატევარს არ იშორებდა. ატოტებულ დათვს შუაზე კვეთდა ერთი მოქნევით. შისგან ნასროლი ტყვია უცილოდ ხვდებოდა მიზანს. ამ ვეება ვაეკაცს საოცრად ჩვილი გული ჰქონდა — სხვას რომ მწუხარე ცრემლს შენიშნავდა, თვითონაც ატირდებოდა. ჯერ კიდევ მაშინ, როცა ასტამური ათი წლისაც არ იყო და ივაკი ახლად აბიბინებულ უღვაშებზე უკვე ჩუმჩუმად ისვამდა ნახევარადლიან თითებს, მათე და შამფრიანი ჭალებში სამწყურაოდ ჩავიდნენ. შემოდგომა იყო და მწყერი ზღვის კიდეს ასდევნებოდა. ეღვა სამართებელივით გაჰკრავდა ხოლმე ღრუბლებით ამღვრეულ ზეცას. ასეთ ამინდში ღამით მწყერაობა იღბლიანია. პატარა ასტამური დედას გამოპარვია და აღევენებულს შორიანლო თვალთვალით უვლია. ივაკიმ და მათემ მწყურებით ჩოხის კალთები გაივსეს თურმე, და როცა სახლისაკენ პირი ქნეს, ბუჩქებიდან ბავშვის ტირილი შემოესმათ.

ახლოს მივიდნენ, ხედავენ, ასტამური ტირის. გაცეხებული ძმა და ბიძაშვილი მოეფერენ ბავშვს. ის კი არაფერს ამბობს და ტირილს მაინც არ წყვეტს.

— თქვი, ბიჭო, შეგეშინდა? — ეხვეწება მათე ძმას.

— ჰოი, ჰოი, ჰოი, — ტირის ბიჭი და სიტყვას არ ამბობს. ივაკიმ ბავშვი ხელში აიყვანა და შინისკენ გასწია. ბავშვი

შეუჩერებლივ ბლავის და ბლავის. ვერაფერი ვერ მოუხერხენ, ვერ გააჩუმეს.

უცებ ივაკის ჩოხის კალთაზე ხელი მოუხვდა და მისმა სისველემ შეაკრთო.

დანამულ თითებს დაყნოსა. სისხლის სუნი ეცა.

— მათე, ასტამურს სისხლი მოსდის, მგონი.

— რაო?! — გაოცდა ძმა.

— თქვი, გენაცვალე, რა გტკივა? — ისევ შეეხვეწა ივაკი მამიდაშვილს.

ასტამურმა ბლავილს უფრო უმატა, სიტყვა კი მაინც ვერ წამოაცდევინეს.

მოსახლისას შეუხვიეს და სინათლეზე დაინახეს, გულზე შემოეყარათ — ბიკს მართლაც სისხლი სდიოდა.

თხელ წულა-მესტში ვეება წითელი ეკალი შესობოდა. ჭრილობა არც ისე პატარა იყო.

ახლა ივაკის ჩამოსკდა ცრემლი. არავინ იცის, ბავშვის ჭრილობამ თუ მისმა ამტანობამ და სიტყვის უთქმელობამ აატირა ბიძაშვილი. ეკალი ამოუღეს, ფეხი შეუხვიეს. ასტამური დაშოშმინდა, ივაკის კი დიდხანს სდიოდა ცრემლი.

ასეთი კაცი იყო ივაკი შამფრიანი, ასეთი ბიძაშვილი ჰყავდათ მათეს და ასტამურს. მათი ჭირი ჭირად მიაჩნდა სვან ვაეკაცს, ლხინი კი ლხინად.

იმ ღამესაც, როცა ძმებს ფათერაკი შეემთხვათ, ივაკიმ თითქოს უბედურება იგრძნო, შინ ვერ გაჩერდა, ცხენი შეკაზმა და მამიდასკენ გამოსწია.

დიდხანს არ დასძინებია იმ ღამით დაჯილს. ავს რამეს გრძნობდა დედის გული. როცა თვალი მიღულა, ცუდი სიზმარი ესიზმრა დაჯილს. თითქოს ფრთები გამოსხმოდა, ორი შვილის დედას, კავკასიონის თეთრმწვერვალებიან კალთებს შუა დაფრინავდა. ხედავს, ბილიკზე მისი ქმარი თეძვეა მოაბიჯებს. წყვილი ნანადირევი ჯიხვი გაუდვია მხარზე. ვეება რქები ყინულში ფართო კვალს სტოვენს. ნაკვალევში, როგორც წისქვილის ღარში, წყალი ისე მოჩქრიალებს. შინისკენ როდი მოდიოდა თეძვეა, აღმა, მწვერვალებისაკენ მდუღუღებოდა ბილიკს.

— სად მიგაქვს ნანადირევი, 'კაცო? — შეეკითხა დაჯილქმარს.

— ბიჭებთან, — უპასუხა მონადირემ.

— ბიჭებს რად უნდათ შენი ნანადირევი, საკუთარიც თავსაყრელად აქვთ.

— შენ ისე გგონია, — ჯავრით თქვა თემქვამ.

— წუხელ წავიდნენ, თვალო, სანადიროდ.

— ჰოდა, ხორცი ენატრებათ ჩემს შვილებს.

— ნამცხვრებიც ბევრი გავატანე.

— უკან დაბრუნდი, ქალო! — გაუჯავრდა ქმარი. — სახლს მიხედე, პატარას არაფერი დაემართოს!

თემქვა ნელა აპყვა ყინულის წვერებზე შევეულად დაკიდებულ ბილიკს, დაჯილი ფრენით გამოედევნა ქმარს.

უცებ დედას თვალი მოსჭრა სანახაობამ. მაღალი მწვერვალის ყინულებს ცეცხლი ბრიალით მოსდებოდა. თითქოს ზეთი გადაესხას ვისმეს, ისეთ კვამლში და მოგიზგიზე ალში იყვნენ გახვეულნი.

— სად არიან ჩემი შვილები?! — დაიკვილა დედამ.

— რად გამოუშვი ისინი სახლიდან?! — ახლა მამამაც დაიბლაგვა. ალაღქცეულ ყინულწვერებშუა ცეცხლი და კვამლი ცას შეტოტებოდა, გუმბათი გავარჯარებულ თონესავით ნაპერწკლებს ისროდა. ვეება ყინულები ემსხვრეოდნენ მწვერვალებს, ყინულები კი არა, ნაკვერცხლის უზარმაზარი კლდეები და უფსკრულებში აღმოდებული ეშვებოდნენ. დაჯილმა თვალი მოჰკრა მათეს და ასტამურს, ორივენი წრიახებზე თოფებივით ეკიდნენ, ერთი—ერთ მწვერვალზე და მეორე — მეორე მწვერვალზე.

არა, ეს მისი შვილები არ იყვნენ, არც ერთს სხეული აღარ ჰქონდა: არც მხრები, არც თავი, არც გულმკერდი და ხელ-ფეხი. მხოლოდ გულები, მფეთქავი გულები დარჩენოდათ. გულის ბეჭებზე არწივის ფრთები გამოსხმოდათ და ისე გამდგარიყვნენ აგიზგიზებული უფსკრულის თავზე.

— ვაი თქვენს დედას, შვილო! — დაიკვნესა დედამ.

— ვაი ჩემს გაჩენას! — დაიბლაგვა მამამ.

— რა დაგმართიათ, მათე?! — მიაძახა დედამ უფროს შვილს.

— ასტამურს ჰკითხე, დედი! — ჩაიბუზღუნა მათემ.

— რა მოხდა, ბიჭო?! — მიაფრინდა ახლა დაჯილ ასტამურს.

— ოჯახი შეგვირცხვინა მათემი — დაიყვილა ასტამურის არწივფრთიანმა გულმა.

— რა თქვი, შვილო! — დაიბუხუნა ახლა შუბლშეკვრით მამამ.

— შენმა უფროსმა შვილმა გვარი შეარცხვინა, მთელს აფხაზეთს შუბლი გაუტალახიანა.

— სტყუი, ეს არ მოხდებოდა! — გაუწყრა თემჰვა ასტამურს.

— შემცდარი ხარ, შვილო, — ჩაიქვითინა დედამ.

— არ დაუჯეროთ, მამავ! — სასოწარკვეთით დაიბღავლა მათემ. ეს ხმა ისე ძლიერი იყო, რომ მთელი ყინულეთი მოსკდა მწვერვლებს და ხანძრის ბუდე-წყაროებს გადაეფარა.

ნელ-ნელა დაიწმინდა კვამლი, ცეცხლი ჩაქრა და გამოიღარა. ისევ გათეთრდნენ ყინულწვერები, ისევ აშრილდნენ ქვემოთ ტყეები, ცისა და მიწის შუა ფირუზისფერი ჰაერით გაივსო სივრცე, მზის სხივებმა ლივლივი დაიწყეს, წყაროები ჩქრიალით დაეშვნენ დაბლა. დაწყნარდა და გაცოცხლდა მთელი ქვეყანა.

— აი, დედიკო, შეხედე, — ისევ განაგრძო მათემ, — ასტამურის ნათქვამი ჯოჯოხეთის ცეცხლს იწვევს ამქვეყნად, ჩემი კი სიმშვიდეს, მზისა და მიწის ბედნიერებას. მე მართალი ვარ, დედი, მართალი!

აღმოსავლეთიდან ნიაგმა დაჰბერა. კრიალა ლურჯ სივრცეში ზევით და ზევით ამალდნენ არწივფრთიანი გულები. თანდათან ნათლად გამოჩნდა მათი სახეები.

მათე ღიმილით შეჰყურებდა მშობლებს, მხოლოდ ასტამურის სახეს ეფარა თალხი. იგი თვალების ბრიალით შესჩერებოდა ქვეყანას.

— ვაი, მე უბედურს! — მოესმა დაჯილს უმცროსი შვილის ამოკვნესა.

მზე კარგა მაღლა იყო, როცა ივაკის ქიშკართან შუქზიარა შეეგება.

— აბა, ბიჭი მომანდე, რძალო, — გაუწოდა ხელები ბავშვს და გულზე მიიკრა. არც პატარამ იუცხოვა ივაკი, იგი

ღიმილით მიეყრდნო შამფრიანის ვეება მკერდს და მამის უღვაშებზე მიჩვეული ხელი წაუბოტინა.

— უღვაში არ შემირცხვინო! — გაეღიმა ივაკის. მან ფრთხილად მოაშორა ბავშვის ჩვილი თითები უღვაშებს, ცალ ხელში აიყვანა და მზისკენ ისე გასწია და გახედა, თითქოს კვერცხს გასცქეროდა.

— აი, რა ბიჭი გამხდარა, რძალო, ეს ჩემი ძმისშვილი? მზის ჩამონაპობივით სხივიანი კაცი დადგება. ხომ ხედავ, უღვაშისაკენ მიუბრუნდა ხელი. მალე ვნახავთ დავაუკაცებულს.

— ასტამურმა მიაჩვია ამ სიცელქეს, — გაიმართლა თავი შუქზიარამ.

— მამიდაჩემი სად არის, შუქზიარავ?

— სასიმიინდეში შექიდა საკენკისათვის.

— მათე და ასტამურიც არ არიან შინ? — სიფრთხილით იკითხა ივაკიმ და რძალს დააქვერდა.

— ჯიხვზე სანადიროდ წავიღნენ, ივაკი ბატონო!

შამფრიანს არ მოეწონა ნათქვამი, მაგრამ არ შეიმჩნია.

— რა უჭირთ, მერე, შე ქალო! — თითქოს თავი დაიიმედა, ისე ჩაილულლულა შამფრიანმა.

— ივაკი, ხომ მშვიდობაა? — მოისმა დაჯილის ხმა და კალთაში საკენკჩაყრილი ქალი სასიმიინდედან სირბილით ჩამოვიდა.

— მშვიდობა ნუ მოგეშალოს, მამიდა, ავი ამბავი როდის მომიტანია, ახლა რომ დავიბედო.

— მე კი მუხლი მომეკვეთა, ცუდი სიზმარი ვნახე, ბიჭო! იმ შენ მამიდაშვილებს არაფერი გაუჭირდეთ, ნეტავ!

ეს ისე წყნარად თქვა დაჯილმა, თითქოს კბილებს აჭერდა, ბევრი არაფერი წამომცდესო.

— ცუდი სიზმარი ნახე, დედი?! — შეჰკივლა შუქზიარამ, — ვაიმე, უბედურ ბავშვსაც მთელი ღამე არ სძინებია, ბორგავდა და ტიროდა.

— სიზმარს რა შეუძლია, შვილო! — გული დაუამა რძალს დაჯილმა, — უბედურებისა ცხადში უნდა გეშინოდეს.

— მითხარი, ბიჭო! — მიუბრუნდა ძმისშვილს დაჯილი, — შენ რამ ჩამოგიყვანა სვანეთიდან, სხეულმა ხომ არ გიგრძნო რამე ფათერაკი?!

ივაკის ტანში გასცრა. მამიდას მიხვედრილობამ ნაპერ-  
წკლები დაუნთო ძარღვებში. ცოტა დააკლდა და კინაღამ წა-  
მოსცდა მოსვლის მიზეზი. მაინც თავი შეიმაგრა, მამიდას  
თვალეებში შეხედა და წყნარად თქვა:

— მამიდა, უბედურება ჩვენს მტერს მოსვლოდეს ოჯახში,  
ჩვენთან მას მკლავიც არ მიუწვდება.

ჭიშკართან ქათმები დაფეთდნენ და ქოთქოთით აქეთ-  
იქით გაიფანტნენ. ყველამ იქით მიიხედა.

— რა ტურა მოელანდათ?! — იკითხა ივაკიმ და იქით  
გაიწია. გაიწია და უკან მოაწყდა ისევ. ჭიშკრის ქვეშ ვეფ-  
ხოს გასისხლიანებული თავი მოჩანდა, სველ ბალანზე აქა-  
ყინულის ჭერ კიდევ გაუძნარი ნამსხვრევეები მიჰკროდა.  
უკანა ფეხებზე ვერ დგებოდა, სიცოცხლე მხოლოდ თვალეებში  
უბეუტავდა.

ივაკის ფერი ეცვალა.

„მამიდაჩემმა არ დაინახოს ეს ძაღლი, თორემ დავიღუ-  
პე!“ — უმალ გაიფიქრა მან და ისე შემობრუნდა, თითქოს  
არაფერიც არ დაენახოს.

— არაფერია, ღღეს სულ მოჩვენების ხასიათზე ხართ. შინ  
შემიყვანეთ, ჩემი მოსვლა ხომ არ გეწყინათ?!

— მოდი, შენი ჭირიმე, მოდი, მამიდა გენაცვალოს! — და-  
ფეთდა ივაკის ნათქვამით დაჯილ.

შუქზიარა ბავშვით ხელში შებრუნდა სახლისაკენ. ივაკიმ  
ნელა მიაცილა რძალ-დედამთილი და სახლში შესვლისთანავე  
კარი ისე მიიხურა, თითქოს ეშინოდა, უკან არავინ გამომეჭ-  
ცესო. ცოტა ხნის შემდეგ ივაკი შამფრიანი ისევ ეზოში გა-  
მოვიდა. მან დაკვირვებით მიიხედ-მოიხედა და, რაკი შენიშნა,  
არავინ არ უცქეროდა, ჭიშკართან მივარდა.

ძაღლი ისევ ჭიშკრის ძელის ქვეშ იწვა. იგი ადამიანივით  
კენესოდა და ქშინავდა, სველი ტანიდან ოხშივარი ასდიოდა.  
მუცლის ქვეშ, ბალნებზე, წყალი მოწურწურებდა. ივაკიმ  
ვეფხოს ფრთხილად მოჰკიდა თავზე ხელი და თვალეებში ჩა-  
ხედა. ძაღლმა უღიმღამოდ ამოხედა ქვემოდან.

„ფერდები ჩანგრეული აქვს, უკანა ფეხებიც მომტვრეული  
უჩანს. — გაიფიქრა მან და დაასკვნა: — ზვავი დასტაკებიათ,  
დავღუპულვართ“. ივაკიმ აიყვანა ძაღლი ხელში და რძალ-დე-



დამთილს რომ არ დაენახა, ბოსტნის ღობეს გადაეწონა. ივაკიმ ძალი წყნარად დაუშვა მიწაზე.

„თივის დაგებაა საჭირო, ცოდვაა“ — ისევ გაიფიქრა და ოღნავ შეჩერდა, მერე ხელი ჩაიქნია და ჭიშკარი გამოაღო.

მზე მთავარ კავკასიონს მედიდურად დაჰყურებდა, ცად ამალღებული თეთრი მწვერვალების ქვემოთ თეთრი ნისლი ირეოდა და ამიტომ იისფერ სივრცეში აზიდული ყინულოვანი მთები ზეცაში გასასვლელი კიბეებივით მოჩანდნენ აქედან.

— ნუთუ იქ, ამ ღვთაებათა საბინადროში ჯოჯოხეთური ამბავი მოხდა?! — ახლა ხმამაღლა წამოიძახა ივაკიმ და ნაბიჯს აუჩქარა.



ღამე მწვერვალებთან გაათია ივაკი შამფრიანმა და დილით ყინულის სამყაროში შეჰყო თავი. ვეება ვაჟაკი მსუბუქად მიიკვლევდა გზას ბილიკებზე.

ბილიკებიც დასრულდა.

— ჰე-ჰე-ჰე-ე-ე!.. — გასძახოდა დროდადრო მოყინულ მთებს ივაკი და რამდენი ხევი და მთა იყო, იმდენჯერ უკან უბრუნებდნენ მისსავე ხმას. ცოტა ხნის შემდეგ ყველაფერი მიწყნარდებოდა და საოცარი სიმშვიდით სუნთქავდა ქვეყანა.

ხანდახან ცის ლურჯ კამარაში თეთრი თოვლის ნაზი სინათლე ალივლივდებოდა და თითქოს ნიავი ამოვარდაო, ისეთი შრიალი მოისმოდა, — ეს ფრინველები გადაუფრენდნენ უფსკრულებსა და მწვერვალებს.

— ჰე-ჰე-ე! — ისევ გასძახებდა ივაკი. გაიგრიალებდა თეთრ კალთებზე მისი ხმა და ისევ ჩაჩუმდებოდა ყველაფერი; ისევ გაიტრუნებოდა სამყარო. არსაიდან არაფერი არ ისმოდა.

„ძალი რომ წამომეყვანა, კარგი იყო, — ფიქრობდა თავისთვის ივაკი. — აღარ შეეძლო ჩვენ ვეფხოს სიარული, იქნებ ახლა მკვდარია კიდევ საწყალი!“

თანდათან მალლა მიიწევდა შამფრიანი, ნაბიჯ-ნაბიჯ უახლოვდებოდა ყინულოვან წვერებს.

— შრრრრ, — მოისმა უცებ ყინულთა ნაფხვენის სრია-

ლი და სწანმა მონადირემ თვალი ჰკრა დაფეთებულ ჯიხვს. იგი ყინულ-ფლატეს ფრთაშეკეცილ არწივივით გადააფრინდა და კლდის უკან გაუჩინარდა.

ივაკიმ უნებლიეთ თოფისაკენ გაისვა ხელი.

— რა ეშმაკად მინდა, სად ვათრიო, — ჩაილაპარაკა შამფრი-ანმა და ხელი ჩაიჭნია.

შუადღის მზე აცხუნებდა მწვერვალებს, ყინულის გარე-კანზე ცრემლებივით დაიწყო ახლად გამდნარმა წვეთებმა ჟონვა. ადგილ-ადგილ ჩხრიალით რბოდნენ წვრილი ნაკადუ-ლები. დილით სიცივისაგან მოსიპული ყინულის ქერქი ახლა მოლხვა, უფრო ადვილი სასიარულო გახდა. ფეხი არც ცურ-დებოდა, მგზავრი მუხლს უფრო იმაგრებდა.

ივაკი დაჟინებით გაჰყურებდა ყინულის პიტალო შვეულ ქედლებს, ათვალეირებდა კალაოებს, ჩასცქეროდა უფსკრუ-ლებს, მაგრამ არსად მამიდაშვილების კვალი არ ჩანდა. დაღ-ლილი და დაქანცული კლდის ცხვირზე ჩამოჯდა.

უცებ თვალეში დაჰკვესა. გაღმა მწვერვალის კალთაზე კაცი დანახა.

„ცოცხლები ყოფილან, მაგრამ მეორე რატომ არ ჩანს“, — გაიფიქრა და „ჰე — ჰეო“, — გასძახა. მგზავრი შეჩერდა, დიდ-ხანს იყურა აქეთ და ისევ გზა განაგრძო. ივაკიმ ახლა შენიშნა, რომ კაცი რაცრაკით მიჰყვებოდა კლდის პირს.

— ჰე-ჰე-ე-ე, — ისევ გასძახა მან და თან დაუმატა: — ივა-კი ვარ, ივაკი შამფრიანი.

უცნობი, თითქოს ტყვია მოხვედროდეს, ისე ჩაიკეცა ად-გილზე; ჩაიკეცა და გაიმხლართა კიდევ. ივაკის სული შეუგუბ-და. სწრაფად მოავლო თვალი გარემოს და უფსკრულისაკენ გას-წია.

ოდესღაც ზვავად წამოსული ყინული და ხერგი მთებშუა გაქედილიყო, მერმე თოვლ-ყინული დაჰყროდა და ორ მთას შუა ხიდად გადებულებოდა. ზემოთ ვიწრო იყო საცალფეხო ბილიკივით, ადგილ-ადგილ ადამიანს ტერფიც არ დაეღმე-ბოდა. ქვეშ, თვალუწვდენელ უფსკრულში მდინარე გარბო-და, მის მშფოთვარე ტალღებს ყინულის გული გამოედრდნა და ათასნაირი ზღაპრული დარბაზებივით გამოეკვეთა. აქა-იქ

წყლისაგან ამოზნექილი გუმბათები ჩანდა და გასასვლელი ყინული ძალიან თხელი იყო.

„შეიძლება ფეხქვეშ ჩამექცეს ეს ყინულები,“ — გაიფიქრა ივაკიმ, მაგრამ შეჩერებით კი არ შეჩერებულა.

სიფრთხილით დაიწყო ყინულზე გასვლა. ხანდახან ვიწრო ყინულის ზურგს ცხენივით გადააჯდებოდა და ისე მიფოფხავდა ხმლის პირივით გაბასრულ ყინულზე. გაღმა კი ის კაცი იწვა და, თითქოს სიკვდილი ჩადგომოდეს ტანში, არც ინძროდა. ორ ადგილას ჩამოტყდა ყინულის კლდე და ჩხრიალით წავიდა ქვემოთ. შამფრიანმა საოცარი სისწრაფით გადაინაცვლა სველ ყინულზე.

„ვაითუ უტხოა, მე კი თავს ვიკლავ“, — გაიფიქრა ივაკიმ. „ქართველი კაცი ხომ იქნება, ეტყობა, უჭირს,“ — თავი გაიმართლა და ისევ გადაცოცება დაიწყო ყინულის ხიდზე.

ვაი-ვაგლახით მიადწია გაღმა კალთას, ხეავად მომსყდარ ვეება ყინულის გორაკს გვერდი აუარა და მგზავრს თავზე დაადგა. დაჯილის უმცროსი ვაჟი ზურგზე გადავარდნილი ეგლო.

— ასტამურ, შენა ხარ, ბიჭო?! — შეანჯღრია მამიდაშვილი გაოცებულმა ივაკიმ. წაქცეულმა ხმა არ გასცა. ივაკიმ ყაბალახის შემოხსნა დაუწყო. ყველაფერი ტანზე შემოპყინვოდა, გამხმარი ქერის ყურის ყუასავით ტყდებოდა ყაბალახის ტოტებიც და ჩოხის კალთებიც. ქსოვილში გაეტანა სიცივეს და გაეშეშებინა. ფიფქი თოვლიც ზედ მიპყინოდა.

— მომკვდარა კაცი, — თავისთვის ჩაილაპარაკა ახლა შამფრიანმა. მათარიდან არაყი გადმოასხა და სახის ზელვა დაუწყო. ცოტა ხნის შემდეგ ასტამურმა თვალები გაახილა.

— ხმა. ამოიღე, ასტამურ! — ჩასძახა შამფრიანმა. ეტყობა, ამ ხმამ უცებ გამოათხიზლა ასტამური, იგი ოდნავ წამოჯდა, მარჯვენა ხელით გაყინულ კლდეს დაეყრდნო და ივაკის თვალების ბრიალით შეხედა:

— შენ აქ როგორ გაჩნდი?! — გაიკვირვა მან.

— მათე სად არის, ბიჭო?! — შეეკითხა ბიძაშვილი.

— ეჰ!.. — ჩაიქნია ხელი ასტამურმა და თვალმილულულა ისევ კლდეზე მიწვა.

„ეძინება, გონზე არ არის“, — გაიფიქრა ივაკიმ. შამფ-

რიანმა მათარა პირთან მიუტანა და სითხე რამდენჯერმე ჩააყლაპინა.

— კიდევ მოსვი, ბიჭო, კიდევ, ჩვენებური არაყია, — ჩას-  
ძახა ისევ მამიდაშვილს.

რამდენჯერმე უაზროდ მოსვა ასტამურმა და თვალები გაალო.

— მათე სად არის-მეთქი, ასტამურ?!

უმცროსი მამიდაშვილი ისევ თვალების ბრიალით მიაჩერ-  
და ბიძაშვილს.

— არ ვიცი, — წყნარად და გაოგნებით თქვა მან.

ნათქვამი არ მოეწონა შამფრიანს.

— როგორ თუ არ იცი, შენთან არ იყო საჭიხვედ წამო-  
სული?!

— არ ვიცი, თავი დამანებე, ივაკი!

შამფრიანს პირში ნერწყვი გაუშრა, ყელი გამოუხამდა.  
უცებ სიტყვა ვერ თქვა.

— რას ამბობ, ასტამურ?! — ამოიხრიალა. დასწვდა მამი-  
დაშვილს, ნიჩბებივით გაშლილ თითებში მოიქცია მისი ბე-  
ჭები და ზევით წამოაყენა. ალბათ, ეგონა, გონზე არ არის  
ასტამურიო, ყურში ხმამალლა ჩაჰყვირა:

— გაიხსენე, ასტამურ, გაიხსენე, ბიჭო, სად დაშორდი  
მათეს?!

ასტამური ძალღნაკბენივით შეინძრა, ხელებიდან გაუსხლ-  
ტა ივაკის, წინ გაიწია და მერმე შემობრუნდა. იგი სულ მთლად  
ცახცახებდა, კბილით კბილს აცემინებდა.

— რას ჩამაცივდი, ალბათ, შენც იცოდი მისი კაიკაცობა  
და მიმალავდით, უთუოდ დედამაც იცოდა, ყველამ იცოდა,  
ვაი სირცხვილო, ოჯახის შერცხვენავ!... — აბღავლდა ასტამური.  
ივაკის თვალები სავსე მთვარისოდენა გაუხდა.

„ნამდვილად ქეუაზე გადამცდარა, დავილუპეთ“, — გა-  
იფიქრა მან და ასტამურს ბეჭებზე მოჰხვია ხელი.

— კარგი, ასტამურ, არაფერს არ გკითხავ, ბიჭო, შინ წა-  
ვიდეთ, — ახლა მოეფერა მამიდაშვილს.

აქვითინებული ასტამური ცხვარივით დაემორჩილა ბიძა-  
შვილს, ცახცახით გაჰყვა ქვემოთ.

ცოტა ხნის შემდეგ ყინულის გორაკებმა იკლო, დაბლა

უკვე მოჩანდა ბალახზე მიშვებული საქონლის ჯოგები, თხისა, და ცხერის ფარები. დაბლიდან ძაღლების ყუფაც ამოდიოდა.

— შენ რატომ მომღევ? — უცებ შემოტრიალდა ასტამურ-რი. — შენ იმას მიხედე, იქნებ ცოცხალიც არის. შამფრიანი შეტორტმანდა, გუმანით მიმხვდარი ახლა სინამდვილედ იქცეოდა.

— მითხარი, ბიჭო, რა უბედურება გჭირს, — შეევედრა ივაკი და თან ისევ თვალებში მიაჩერდა.

— გიყი გგონივარ, ხომ? უარესი მეკუთენის, ვაი ჩემს დედას, რომ შვილის მაგივრად ოჯახის საძირკვლის მქამელი გაუზრდია უბედურს.

— ვიზე ამბობ, ასტამურ?! —

— შენს უფროს მამიდაშვილზე, ჩემს გამზრდელ ძმაზე! — მთელი ძალით დაიყვირა ასტამურმა, კისრის ძარღვები ბაწარით დაექაჩა, თვალები ჩაუსისხლიანდა.

— რაო, რა თქვი? — უაზროდ დააჩერდა ზემოდან ივაკი.

— რაც გაიგონე. შუქშიარა შეჰყვარებია ჩვენს ძმას.

— გაგიყებულხარ, უბედურო, უთუოდ გაგიყებულხარ!

— თვითონ მითხრა, თავისი პირით წამოიძახა.

— ღმერთო მიშველე! — ჩაიჩურჩულა ივაკიმ, ხანჯალზე დადებული ხელი აუკანკალდა, შუბლზე ცერის სიმსხო ნაოჭები გაუჩნდა.

— ტყუილია, — მტკიცედ თქვა ახლა მან, — მოგჩვენებია, ძმის ნაცვლად ქაჯი დაგლაპარაკებია.

— ქაჯი და ეშმაკი თქვენს თავს, ვეცოდი, არაეინ დამიჩერებდა! — სასოწარკვეთით წამოიძახა ასტამურმა. — ვიცოდი, არაეინ გამიგონებდა! — გაიმეორა ისევ. მერე სახე თითებში ჩარგო და აბლაგლდა. მისმა ტირილმა ივაკი გამოაფხიზლა, სილინჯე დაუბრუნა. კარგა ხანს უყურა და მერე მკლავზე მოჰკიდა ხელი.

— მათე სად დატოვე, უბედურო!

— სიჩუმის ხევში.

— იქ ვინ ჩაიყვანდა, ბიჭო?

— თავისმა სიკვდილმა ჩაიყვანა, ოჯახის შერცხვენამ გადაჩეხა.

— ვაი მამიდაჩემის ძუძუს! — წამოიძახა ივაკიმ და თავზე ხელები შემოიკრა.

ქვემოდან ძაღლების ყეფა მოისმა. მწყემსები მკავე წყაროებზე დოქებით ამოსულიყვნენ.

ივაკიმ ნელა მიიხედ-მოიხედა, ცოტა ხანს შეჩერდა, რამდენჯერმე ამოიოხრა; მერე ასტამურს დაადგა თავზე.

— მწყემსებთან ჩადი, კრინტი არ დასძრა. თუ გკითხონ, ზევით დარჩა-თქო, უთხარი; ხომ გესმის, უბედურო, სიტყვა არ წამოგცდეს!

მეტი არაფერი უთქვამს ივაკის. ყაბალახი შემოიხვია და აღმართს შეუდგა.

რაცრაკით წავიდა ასტამურიც იალალებისაკენ, მწყემსებმა შორიდან შენიშნეს მზიავალი და წინ შემოეგებნენ.

— უბედურება შეგმთხვევია, ასტამურ! — მიმართა ყველაზე უხუცესმა თემშულ თარკილმა. ასტამურმა დიდხანს უყურა მას და რაკი ხიმურის მამა შეიცნო, გონი დაკარგა, მიწაზე მოწყვეტით დაეცა.

— აბა, საკაცე, სადგომამდე ჩავიტანოთ, — წამოიძახა თემშულმა და ყურების სრესა დაუწყო ასტამურს.

• • •

სამი მყინვარის კალთებქვეშ გართხმულა სიჩუმის ხევი. როცა კავკასიონის დიდი მწვერვალები შეირხვიან და ბეჭებს გაიფერთხავენ, ყინულის ვეება ზვავებს გზავნიან დაბლა. უხსოვარი დროიდან აწეება ერთიმეორეს ეს ყინულები, ერთმანეთს ამსხვრევენ და ერთ მთლიან ყინულად იქცევიან. ზვაეების დროს ეს ხევი ცივ ჯოჯოხეთსა ჰგავს. გრიალ-გრიალით იმსხვრევიან ზევიდან დაქანებული ზვაეები, ყველაფერს გლეჯენ და ხვეტავენ; კლდეთა და ყინულთა ქარიშხალი მიწას არყევს და აზანზარებს. ათი ათას მეხად სკდება ნამსხვრეეები, შემდეგ კი ჩაჩუმდება ხევი, გაირინდება, ჩქამიც არ ისმის არსაიდან; მხოლოდ გადაფრენილი ჯიხვის ჩლიქიდან მოწყვეტილი თოვლის კვალდამჩნეული ნატერფალი თუ ჩამოცვივა ათასში ერთხელ, სძინავს უფსკრულხევს წყნარად, გაურხევ-

ლად, შეუშფოთებლად, სამი მწვერვალის ფესვებთან დევს გარინდებული.

ადამიანის თვალს არაერთხელ დაუნახავს ზემოდან, კაცი ფეხი კი არასდროს არ დაკარგებია მის მუდმივად უდნობ ყინულით გალიბულ ქერქს: ზევიდან გადმოვარდნილ კენქს ჩიტის ფრთის ნიავიც აათამაშებს, ისე მოუპირკეთებია და გაუსარკავს ბუნებას ყინულის ზედაპირი. მზის შუქი ვერ აღნობს მის ზედაპირს; მხოლოდ მიწისქვეშ დაბუდებული სითბო ალბობს მის ქვეშეთს, საიდანაც ჩხრიალით მიჰქრიაან წყაროები. ამ წყაროთა დენას თუ გაუღარავს ეს მთები დაღრმა, თვალჩაუწვდენელი უფსკრული გაუჩენია დასაბამიდან აქ ყველაფერი გაყინულა და თეთრი კალთების ქვეშ გამოხვეულა. ზვავების ჩავლის შემდეგ აქ არემარე ყუჩღება, ჩუმდება და ირინდება. ივაკი შამფრიაანმა ზემოდან დახედა ყინულეთს ყველაფერი ხელისგულივით მოჩანდა. კლდისა და ყინულის ახალი ნამსხვრეეები აქა-იქ დაბნეულად ეყარა. შამფრიაანის გამოცდილმა თვალმა მათეს ცალი პაიჭი შენიშნა უფსკრულის გასარკულ ზედაპირზე, კაცი კი არსად ჩანდა. დიდხანს ათვალთვრა ივაკიმ ხევი, დიდხანს და მათეს თვალე მაინც ვერსად მოჰკრა. ახლა მეორე კალთაზე გადავიდა სვანი მონადირე და იქიდან ჩახედა უფსკრულს, არც იქ მოჩანდა.

„პაიჭი აქ არის, — ფიქრობდა იგი, — მაშასადამე, მათეც აქვე უნდა იყოს“.

იგი შეჩერდა და კლდის კალთებს ააყოლა თვალი. გაღმა კალთის ფრიალოზე, რომ იდგა, სწორედ იმ კლდის ცხვირის ქვემოთ, შავი რაღაც გამოჩნდა. თანდათან დაუკვირდა და მათეს ნაბდის კალთის ყური შეიცნო. ისევე მეორე კალთის ზემოთ მოექცა ივაკი. ჩაიხედა და გული შეუქანდა. კლდის ცხვირზე თოვლში ჩამარხული კაცი იწვა. კლდის ბოლოზე ბაწარი დაამაგრა, ფრიალოზე დაიწყო ჩაცოცება. გადაჩეხილ მათეს ზემოდან ფიფქი თოვლი დაჰყროდა, ივაკიმ თოვლი ფრთხილად მოაშორა და გულმა რეჩხი უყო — ნაბადი მთელ ტანზე შემოხვეული შერჩენოდა მამიდაშვილს.

„კოცხალი იქნება, ნაბადი და თოვლი სითბოს შეუნახავდა“, — გაჰკრა ელვასავით ფიქრმა შამფრიაანს, ხანჯალი გაიძრო და ბაგე-ცხვირთან მიუტანა.

ხანჯლის პირი ოდნავ შეიორთქლა.

— ცოცხალია, ღმერთო, მიშველე! — წამოიძახა ხმა-  
მალლა და მათარა მოიხსნა. ნათევადით ჯერ სახე დაუზილა,  
მერე საკინძე გაუხსნა და გულმკერდი დაუსრისა.

მათემ ამოიკენესა.

— თვალი გაახილე, ძმაო, შენი ჭირიძე, გამოფხიზლდი! —  
ეფერებოდა ივაკი გაყინულს.

ვაი-ვაგლახით გახსნა წამწამები მათემ და ივაკის შეხედა.

— შენა ხარ, ივაკი?! — გაიღიმა მათემ.

— მე ვარ, ჩემო მათე, ახლა ეს მოსვი, პო, კიდევ მოსვი,  
ძმაო, ძალას მოგცემს სხეულში.

ცოტა ხნის შემდეგ მათე ნელა წამოჯდა.

— დალაპარაკებაც არ მაცალა იმ სულელმა, ისე მკრა  
ხელი და გადამჩეხა. — ეს იყო მათეს პირველი სიტყვა, რო-  
მელიც ბავშვის პირველ ლულულს უფრო ჰგავდა, ვიდრე  
ვაეკაცის ნათქვამს.

— ვინ გადაგჩეხა?! — გაოცდა ივაკი.

— ასტამურმა!

— რა თქვი?

— რაც გაიგონე, ივაკი, ასტამურმა გადამჩეხა.

— თქვენ ორივენი გაგიჟდით?! — არ დაიჯერა ივაკიმ.

მათემ წამოდგომა დააპირა, მაგრამ მტკივანი ფეხი არ და-  
ემორჩილა.

— აი, ეს ფეხი რომ არ მტკენოდა, იმ სიტყვასაც არ ვიტ-  
ყოდნი, მე ზევით ვერ ავედი, ის კი სიბნელეში ილუპებოდა,  
სხვა გზა არ მქონდა!

ივაკის ვერაფერი ვერ გაეგო. იგი გაშტერებული მისჩე-  
რებოდა მათეს.

— კარგი, თქმას მოესწრები, ჯერ სამშვიდობოს გავიდეთ. —  
ივაკი ბაწარს დაეკიდა და ჯერ თვითონ აპყვა კლდის კალთას  
ზემოთ, მერმე მათეს ჩამოუგდო მისი ერთი წვერი. მა-  
თემ ბაწარის ბოლო წელზე და ბეჭებზე შემოიხვია, მაგრამ  
კლდეზე ასვლის დროს საშინელი სისუსტე იგრძნო. ფეხის  
სიმსივნე ახლა ისე არ აწუხებდა, მაგრამ ღონე ვერ მოეკრიბა.

„მთელი ღამე სიცხეს დავუბუგივარ. ჰე, ალბათ, ამ ამბავმა  
გადამარჩინა კიდევ“, — გაიფიქრა მათემ.



— რას შერები, იჩქარე, კაცო! — ჩამოსძახა შამფრიანმა.

— სისუსტემ დამრია, ცოტა მაკალე.

ივაკიმ კლდის ბოყეს შემოხვეული ბაწარი მოხსნა და თვითონ ფეხგადგმულმა დაიწყო მისი აკრეფა.

— აბა, შენ მხოლოდ ნელა იმოდრავე, მე ბაწარს დავქაჩავ, ბიჭო! — ჩასძახა ისევ.

მათეს ამოსვლისთანავე გული შეუღონდა. იგი ისევ ჩაიკეცა კლდის ქიმზე.

ნათევადის წვეთებმა თავისი გაიტანა და ცოტა ხნის შემდეგ მათეს ხელმეორედ ჩაუდგა ტანში ძალ-ღონე. ივაკი პირმოკუმული და შუბლშეკრული მიჰყვებოდა მამიდაშვილს. როცა მკევე წყლებთან შეისვენეს, მაშინ ამოიღო ხმა შამფრიანმა:

— ახლა მიაგებ, რა გჭირთ, ბიჭო! — თითქოს თავისთვის ჩაილაპარაკა ივაკიმ.

ვარსკვლავები ცაზე ნელ-ნელა ჩნდებოდნენ, როცა მათემ სათქმელი დაამთავრა. ივაკი შამფრიანი ხანჯალზე ხელდადებული და სახეგაფითრებული მისჩერებოდა მათეს.

— დიდი ცოდვა ჩაგიდენია, მათე, — გაგუდული ხმით წარმოთქვა მან.

— სხვა გზა არ იყო, ძმა უნდა გადამერჩინა, ივაკი.

— სტყუი, — დაიბუხუნა ახლა შამფრიანმა. — ერთი სიკვდილი თუ მეორეში შეუნაცვლე, ეს განა სიკეთედ მიგაჩნია?!

— რას ამბობ, ივაკი?!

— რასაც შენ მაშინ უნდა მიმხვდარიყავი, ჩემო ძმაო. ასტამური მართალია, შენ გულზე მითანილი სასიკვდილო დანა ააცილე, სატევარი კი თვითონ ჩაქარი უღვთოდ.

— არა, ხარ მართალი. — წამოდგა მათე, — ჩამოვიდა თუ არა, სიტყვა არ დამაცალა, სიცხისაგან გათარანებული და ფეხდასიებული კაცი სიტყვის უთქმელად გადამისროლა კლდებზე.

— ძმის მოღალატეს სიკვდილი ეკუთვნის, — თვალი არ გაუმართავს ივაკის, ისე მიახალა მათეს ეს სიტყვა.

— მერე მე მოღალატე ვიყავი?!

— შუქზიარა ხომ შენი და იყო!.. — გაბრაზდა ახლა შამფრიანი.

— იყო და არის კიდევ.

— კაცის გულში არავინ ზის მათე, სიტყვამ გულში ჩადებული ფიქრი უნდა გამოთქვას.

— მერე მე...

— შენ კი... — გააწყვეტინა სათქმელი შამფრიანმა. — შენ პირველმა ესროლე ბინძური ტალახი მამის სახლის საძირკველსა და თავანს.

— მე მისი სიცოცხლე დავიცავი.

— სამაგიეროდ, სამი სიცოცხლე გასწირე, — თანდათან უღმობელი გახდა ივაკი.

— როგორ?!

— როგორ და შენი ნათქვამის შემდეგ არც ცოლი ივარგებდა, არც დედა, ძმა და არც შვილი.

— ივაკი, შენ ასე არ უნდა მითხრა. მე ჩემი ძმა გადავარჩინე.

— ცუდი გზით მოპოვებულ სიცოცხლეს ვაუკაცი კაცი სიკვდილს არჩევს ყოველთვის.

— მათეს ტანში შემოენთო. იგრძნო აფხაზმა მონადირემ, ივაკი შამფრიანი დიდ შესაწუხებელს წუხდა.

— შამფრიანო! კაცს გამწარება საპასუხოს აფიქრებინებს. გესლიანი სიტყვა რომ არ მომფიქრებოდა, ძმა მელუპებოდა.

— აფხაზ კაცს ღალატს სიკვდილი ურჩევნია, მამიდაშვილო!

— შენ ასე ფიქრობ, ივაკი?!

— სიმართლეს გეუბნები, პირველმა შენ გაუბზარე გული ასტამურს.

— რაღა ექნა, მე უბედურმა!.. — სასოწარკვეთით თქვა მათემ. ნელა ჩამოჯდა წყაროს პირზე და თავი ჩალუნა.

ეტყობოდა, საბალახოებს ქვემოთ ქარი ქროდა. ხეები ირხეოდნენ და იზნიქებოდნენ. ხანდახან ხეებშუა სიცარიელე ჩნდებოდა და მაშინ მთვარის სხივები მკრთალად გაიღვებდნენ ხოლმე.

მათე თავაუღებლად იჯდა ერთ ადგილას.

ივაკის შეეცოდა მამიდაშვილი.

— ასეა, ძმაო, უჩრდილო სიყვარულია გამძლე და ბედნიერი, თორემ ის ოხერი ექვის ბზარი კაცს კი არა, აი ამ მთებს გააპობს შუაზე.



თემშულ თარკილმა ასტამური თავის სადგომ ფაცხაში შეიყვანა. გონწასული ახალგაზრდა მონადირე ლოგინში ჩაათბუნეს.

—თბილი რძე ასვით, არყით დაზილეთ! — ბრძანა თემშულმა და ასტამური ქალებს ჩააბარა.

იატაკზე დათვის ტყავები ეფინა. კედლებიც ნადირის ტყავებით იყო მოფარდაგებული. თემშულის ქალიშვილი ხიმურ თარკილი ჯიხვის ტყავგადაფარებულ ჯირკოზე იჯდა. შეხედვისთანავე იცნო ასტამური ხიმურმა. განთიადის უამს მზის სხივი რომ ცის ტატნობს ფრთას გაჰკრავს და აღმურს მოუყიდებს, ისე მოედო ალი სახეზე ხიმურს. „ალბათ, მათეც აქ არის?!“ — გაიფიქრა მან და ოდნავ შემკრთალი წამოდგა. იგი ყელმოღერებით, წყნარი და მსუბუქი ნაბიჯებით წამოვიდა კარისკენ.

ზღურბლს რომ გადააბიჯა, მწყემსებს შეეფეთა, ყველამ მოკრძალებით დაუთმო გზა. თავშეყრილ მწყემსებს შორის წამოძახილები ისმოდა.

— რა დაემართა, ნეტავი?!

— ზევმა თუ ჩაიტანა.

— გაყინულია საწყალი ბიჭი.

— დაღლილი და გატანჯული ჩანს.

ხიმურმა წყნარად მოავლო თვალი ყველას. ჯერ ერთი შეათვალიერა, ერთიდან მეორეზე გადავიდა, მერე მესამეზე, მეოთხესაც დააკვირდა, მაგრამ, ვისაც ეძებდა, ვერ დაინახა. ოდნავ შეჩერდა, მერე თავი დახარა და წყაროსაკენ წავიდა.

დიღხანს იჯდა წყაროს პირზე ხიმური, იჯდა და მათეს სახე ელანდებოდა.

„არასდროს მარტო არ წასულა სანადიროდ. წასვლის წინ თვითონ მითხრა, ასტამურიც ჩემთან ერთად მოდისო. რა დაემართა, ნეტავი? ნუთუ დაილუპა და გადაიჩეხა?!“ — ქალს თვალებზე ცრემლი მოადგა.

— უშენოდ წუთსაც ნუ მიცოცხლია! — ჩურჩულით ჩაილაპარაკა ქალმა. მისმა ჩურჩულმა წყაროს სარკის პირზე ქაველები რგოლებად აამოძრავა; ქალმა თვალი დააშტერა

წყაროს ზედაპირს. წყაროში რგოლები საყურეს რკალივით ჩნდებოდა, ნელ-ნელა ფართოვდებოდა და ათრთოლებული უცნაურად იკარგებოდა. ხიმურს თვალები გაუშტერდა. უცებ შენიშნა, რომ წყალში დარჩეულ რგოლებშია მათეს თავი გამოჩნდა: იგი ცხენზე იჯდა, თეთრი დარაიის ყაბალახი ისე შვე-ნოდა, როგორც პირველი ნახვის დღეს.

ამ გახსენებამ თარკილის ქალი ააღელვა. ლიხანში, ზედ თავად შერვაშიძის სასახლის წინ გაშლილ ტრიალ მინდორზე, დოლი იყო გამართული. ვინ არ იყო მაშინ იქ: შერვაშიძეთა სასახლეს მარშანიების, გარდაფხაძეების, ჩაჩბების ოჯახები სტუმრებოდნენ. ოქრო-ვერცხლში დალესილი ქალ-ვაჟნი ბე-დაურებს აჭიბრებდნენ ერთმანეთს. ქერკინძ მარშანიას ნაცრის-ფერმა კვიცმა გადარია შეკრებილები. გოგმანით იწყებდა სირბილს და თანდათან ქარიშხლის წინ ამოვარდნილ ნიავივით უმატებდა სრბოლას.

თავადები სასახლის წინ, ფანჩატურთან იდგნენ, გლეხებს კი საყდრის გალავანში ჩატანებული ნიგვზის ხის ქვეშ მიეშ-ვათ ცხენები. ვეება მინდორი ხალხით იყო სავსე, მარშანიას კვიცმა მინდვრის ხუთი შემორბენის დროს ყველანი უკან მოიტოვა. ახლა ათი შემორბენისათვის ემზადებოდნენ ბედა-ურები. ხიმური ხედავდა, მარშანიას ნაცრისფერი ბედაური აღვილზე კი არ ცქმუტავდა სხვა ცხენებივით, დინჯად იდგა, მხოლოდ ლაგამს კვნეტდა და თვალებს ელმად აბრიალებდა. ხიმურმა ისიც კარგად შენიშნა, ეზოს დიდ ქიშკარში როგორ შემოგოგდა ნესტოებდაბერილი ნისლისფერი ბაჩა კვიცი. ერთი შეხედვით გარეულ ღორს უფრო წააგავდა, ვიდრე ცხენს. ჯაგარივით სქელი ბეწვი ზღარბივით აბურძგვროდა პა-ტარა და მრგვალ ტანზე. მხედარმა ეკლესიის გალავნისაკენ მიუშვა კვიცი. უცებ ხიმურის თვალებში ნაპერწყმებმა იელვა, ცხენის პატრონს დარაიის თეთრი ყაბალახით ჰქონდა თავი შეკრული, სწორედ ისე, როგორც თვითონ ხიმურს. ცხენზე მეტად თავისუფლად იჯდა, წელი და ბეჭები არ ერხეოდა. ლაჯებშია ამოკეცილი ნისლისფერივე ჩოხის კალთები არ ეშლებოდა ცხენის გოგმანის დროს მუხლებზე, მიწებებულ-ვით ჩანდა.

ხიმური სწრაფად გამოეყო ხალხს და წინ წამოიწია. მხე-

დარი უდარდელად მიაგვლებდა ცხენს და სტუმრებს ათვალიერებდა. ხიმურს რომ გაუსწორდა, მისკენ მოიხედა. ქალს ახლაც ჟრუანტელი დაუვლის ტანში, ის შემოხედვა რომ მოაგონდება.

ცხენოსანმა შეხედა თუ არა ხიმურს, თვალეში ცხენზე უფრო ბრიალა გაუხდა, სახე ქალწულივით გაუწითლდა. უნებლიეთ შუბლზე მოისვა ხელი. ხიმურმაც მონუსხულივით კიდევ უფრო გაიწია მისკენ. მოსულმა ცხენს სადავე ამოკრა და ადგილზე გააშეშა.

— ხომ არაფერს მიბრძანებთ, ქალიშვილო — ვაჟკაცის ხმამ ცეცხლი მოუკიდა ტანში თარკილის ასულს.

ხიმური დაიბნა.

— ცხენი მომეწონა, სხვანაირია, ჩვეულებრივს არ ჰგავს! მხედარმა თვალის გახელის უმალ დაიქვეითა.

— ჰოი, თქვენი საჩუქარი იყოს! — რეტდასხმულივით თქვა მან და ადვირი ქალიშვილს გაუწოდა.

— როგორ გეკადრებათ?!

— ნეტავი ასეთივე თვალით მე შემხედოთ, ჩემს თავსაც არ დავიშურებდი!

ხიმური გამოფხიზლდა.

— ვითომ?! — გამომწვევად აათვალიერა დაქვეითებული. ჩოხის კალთები კოჭებამდე უწევდა მოსულს და უფრო მაღალს აჩენდა. მისი წელი ხიმურის ნეკის ბეჭედში გაძვრებოდა. ბეჭები კი ბრტყელი და განიერი ჰქონდა და მძიმედ ერხეოდა ჩოხაში... თვალეში სულშებერილი ნაკვერცხლებით უგვიგინებდა. ხიმურმა წამწამები დახარა და ახლა უთქმელად გამობრუნდა. ვაჟი გაქვავებულივით ისევ იმ ადგილზე იდგა.

დოლი ცოტა ხნის შემდეგ დაიწყო. მარშანიას ნაცრისფერი ბედაური ქარიშხალივით მიჰქროდა, მას ნისლივით მსუბუქად მიჰყვებოდა ბაჩა-კვიცი.

მინდვრის ექვსჯერ შემორბენის შემდეგ, ხალხმა ჯერ ბაჩა-კვიცი კისერი შეამჩნია და მერე მისი ტანი. მსუბუქად, ძალდაუტანებლად მიჰქროდა ბაჩა-კვიცი მიზნისაკენ. მარშანია სირმის მათრახს სცემდა ისედაც ფიცხ ბედაურს, — ჰატ, ჰატო, — ჩასძახოდა ყურში, დეზსაც ხმარობდა, მაგრამ დაღ-

ლილობისაგან ხერხემალმოდუნებულ ცხენს ეტყობოდა, მეტი არ შეეძლო. თანდათან მოკრიფა ნაცრისფერი ბედაური ბაჩა-კვიცმა და მინდვრის მეათედ შემოვლის დროს უკვე ერთი რკალით გაასწრო წინ.

— ის პატარა ცხენი თევზივით გვერდი-გვერდ იყურება, — შენიშნა ვილაცამ.

— მხედარს შეხედეთ! — გაიოცა შერვაშიძემ, როცა ცხენებმა წინ, სულ ახლოს გაუქროლეს. — სუნთქვაც კი არ მომატებია, წამწამებიც არ დაუხამხამებია, აი, მხედარიც ამას ჰქვია!

— ვინ არის ნეტავი? — იკითხა შერვაშიძის ქალიშვილმა.

— თემჰვას უფროსი ბიჭია, ქალბატონო, სვანი ქალის, დაჯილის ვაჟიშვილი, — უპასუხეს ქალს.

ხიმურს გული გადაუტრიალდა. მიხვდა თარკილის ქალიშვილი, თავადის ქალწულს რომ თვალი შეუვარდა ბაჩა-კვიციის მხედარზე. მათემ კი ამ დროს ეკლესიის გალავანთან მიაგდო ცხენი. მეგობრები ზრდილად შემოეხვივნენ და მოლოცვა დაუწყეს.

— ნახეთ ერთი, ოფლის ცვარი არ დასდენია! — გაიოცეს ცხენის სიმშრალე მოჭირითებმა. — ლაჭებსაც არ შეჰპარვია ლამი.

— ჯიქის ძუძუნაწოვია, — გაიღიმა მათემ.

— რაო?! — ახლა კი ვერ შეიმაგრა თავი ხიმურმა. მისი ხმა გაიგონა თუ არა, მათე სწრაფად შემოტრიალდა.

— კვიცი როცა იყო, ჯიქის ძუძუს ვაწოვებდით, ქალიშვილო.

— ჯიქი კვიცს როგორ მიიკარებს?

— ცოცხლად დავიჭირე დედა ჯიქი თავის ჩვილით, კვიციც შეეჩვია, არც მე დავუშალე.

თავად შერვაშიძის ქალი ახლო მისულიყო და გაშტერებული უსმენდა მთხრობელს.

— ჩვენ კი გვასწავლეს, ჯიქი არ შინაურდებოა, — ნელი ხმით თქვა მან.

— შეიძლება ასეა, ქალბატონო, — ჩაფიქრებით შეეპასუხა მათე, — ალბათ, შვილთან ერთად რომ შევიპყარი, ამან დააოკა, ძუძუს საწოვრად ბოკვერთან ერთად კვიციც მიუშვა.

მის თვინიერებას კი ვერც ახლა დავიქადნებ — რკინის პალოზე მიბია ჯაქვით.

იმ ღამით თვალი არ მოუხუჭავს ხიმურს. ვერც მეორე ღამეს დაიძინა გულდამშვიდებით. მამამ დალონება შეატყო ერთადერთ ქალიშვილს.

— ავად ხომ არა ხარ, გოგო?!

ხიმური შეცბა. მამას მხრებზე მოეხვია.

— არა, მამა, ცოტა უგუნებოდ შევიქენი.

— საბალახოებზე ავიდეთ, შვილო, ჯოგში მთის ჰაერი მოგიხდება.

ხიმური — შეშინდა. იფიქრა, წამიყვანენ და მათეს მთელ ზაფხულს ვერ ვნახავო.

— ვერ წამოვალ, დედას ვერ მივატოვებ.

სწორედ ამ დროს ჭიშკარი გაიღო და მათეს ძმამ, ასტამურმა, პატარა ჩიქი შემოიყვანა.

— ჩემმა უფროსმა ძმამ გისაჩუქრა, — წყნარად თქვა მოსულმა და ხიმურს შეხედა.

თარკილის ქალიშვილი ცას შეეტოტა ხელით.

— მობრძანდით, — სტუმარი შინ შეიპატიჟა; გაოცებული მამა ჩაფიქრებით მიჰყევბოდა სტუმარს. მიხვდა ძველი მეჯოგე — მათეს საჩუქარი უფრო მეტი მნიშვნელობისა იყო.

დიდი პატივით მიიღო ასტამური ქალიშვილის ოჯახმა.

ხიმური თავს ევლებოდა სტუმარს. მეორე დღეს უმცროსი ძმა მათეს უყვებოდა თარკილების უხვი მასპინძლობის შესახებ.

— დალაღები კოჭებამდე უღელავსო, — დააბოლოვა ასტამურმა და ძმას ეშმაკურად შეხედა.

მას შემდეგ ბევრი რამ მოხდა. მათე არაერთხელ შეხვდა ხიმურს. არაერთხელ მოუსმენია ნიავს მათეს მკლავზე დაყრდნობილი თარკილის ქალის ჩურჩული. ახლა კი წყაროს თვალში უყურებდა ხიმური თავის გულისტოლს.

— არა, ასტამურს უნდა ვკითხო! — გადაწყვიტა მან და კარვისაკენ წამოვიდა.

გონწასული ასტამური შფოთიანად სუნთქავდა. ზღურბლზე გადააბიჯა თუ არა, ხიმურს ლაპარაკი მოესმა: სიცხეში წასული ასტამური ბოდავდა.

— ტყუილია, არა მჯერა, შეუძლებელია, გაგიყდა... — ძიხდა იგი ნაწყვიტ-ნაწყვეტად.

— იწვის უბედური! — წაიჩურჩულა ხიმურმა, თავსაფარა დაასველა და ავადმყოფს შუბლზე დააფინა.

თითქოს ჩვარის სიცივემ იმოქმედაო, ასტამური ოდნავ გაინაბა, გაუჩრდა. ცოტა ხნის შემდეგ ისევ აფორიაქდა, ისევ აიტკიცა და უფრო ხმამაღლა მორთო ყვირილი:

— რა თქვი, როგორ გაბედე, ოჯახი შეარცხვინე! არა, სტყუი, ვერაგო, შექზიარა არ მილალებდა, ძმა კი არა, გველი ყოფილხარ... ეს შენ გამოიგონე. ცილი დასწამე ჩემ ცოლს!

ხიმურს მუხლი უკანკალებდა.

— გაგიყდა, სიცხისაგან გაგიყდა, რა ვქნა, მათეს რა ვუთხრა! — სიმწრისაგან ხელების მტვრევით ჩაიჩურჩულა ხიმურმა.

— არა! — ახლა ისე დაიყვირა ავადმყოფმა, რომ კარავმა დაიზანზარა. — მაშ, გვატყუილებდი, ხიმური მიყვარსო, ხომ?! თვალს გვიხვევდი მეც და დედასაც, არა?! არ დაგინდობ, დიღამდე როგორმე გავძლებ და მაშინ ნახე შურისძიება!..

თავისი სახელის ხსენებაზე ხიმურმა უკან გაიწია.

— ღმერთო ჩემო, ეს რა გავიგონე. ეს რა წამოროშა ასტამურმა, აქ რაღაც სხვა ამბავია! — იგი გონების მოსაკრეფად კედელს მიეყრდნო. ქალს ლოყები გაუყვითლდა და ათრთრლდა.

— არა, ტყუილია, მათე ჩემს სიყვარულს არ უმტყუნებს! — ამ სიტყვებთან ერთად ხიმური გარეთ გამოვარდა, უცებ კარს უკან მიყუდებულ ურდულს წამოედო და კაბა მუხლზე სულ გადაიხია. ხიმურს ეს არც გაუგია. მან ხმაურით გამოაღო კარი და მთებს გახედა; მწვერვალებსა და საბალახოებს შუა ლურჯი მსუბუქი ლივლივა ჰაერი იდგა. მზის სხივები თვალისმომკრეფლად იბნეოდა ამ ზურმუხტი ფერებით საცხე გარემოში. თეთრი მწვერვალები პირქუშად აზიდულიყვნენ ზეცისაკენ.

— სად წავიდე, როგორ მივაკვლიო! — თრთოლვით ჩაილაპარაკა ქალმა.



— ხა, ხა, ხა, — მოკვდი უბედურო! — ისევ დაიღრიალა ასტამურის ხმამ კარავში.

ხიმური შემობრუნდა.

— უნდა გავალვიძო, გამოვკითხო, — გაიფიქრა და ისევ კარავში დაბრუნდა.

ასტამურს ცალი ხელი საბანს გარეთ გადმოეგდო. შუბლზე ოფლის წვეთები დაჰყვოდა.

— ასტამურ, ასტამურ, — ჩასძახა ქალმა ავადმყოფს.

ასტამური მეხდაკრულივით კანკალით წამოჯდა ლოგინზე და უაზრო თვალებით მიაჩერდა ქალიშვილს.

— მითხარ, რა დაემართა მათეს?! — შეევედრა ხიმური.

ასტამურმა არაფერი თქვა. იგი ისევ გარინდებით მისჩერებოდა ქალიშვილს.

— ჰა, შენ ხარ, უბედურო?! — შეიცნო ხიმური ასტამურმა.

— უბედურს რატომ მეძახი, ასტამურ!

— განა შენ არ გიყვარდა ის დაუნდობელი კაცი?

— ვინ არის დაუნდობელი?!

— ვინ და ჩემი ძმა, მათე.

ქალი ასტამურს მივარდა და ხელებზე მოეჭიდა.

— გარკვევით მითხარ, გული ნუ დამილიე, ასტამურ!

— რა გითხრა, ჩემო დაო, ორივეს გვიღალატა, ორივე დაგვრუპა. შუქზიარა შეყვარებია.

— ტყუილია!.. — ამოსკდა ქალს გულიდან. სიცხე გაქვს და ბოდავ.

— თვითონ თქვა, თარკილის ქალო, ჩემი ყურით გავიგონე.

— სტყუი, საზიზღარო! — ხიმურმა ასტამურს ხელი გაუშვა და კედელს მიეკრა. მისი თვალები მრისხანედ ელავდა ახლა.

— ნეტავი მართლაც გავგიჟებულებიყავი, ბედნიერ კაცად ჩავთვლიდი თავს! — ასტამურს ცრემლები წასკდა თვალთაგან და წამწამებიდან თქრიალით დაიწყო ცვენა იატაკზე.

„გიჟმა კაცმა ცრემლი არ იცის“, — გაახსენდა მამის ნათქვამი ქალს.

— სად არის მათე ახლა? — ხრიალით იკითხა ქალმა.

— ჯანდაბას, სადაც დედაჩემის ძუძუს მოწოვამდე უნდა ყოფილიყო.

გაღებული კარიდან ნიავმა შემოიგრიალა და მუხლისთავზე გახეული კაბა აუთამაშა ქალს.

— ნუ მომკალ, ასტამურ, სათქმელი გარკვევით მითხარი.

ასტამურმა ტირილი შეწყვიტა. ახლა ცრემლი აღარ სდიოდა. სველი წამწამებიდან თვალები ნაკვერცხლებივით უბრიალებდა, ხიმურს დაჟინებით მისჩერებოდა. მისი ასე უცებ შეცვლა ქალს არ მოეწონა, ხიმურმა თვალი გაადევნა ასტამურის მზერას და მუხლზე დაიხედა. ქალს შიშველი მუხლისთავი თეთრად შეღვარებდა. სახელანძული თარკილის ქალი გველნაკებნივით წამოვარდა ზევით.

— ფუი, შენს ძმობას, თვითონ ვერაგი და უნდო ყოფილხარ! განა მე არა ვარ შენი სარძლო?! მათე კი, ჩემი მათე, სამძოდაც კაცია და საქმროდაც შეუცვლელია, იცოდე!

იგი სწრაფად გამოვარდა გარეთ, კარვის სვეტზე დაკიდებულ ნაბადს და ბაშლაცს ერთად წაატანა ხელი, მერე ოღხავ შეჩერდა, გარემოს თვალი მოავლო და ბალახზე მიშვებული ცხენისაკენ სირბილით გაიქცა. ენაჩავარდნილი ასტამური ერთ ადგილზე გაშვებული დარჩა. ახლა თვალების ელვარება ჩაუქრა, სხეული მოუღუნდა, პირში ნერწყვი ისე გაუშრა, ხმის ამოდება გაუქირდა. იგი რაცრაკით მიადგა კარებს. ხიმური ცხენზე ჯდებოდა.

— არ წახვიდე, ხიმურ. ვფიცავარ, უნამუსო თვალთ არ შემიხედავს, გოგო!

ცასა და მაღალ მწვერვალებს შორის სავსე მთვარე ისე დადიოდა, თითქოს განგებას უნდოდა ეთქვა, — აბა, შეხედეთ და დასტკბით, განა ქვეყნად უფრო ლამაზი, უფრო მშვენიერი რამე გინახავთ?! ღამის სიწყნარეში მისი სხივები მღუმარედ დასცქეროდნენ ცის თალში შეტყორცილ, მარად დაღუმებულ უინულოვან მთის წვერებს. სინათლე პეშვებით იბნეოდა ყველგან: მთის კალთებზე, ხეებში და ზღვისპირა მინდვრებში. მხოლოდ დაჯილის ფაცხის წინ, ცაცხვის დიდ ტოტებქვეშ ვერ ჩაეღწია მის სხივებს. ფოთლების სიხშირის გამო მის ძირში ღამე იდგა, აქ ორი ლანდი ჩურჩულით ესაუბრებოდა ერთმანეთს.

— მამიდაჩემო, თუ გიყვარვარ, დრომდე არაფერი მკითხო. მათე სვანეთში ამაღამვე უნდა წავიყვანო, საქმე მაქვს...

— ხომ ცოცხალია, ბიჭო?  
— ცოცხალიც არის და ჯანზედაცაა.  
— ასტამური სად არის?  
— თარკილებთან დარჩა, საბალახოებზე.  
— მას ხომ არაფერი უჭირს?  
— არა, ისიც კარგად არის.  
— დედას არაფერი დაემალემა, ივაკი!  
— აკი გითხარი, მამიდა, მათე აუცილებლად ჩემსას უნდა წაიყვანო-მეთქი.

— შენ რა გაგიჭირდა, რატომ მიმალავ?!  
— მალე გაგაგებინებ. ახლა, ჩემს თავს გაფიცებ, არაფერი მკითხო.

— ცოტა ჩემსკენ მოიწი, — დაჯილმა ძმისშვილის სახე ახლო მიიტანა და თვალეებზე ხელი მოუსვა: — ცრემლი არ გაქვს, მაგრამ, გეტყობა, თვალეები გიხურს, ბიჭო.

— მამიდა შენთვის ოდესმე ტყუილი მიკადრებია?

— არა, მაგრამ, ცუდი სიზმარი ვნახე ბიჭებზე.

— ხომ დაგიფიცე, ორივენი ჯანზე არიან.

— კარგი, წაიყვანე, დამილოცნიხართ. იცოდე კი, სანამ თქვენ ამბავს არ გავიგებ; დავილევი.

— თუ იღარდებ, მაშინ ამაღამვე ჩამოვიყვან ორივეს სახლში.

— არა, თუ ასე გჭირდება, შენი ძმები არიან და წაიყვანე, საფათერაკო არაფერი ჩაიდლოთ გულში.

ივაკიმ ფრთხილად გადმოიყვანა ცხენი, მამიდას გადაეხვია და ისევ მთებისაკენ გასწია.

— რახან კარგად არიან, აღარაფერს დავეძებ, — ჩაიჩურჩულა დაჯილმა და ჭიშკარი მოხურა.



მათე თანდათან მომჯობინდა, სევანეთის ჰაერმა, ივაკის მოვლამ და ახალგაზრდულმა ჯანმა თავისი გაიტანა. მხოლოდ ერთი ფიქრი არ შორდებოდა მათეს — ხიმურისა არაფერი ისმოდა. აგერ ორი კვირა გავიდა და აფხაზეთიდან ჩამიჩუმიც არ აღწევდა აქეთ.

— ჩვენი ამბავი თუ გაიგო, დავილუპე! — ეტყოდა ბიძაშ-  
შვილს მათე.

— არ ვიცი, — დაიბუხუნებდა ივაკი, — ნეტავი, მეც არ გა-  
მეგო და მომკვდარიყავი.

— ხიმურმა თუ შეიტყო, რა მომელის, ივაკი?

— არც ეს ვიცი, ვერაფერს გეტყვი.

— უიმისოდ ვერ ვიცოცხლებ, იცოდე!

ივაკი შუბლს შეიკრავდა. ხანჯალზე ვეება თითებს დაალა-  
გებდა და მხრებს აიჩეჩდა.

რამდენი კოშკია სვანეთში, იმდენი გზაც არის. ყოველი  
გზა კი კოშკის ძირას თავდება. ერთ დილას ივაკიმ მათყენ  
მომავალი ორი ცხენოსანი შენიშნა. ისინი ბოგირზე გამოვიდ-  
ნენ და ტენებით წამოვიდნენ ზევით.

„ვინ უნდა იყვნენ, ნეტავი?“ — გაიფიქრა და მათეს უხმო.

— დედაჩემი და ხიმურის ქალია — გაიოცა მათემ და ფე-  
რი ეცვალა.

ცოტა ხნის შემდეგ ორივე ცხენოსანი კოშკის ზღუდეს  
მოადგა.

კარი გაუღეს. დაჯილს მათესათვის არ შეუხედავს, ისე  
შეანათა თვალები ივაკის.

— ჩემი ოჯახის მტერი ხომ არ იყავი, უბედურება როკ  
დამიმალე?!

ივაკი შეერთა, მაგრამ არ დაიბნა:

— ჭირს დრო აქარვებს, ძამიდაჩემო, მეც დროს გასვლით  
მინდოდა მისი განელება.

— ტყუილია! — დასტეკა დაჯილმა. — ასეთ ჭირს დრო  
უფრო აღრმავებს და საქვეყნო ჭირად ხდის.

— ქვეყანა რა შუაშია, დედაჩემო?! — ბორძიკით წაილულ-  
ლულა მათემ.

— გონება დაგბნელებია, შვილო! განა ოჯახის შერცხვენა  
ქვეყნის ჭირი არ არის?

— ასტამური ილუპებოდა, დედი!

— შერცხვენას სიკვდილი არ სჯობია, ბიჭო!

ხიმური ჯერ ხმას არ იღებდა. იგი გარინდებული ისმენდა  
ნათესა და დაჯილის საუბარს. ქალს დარაიის თეთრი ყაბა-  
ლახი მოეშალა თავიდან და დალალები ძირს გადმოსცვენოდა.

მხრებიდან ჩამოგდებული ნაბადი ბეჭზე მოსხმულივით ისევ მიწაზე იდგა და ქალს მკერდამდე სწვდებოდა.

— მე რას მეუბნები, მათე?! — იკითხა მან და დალალები ხელში ისე აიკრიფა, თითქოს ამით აპირებდა წაქცევისაგან თავის შეკავებას.

— შენ?! — დააბნია მეხზე უფრო საშიშმა სიტყვამ მათე.

— ჰო, მე! მე რას მეტყვი?

— რა უნდა გითხრა, თუ არ გამწირავ, დღესვე ჯვარს დავიწერ.

დაჯილმა ამოიხვნეშა. ხიმურს თითქოს არ გაუგონია ეს ხვნეშა.

— მერე, გულს, რას ეუბნები?!

— რა თქვი?! — კიდევ უფრო გაიკვირვა მათემ.

— გულს რას ეუბნები-მეთქი?!

— მე ისევ მიყვარხარ, მე ისევ შენ...

— სტყუი! — გააწყვეტინა სიტყვა ხიმურმა, — განა, თუ ერთი გიყვარს, პატოსანი კაცი მეორე აღამიანს ეტყვის ამ სიტყვას?!

— არავისთვის არ მითქვამს, მიყვარხარ-მეთქი.

— ხომ თქვი, შექზიარა მიყვარსო.

მათეს სახე დაეღრიჯა.

— გულით ხომ არ მითქვამს!

— განა ვაუკაცის გულში ნაფიქრი სიტყვა ბაგემ შეურყენელად არ უნდა გამოთქვას? განა სხვანაირად შეიძლება?!

იგი ოღნავ შეჩერდა, სული მოითქვა და მერე დაჯილს და ივაკის მიუბრუნდა:

— თქვენ მაინც, მითხარით, აღამიანებო!.. ღმერთმა იცოდეს, თავზე უფრო მიყვარდა თქვენი შვილი, მე მეგონა, მასაც ვუყვარდი. ახლა კი ჩემს სათქმელს სხვას ეუბნება, თან მეფიცება — უგულოდა ვთქვი და დამიჯერეო. არა, მათე, ვერ დაგიჯერებ; მე მეგონა, ასტამური სცდება-მეთქი და შენკენ გამოვეშურე. მეგონა, თავს გაიმართლებდი და შენგან სხვა სიტყვებს გავიგონებდი; შევცდი, აფხაზი კაცისა არც გული გქონია და არც სიტყვა.

მათე შეტორტმანდა და ხელგაწვდილი წამოიწია ხიმურისაკენ.

— არ მომეკარო — დაიკვილა ქალიშვილმა. მან ნაბადს ხელი ჰკრა და ისიც კაცივით გაგორდა მიწაზე.

— არ მომეკარო თარკილების ოჯახს, იცოდე, ასე მოსდგამს: სიტყვამრუდე ადამიანი ყველაზე ბოროტ კაცად მიიჩნია. სიტყვას გულიდან ფრთხილად უნდა ამოკრეფა, დაუფიქრებლად ნათქვამი საყვარელ კაცს საძულველად გაგიხდის, ძმას გადაგამტერებს, დედას დაგაშორებს, ქვეყნის მოღალატედ გაგხდის.

— ვაი, მე უბედურს, რომ ასე დამემართა! — წამოიძახა მათემ და თავზე ორივე ხელი შემოიკრა.

დაწილი დაბარბაცდა, მერე ძალა მოიკრიფა და ივაკის შეუტია:

— წამიყვანე აქედან, ბიჭო, აქაურობას გამაცილე, გულად გამისკდება!

ივაკიმ ფრთხილად მოჰკიდა ხელი მამიდას და კოშკისაკენ წაიყვანა.

ათრთოლებული ხიმური ცხენისაკენ წავიდა ნელა. გონებადაბნეულ ქალიშვილს ნაბდის წამოსხმა არ გახსენებია, ისე შეჭდა ცხენზე. მუხლის თავამდე აწეული კაბის კალთა გაფრიალდა და ქალიშვილის ქათქათა თეთრმა მუხლმა ელვასავით მიიანათა მათეს.

ხიმურმა უნებლიეთ დაიფარა ხელი შიშველ სხეულზე და თავისდაუნებურად ცხენიდან მათეს ჩამოხედა.

ვაჟი მისკენ არ იმზირებოდა, იგი ახლა დამბლადაცემულივით იდგა, მის თვალებში სიცოცხლის ნიშანწყალი არ კიაფობდა.

— არ გადარჩება! — გაიფიქრა ხიმურმა, ცხენს ქუსლი ჰკრა და ნაბადი აიტაცა. — ღმერთო შენით და მის ფიქრს სინათლე აკლია, ნისლიანი კაცი ყოფილა. ასეთები ძმასაც გულს გაუტეხენ და თავსაც დაიღუპავენ! — ხიმურის ცხენმა ბაგირი გადაირბინა და კლდეზე გაჭრილ გზას დაადგა, ზემოთ ახლა ჩამიჩუმი არ ისმოდა.

არც კოშკიდან გადმოუხედავთ მისკენ და აღარც მას გაუხედავს იქით.

## თქვეულეგა ჰუთაისზე

გულზეიადი მამა ჰყოლია დადამ გულბანს. ჰაბუქს მშვილდ-ისრით ღმერთათათვის ნიშანდაკრული ხარჯიხვი მოუქლავს. მამა განრისხებულა, ლეთაების შესაწირს კაცის ხელი არ უნდა შეხებოდანო. ორი დღე სდია შვილს მოსაკლავად.

მდინარე ფაზისის მფრინავ ტალღებში ფიქვის ორი მორი გააწვინა დადამა, თვითონ ზედ შედგა და ბარისაკენ გასცურა, კავკასიონის უკანასკნელ კლდეფერდზე გადმოხტა ტივიდან. მაშინ იქ, სადაც ახლა უქემერიონის კალთებია, ძელქვის გაუვალი ტყე ყოფილა. ძელქვები ვაზის მტევნებით იყო დახუნჩა-ლული. მათ ფესვებთან ჰაბუქს კარავი მოულობავს, კერა გაუჩაღებია და ცხოვრება დაუწყია.

ზემთ, წითლნარსა და მუხნარში გარეული ღორი იცოდა, ცამდე აშოლტილ მთვლემარე უღრანში კი ირემი და შველი. აბა, სანადირო როგორ დაეღეოდა მის გამჰკრიახ თვალს და ვეფხვის მოქნეულ ბწყალივით მკლავს. მისი თითებით მოზიდული ისარი ორი დღის სავალზე დაეწეოდა ცაში აფრენილ ფრინველსა და ველზე გაჯირითებულ შველს. ფათერაკისაგან დედის ხელით მკერდზე დაკიდებული დევის კბილის ავგაროზი იცავდა. კეთილს კი თვითონ სცნობდა. მაღალ მწვერვალთა სიახლოვეს დაბადებულს არწივი მიაჩნდა კეთილისმყოფლად. ამიტომ დაბინავებისთანავე ჰერ კიდევ შეუბუმბლავი მართვე დაიჭირა და აღზარდა.

კარვის კუთხეში ძარღვიანი კლდის ჭანი შემოიტანა, ზედ ბუდე გაუკეთა და თანამოსახლედ გაიხადა.

ჰერ ბუმბულით შეიმოსა მართვე, მერმე ფრთები გაუმაგრდა. მის ნისკარტს და ბწყალს თანდათან მუხის კანის ფერი

მეცა. ბავშვივით გაიწვრთნა. ვაჟკაცივით დაუმწიფდა გონება. დადაში დილით მშვილდ-ისარს გადაიკიდებდა, მართვეს წინ აიფრენდა და ფაზისის ნაპირს გაუყვებოდა. ცის ტატნობიდან მართვეს ვარსკვლავივით სხივიანი თვალები ყველაფერს ხედავდა. ირემს მოჰკრავდა თუ შველს თვალს, ზევიდან დაიხუვლებდა, გამზრდელს ადგილსამყოფელს ანიშნებდა. ნანადირევეს ერთად შეექცეოდნენ. ასე შეეჩვივნენ ერთმანეთს, ასე დამეგობრდნენ. სალამოჟამს სანადიროდანაც ერთად ბრუნდებოდნენ. არწივი ცის ბილიკით, დადაში ტყის საცალფეხოთი. გზა კი ორივეს ერთი ჰქონდათ — სახლისაკენ მოდიოდნენ. ერთ სალამოს არწივი არ დაბრუნდა. დამე თეთრად გაათენა დადაშმა, თვალს ძილი არ მიეკარა. გათენებისას ფრთების შრიალი მოესმა. კარვის წინ, ძელქვის ტოტზე წყვილი არწივი შენიშნა. ერთში თავისი მართვე იცნო, მეორე კი ეუცხოვა. მიხვდა დადაშ გულბანი, დაწყვილების დრო დამდგარიყო. ახლად გატყავებული შველი მიუგდო ორივეს. თვითონ კი უცნობმა რამ დარდმა შეიპყრო ვაჟკაცი.

მთელი წელი ბოღმანარევი დადიოდა დადაში, თავი უბრუნოდა, წამალი კი ვერ მოენახა. ამ ხნის მანძილზე არწივებმა ბარტყებიც დაჩეკეს.

ერთ დღეს, იქ, სადაც ფაზისის ტალღები უფრო მშვიდი და წყალმრავალი ხდება, ვეება ნავი შენიშნა. ადამიანები ნაპირზე გადმოსულიყვნენ, ნანადირევი მწვანეზე გაეშალათ და შეექცეოდნენ. ჰაბუკმა თვალთვალი დაუწყო მოსულეებს. ცოტა ხნის შემდეგ მათ ორი ქალი გამოეყო. ქალებმა ტყისკენ აიღეს გეზი. ერთი ახალგაზრდა იყო, ირემს ჰგავდა, მეორე უფრო ხნიერი და დარბაისელი ჩანდა. ახალგაზრდა დაწინაურდა და სწორედ იმ ძელქვისაკენ წამოვიდა, სადაც დადაში იყო მოფარებული. ვაჟკაცი წამოწვა და თავი მოიმძინარა. ქალწულს შეეშინდა, ალბათ, მკვდარი ეგონა, მუხლი მოიყარა და ვაჟის მკერდზე ყურის დადება დააპირა. დადაშის გულისცემა ერთი დღის სავალზე ისმოდა. ქალს ღიმილი მოერია. ალბათ, გუმანით მიხვდა ვაჟის ეშმაკობას და ტყის ნაპირზე ჩუმი კისკისი გაისმა. ჰაბუკმა თვალი გაახილა.

— თქვენ ვინ ბრძანდებით?! — ჩურჩულით იკითხა ქალწულმა.



დადაში გააკვირვა მისმა რბილმა და ხავერდოვანმა ხმამ. სიტყვა მაინც ვერ დასძრა.

— მუნჯი ხარ? — გაელიმა ქალს.

— შენმა ხილვამ დამამუნჯა, — როგორც იქნა წაილულულულა ქაბუქმა.

ქალმა არაფერი თქვა, მხოლოდ უკან ორი ნაბიჯი გადადგა და მხლებელ ქალს შეეხიანა:

— ძიძა-დედღუ, შენ უკან დაბრუნდი, მეც მალე გეახლები.

ხნიერი ქალი უსიტყვოდ დაემორჩილა, ქალიშვილი კი უკან გამობრუნდა. იგი ისევ მივიდა დადაშთან, ნელი რხევით მშვილდი აიტაცა და თვალიერება დაუწყო. ლარის მოწვევა სცადა. ძნელი აღმოჩნდა. ქალმა ვაჟაკის გულმკერდზე გადაიტანა თვალი.

— უჰ, რა ღონიერი ყოფილხარ?!

— დათვი მომიკლავს ერთი დარტყმით, — დაიტრაბახა ვაჟმა. ქალმა ექვით შეხედა. ვაჟი შეცბა, უხერხულობა იგრძნო თავის ნათქვამის გამო.

დადაშის ბედზე უცებ შრიალი გაისმა და ციდან ჩამოსხლეტილი მისი აღზრდილი ზედ ბექის თავზე შემოაფრინდა.

ქალს შიში დაეტყო.

— ავი სული ხომ არა ხარ?! — შეკრთა ქალწული.

— ავი რად ვიქნები, ეს ჩემი გაწვრთნილი არწივია! — იამაყა დადაშმა.

— შენი გაწვრთნილი?! — ფერი მოუვიდა ქალს.

— ჰო, ჩემი. ამ უშიშარს თავისი ცოლ-შვილიცა ჰყავს. ამქვეყნად მგონი მარტო მე დავიარები უტოლოდ, — წამოსცდა უნებურად გულის დარდი.

ქალმა შეხედა ქაბუქს და თვალეები დახარა. დადაშის მხერაში ისეთი ელევა-კოცონი შენიშნა, რომ მისმა თვალებმა თვითონაც აათრთოლა და ტანში ტკბილნარევი შიში ჩაუყენა.

— ენა ჩვენი გაქვს და უცხო კი ჩანხარ, — შეეკითხა ვაჟი.

— მე აიეთის მეფის ასული ვარ, — წამოსცდა ქალს.

— მეფის?! — გაიკვირვა ვაჟმა. მე კავკასიონის მწვერვალთა მაღალი კალთების შვილი ვარ. ჩვენ მეფე არასდროს გვეყოლია. მამისაგან გამიგონია კი — ბარის მცხოვრებლებს მეფე ჰყავთო.

— ჰოდა მეც მისი ქალი ვარ. მისი ერთადერთი ასული.

— მეფეები გულგოროზნი ყოფილან, ერთმანეთს ეომებიან, დილეგში ამწყვდევენ ადამიანებს.

— მამაჩემი მეომარია, მაგრამ გულკეთილია, — წყენა და-  
ეტყო ქალს ხმაში.

— ნუ გამოჩავრდები, — შეტოკდა ვაჟი. — ეს მამაჩემს უამბნია ჩემთვის. ახლა მე მარტოდმარტო ვარ ამქვეყნად. მამა გაევაჯერე, გამირისხდა. მხოლოდ ეს ზვიადი ფრინველი სუნთქავს ახლა ცოცხალთაგან ჩემს ახლოს.

ქალმა არწივს ჩახედა თვალეებში. ვაჟი გააოცა მისმა აღზრდილის თვინიერებამ. იცოდა დადაშმა, ფრინველი მის გარდა ყველა სულდგმულს ერჩოდა. ახლა კი სიკეთე ჩადგომოდა მუდამ ბრანიან მზერაში.

„ამასაც მოეწონა ეს ასული, ჩემი ბედი თუ იგრძნო მტაცებელმაო“, — გაიფიქრა თავისთვის.

ქალმა ფრთებზე ნაზად დაუსვა ხელი. არწივი გაიტრუნა, არ იუცხოვა.

— კარგი ყოფილა შენი გაზრდილი, — ღიმილით თქვა ქალმა.

— თქვენ მას მოეწონეთ, ჩემსა და თავის ფრთოსან მეცალეს. გარდა აქამდე არავის იკარებდა, ახლა მესამე მეგობრად გიგულათ.

— მეც ვუმეგობრებ. სიკვდილამდე ვუმეგობრებ, — წყნარად ჩაიჩურჩულა ასულმა და მორცხვად შეხედა ვაჟს.

დადაშს კვეს-აბედმა გაჰკრა, ტანში ცეცხლი შემოენთო. არწივს ნისკარტზე ხელი წაავლო, მისკენ მიაბრუნა.

— რას იტყვი ახლა? — ხმამაღლა ჰკითხა ზვიად ფრთოსანს.

— გრაგ-ჰე-ჰე! — გაჰყვილა არწივმა ცის ტატნობს.

— გრაგ-ჰე-ჰე! — მოესმა პასუხად ზევიდან და ცოტა ხნის შემდეგ ღრუბლებქვეშ დაშვებული მობოინე დედალი ფრთოსანი შენიშნა ასულმა.

ქალი უნებლიეთ გაიწია ვაჟისაკენ. ვაჟმა ანაზდად მოხვია ხელი.

— წამოხვალ ჩემთან?

ქალი გაიტრუნა, სიტყვა ვერ დასძრა.

— იქ კარგია, მდინარის ტალღები მეხვიით ასკდება კლდეებს, ცივი წყაროები მოჩუხჩუხებენ მღვიმეებიდან; ყურძნის მტევნებით დატვერილია ძელქვის ტოტები. იქ კარგია! — სუნთქვა გაუხშირდა და დაშს და თვალები აუნაპერწყლდა.

— ცა უფრო სუფთაა და ვარსკვლავმრავალი, მიწაც უხვია და თბილი. ჩვენი სამყოფელიც კლდეებით არის შემოზღუდული. უშიშარია და ნეტარდასასვენებელი. წამოხვალ ჩვენთან?! — ჩაუჩურჩულა დაჟინებით ვაჟმა.

— არ ვიცი, მე შენთან მივინდა, მაგრამ მამას უნდა შევეკითხოთ. უიმიოდ არ შეიძლება.

— იქ კარგია! — ისევ აფეთქდა ვაჟი. — ზევით არწივთა საბუდარი მწვერვალებია, ქვემოთ გაშლილი ველები, ზემოთ წაბლის ტევრებია, ქვემოთ ძელქვის გაუვალი ტყით დაღრუბლული გარემო. მწვერვალთა კალთებზე ჭიხვები დანავარდობენ, ქვემოთ კი ხარ-ირემი. ხის ტოტებზე უთვალავი ფროსანნი ბუდობს, ხეთა ფუტუროებიდან თაფლის წყარო მოჟონავს. კარგია-მეთქი, ხომ წამოხვალ, კოლხეთის მეფის ასულო?!

ქალმა თრთოლვა იგრძნო. ვაჟმა უფრო ანლო მიიზიდა იგი.

— იქ კარგია, იმიტომ, რომ ჩვენ ერთმანეთი ვნახეთ, — ახლა კვესი და ნაპერწყალი ხმაშიც ჩაუდგა და დაშს, — იქ კარგია, ჩემი სიცოცხლის პირველო ლამაზმარცვალ, არწივები ხომ მოგეფერენ და ბედი დაგვილოცეს. სალ კლდეზე კოშკს აგიგებ, სასახლეს გავშლი მწვანე მდელოზე, კიბესვეტი მარმარილოსი ექნება, თაღები ვარსკვლავთა გუნდით მოქედილი, მისი გუმბათი იალბუზს მიებჯინება, კედლებს ცის დასალიერში ამოვუქვიტკირებ. ხომ წამოხვალ, ჩემო დედოფალო?!

ქალმა კოჭებამდე ჩამოშვებული ნაწნავები ხელში აიკრიფა, ჯერ ცაში მობოინე არწივს შეანათა შავი დანამული თვალები, მერე ისევ და დაშის მხარზე ჩამომჯდარ ზვიად ტოლფროსანს მოეფერა და თქვა:

— წამოვიდე თქვენთან, ფრინველთა მეფევე?

— გრაგ-ჰე-ჰე!.. — გაჰყვილა ისევ მამალმა დედალს ცის ლურჯ გუმბათში.

— გრაგ-ჰე-ჰე! — ისევ მოისმა საპასუხო ყვირილი ზემოდან. ასულმა გაიღიმა, ვაჟს კისერზე ხელი მოხვია და ისევ წყნარად ჩასჩურჩულა:

— მთვარე რომ თორმეტჯერ დაიღვევა და გაიბადრება, მელოდე. მამაჩემს ნებართვას ეთხოვ, უიმისოდ არ შემიძლია. მამის სიყვარული ღონეს მისცემს ჩვენს ცოლქმრობას. დამელოდე და მოვალ.

• • •

შვილზე გაბრაზებულმა შერგილ გულბანმა ცოლის გული ველარაფრით მოიგო. ქმრის გულწვიადობამ მეტად განარისხა დედა-ძაძუ.

— ღმერთი სულგრძელია, — ამბობდა იგი, — ჩემს შვილს შეცდომას მიუტევებდა, შენ კი ღმერთიც გასწირე, როცა შვილზე მახვილი აღმართე და მეც გული მომიკალი. უფრო გავარჯარებულ ქვის კეცზე დავწვები, ვინემ შენს მკლავზე! — თქვა და კოშკში ავიდა, შიგ ჩაიკეტა, შვილს დაუწყო ლოდინი. ქერის გამხმარ პურის ყუას წყალში ალბობდა და ისე ცხოვრობდა. ქმრის ნანადირევი არ გაიკარა. — მათაც, ალბათ, ისე უმიზნებდა მშვილდ-ისარს, როგორც ჩემს დადაშსო.

თანდათან დადნა ქალი. შერგილ გულბანის ცოლი კი ენით უთქმელი ლამაზი ქალი იყო თურმე. პირველად ჯარობაზე ენახა იგი განთქმულ მონადირეს შერგილს და ნადირობის ქალღმერთი ჰგონებოდა. გორაკზე მდგარი ასულის წამწამები ყორნის გაშლილი ფრთებივით შრიალებდა და მისგან მონაბერი ნიავი ათ ნაბიჯზე ბალახს არხევდა. ტანი ხევში ამოსულ ალვის ხესავით მაღალი და თმა შავი ღრუბელივით სინათლეგაუქვალნი ჰქონდა. დიდი ძალა აქვს ნამდვილ მამაკაცზე ქალს. შერგილ გულბანიც ცოლის თვალთა შუქით ინათებდა ცხოვრებას, მისი გუმანის გამომცნობი და შემსრულებელი იყო. ახლა კი, როცა დადაშზე განრისხებულს გული გაუგრილდა, ცოლის დარღმა მასაც ოჯახის უბედურებაზე მოუბრუნა გულ-ღვიძლი.

„შვილიც დავკარგე და ცოლიც დავღუპე, ვაი ჩემს გულმესისხლეობას“, — ფიქრობდა იგი და გალიგვებული თვალებით შესცქეროდა ცოლის სამყოფი კოშკის ცივ კედლებს. დრო კი გადიოდა. მალლა კოშკში დედის ძუძუ-მკერდი ჰქნებოდა, კოშკის ძირს მამის მხარ-ბეჭი ილეოდა.

ქვეყნად არ არის უფრო ძლიერი რამ, ვიდრე შვილზე დაფიქრებული დედის გუმანი.

მისი გულ-ღვიძლი შორით გრძნობდა შვილის ბედსა თუ უბედობას, შვილის პირისლიმილს თუ თვალზე მომდგარ ცრემლს. და, აი, ერთ გათენების ეამს, კოშკის წვერს რომ შეჰყურებდა, შერგილ გულბანმა დაინახა, მისი ცოლი ტაატიო, მაგრამ პირმომღიმარე ჩამოდიოდა კიბეზე.

— წადი, შე უბედურო შერგილ, ჩვენს შვილს მიეშველე, წუხელ გულმა მითხრა მისი ბედნიერების ამბავი, ეწვიე, ეტყობა, მამის ხელი ესაპიროება, სახლიკაცებიც გაიყოლიე, ვინძლო გამოადგეთ. ვგონებ, სასახლის აშენება განუზრახავს. ხუროები აარჩიე, ჩემი თმის ფთილებიც თან წაიღე და ციხე-ქალაქის ბალავერს დაუტანეთ. შთამომავლობას დედის თბილი სიყვარული თან დაჰყვება, ძუძუქეთილი ქალნი დაიბადებიან, სამართლიანი ვაჟკაცნი დაიზრდებიან.

სიტყვა არ უთქვამს შერგილს, ცოლის ბრძანება ღვთიურ ძახილად მიუჩნევია და მზის ამოსვლისას გზას გასდგომია.

მხოლოდ, როცა მდინარის პირას ჩასულა უფროსი გულბანი, მაშინ შეუნიშნავს ზემოთ მობორიალე ორი არწივი.

მამასაც მიმხვედრი გუმანი აქვს. ამიტომ მასაც გეზი იქით აუღია, საითაც არწივები ფრთის შრიალით მიუძღვებოდნენ სახლიკაცებს.



თვითონ აიეთის მეფე ამოსულიყო ამალით. ორი ათასი ხურო და ხის ოსტატი ამოეყვანა თან, შერგილ გულბანის სახლიკაცებს ისინიც დამატნენ და ციხე-ქალაქის კედლებმა დღითიდღე ცისკენ აიწიეს.

გალავნის ოთხსავე კედელში ბალავერს დედის თმის ფთილები ჩაატანეს. ვაჟის და ქალის მამებმა თითო ულვაშის ღერიც თან ჩააყოლეს, მემკვიდრეები და თაობები პირიანი და ვაჟკაცური ყოფაქცევის უნდა დამდგარიყვნენ.

თქმულება იმასაც ამბობს, აიეთის მეფეს ვეფხვის სამი ბოკვერი მოეყვანოს თითქოს. ხუროები მათი ნერწყვით ზელავდნენ კირს და საშენ ქვასაც მათ ალოკინებდნენ — ვეფხვური

ძალა და ბწყალი რომ დაყოლოდა ციხესა და შიგ გაზრდილ შთამომავლობას.

როდესაც თალის შეკვრაზე მიდგა საქმე, არწივთა გუნდი მოიხმო დადაშმა. თითოს თითო ფრთის ნაპტყენი დააძრო და გუმბათის კალთებს ჩაატანა. ჰაეროვანი და მძლავრი დარჩება, დასაზრდელებიც არწივების საბუღარს თავისად იგულებენ.

ამენდა კლდეზე ციხე-ქალაქი. წყაროები იღუმალი გზით შემოიყვანეს, ბილიკები და გზები მოხრეშეს. აღმოსავლეთის მხრიდან ფაზისის ტალღები ასკდებოდა მის კალთა-ფესვს, დასავლეთით კი ქვესკნელს ჩათხრილი გაზაფხულით გაგოყებულ პატარა მდინარე უვლიდა ირგვლივ. ამ მდინარის პირას ბალები გააშენეს, ბოსტნები გამართეს. ხეებზე სხვადასხვა ჯიშის ყურძენმტევნები გაამრავლეს და შეატოტეს.

როდესაც მთვარე თორმეტჯერ დაიღია და ისევ გაივსო, მაყრიონიც მიუახლოვდა ადგილსამყოფელს.

საპატარძლო და მისი ამაღა დარახტული ცხენებით შემოფრინდნენ გალაგანში, ცხრა სამთავროს ულამაზესი ქალწულნი თან ახლდა აიეთის ასულს. მათი მშვენიერება თვალს სტაცებდა დადაშ გულბანის დევგმირ სახლიკაცებს. ქალები გააკვირვა მთის ვაჟთა სილამაზემ და ახოვანებამ.

მეფემ თქვა:

— მარტო დადაშის და ჩემი ქალწულის ქორწინება როდი მიბრძანებია. სამი დღის ვადა მომიცია გალაგანში შემოსულ ქალ-ვაჟათთვის, ერთმანეთს თვალი დაადგან და გაეცნონ, ურთიერთის ფიქრი და აზრი გამოხსნან და შეუღლებიასათვის მოემზადონ. სამი დღის შემდეგ მათი ქორწილი და ახალ ციხე-ქალაქში დასახლება დამიკანონებია. მზითევს თვით ვიკისრებ, ოჯახთა მოწყობილობაც სამეფო საგანძურიდან გაიცემა. მამაკაცები ჩემს მხედრებად ჩამირიცხავს, უფროს მთავრად შერგილ გულბანი დამინიშნავს!

სხვანაირი ფერი აქვს კოლხეთის ცას. ფარიოდ გადაშლილ კამკამა ლურჯ გუმბათს მუდამ მზე ანათებს და თაფლის ღვეთებიც პეშვი-პეშვ სცივია სხივთა ღვედებად. ცაში შეტყორცნილი მისი მწვერვალები მუდამ თეთრი ყინულებითაა დაფარული, კალთებზე კი დაუღეველი გაზაფხული დაშრიალეებს და ყოველთვის ლორთქო სიმწვანეს ბადებს.

ფერდობები და ველები გაუვალი ტყით, უთვალავი ხეხილით და ათასგვარი ყვავილებით არის სავსე. მინდვრებზე პურის ყანა და ბალ-ბოსტნები გადაშლილან. ვერცხლისფერი წყაროები ყოველ ფეხის გადადგმაზე გადმოქუხან და ქვემოთ, ბარისაკენ გზებს წყრიალით მიიკვლევენ. ათი ათასი ფრანველით ავსებულა ტყე-მინდორი.

სამი დღე-ღამე ხარობდნენ და ერთმანეთს ეცნობოდნენ ქალ-ვაენი. მეოთხე დღეს ხალდეს საზაფხულო მინდვრებიდან ჩამორეცილი სამასი სული ხარი წამოაქციეს და დაატყავეს, ორი ამდენი წვრილფეხიც დაჰკლეს და ზეიმი გააჩაღეს.

ქალებს, ტკბილნაყოფიერების ნიშანი, წაბლის რტო ეკავათ ხელში.

ვაეებს ლომთავიანი ვერცხლის სატევრები შემოერთყათ სამოსზე — სიმდიდრის, სიბრძნის და ვაჟკაცობის დამამტკიცებელი.

შვიდი დღე-ღამე იქორწინეს და მერვე დღეს ძაძუ-დედა მოადგა ახალ ციხე-ქალაქს, შერგილ გულბანის მეუღლეს შვილის სიდედრი აიას სამეფოს დიდი დედოფალი გამოეგება:

— ყოველ დედას ერთი ფიქრი აქვს, — თქვა დედოფალმა, — შვილზე ბედნიერი დარჩეს წუთისოფელში, დავლოცოთ შვილები, ჩემო დაო.

— დედის გულწრფელი ბაგით დამილოცია ორივენი, — წყნარად თქვა ძაძუმ, — დამილოცია ჩვენი ხალხის ბედის გასახარებლად, დამილოცია ჩვენი მიწის ასაკვავებლად, დამილოცია შთამომავლობის ბედნიერი გზის გასაკვლევად!

მუხლი მოურთხამს ძაძუ-დედას დიდი დედოფლის წინაშე. დედოფალი შეჩქვივებულა, მძახლისათვის დაჩოქება არ დაუნებებია; მკერდზე მოხვევია და-დარბაისლურად უთქვამს:

— ამქვეყნად, ჩემო ძაძუ, მხოლოდ დედები არიან თანასწორნი. მარტო მათ აქვთ ერთი უტყუარი ფიქრი: შვილებს ჯანი და ბედნიერება არ მოაკლდეს. ჩვენც ხომ დედები ვართ, მძახალო ჩემო, მიმიღეთ თქვენს დად, თქვენს სისხლად და ხორცად. დე, ორივემ ერთად ვიფიქროთ მათთვის.

მერმე დამსხდარან, საუბარი გაუბამთ, როგორც ეს დედებს სჩვევიათ ხოლმე ბედნიერ წუთებში. თავიანთი შვილების სიყმაწვილე გაუხსენებიათ, მათი ჩვევები და ანცობანი მოჰ-

გონებით, აქა-იქ ქმრების ავ-კარგიც გამოუჩვენიათ და ერთმანეთი ახლოს გაუცვნიან.

მეფის ბრძანებით ყოველ ახლად დაქორწინებულთათვის სახლკარი აუშენებიათ, წყვილი ხარი და საჯდომი ცხენი უბოძებიათ, დიდ ცხოვრება-სიცოცხლისათვის საძირკველი ჩაუდგამთ. ვიდრე ქალაქი აშენდებოდა, აიას მთის კალთები და ველმინდვრები ორხელ დაითოვა და ამწვანდა. მესამე გაზაფხულზე ციხე-გალავანს ქონგურები ამოუქვიტვირეს, კოშკისთავს გუშაგები განაწესეს.

ვეფხვსა და ლომს თათი აქვს მძლავრი და ღონიერი, მაშინდელ კოლხეთს ახალი ციხე-სიმაგრე მიუჩნევია ქვეყნის ფესვისმაგრედ და როცა აიას მეფეს შვილიშვილი შეეძინა, საშფო ზეიმი ამ ციხე-ქალაქს გადაუხდიათ.

თქმულება ამბობს: დადამ გულბანის ჩვილ მემკვიდრეს უჩვეულო ღონის მკლავი გამოყოლია. ერთი წლის ბავშვი, თუკი რასმე ხელს წაავლებდა, ვერაფერს გამოგლეჯდა ხელიდან.

ჯერ კიდევ ყრმა ბიჭს წაბლის ხის აკენის რიკული მოუფუნებია თითებშუა.

— ვეფხვის თათი ჰქონია! — გაჰკვირვებია მეფე-პაპას.

— ქვის თათი დაჰყვა ჩემს შვილიშვილს! — უთქვამს შერგოლ გულბანს.

— ეს ციხე-გალავანიც ხომ სალ ქვებზე დგას. ალბათ, მისი ფესვი თუ ასაზრდოებს ჩვილის ძარღვებს! — დაუდასტურებია დიდ დედოფალს.

— სახელიც კვათათი დაენათლოს! — უთქვამს ძაძუ-ბებოს.

— ამ ციხე-ქალაქსაც კვათათისი დაერქვას! — უბრძანებია მეფეს.

ამის შემდეგ ხშიადი გაუტეხიათ, ბიჭისათვის ყურძნის წვენით ჩვილი ტუჩები მოუბანიათ, მთელ სამეფოში მალე მსრბოლნი დაუფრენიათ:

— შვილიშვილი მეყოლა, ერთადერთი მემკვიდრე ჩემი ის არის და სახელადაც კვათათი დამინათლავს. ახალ ციხე-ქალაქისათვის კვათათისი დამირქმევია, და უწყოდეთ, ამიერიდან ჩემი საბრძანებელიც ეს არისო.

მალემსრბოლნი ჯერ კიდევ არ იყვნენ წასულნი, რომ სამ-



ხრეთიდან და ზღვისპირეთიდან ავი მაცნე მოსულა. მომხ-  
დურთა უთვალავი ლაშქარი შემოსეოდა ქვეყანას.

მტერთან შერკინება მეფეს ახალ ციხე-სიმაგრეში განუზრა-  
ხავს. ლაშქარი სამად გაუყვია: მარჯვენა ფრთის მეთაურად და-  
უნიშნავს შერგილ გულბანი, მარცხნივ — დადაში, ხოლო  
მკერდ-მკერდ თვითონ მეფე მიუძღოდა მკაფავთ. მტერი კი მო-  
ძალებულა და მოძალებულა. ისართა ტყორცნისაგან წრიახ  
კლდის ფერდებს ნაპერწკლები ბლუჯა-ბლუჯა სცვიოდა. მეცი-  
ხოვნენი ამ ნაპერწკლებზე გაზინთულ ჩვრებს ცეცხლს უკი-  
დებდნენ და სახანძრე საბუდრებად უკან ესროდნენ მომ-  
ხდურთ. დახოცილი მეომრებისაგან ადიდებულ მდინარეზე-  
ხიდი გაკეთებულა, შეგუბებულა და ორ ვიწროშუა გარემო  
ზღვასავით დაუფარავს.

ამ ხილით უსარგებლიათ ციხე-გალავანში მყოფთ. ღამით,  
მტრის წამალევიად ჯარი მდინარის მარცხენა ნაპირზე გადაუს-  
ხამთ, ზურგით მოუვლიათ, მწვანე ტყით შემოსილი გორაკები  
დაუკავებიან და იქიდან გაურეკიან თავდამსხმელები. მტერს  
ერთხელ კიდევ გაუბრძოლებია, ძალები შემოუკრიბავს და ცი-  
ხე-ქალაქს ისევ შემორტყმია მრისხანე ტალღად. სწორედ ამ  
დროს ჩრდილოეთიდან ჰერეთელებს ჩამოუსწრიათ და მტრის  
ურდოები ისე უწყალოდ უკაფავთ, მთხრობელად მხოლოდ  
სარდალი და მისი ამაღა გადარჩენილა.

თქმულება იმასაც ამბობს, დამარცხებულსა და შერცხვე-  
ნილ თავდამსხმელთა სარდალს გაქცევის წინ ახალ ციხე-ქალა-  
ქისაკენ ცხენი მიუბრუნებია და უთქვამს: მთელი ქვეყ-  
ნები გამარჯვებით მომივლია, ათასი ციხე-ქალაქი დამინგრევი-  
აქ კი ამდენი ჯარი ამომიხოცეს, ვაი რომ არც ციხე-ქალაქის  
სახელი ვიცი და არც მისი პატრონისა!

მაშინ თვით მეფეს, ქვათათა ბიჭი ხელში აუყვანია და შე-  
უძახია:

— ამ ციხე-სიმაგრის ბატონი აი, ეს გაუკაცია, მისი სახელი  
ქვათათი გახლავთ, ციხე-ქალაქსაც ქვათათისი ჰქვია!

გამარჯვებულ მეციხოვნეებს კი ზევიდან ვეფხვის თათები  
და არწივის ფრთანაპტკენები გადმოუყრიათ — ნახეთ, ასეთი  
ვაჟები ჰყავს ამ ციხე-ქალაქს. ვეფხვის თათების და არწივის  
გაფრენის ძალ-ღონის პატრონი არიანო. შერცხვენილ სარ-

დალს თავი ჩაუქინდრავს, ცხენი შეუბრუნებია და უკან წასულა. მის ამაღლაში ერთი ჭკვიანი კაცი ყოფილა, სარდალს პირდაპირ შეხედა თურმე და ასე უთხრა:

— ციხე-გალავანი ვეფხვის ნერწყვით უშენებიათ, მკლავშიაც ვეფხვის და არწივთა ძალ-ღონე ჩაუთესიათ. აბა, ვინ მოსპობს მათ ნაშიერთ, ან ვინ დასძლევს მათ ქვეყანას!

ნირგატეხილი სარდალი ტანმოთენთილი და ბეჭებმოხრილი სპარსეთის საზღვრამდე ჩიფჩიფებდა:

— ქვათათისი... ქვათათისი... ბიჭი ქვათათა... ქვათათისი...

ასე მთავრდება ეს თქმულება ჩემს ქუთაისზე, მაგრამ თქმულებებს განა დასასრული აქვს?!

ახლა, როცა რიონის ტალღებით აბრუნებულ გენერატორებს ცეცხლის ნაპერწკლებით გადაუჭედავთ მისი თაღები, როცა მისი ვაჟკაცების ხელით შექმნილი მძლავრი მანქანები ჩვენი ქვეყნის მალაროებსა თუ ველ-მინდვრებზე დოვლათსა და სახალხო სიუხვეს ჰქმნიან, ამ თქმულებას მეტი ძალა და ღონე ახლავს.

ქეშმარიტად, ქვათათიანი ვაჟკაცები აკეთებენ ამ დიდ საქმეებს.

## სვანური თქმულება

გეგუთის სასახლე ძელქვის ტყეში იყო ჩაფლული. ტიტველი, უბუსუსო და უხორკლო ტყვიისფერი ხეები ცის გუმბათს მიბჭენოდნენ. ტყის კუდი ქუთაისის ციხე-გალავანს გარშემო უვლიდა და ლეჩხუმის მისასვლელებთან იკარგებოდა. ამ უსასრულო ხეთა ტევრში სიჩუმე სუფევდა. მხოლოდ ჩიონის ტალღების ტლაშუნი ისმოდა შორით.

ტყის ერთი ფრთა მდინარეს მიჰყვებოდა. სწორედ აქეთ მოდიოდა ჯორის კვალი. შოთამ დახედა თუ არა ტყის სიგრილით დალამებულ მიწაზე დაჩნეულ ნატერფალს, იმ წუთშივე მიხვდა, თამარს აქ გაეცლო. ნალზე ამოტვიფრული ძელქვის ტოტი შლამს დამჩნეოდა. სხვა არაფერი ჩანდა.

— ნუთუ მარტოდმარტო წავიდა პირიმზე? — გაიოცა შოთამ.

— არა, ალბათ, მსლებლები მთის ბაჩა ცხენებზე სხედან, მათი კვალი კი ამ მიწას არ დაემჩნევა, — დაასკვნა მან და ბედაურს ლეჩხუმისაკენ მისცა სადავე.

— რატომ გაიქცა და არ გაამხილა თავისი ზრახვა?! — მეათასეჯერ ეკითხებოდა რუსთაველი თავის თავს.

მზე ზემოდან აჭერდა ტყის წვრილი ფოთლებით შემოსილ წვერებს. ზევიდან აქა-იქ ჩამოპარული სხივები ვეება სვეტებად ციმციმებდნენ გრილსა და ჩრდილოვან ტყეში. დაურახტავი ბედაური ბილიკზე გრიალით მიჰქროდა. ხანდახან მისი სამკერდე ტყავი გაიტყლაშუნებდა და ტყის კიდემდე გაეარდებოდა მისი ხმა...

„საით აპირებს გაფრენას, ნეტავ? — არ ასვენებდა გზადაგზა შოთას ფიქრი, — ნუთუ ვაწყენინე რამე, ნუთუ გამი-

გულისდა ჩემი მზე-მთვარე! ვაი თუ ახალგაზრდა ოვსთა მთავრისაყენ მოისურვილა გასეირნება? ვაითუ... — მოვარდა გულისმლარავი ეკვი. — კი, ესეც შეიძლება მოხდეს, ჭიმამტარის თავზე ფონში გასცურავს და მუხურაზე გავლით საჩხერეზე გადავა, იქიდან კი ერთი მკლავის გაწვდენაზეა ოვსთა მთავარი სოსლანი“.

ბედაურს არ ესმის პატრონის დარდი, იგი ლალად მიჰქრის ხეებს შუა და მხეცური ალლოთი არ ედება მათ კორძიან ტანფესეს. უცებ გათავდა ტყე და რიონის სარკესავით ზედაპირმა შემოანათა. გაოცდა შოთა. სანაო შენიშნა. ის, ეტყობა, სულ ახლახანს გააბეს გაღმა-გამოღმა. სანაოზე პურის ძნებით დატვირთული ურმები იდგნენ. სანაოს ბოძბორბალა ისე აჰრიალდა, ეტყობოდა, ქონწაუხსმელი იყო. გაღმა კალო გაემართათ. კალოზე გოგო-ბიჭები ყრიაპულობდნენ. რიონის ნაპირზე შლამს დაუკვირდა.

ცხენთა და ხარ-კამეჩთა ნაკვალევი ერთმანეთში ასვრილი იყო. ჭორის ნატერფალი კი არ ჩანდა.

„სვანეთისაყენ წასულა!—უცებ ნათლად მოუვიდა ეს ფიქრი შოთას. — ვაი, შენს შოთას, განა ამ ერთი კვირის წინ ზაქარიას არ ჰკითხავდა პირიმზე სვანეთზე?! ნამდვილად იქეთ წავიდა, — დაასკვნა ახლა გულდაჭერებით და ბედაურს უნებლიეთ დახედა, — ალბათ, ჭორიც იმიტომ აირჩია სამოგზაუროდ. ჩემი ქუჩანი კი იმ ციცაბოებს სად გაუწვდება“.

ცხენს სადავე მოსწია და შეყოყმანდა.

„არა, ახლა უკან დაბრუნება არ შემიძლია, უნდა დავეწიო, უნდა გავაოცო. დაე, მიხვდეს მის ნატერფალს როგორ ვუფრთხილდები“.

შეფენილზე უკვე თანდათან გახშირდა წაბლის ტყე. ძელქვის ხეები აქა-იქ თუ გამოერეოდა. შარშანდელი ნაყოფი ახლაც ეყარა ხის ძირებში. ვეება ტახებო დაშლიგინობდნენ ფერდობებზე. რიონის ხევი თანდათან ვიწროვდებოდა. ახლა გზა ზედ მდინარის კლდოვან ნაპირს მიჰყვებოდა. ქვევით, ღრმა ქვესკნელში, ღრუბლისფერი რიონი კლდეებს ასკდებოდა. გაღმიდან ტყის ქათმების გნიასი ისმოდა. მზე ცის შუაგულში იყო, როცა ორბელს გადაუარა. უცებ ზედ მისი თავის ზემოდან შრიალით გადმოეშვა შავი მიმინო. იგი საოცარი სიღამა-

ზით გადატრიალდა ჰაერში, ირაო შეჰკრა და გაღმა ნაღველს დააცხრა.

„კაპუეტია, ვილაცას გამოქცევია“, — გაიფიქრა შოთამ.

სწორედ ამ დროს, გამოღმა ბილიკიდან, მთის წვერს რომ მიჰყვებოდა, სტვენა გაისმა.

მონადირეები ყოფილან, მიხედა მხედარი.

გაღმიდან ახლა ექვნების ქლარუნი და მიმინოს კიპკიპი გაისმა.

— იქ ვინ გააწევს, ქალბატონო! — დაიბუხუნა ვილაცამ ტყეში.

— უნდა გაცურო, ბიჭო! აბა, ახლა მიმინოს დავკარგავ თუ! ეს ქალის ხმა იყო.

შოთა უნებლიეთ შემობრუნდა ბილიკისაკენ. ზემოდან ვეება ბექებიანი მამაკაცი ჩამოდიოდა. იგი გვერდი-გვერდ მოჰყვებოდა ბილიკს. მარჯვენა ხელი ვილაცისათვის ჩაეკიდა და ისე მოუძღვებოდა.

— ხელი გამიშვი! — ისევ მოისმა ქალის ხმა.

— არ გაგიშვებ, ქალბატონო, ფეხი დაგიცდებო და ზედ რიონში მოადენ ყვრიალს, მერე რა პასუხი მიუუტანო მამა-შენს?!

— რომ გიბრძანებ ხელი გამიშვი, ჰატ, შე გამოყრუებულო! — გააკაპასდა ქალი.

— ვერ მოგართვეს! — გაჯიუტდა დევკაცი. ახლა ორივენი შარაზე გამოვიდნენ. ამ ვეება კაცმა ფეხები ისე გააბაჯბაჯა, მთელი შარაგზა დაიკაფა.

ქალს თეთრი ყაბალახი და თეთრივე ნაბადი ეხურა.

„თავადის ქალი თუა“.

— არ გამიშვებ ხომ? არ გამიშვებ ხომ?! ესეც შენ, ესეც შენ! — ქალიშვილმა მთელი ძალით უბიძგა დევკაცს, უცებ ხელიდან დაუსხლტა და შოთასკენ გამოექანა. დევკაცი წაბარბაცდა.

ძლივს დაიოკა სადავე მხედარმა. ქალი ზედ ცხენის მკერდს მიასკდა.

— გიგოია მიშველე, გიგოია მიშველე! — შეჰკივლა შეშინებულმა ქალმა.

ამ ხმამ გიგოიაზე მეხივით იმოქმედა. ეს მთის ხელა კაცი

ჯამბაზივით გადმოხტა და ქალის ხმისაგან შეშინებულ ყალყზე შემდგარ ბედაურს დროზე მღუსწრო. იგი ლომივით ეცა ცხენის სადავეს. თუმცა შოთამ უკვე მიიღო საჭირო ზომა, მან სადავე მარჯვნივ დაუქირა. ცხენი უკანა ფეხზე შემოტრიალდა და წინა ფეხებით ფერდობს ჩამოეკიდა.

— ხომ გაგათავებდი, ბავშვს რაიმე რომ მოსწეოდა... — სიტყვა პირში ჩაუწყდა გიგოიას. მან მხოლოდ ახლა შეხედა მხედარს და შედრკა.

მიხვდა ყმაგლეხი, მის წინ უცნობი დიდბატონი იდგა, მხედარი კი თვითონ გაშტერებულიყო, სახე გაყვითლებოდა. თვალეში ნაპერწკლები უკვესავდა. იგი ერთ ადგილს მისჩერებოდა.

ქალიშვილს ჩაეჩოქა ჩანთიდან ირმის ტყავის, ოქროთი მოოქვილი წიგნი გადმოვარდნოდა და ახლა შიგ სდებდა. გიგოიამაც იქით გაიხედა.

— ვაი, ჩემს დღეს უბედურს, დედამ დაგიშალა მაგის კითხვა, შენ კი მოგიპარავს და თან წამოგიღია!

ქალიშვილი ნელა წამოიმართა და გიგოიას შეაკვესა თვალეში:

— გიგოია, დედაჩემთან არ დამასმინო, თორემ, იცოდე, ისეთ საქმეს დაგმართებ წვერს შენი ხელით იგლეჯდე!

ქალიშვილს მხედრისაკენ ჯერ არც კი გაეხედა. იგი მალავდა წიგნს ხელჩანთაში. თან გიგოიას მიშტერებოდა.

— ვინ მოგცათ, ქალწულო, ეს წიგნი? — მოესმა ზემოდან მხედრის ხმა. საოცარი ხმა იყო, ტკბილი და ბოხი, ძლიერი და ყრუანტელმომგვრელი. ქალიშვილი ანაზად შეაკცქერდა მოსულს.

— უიმე, ვინაა, ნეტავ, ეს კაცი, გიგოია?! — გულწრფელად გაიოცა ქალიშვილმა. შოთას უნებლიეთ გაეღიმა. ქალიშვილი თხუთმეტი წლისა თუ ოქნებოდა. ასეთი სილამაზის ქალიშვილი ჯერ არ ენახა შოთას. დაქალებაში შესული მისი ტანი შოლტივით ირხეოდა თივთიკის ოქრომკედლიან კაბაში. მსხვილი ნაწნავეები წინ გადმოეყარა, შველის ნუქრის თვალეები ნისლდაკრულ ცისკარივით შეფეხებოდა პოეტს.

„თამარის თვალეები, ღმერთო ჩემო, ნამდვილად თამარის თვალეები!“ — ამ ფიქრმა შეაკრთო მხედარი.

— ეს წიგნი ვინ მოგცა, ლამაზო ქალწულო?! — ისევ წყნარად შეეკითხა უცნობი მხედარი.

— მე სადა მაქვს წიგნი?! — თითქოს გაიკვირვა მან და ლაწვებზე ცეცხლი მოედო.

„პირველად ამბობს ტყუილს“, — მიხვდა მოსული.

— წაეკითხე, ქალწულო, მაოცებს, ძალიან მაოცებს. ეს წიგნი სასახლეშიაო ორად-ორია. თქვენთან კი საიდან გაჩნდა? ვინ მოასწრო გადაწერა ასე ანაზღად.

ქალიშვილს თვალეში ეშმაკური ღიმილი ჩაუდგა.

— თქვენ სასახლიდან ბრძანდებით?

— სწორედ გეგუთიდან მოვდივარ ახლა, — მიაპიტად უპასუხა შოთამ.

— ჰოდა, იცოდე, პირველად მე მომიძღვნა ეს წიგნი დიდმა შოთამ, სახელად თამარი მქვია.

შოთა ჯერ გაოცდა, მერმე ისევ გაელიმა და ბოლოს თავშეუკავებელი ხარხარი აუტყდა.

— აი, კოპწია ქალწულო, თურმე ვისთვის დაუწერია ეს წიგნი ავბედ კაცს, თამარიც რომ ჰქვია სახელად?

პატარა თამარს ელვამ დაჰკრა თვალეში, მრისხანებამ სახე აუფორიაქა. იგი ახლა იმ მიმინოს ჰგავდა, რომელიც მოფრენილიყო და დეკაკის ტყავგადაკრულ მაჯაზე ველურად აბრიალებდა თვალებს.

— გიგოია; ამ ბატონს ჰგონია, მე ვიგონებ, ხომ?! — შეუტია გიგოიას და ფეხები დაუბაკუნა. გიგოიას ფერმა გადაუარა. ეტყობა, პატარა ქალბატონის რისხვამ და ნათქვამმა მართლაც შეაშინა.

— რატომ კადრულობ, თამარ ჩემო! შენს ნათქვამს ყველა დარბაისელი კაცი დაიჭერებს. დიდო ბატონო, იცით ვინ ბრძანდება თქვენს წინ?! — შემობრუნდა შოთასკენ გიგოია.

— აი, ეს კი, მართლაც, საინტერესოა, მხოლოდ ისიც უნდა მითხრათ, წიგნი მართლა თუ შოთამ უძღვნა პატარა კეკელს თამარს.

— ჩვენი თამარის ნათლია დიდბატონი დემნა ბრძანდებოდა, — დაიწყო გიგოიამ როყიო ხმით, — ჰოდა, შოთა და დემნა ძმადნაფიცები ყოფილან, ერთად სწავლობდნენ თურმე, სწორედ მაშინ მონათლა დემნამ თამარი და...

— ღმერთო ჩემო! — აღარ დააცადა სათქმელი და გაფითრებულმა შოთამ შუბლზე იტკიცა ხელი, — ეს წიგნი, მართლაც, დემნამ მოხოვა, ჩემს ნათლულს აჩუქეო, ვაიმე ბეჩავს, როგორ ვერ ვიცახ ჩემივე ნიშანი. ყდაზე. გუჯუ ახვლედიანის ქალი იქნებით, ალბათ.

თამარი უყურებდა და კანკალებდა.

— ნუთუ, თქვენ დიდი შოთა ბრძანდებით? — ვედრებით შეესაყვედურა ქალწული.

— ვაი, რომ შოთა ვარ, ჩემი მეგობრის ქალო, შენ კი ვერ გიცან!

— თქვენი მუხლის და გონების ჰირიმე! — უცებ დაემხო გიგოია მხედრის წინ. — მე თვითონ ვარ მოსაკლავი, რომ ვერ გიცანი, პირმნათო! განა გელათში მე არ მოგართვი ბატონის უსტარი?

— თან თვალსა და ხელს შუა გამეპარე!

— ასე მქონდა ნაბრძანები, იმ ღამესვე ჩემს ბატონთან უნდა გავჩენილიყავი, დიღო ბატონო...

შოთა შემოდგომის ვერხვის ფოთოლივით თრთოდა. ახლა გაახსენდა ყველაფერი, დემნას ძმობაც, გუჯუს ერთგულებაც და წიგნზე მოხატული ნიშანიც. იგი უცებ გადმოხტა ცხენიდან და თამარს ხელზე ემთხვია.

— გამახარე, ჩემო კეკლუცო, შენი სილამაზით და ქცევით.

— ღმერთო დიდებულო! — დაიბნა პატარა თამარი. — ამას რას მოვესწარი, დედაჩემი არ დამიჯერებს და მომკლავს კიდევ. გიგოია! — შეჰყვირა ისევ მხლებელს. — სახლისაკენ გაფრინდი, დედას უთხარი, ღვთისსადარი სტუმარი მომყავს-თქო.

— არა, ჩემო თამარ! მე გზას ვერ გადავუხვევ, საჩქარო საქმეზე მივდივარ, მამას და დედას ჩემი მოკითხვა უთხარი. ვწუხვარ, რომ სტუმრად ვერ გეახლებით.

— რას ამბობ, ბატონო, აბა, თქვენ რომ გნახეთ, ვინ დამიჯერებს?!. — შეწუხდა პატარა თამარი.

— ჩასვლისთანავე წიგნს მოგწერთ გეგუთიდან, — გაეღიმა ისევ შოთას.

— გეგუთიდან?! არა, გეგუთიდან არ მინდა, — იჯიუტა



თამარმა, — რადგან ასეა, მითხარით, სწით მდიდხართ, ჩემს მიმინოს დაგადევნებთ. გზიდან მომწერეთ წიგნი.

შოთა გაკვირვებით დააჩეღდა ბინდბუნდისფერ ნაკვერ-ჩხალთვალეზიან კაპუეტს.

— ჩემი გზა მეც არ ვიცი. ალბათ, სვანეთს გადავალ.

— მოგაგნებს ჩემი მიმინო. გიგოია, ხორციის ნაჭერი მიართვი ღიღბატონს! — მიუბრუნდა იგი მხლებელს, თავის ხელით დააპუროს ჩემი აღზრდილი, მერე თქვენს კვალს თვითონ ამოხილავს, ვერსად დაემალეზით.

გიგოიამ თვალისისწრაფით ჩაყო ხელი ტყავის ჩანთაში და თითისხელა ხორციის ნაჭერი მიაწოდა შოთას.

პოეტმა უნებლიეთ გამოართვა.

მიმინომ შეხელა თუ არა ნაჭერს, შოთას მაჯაზე ნიავეით დააფრინდა. ახლა მისი თვალეზი ბოროტად არ კვესავდა. კიპკიპებდა კიდეც.

— ჩემი მიმინო ცხრა მთის გადაღმა მოგნახავთ აწი. იცოდეთ, წერილით დამიდასტურეთ, რომ ამ მიღამოებში შეგვვლით, ღედაჩემი მაშინ დამიჭერებს.

— უსათუოდ მოგწერო, თუმცა მეექვება, კაპუეტმა გეგუთამდე მომნახოს.

— მოგაგნებს, უცილოდ მოგაგნებს! — ახლა მასაც გადაედო ღიმილი.

მიმინომ ხორციის ნაჭერი დაძიგნა და ახლა ნისკარტს იწმენდდა ფრთებზე. იგი დარბაისლურად აიწია ისევ ჰაერში და ისევ გიგოიას დააჯდა მარჯვენაზე.

— აბა, მშვიდობით, პატარა თამარ, მშვიდობით. იცოდე, თუ შენი აღზრდილი არ დამეწია, გეგუთიდან მტრედს უსათუოდ გამოვატან ბარათს ღედაშენის დასაჯერებლად, — დაასრულა შოთამ და ანაზღად მოახტა ქურანს. სანამ ქალწული რასმეს მოიფიქრებდა, უკვე ცაგერის მინდვრებზე მიჰქროდა შუბლზე ოფლდაყრილი.

— ვაი, ჩემს ღღეს! — ოხრავდა გზადაგზა იგი. — რას არ მოვესწარი. რა არ ვნახე, რა არ შემემთხვა ამ ცრუ წუთისოფელში.

თანდათან ყაჭის თეთრი გორგალივით იშლებოდა წარსული. ღემნა და მისი ძუძუმტე, გუჯუ ახვლედიანი... ღემნას და

თამარის განუყრელი ნათესაური მეგობრობა. დიდი თამარი, მისი პირველი შეხვედრა, შემდეგ დემნას დაჟინება, დაწერე რამე დიდი და უკვდავიო. შემდეგ უძილო ღამეები და თავდა-  
ვიწყებული შრომა. ახლაც ახსოვს და საწამ ცოცხალია, რა დაავიწყებს იმ ღამეებს, როცა დემნა და გუჯუ ისმენდნენ მის პირველ სტროფებს, როგორ მოეხვია დემნა მაშინ შოთას და პირველმა კაცმა უთხრა კაცთა შორის — ჩვენ წავალთ ამ ქვეყ-  
ნიდან მომაკვდავნი, შენ და საქართველო კი უკვდავებაში გახვედითო.

იტირა კიდეც, ხარისოდენა თვალებიდან ცხელი ცრემლი გადმოსდიოდა. მერმე გუჯუს ქორწილი. წიგნის მეორე ცალად გადაწერა და ყდაზე საძმო ნიშნის ამოტვიფრა, შემდეგ რომ ეს ნიშანი დემნამ გიორგი მეფის წინააღმდეგ შეთქმულთა სანი-  
შნებლად აქცია. აი, სად აღმოჩნდა ახლა ეს, წიგნზე მისი ხე-  
ლით ამოტვიფრული ბედუბედური ნიშანი! ცხენმა ნელ-ნელა გაივაკა და ხიდზე გრიგალივით გადაირბინა.

„ვინ იცის, იქნებ დემნა ბატონიშვილის ტახტი უფრო გამოსდგომოდა საქართველოს, ვინემ...“ — უცებ გაუწყდა ფიქ-  
რი, სადღაც გულის სიღრმეში სინანული იგრძნო. ასეთი ფიქ-  
რი მკრეხელობად მოეჩვენა. — განა თამარმა არ განამტკიცა მამულის ბალავერი და არ აღამალა მისი თავანი? არა, ამა-  
ზე უკეთ ვის შეეძლო ხელმწიფეთა ფათერაკიან გზაზე ქვეყნის წინ გაძლოლა. თუმცა, დემნა ბრძენი ხელმწიფე და დიდი მხე-  
დარმთავარიც იქნებოდა. ეს ეჭვი ისევ შემოეჭლო პოეტს. სათავადო სვანეთისაკენ მიმავალი გზა თანდათან მალღდე-  
ბოდა და ზევით იწევდა. მზე ჩავიდა. მისი სხივები მხოლოდ გაყინულ მწვერვალთ ანათებდა. ხევებში უკვე ბნელოდა. ბედაურის ლაჭებშუა ცხენისწყლის თეთრი ქაფი შეგუფთდა და გაისაპნა.

— უნდა გადავიღამო, — ხმამალა თქვა შოთამ და სო-  
ფელი გამოჩნდა თუ არა, პირველ სახლს მიაშურა.

• • •

მეორე დღითაც ვერ მონახა მზეთამზის გზა-კვალი მდე-  
ვარმა.

იგი გუმანით აპყვა ცხენისწყლის ნაპირებს, უშგულში რო-

ცა ააღწია, უთხრეს: ნაბდებშემოხვეული სამი მგზავრი იღუ-  
მალი სიჩქარით მიაქროლებდნენ ცხენებს, მათ შუა თეთრი  
ჯორი მითოხარიკობდაო.

კალამდე მეტად ვიწრო და კლდოვან გზაზე ბედაურს გა-  
უქირდა. ადგილ-ადგილ ხანჯალივით ამოწვერილ ბასრ კლდე-  
ებზე ერთი ბეწო ხის ბოგირი იდო. უჩვევი ქურანი ჭერ ფრუ-  
ტუნით გადაფრინდებოდა, მერე მთელი სხეულით კანკალებ-  
და.

მხოლოდ კვირიკესთან ამოისუნთქა ბედაურმა. აქვე გაიგო  
მდევარმა, თეთრჯორიან მგზავრს კვირიკეზე ღამე გაეთია. მა-  
თი გეზი კი მაინც ბინდბუნდში იყო გახვეული: ახლა ენგუ-  
რის ქაფქაფა, მსრბოლავ ტალღებს გაჰყვა გუმანით. სათავადო  
სვანეთი უშგულთან გათავდა და ლათბარის უღელტეხილი  
ხელმარცხნივ დარჩა. უბატონო სვანეთის ცადაზიდული კოშკე-  
ბი კერასხებივით ამართული პარპალებდნენ ლაქვარდში.  
ბედაური გრიალით მიაარღვევდა იისფრად შენისლულ ჰაერს.  
კლდეს შემსხვრეული ენგურის შხეფები წანდახან ნაპერწყლე-  
ბივით კვესავდნენ და მაშინ შოთას ეჩვენებოდა, თითქოს კალ-  
მახები ელავდნენ მდინარეში. შეიძლება ასეც იყო. იფარი-  
დან უღელტეხილისკენ აიწია და მულახის მისასვლელებს გა-  
დაადგა. შოთა გააოცა სოფლის სიდიდემ და სილამაზემ, მისმა  
ყანებმა და ბალახთა მრავალფერად ლივლივმა. ცა სუფთა  
იყო, ჰაერი გრილი და სიკეთით სავსე.

— ბერძნებს რომ სვანეთი სცოდნოდათ, ალბათ, თავიანთ  
ღმერთების სამყოფლად მას აირჩევდნენ. მართლაც, არც არის  
ქვეყნად უკეთესი ღმერთსამყოფელი, — აღმოხდა შოთას.

იფარში დაშორდა ენგურს და ახლა მესტიაში შეეფეთა  
მას. კლდის სასთუმალზე დაკირული გაუთლელი მორების ხი-  
დი ჩელტით და მიწით დაებეკნათ. თოხარიკით განვლო ბედა-  
ურმა და თავქვე დაუყვა. ისევ უცებ გაახსენდა გუჯუ ახვლე-  
დიანის პატარა ქალის თამარისეული წიგნის ტვიფრი.

„ღემნას ეშინოდა ჩემი შეთხზულის ფათერაკისა. ის  
სულმნათი ფიქრობდა დიდნი თავადნი წინაღუდგებოდნენ  
ჩემს მკრებელ აზრებს. გუჯუსაც იმიტომ მისცა შთამომავალ-  
თა საიდუმლოდ და საზეპიროდ. თუმცა დავალება რა საკადრი-  
სია, თვითონ წამკითხველსა და გამგონეს ერთიანად ამახ-

სოვრდებოდა სტროფები. თამარმა სახელმწიფო წიგნად განამტყიცა იგი. ეპ, ხელმწიფეთა ფიქრს ვინ მიხვდება, მაგრამ გუმანით მაინც ვიცი, ერის გულსა და გონებაში ამით გზა მისცა ჩემს ნათქვამსა და ნააზრევს. ჰოო, როგორც ჩანს, მასაც ეშინია უგონო და უნიათო ადამიანებმა არა ავნონ რა ჩემს წიგნს“.

მღინარის პირას საკირეები გამოჩნდა. კვამლის ზოლები ცის გუმბათისაკენ ვეება სვეტებად აღმართულიყვნენ. იქაც ვერ ნახა თავის გულისდარდის კვალი.

კრიკა შეეკრა მხედარს. ავ გუნებაზე დადგა.

— ნუთუ, ტყუილად ვიარე ამ კლდის ფრიალოებზე ასე სიჩქარით? — შეეკითხა იგი თავის თავს. სადღაც შორს იმედის ნაფოტი მაინც ამოცურდა და ხასიათიც შემოუბრუნდა.

მან ისევ დეზი ჰკრა ბედაურს და თავქვე დაეშვა.

— არ შეიძლება ოდიშის ჭალებამდე არ მივეწიო, — დაასკვნა მან.

უცებ მოსახვევში ჩვილი კვიცი შეეფეთა. იგი დამდგარიყო და კლდიდან ჩამოკიდებულ, ქათქათა, მკლავის სისხო ნაკადულს დასჩერებოდა. ბედაურის მისვლა არ ეუცხოვა, ალბათ, დედა ეგონა, შესჭიხვინა კიდევ. ადგილიდან მაინც არ იძროდა. ისევ წყლის ქათს დაშტერებოდა. უნებლიეთ, შოთაც დააჩერდა იმ ადგილს. საოცარი რამ ნახა.

მოზრდილი კალმახი შეხფებისაგან აბოლებულ გუბეში მომწყვდეულიყო და ფართხალებდა. მისი ბროწეულის კაკლებით დაწინწკლული სხარტი ტანი ნაკვერცხლებივით კვესავდა ყინულივით გუბეში. კვიცი ხანგამოშვებით დაყნოსავდა, მერე უკან შიშით და გაოცებით - დაიხევდა, მაინც არ შორდებოდა.

პოეტმა ფრთხილად აიყვანა კალმახი და ვერცხლის სვეტივით დაკიდებულ ნაკადულში ჩაუშვა. ერთი გაიღვა კალმახმა და უსახოდ გაქრა. კვიცმა ახლა შენიშნა უცხო ბედაური, ერთი კანკალით დაიჭიხვინა, შებრუნდა და თავქვე კისრისმტკრევით დაეშვა. შორს, მოსახვევში, ხევის პირას ცხენოსანი დალანდა ახლა ბედაურზე მჯდომმა. თვითონაც იქით მიუშვა თავისი ქურანი, რატომღაც სიმღერა მოუნდა ბრძენ პოეტს. ენგურის ტალღების დგაფუნში, ხეებიდან ქშუილით მოვარდნილ სიგ-

წილეში, ფერდობზე აშოლტილ ვეება ხეთა ტევრების შრიალ-  
ში ნელა გაისმა მისი სიმღერა, კარგა ხანს იმღერა გულით,  
მერმე შენიშნა, რომ სვანურ ლილეს მღეროდა.

— პირველად ვმღერი ამ სიმღერას, — გაოცდა მხედარი, —  
აღბათ, ამ ღმერთსამყოფელში სხვა სიმღერა არც იმღერება! —  
ეს სიტყვები ხმამაღლა თქვა შოთამ.

უცებ გაისმა შრიალი და ბეჭზე მიმინო დააჯდა შემკრთალ  
პოეტს.

— პატარა თამარის კაპუეტი! — თითქმის შიშით აღმოხდა  
მხედარს. — მტრედივით გაუწრთენია, — თქვა მან.

მიმინო კი, ვითომ არაფერი მომხდარიყო, ისე იწმენდდა  
დაღლილ ფრთებზე ოქროსფერ მოკაუჭებულ ნისკარტს. ყელ-  
ზე პატარა ტყავის ნაკერი შენიშნა. ფრთხილად მოხსნა ყაითა-  
ნი და წერილი გაშალა. პატარა პერგამენტის ნახევზე ფერა-  
ფერას მელნით ნაწერი ასოები მოჩანდა.

ახელედიანის ქალი ვარ, აღბანას ვიღებ საშინდეს,  
ორბელის თავზე შემომხედი, მზემ დამანათე, დამბნიდე.  
ერთი პატარა გული მაქვს, შენ თვალთა შუქით დაფლითე,  
სამოთხეს ვინა მალირსებს; ჯოჯოხეთს რისთვის წავიდე?!

გაოგნებული შოთა ახლა ღიმილით კითხულობდა სტრიქო-  
ნებს. ჩვენში ყველა ლექსად ამბობს თავის სათქმელსო, გაი-  
ფიქრა. ჭეშმარიტად ძნელიაო ჩვენს მამულში მეღექსედ  
ყოფნა.

ქურანი კი ისევ მიჰქროდა ხელმარჯვნივ გამოჩნდა უშბას  
ქათქათა, თვალისმოძქრელი მწვერვალი, ერთი მხრიდან ჩაბა-  
ლახივით ეხვია ნისლი. ცხენს სადავე უნებლიეთ მოსწია და  
შეჩერდა. ყინულწვერი თითქოს ლაყვარლში კანკალებდა.

— ღმერთთან მისასვლელ კიბესა ჰგავს ჩვენი მთები!

თვალებში თითქოს მეტი სინათლე ჩაუდგა, მეტი ელვარება  
მოემატა. ცხენს ისევ სადავე მისცა. უშბას თავს ერთი კიდეც  
ახედა და თავდაღმართს ჩაუყვა. კაპუეტი წყნარად გადაინაც-  
ვლებდა გზადაგზა შოთას მხრებიდან მახლობელ ხეზე ირაო-  
თი, და შორს კი არ მიდიოდა, თვალს არ ეფარებოდა, ისევ უკან  
ბრუნდებოდა შოთას მხარზე. ენგურის მეტად ვიწრო ხევს მიყ-  
ვებოდა გზატკეცილი. დამდებოდა. უცებ გაიხსნა კლდეთა კა-

რი და გაშლილი ქალაქი შემოეფეთა შოთას. ქალის ბოლოზე კარვები შენიშნა. გულმა რეჩხი უყო. შუა მინდორზე ბედაურმა უცებ მეხივით დააყარა ჭიხვინი.

— ჩუმაღ, ჩუმაღ, თორემ გვიცნობენ, ჩემო ქურანა

მხედარი მიხვდა, რომ მისმა ბედაურმა ნაცნობი ცხენები დალანდა.

— ჩუმაღ, ჩუმაღ, — ისევ ჩასჩურჩულა ყურთან ბედაურს.

— ჩუმაღ, ჩუმაღ, — დაიბუხუნა ვეება სვანმა და მხედარს წინ გადაეღობა. ცხენი ოდნავ დაფრთხა და გვერდზე გაიწია.

— შენ ხარ, მურზაყან ჩემო! — გაეხარდა მხედარს დამხედურის ნახვა.

— ვაი, ჩემს თავს, თქვენ აქ საიდან გაჩნდით?! — გაიოცა სვანმა.

მისი ფართო ბეჭები მთებივით მოჩანდა ღამის ჩრდილებში. მხოლოდ ვეება სატევრის ტარი დილისფრად ელავდა.

— ვაი, თუ პირიმზე გაჯავრდეს!.. — ისევ დაიბუხუნა მურზაყანმა და მერმე ისე გაიცინა, ქალამ გრგვინვით მისცა ხმა.

— მის ახლოს სიკვდილი მიჩვენია, ჩემო მურზაყან, მისგან შორით სიციცხლეს! — ისევ წყნარად თქვა მოსულმა და ცხენიდან გადმოფრინდა. ეტყობა, სვანმა ვერ გაუძლო ცთუნებას და მხედარი-მუხის ტოტებივით მაგარ მკლავებში მოაქცია.

— მარტო მოვდივართ, სად არ ვიარეთ; კვირიკეზე ღამე ვათიეთ, ჰადიშში საყდარში აველით, მულახში კოშკების წვერები ვთვალეთ. თქმით კი არავის ვუთხარით ჩვენი ვინაობა. ახლა კარვები გავშალეთ, ამ ადგილსაც თამარშენი დავარქვით, — ჩივილით უამბობდა მურზაყანი შოთას.

— ვერ დავიჯერებ, მურზაყან, ძმაო, სვანეთში შენს ბეჭებს და ხანჯლის ტარს ვერავის გამოაპარებდი!

— ბეჭზე ნაბადი მეხურა, შოთა ბატონო, უცხოოდ რომ მეცლო. აქამდე ვერვინ მიცნო და აწი რა ვიცი!

შოთამ ბინდბუნდში რომ გაიღიმა, თეთრი კბილები გამოჩინდა მხოლოდ, მან ღიმილით სატევრისკენ წააპარა ხელი.

— ნუთუ სვანეთში ვერ გიცნეს, დაუჯერებელია!

— რომ ვეცნეთ, პირიმზესაც ხომ იცნობდნენ, ქვეყანას შეგვიყრიდნენ.

ახლა გაახსენდა შოთას, რომ მურზაყანი თამარის ძიძიშვილი და განუყრელი მცველ-მეგობარი იყო. მისი გამოჩენა თამარის გამოჩენას ნიშნავდა.

უცებ ისევ გაისმა მიმინოს ფრთების შრიალი და ახლა კაპუეტმა ირაო მურზაყანის ბეჭების გარშემო შემოავლო და დააჯღა კიდეც.

— ღმერთო მიშველე, ამას აქ რა უნდა?! — თითქმის დაიყვირა შიშით გაოცებულმა მურზაყანმა.

„საოცარია, ალბათ, შევეშალე, მაგრამ ნუთუ ამ დეკაცში ვერ გამარჩია მიმინოს თვალმა“.

მურზაყანმა შენიშნა შოთას გაოგნება და ხმა მიაშველა:

— ეს კაპუეტი თამარის გაზრდილია, ახელედნიანის ქალს აჩუქა, ხომ გახსოვს, უბედური დემნას ნათლული რომ არის.

— მე კი ვიცი, მაგრამ შენ თუ იცოდი, ეს კი არ მეგონა, — გაცბუნდა გაგონილით შოთა და კინაღამ ხმამაღლა წამოსცდა სათქმელი. ენა მოიკვნითა.

მურზაყან ხომ თამართან და დემნასთან ერთად იზრდებოდა, მათთან ლაღობდა, მათთან სწავლობდა, გუჯუ ახელედნიანიც იქ არ იყო მაშინ?! ეპ, შოთას ახლა გაახსენდა ესეც და მიმინოს მოეფერა.

— აბა, წავიდეთ კარვებში, მხოლოდ პირიმზეს უკვე სძინავს და ნუ გავადვიძებთ, ახლა დაწვა, ცოდვაა, დილით ცისკარს ასწრებს ადგომას, — წყნარად, მაგრამ ისევ ბოხი ხმით წარმოსთქვა მურზაყანმა.

უცებ მიმინომ დაიკიპკიპა და თან კაბის შრიალი მოისმა.

— ღმერთო ჩემო, ნუ გამირისხდები! — მუხლგებზე დაეცა შოთა. მურზაყანმა უკან დაიხია. ისიც ახლა მიხვდა, რომ მათ წინ თამარი იდგა. თეთრ ნაბაღზე მოქობილი ოქროს ფართო ყაითანი ღამეში ნათელივით ელვარებდა. სახეზე თეთრივე თივთიკის ჩაბალახი წამოეხურა პირიმზეს.

— ცხენის ქიხვინი ვიცანი, გამელვიძა, სიზმარი მეგონა პირველად, ახლა ვხედავ, ვით საწუთროს, ვერსად დაგემალეებით, გეტყობა, დიდო პიიტეკოსო, ახელედნიანის ქალიც გაგიცენია გზაში, ჩემს გაზრდილ მიმინოსაც მოსწონებინებარ.

შოთას ტანში გასცრა, გააძაგძაგა.

„გულთამხილველია თამარი“ — უცებ მოვარდა ეს ფიქრი, ხმამალა კი დაუმატა:

— თქვენს ნაკვალევზე ყოველთვის სინათლეს იპოვის კაცი, ჩვენო დედოფალო!

— დედოფალს ნუ მიწოდებ, შოთავ ჩემო. მე ახლა უბრალო მოგზაური ვარ, უჩინმაჩინად მთებში მოხეტიალე. ზევით წამოდექი, მუხლზე დაცემა არ არის საჭირო.

— აკრძალული გვაქვს „დედოფლის“ წოდება, — უჩვეულო, დაბალი ხმით ჩაუჩურჩულა მურზაყანმა შოთას.

შოთამ ახლა შენიშნა, რომ კაპუეტი თამარის მხარზე დაფრენილიყო. იგი ნისკარტით წიწკნიდა ჩაბალახის ოქრომკედლით ნაქსოვ სირმას, თან მხიარულად კიპკიპებდა. მერმე, თითქოს ქარმა წამოუფრინა, ისე გადმოინაცვლა შოთას მხარზე.

თამარმა მრავალმნიშვნელოვნად და გაოცებით გააყოლა თვალი მიმინოს. თითქოს ორი ვარსკვლავი დადევნებოდეს კაპუეტს შოთას მხრებამდე, ისე კაკამებდა ახლა მისი თვალები. მურზაყანი ახლოს მიიწია შოთასკენ და უჩურჩულა:

— ამ დილით ჯიხვი მოვკალ, მომშეული ჩანხარ, ნაკვერჩხალზე მწვადები ავაშიშხინოთ, სვანური არყით ძარღვებსაც გაგიბობ, ლექსის დიდო მთხზველო.

— მიმინოსაც მიკმიეთ ხორცი! — წყნარად სთქვა პირიმზემ და თან გააფრთხილა: — დილით სადადიანოსკენ უნდა გადავიდეთ, ღამე დიდი ხნით არ გატეხოთ.

ისევ კაბის შრიალი გაისმა და მზეთამზის ლანდი ღამის სიბნელეში გაუჩინარდა.

გათენების ჟამს ძილგატეხილმა შოთამ ენგურისპირას დაძარღვეულ კლდის ქიმზე ჩამოისვენა. აფორიაქებული დაჰყურებდა ნისლდაყრილ და მღელვარე მდინარეს. ბობოქარი ტალღები კლდეებს ეხეთქებოდა და სქელ ნისლში ხანდახან ნაპერწკლებივით გაიელვებდა შხეფები. სიგრილე ქვემოდან ძალუმიდ მოქშუოდა და ძვალრბილში სასიამოვნოდ ატანდა. ეს გრილი მდინარის ნიავე უფრო აფხიზლებდა შოთას.

ქალაკზე თამარის კარვის ტილოები ირხეოდა. შოთას მოეჩვენა, რომ კარავიდან თეთრნაბღიანი გამოვიდა, ისიც და-



ლანდა, თუ როგორ წამოვიდა ნაბღიანი ჩრდილი მდინარის პირისკენ.

„არც თამარს დასძინებია“, — გაიფიქრა მან.

— აღრე ამდგარხარ, შოთავე ჩემო, — ახლა აშკარად მოეს-  
მა მზეთამზის წყნარი, იაღონივით ხმა.

— ნალველმა დამრია, მეფეო, დაეიბენი, ვერ მივმხვდარვარ,  
რად დასჭირდა ქვეყნის მფლობელს უჩინმაჩინად სიარული,  
ხალხის თვალთაგან განრიდება, თავის სამწყსოში მალულად  
მგზავრობა.

თამარი წყნარად მიუახლოვდა შოთას. როცა შენიშნა, იგი  
ფეხზე აღგა, გააფრთხილა:

— დაჯექი, ბრძენს ჩემგან არ გესწავლება, მეგონა, შენ  
მაინც გამიგებდი ზრახვას.

— ჩემი სიბრძნე ვინა სთქვა, ჩვენო მზეთამზევე, ვით შევა-  
დარო ღამე დილის მზეს!

— არა, შოთა ჩემო, ამქვეყნად ბრძენთა ნააზრევი რჩება.  
მეფეთა კი — ნამოქმედარი. ჩვენ სიჩუმე გვმართებს და ხალ-  
ხის სიკეთისთვის დაუღალავად შრომა, თქვენ კი აზრი და სიბ-  
რძნე გიკვალავთ ხალხის გულში გზას.

— მალვა მხოლოდ ტრფობას შეენის, მზეთამზევე.

— ხალხისთვის შრომას და სიყვარულსაც არ უყვარს ქვეყ-  
ნის პატრონისაგან ტრაბახი, დიდო პოეტო. სვანეთს მოსვლა  
უჩინმაჩინად რომ არ განმეზრახა, ხალხი შეიყრებოდა, ზეიმებს  
გამართავდა. მეც აღამიანი ვარ, ზეიმში მეც ჩამითრევდნენ და  
განზრახულის კალაპოტიდან სულ სხვა სვრელში გადამისრო-  
და. ახლა კი...

— ახლა კი... — შეაწყვეტინა სიტყვა შოთამ. — განზრა-  
ხულსა და წინასწარ ნათქვამს პირდაპირ მივყვებით ხომ,  
მზეთამზევე.

— ახლა კი დინჯად, ერთი ძარღვის ატოკებით, ერთი განუ-  
ყოფელი სულით და გულით ვაკვირდები ჩემი სამწყსოს ერთ  
ულამაზეს და უპატიოსნეს თვალს. სვანეთი ჩვენი ქვეყნის  
ცადაზიდული გვირგვინის ჯილაა, მისი ელვარე სილამაზე. ჩვე-  
ნი მამულის ხერხემლის მტკიცე ნაწილია. უნდა მენახა, უნდა  
გამეგო მისი ჭირ-ვარამი, მისი სიხარული თუ მწუხარება.

განთიადის იისფერ ნისლით ჩაბურულ გზაზე მოულოდნე-

ლად ცხენის ფეხის ხმა მოისმა. ცოტა ხნის შემდეგ ცხენოსანიც გამოჩნდა. ცხენოსანმა, ეტყობა, ამ რიბირაბოში შეამჩნია კარვებიცა და დამხვდურიც. იგი ახლო მოვიდა და შეჩერდა.

— მგზავრები თუ ყოფილხართ?! — იკითხა მხედარმა. თავზე თეთრი ნაბღისაგან მოთელილი ქუდი ეხურა, წელზე ვეება ზანჯალი და ზურგზე თხის ტომარა ეკიდა.

მზეთამზე და შოთა ხმაზე მიხედნენ, მხედარი ყრმა ბიჭი იყო.

— მგზავრები ვართ, — წყნარად შეეპასუხა შოთა, — თქვენც ადრე გიმგზავრიათ!

— მწყემსი გახლავართ, ხალდეშურას სათავეებთან ბალახობენ ჩვენი ხვადაგები. თქვენ მწყემსებს არ გავხართ, კარვები კი დაგიდგამთ!.. — დააკვირდა ახლა კარვებს გაოცებული მწყემსი ბიჭი.

შოთას და მზეთამზეს დაბნეულობა დაეტყოთ. ისევ თამარმა დაასწრო სათქმელი:

— კვირიკეზე ვიყავი სალოცავად.

— არც მლოცველებს გეგხართ, — თავი გააქნია ბიჭმა.

— ჰადიშიც მოვიარეთ, იქაც მუხლი მოვიყარეთ, — ისევ წყნარად თქვა თამარმა.

— თვითონ იქიდან გახლავართ! — გაუბრწყინდა ბიჭს თვალები.

— რა გვარისა ხართ, ან სახელად რა გქვია? — შეეკითხა შოთა.

— ავალიანი ვარ, სახელად ბათილბის მეძახიან.

— ჰადიშიდან ხარ?! — გაუბრწყინდა სახე თამარს. — ერთი სათხოვარი მაქვს, უნდა შემისრულო!

— ბრძანეთ, ბატონო!

— ერთ წუთს მომიცადე. შესაწირი უნდა გაგატანო ჰადიშის საყდრისათვის.

თამარი კარვისაკენ წავიდა და როცა უკან გამობრუნდა, დილამ უკვე გადმოიხედა მწვერვალებიდან. ხეებშიც ნელა ჩადიოდა დილის შუქი.

— ძვირფას რამეს გატან, შვილო ჩემო, წინამძღვარს უთხარი თვალისჩინივით მოუფრთხილდეს.

მან წყნარად გაუწოდა ბათალების უცხოოდ ნაქარგ შალში

შეხვეული წიგნი. ბიჭმა ფრთხილად გამოართვა და შალი მოხსნა.

— ღმერთო ჩემო, — დაიბღაველა ბათალბიმ, — ეს ხომ მეფეთრი საჩუქარია. მერმე ცოტა უკან დაიხია, თამარს შეხედა, ოდნავ დაუკვირდა და მუხლებზე დაეცა.

— ახლა გიცან, ღმერთთა სწორო მეფეო, თქვენი შუქით თვალეები თუ დამიბნელდა მე საწყალსი..

— კითხვა იცი?! — გაუკვირდა შოთას. თამარს კი ლაწევები ოდნავ შეუვარდისფერდა.

— მამას ათონის წმინდა მთაზე ვყავდი წარგზავნილი, ბერძნულსაც ვმარცვლავ.

— დაილოცოს ქართველი კაცის თვალის სინათლის მანძილი! — თითქოს ლოცვა აღევლინოს, ჩაიჩურჩულა შოთამ.

— მამაშენი ვინ არის? — იკითხა მზეთამზემ.

— ვისთანაც ამ წიგნის შიტანა გიბრძანებია, — ისევ დაჩოქილმა თქვა ბათალბიმ:

— აღეკი, შვილო, ჰადიშამდე არავის უამბო ჩენი შეხვედრა. გულმა მითხრა, ქვეყნის გონების ეს განძი ჰადიშის საყდარში უკეთ შეენახება ერს. ახლა კი წადი, არ დაგაგვიანდეს.

ბათალბი ჭერ კიდევ მუხლზე დაჩოქილი იდგა.

— დამლოცე, მზეთამზევ, დე, შუქმა შენმა გაუნათოს ჩვენს ხალხს გზაკვალი.

— დამილოცინიხარ, შვილო!

ბიჭი ნელა ადგა, კალთა არ გაუბერტყა, ისე მოახტა ცხენს და სიტყვა აღარ უთქვამს, ისე გაშორდა დამხდურებს. შოთამ კარგად გაარჩია, თუ როგორი სიფრთხილით ჩააცურა უძვირფასესი ძღვენი აბგაში ბათალბიმ და როგორი მადლიერი თვალით გამოიხედა წასვლის წინ მათკენ.

— მაინც მიხვდნენ თქვენს ვინაობას, მეფეთ მეფეო, მზეს თავის შუქით იცნობენ, ეტყობა, ხალხს უჩინმაჩინის ქულით ვერ დაუხუჭავ თვალს.

სწორედ ამ დროს ბათალბის ცხენი წყალგარდნილს გასცდა და აღმართზე ცხვირწაწვდილ გორასთან გამოჩნდა. ცხენი თოხარიკით მიჰყავდა გახარებულ მხედარს.

უცებ მის ზემოთ ზრიალი და გრუხუნი მოისმა. გრუხუნს ლაწანი და თითქოს მიწის რყევა მოჰყვა.

— დავიღუპეთ, ზვაევი ჩაიტანს იმ უბედურს! — დაიბღავლა მურზაყანმა. მართლაც, ზედ იმ ცხვირწაწვეტილ მთის თავზე, რომლის ქვეშ ბათალბის ცხენი მიქროდა, მთის წვერი მოწყვეტილიყო და ქვემოთ მსხვრევით და მტკრევით ზვაედ მოდიოდა.

ვეება ხეები და კლდენი იღეწებოდა და ერთად, გუფთად შეკრული დაბლა მოექანებოდა.

ეტყობა, ცხენოსანმა იგრძნო დაღუპვის მოახლოება. ცხენი უცებ მოწყვიტა ადგილიდან და ოთხით გააქროლა აღმართზე.

მერმე ყველაფერი დაიბურა.

ზემოდან მათ თვალწინ ჩაიქროლა თოვლის ვეება ზვინებმა, დაღეწილმა ხეებმა, კლდეთა ვეებერთელა ნამსხვრევებმა, ჩაიქროლეს და გარშემო ყრუ ნისლი და სიცივე დააყენეს.

თამარმა შეჰკივლა, თვალეზზე მიიფარა ხელი. შოთა და მურზაყანი სულმოუთქმელად გაჰყურებდნენ ხევგალმა დაკიდებულ გზას. თოვლის მტკერმა და ნისლმა იქაც შეატბორა.

არაფერი ჩანდა...

უცებ თითქოს მზის შუქი გამოვარდნილიყოს ჯოჯოხეთიდან, ისე ამოიკვნესა ყველამ, გალმა მხედარი ისევ გამოჩნდა.

— გადარჩა, მეფეო! — ჩაიჩურჩულა შოთამ.

— ღმერთმა გვიშველა, — ისევ დაიბუხუნა მურზაყანმა.

თამარმა თვალი გაახილა. იგი კარგა ხანს მისჩერებოდა ხევგალმა მიმავალს და მერე შვეებით ამოისუნთქა.

— გადარჩა, — წყნარად ჩაიჩურჩულა მანაც და დასძინა: — ქვეყნის განძიც გადაარჩინა თავგანწირვით.

— გარნა გელათში არ დაისვენებდა დიდი ოთხთავი, მეფეთმეფეო, — თითქოს საყვედურით უთხრა შოთამ.

— ეჰ, შოთა ჩემო, განგების თვალს დიდი სინათლე აქვს. გულმა ისე მითხრა და მეც მივყევი.

შოთამ თავი ჩაღუნა.

— მაპატიე, დედოფალო!

— საპატიებელი არა გითქვამს რა, ახლა კი ცხენები შეკაზმონ, დაღამებამდე ოღიში უნდა განვლოთ უჩინმაჩინად.

— პირველად მესმა შენი. მაღალი ხმა, — თითქოს თავისთვის ჩაილაპარაკა შოთამ.

თამარი თვითონაც გაკვირვებით მიაჩერდა შოთას, სახე  
ოდნავ აუწითლდა.

— ოჰ, რომ შევეცივლე, ის გაგიკვირდა! ასეა, ადამიანი ულო-  
ნობის დროს წამოიყვირებს. შენ კი, როგორც მახსოვს, წელან  
მირჩევდი ხმაურით მოგზაურობას სვანეთში. ქვეყნის მმარ-  
თველს თუ სხვა მიზანი არა აქვს, წყნარად სიარული ურჩევნია,  
ხალხის ტკივილთა გასაგებად და მოსარჩენად. ტაშით და ზარე-  
ბის გრიალით ყეენები ყეენობენ ჩვენში.

შოთას თავი არ აუღია, ერთი კი გახედა და წყნარად თქვა:

— ცხენებს შევაკაზმინებ, მეფეთ მეფეო, გევედრები გულ-  
ში არ ჩაგრჩეს ჩემი კადნიერება!

ცოტა ხნის შემდეგ, როცა ცხენოსნებმა ეს ადგილი დატო-  
ვეს, ერთმა მათგანმა უკან მოიხედა და თითქოს მთა-ბარს გას-  
ძახა:

— ჩუმად, ჩუმად!

— ვის ეძახი?! — შეაჩერა ცხენი თამარმა.

— ამ ადგილს უნდა დაერქვას სახელი „ჩუმად“, დაე, ამ  
მთა-ბარმა მაინც შეინახოს თქვენი ნაკვალევი.

— ხალხს არაფერი დაემალემა, ბრძენო პოეტო, საჭიროს  
გაიხსენებს და არც დაკარგავს.

# ხე სიკეთისა და ხე ბოროტებისა

პიესა-ლეგენდა

მოქმედი პირნი:

დარისპანი — ადამიანი-ბოროტება, უსაყო, კოჭლი და ცალთვალა-  
ხალიბა — ბრძენი ქაბუჯი.  
ავთო — ქაბუჯი, 20—21 წლისა.  
მზეონა — 16—17 წლის ქალიშვილი.  
დუნიადარი — ავთოს დედა.  
ვაჟი — ფიზიკოსი.  
ქალი — ფიზიკოსის საცოლე.  
გლეხი, გლეხის ცოლი, მე'თაური (ველურთა).  
კორფლიანი (ქიმიკოსი).  
გამომთვლელი (გამომთვლელი მანქანების მექანიკოსი).  
ხალხი.

პირველი სურათი

მთების ფონზე მოჩანს ვაზის რტოებით დატვირთული ორი ხე.  
ერთს აწერია „ხე სიკეთისა“, მეორეს — „ხე ბოროტებისა“.  
ორი უკაცრიელი ბილიკი, მესამეზე მოდის გლეხი, თან მეულ-  
ლუ მოჰყვება.

გლეხი. ამ ბილიკს გამოჰყევი, იქით ნუ გადააბიჯებ, დარისპა-  
ნისაა.

ცოლი (სიცილით). ჩემო კაცო, ნუ იცი ასე ლაპარაკი, დარის-  
პანი ვილაა?!

გლეხი. ეჰ, იმ ხის პატრონია. (უჩვენებს „ბოროტების ხეს“.) იმ  
ხეს რომ ახარებს, ის კაცია.

ცოლი. უიმე, ცოდვიანი ყოფილა!

გლეხი. რა გაყვირებს, წიგნში წერია, იმ ხის გაზრდაში ქა-  
ლებსაც წილი უდევთო.

ცოლი (უჩვენებს შორეულ ნათელ ბილიკს). აბა, იმ ბილიკზე გა-  
დავალი

გ ლ ე ხ ი. იმ ბილიკზე გავლა ძნელია, ხალხი ამბობს, ამირანი-სააო.

ც ო ლ ი. აბა, რა მეშველება?

გ ლ ე ხ ი. ჩემს გვერდით იარე. ქალმა მამაკაცის გვერდით უნდა იაროს, თორემ თვითონაც დაიღუპება და ქვეყანაც აირევა.

ც ო ლ ი. ნუ იცი ასე ლაპარაკი, კაცო!

გ ლ ე ხ ი. ადამიანის სიცოცხლე ასეა. აქეთ სიკეთის წმინდა წყარო მოწანწყარებს, იქით ბოროტების მორევია. ბოროტებას უნდა ერიდო, სიკეთისკენ იარო შეუსვენებლივ.

ც ო ლ ი. ეჰ, რამდენი ხანია შენი ცოლი ვარ და შენი მაინც ვერაფერი გავიგე.

გ ლ ე ხ ი. ის მეორე ხე (უჩვენებს „სიკეთის ხეს“) ამირან დევეკაცმა გაახარა. ადამის შემდეგ ის უვლიდა და სწორედ იმ ხის ქვეშაა ბედნიერების ჩრდილი მოკალათებული.

ც ო ლ ი. ნუ სწუხხარ, ჩემო კაცო, ნუ სწუხხარ!

გ ლ ე ხ ი. ცეცხლი ამირანმა გვიშოვა, პირველი გუთანი ამირანმა გაგვიჭედა, ძაღლი რომ ძაღლია, ესეც იმან მოაშინაურა.

ც ო ლ ი. ძაღლი ვითომ რად უნდოდა?

გ ლ ე ხ ი. ადამიანის ერთგულება შეატყო.

ც ო ლ ი. ძაღლი მაინც ძაღლია.

გ ლ ე ხ ი. რატომ? ადამიანის მეგობარია, კეთილი, თვინიერი.

ც ო ლ ი. თვინიერი ცხვარია.

გ ლ ე ხ ი. კი, ცხვარი თვინიერია, მაგრამ სუსტია, მეგობრობა არ შეუძლია.

ც ო ლ ი. უცნაური ლაპარაკი იცი, ჩემო ქმარო.

გ ლ ე ხ ი. ცხვარი ჩერჩეტია, ჩერჩეტს კი მეგობრობის თავი არა აქვს.

ც ო ლ ი (უყურებს „ბოროტების ხეს“). ლამაზი ხე კი არის.

გ ლ ე ხ ი. თვალსაც იტაცებს და გულსაც. ევას ხესაც ეძახიან. ქალივით ლამაზი და მაცთუნებელია.

ც ო ლ ი. მეც მაცთუნებელი ვარ, ჩემო კაცო?

გ ლ ე ხ ი. ქალი როცა დედაა, მაშინ სხვაა, მაშინ იგი ქვეყნის სიკეთე და სილამაზეა. შენ დედა ხარ.

ც ო ლ ი. რა ვქნა, კაცო, ახლა იმ დარისპანის მეშინია.

გ ლ ე ხ ი. კი, საშიშია, შვილებისათვის საშიშია.

ც ო ლ ი. შენ რატომ არ გეშინია?

გ ლ ე ხ ი. მე გლახიკაცი ვარ, ყველასი თუ შემეშინდა, არ ივარგებს.

ც ო ლ ი. ვითომდა რატომაო?

გ ლ ე ხ ი. მაშინ ქვეყანა დაიღუპება. ცის ქვეშ გლახს არც ეშმაკის უნდა ეშინოდეს და არც ანგელოზის ერიდებოდეს.

ც ო ლ ი. (შივა და მოფერება). ვიცი, არავისი არ გეშინია, ამიტომ ხარ ჩემი ქმარი.

გ ლ ე ხ ი. მაინცადამაინც არც სხვებს ეშინიათ.

ც ო ლ ი. სტყუი, ეშინიათ. გუშინწინ ჩვენმა მეზობლებმა ერთ მგელს ზურგი უჩვენეს.

გ ლ ე ხ ი. მხეცის ყველას ეშინია.

ც ო ლ ი. დარისპანს არ ეშინია?

გ ლ ე ხ ი. გამიგონე, ქალო, ამქვეყნად იგი შიშით დაიარება, კანკალებს, იმიტომ ელოლიავენა იმ ხეს.

ც ო ლ ი. რატომ იცი ასეთი ლაპარაკი, ჩემო კაცო, ვერც კი მივხვდი, რას ამბობ!

გ ლ ე ხ ი. ყოველი ბოროტება შიშის შვილობილია.

ც ო ლ ი. გული ნუ გამიწყალე, მაინც რა ქნა იმ დარისპანმა, მითხარი ერთი!

გ ლ ე ხ ი. ვერ მიხვდი?

ც ო ლ ი. ვერ მივხვდი, ვერა!

გ ლ ე ხ ი. მართლა ვერ მიხვდი?

ც ო ლ ი. რატომ იცი, ჩემო კაცო, ასე ლაპარაკი?

გ ლ ე ხ ი. ქალო, ცხვარს ხომ ვპარსავთ ჩვენ?

ც ო ლ ი. მერე?

გ ლ ე ხ ი. მიწის გაჩენიდან დარისპანი ასე პარსავს ქვეყანას.

ც ო ლ ი. რაო? მერე კაცები გაწყდით?

გ ლ ე ხ ი. იმასაც თავისი ხალხი ჰყავს.

ც ო ლ ი. ამირანი?!

გ ლ ე ხ ი. ამირანი დაჯაჰვეს, იალბუზზე მიაკრეს.

ც ო ლ ი. უიმე, რა მეშველება!

გ ლ ე ხ ი. რა ვიცი, შვილებმა იციან, მათი ვაჟკაცობის საქმეა.

ც ო ლ ი. შორიდან მაინც მანახე ეს დარისპანი, კაცო.



**გ ლ ე ხ ი.** დაიჟინებ და დაიჟინებ, რა სანახავი ის არის! მის  
 ნახვას თავით რომ ნიორი ნაყო, ისა ჯობია.  
**ც ო ლ ი.** მე დედა ვარ და მინდა მისი შეხედვა.  
**გ ლ ე ხ ი.** ვითომდა რათაო?  
**ც ო ლ ი.** აბა, არ ვიცოდე, ვინ არის ჩემი ოჯახის მტერი? ჩემი  
 ბავშვების ბედს ვინ ემუქრება?!  
**გ ლ ე ხ ი.** იცოდე, მერე არ წამეჩხუბო, რატომ მანახეო!  
**ც ო ლ ი.** რატომ იცი, კაცო, ასეთი ლაპარაკი?  
**გ ლ ე ხ ი.** ნახე, ნახე, მისი ნამოქმედარიც ნახე, იცოდე, ცრემ-  
 ლი კი არ დამანახო, არ დამანახო, თორემ...

### მეორე სურათი

ნელა იხსნება ფარდა და ნისლით დაბურული, თოვლიანი  
 მწვერვალები გამოჩნდება. ერთ-ერთი ყველაზე მაღალი ყო-  
 ნულოვანი მწვერვალის ქვეშ, გამოქვაბულში, მიჯაჭვული დევ-  
 გმირი ამირანი იღანდება. ყვავ-ყორნები ესევიან და გულს  
 უფლეთენ.

უფრო შორს, ღრუბლებში, მოჩანს აინშტაინის სილუეტი.  
 ისმის გამაყრუებელი, ბოროტი ხარხარი. გამოჩნდება დარის-  
 პანი.

**დ ა რ ი ს პ ა ნ ი.** ვინ მეძახდა მე?  
**პ ი რ ვ ე ლ ი ხ მ ა .** არავინ, ბოროტებას განა ვინმე მოუხ-  
 მობს?  
**მ ე ო რ ე ხ მ ა .** შენ არავინ გიხმობს, ნეტავი თვით არ ეძა-  
 ლებოდე ხალხს!  
**მ ე ს ა მ ე ხ მ ა .** შენ ყველას სძულხარ, შენი ყველას ეშინია!  
**დ ა რ ი ს პ ა ნ ი.** სტყუით! ადამიანებს მე ვჭირდები.  
**პ ი რ ვ ე ლ ი ხ მ ა .** ასეთი ადამიანები სახრჩობელაზე უნდა  
 ეკიდონ.  
**დ ა რ ი ს პ ა ნ ი.** აი ხომ ხედავთ, თქვენც სახრჩობელა ახსე-  
 ნეთ. ვინც სახრჩობელა ახსენა, მე მას ვჭირდები.  
**მ ე ო რ ე ხ მ ა .** არ იფიქრო! ჩვენ ადამიანთა სიკეთე გვინდა.  
**დ ა რ ი ს პ ა ნ ი.** აი ამ ვაჟბატონს, ამ ღვგაკაცსაც ეს უნდოდა.  
 (ამირანზე მიუთითებს.) აგერ რამდენი საუკუნეა აქ არის და  
 თავისი თვალთ ხედავს ადამიანთა ბოროტებას. ქვეყნად

სიკეთე არ არსებობს — სულ ომები, სულ ერთმანეთის  
ხოცვა და ჟლეტა.

მესამე ხმა. ეს ადამიანების ბრალი როდია. ეს შენი ბო-  
როტების თესლია.

დარისპანი. ჩემი თესლია, დიახ, ჩემი თესლია. ისინი მე  
მგვანან, ჩემნაირები არიან. ადამიანი ყველა ბოროტია.  
კაცმა კაცი ისე უნდა შეჭამოს, როგორც ირემმა — ბალა-  
ხი, ვეფხვმა — შვლის ნუკრი, მგელმა — ცხვარი და თი-  
კანი. ასე იყო და ასე იქნება.

პირველი ხმა. ტყუილია, ცილისწამებია ადამიანთა მოდგ-  
მაზე.

დარისპანი. ასე ეგონა ამირან ლომკაცსაც, ადამიანის კე-  
თილშობილებით მოხიზლული იყო. ძმამ ძმის ჭირი უნდა  
გაიყოსო, თავისი ლხინი მეგობრებს, მოყვასს გაუზიარო-  
სო, ხალხის სიყვარულს შეეწიროსო.

მეორე ხმა. დიდ არს სახელი მისი!

დარისპანი. სისულელეა, სიგიჟეა. ადამიანი ბუნების შეი-  
ლია. ბუნება კი ვერაგია, დაუნდობელი. მზის შუქი ფი-  
ტავს და ამსხვრევს კლდეს და მტვრად აქცევს მის ძარ-  
ღვიან ქიმს. წვიმის წვეთი ცხელ ქვიშას ეპკურება და  
კიდევ უფრო წვრილად შლის მას. რკინა დაუნდობლად  
ხლეჩს ხის ვეზება ტანს. რკინას კი ჟანგი ჭამს და აძაბუ-  
ნებს. ასე იყო და ასე იქნება.

პირველი ხმა. მზე ათბობს და ამოძრავებს ქვეყნიერებას.

მეორე ხმა. წყალი აწყურებს ყველა მწყურვალს და პა-  
ერთან, მზესთან ერთად სიცოცხლეს ბადებს.

მესამე ხმა. ადამიანები აკეთილშობილებენ ბუნებას.

დარისპანი. ასე ეგონა ამირან ლომკაცსაც. ბუნებას  
აღუდგა, განგებას ცეცხლი მოსტაცა და ადამიანს გადას-  
ცა. რკინას თვალი დაადგა, ცეცხლის დახმარებით, ხმლის  
და ისრის წვერის მაგივრად, სახნის-საჭრეთელი გააკეთე-  
ბინა.

ხალხი. დიდ არს სახელი მისი!

დარისპანი. სისულელეა, სიგიჟეა. ეს ხომ ბუნების წინა-  
აღმდეგობაა, ერთმა მეორე უნდა ჭამოს, ერთმა მეორე  
ანადგუროს. ძლიერმა სუსტი უნდა გადაყლაპოს. წერო

ბაყაყთა მოდგმით იკვებება, ბაყაყები კი ჰიალუით ცხოვრობენ.

ხ ა ლ ხ ი. ადამიანები აკეთილშობილებენ ბუნებას.

დ ა რ ი ს პ ა ნ ი. ტყუილია. გაჩენის დღიდან ისინი ერთმანეთს ხოცავენ და ანადგურებენ.

ხ ა ლ ხ ი. ეს შენი თესლია.

დ ა რ ი ს პ ა ნ ი. კი, ჩემი თესლია. ადამიანები მე მგვანან.

ს ა მ ი ვ ე ხ მ ა. დიდ არს ამირანის სახელი.

დ ა რ ი ს პ ა ნ ი. ამირანი ერთია, ადამიანები მილიონებია. ისინი ათას რამეს იგონებენ ურთიერთის მოსასპობად, ერთმანეთის გასაყლეტად. აბა, მაჩვენეთ ადამიანთა გონების ისეთი ნაყოფი, რაც მათ ამრავლებდეს და არ ხოცავდეს. ყველაფერს იმიტომ იგონებენ, ერთმანეთი გაანადგურონ.

ს ა მ ი ვ ე ხ მ ა. ტყუილია. ადამიანთა მიზანი სიკეთეა.

დ ა რ ი ს პ ა ნ ი. ამირანმა კეთილი მიზნით მათ ცეცხლი და რკინა მისცა, სწორედ ამ ცეცხლით და რკინით ჟლეტენ ისინი ერთმანეთს.

ს ა მ ი ვ ე ხ მ ა. ეს მხოლოდ შენი თესლია.

დ ა რ ი ს პ ა ნ ი. კი, ჩემია, ჩემი თესლია. ადამიანები მე მგვანან ახლაც.

პ ი რ ვ ე ლ ი ხ მ ა. სტყუი, მსახვრალო!

დ ა რ ი ს პ ა ნ ი. ასე იყო, ასე არის და ასე იქნება.

ს ა მ ი ვ ე. არა და არა! აღარ იქნება.

დ ა რ ი ს პ ა ნ ი. მე ცოცხალი ვარ. ადამიანები ცოცხალნი არიან. ჩემი თესლი კვლავ აღმოცენდება.

პ ი რ ვ ე ლ ი ხ მ ა. შენი თესლი გამოიფიტა, ძარღვი დაკარგა. სანაყოფო ნატამალი გამოუშრა. შენი თესლი მოისპობა.

მ ე ო რ ე ხ მ ა. დააკვირდი დედამიწას, ახალი ხალხი მოვიდა, ამირანის, თესლის ნაყოფი.

დ ა რ ი ს პ ა ნ ი. ისინიც ადამიანებია, მაშასადამე, ჩემი თესლი არ მოსპობილა.

მ ე ს ა მ ე ხ მ ა. მათი აზრი სულ სხვაა, მათი ფიქრი სულ სხვაა, მათი მოქმედება სიკეთეა და ბედნიერება.

დ ა რ ი ს პ ა ნ ი. ასე ეგონა ამირან დევკაცსაც. მისი ცეცხლი და რკინა ასეული საუკუნეებია ჟლეტს ხალხს.

ს ა მ ი ვ ე. ეს შენი ბრალია, შენ ხოცავ ხალხს.

- პირველი ხმა. გაიხსენე შენი ნამოქმედარი!
- მესამე ხმა. კაენის შემდეგ ხალიბას მკვლელობა შენი ხელით მომხდარი პირველი კაცთა კვლავა.
- პირველი ხმა. შენ მოჰკალი ჭაბუკი ხალიბა!
- დარისპანი. მე არ მომიკლავს, თვითონ შემომაკლა თავი.
- მეორე ხმა. სტყუი! შენ იგი მოჰკალი, როგორც ხვალინდელი დღის სიკეთის თესლი. შენ გეშინოდა მისი.
- პირველი ხმა. მისი დავაჟკაცება შენ დალუპვას გიქადდა.
- მეორე ხმა. შენ დალუპე ამირანი.
- დარისპანი. ბრალი არა მაქვს, თვითონ გამოუტანეს თავიანთ თავს განაჩენი.
- მეორე ხმა. სტყუი, ბოროტო კაცო.
- მესამე ხმა. დიდ არს ამირანის სახელი!
- პირველი ხმა. შენ კი პირველი მკვლელთაგანი ხარ ადამიანთა შორის.
- მესამე ხმა. ხომ გახსოვს ხალიბა?
- მეორე ხმა. გაგახსენებთ, თუმცა არც შენ დაგვიწყებდა. დე ამ ხალხმა ნახოს შენი ნამოქმედარი.

### მესამე სურათი

ნელა იწმინდება ნისლი. თანდათან გამოჩნდება კავკასიონი. ხანდახან გაიღვლებს და მაშინ ფერდობზე მოჩანს წაბლისა და თხმელის ვეება ხეები, ზედ ველური ყურძნის მტევნებია დაბარდნული. ქარიშხალია. ხის წვერობთან ერთად თითქოს მწვერვალებიც იზნიჭებიან. ხეებში ამღვრულა, აღიდებული მდინარეები მოქშუიან. ცაზე შავი ღრუბლები ერთმანეთში ირევა. ყოველ წუთს ელავს და მეზი გრვეინვით ეხლება კავკასიონს. ერთ-ერთი გამოქვაბულის წინ ავთო ღვას, გამოქვაბულში დედამისი ღუნიადარი მოჩანს. ავთოს გვერდით კლდის ქიმზე მშვილდ-ისარია მიყუდებული. გამოქვაბულის წინ, უფსკრულის პირას ვეება ძელქვაა, მისი ერთი ფესვი გაღმა ნაპირამდე წვდება. ეს ფესვი ხილიც არის.

- ღუნიადარი. შიგნით შემოდი, ბიჭო, ხომ ხედავ, ქვეყანა იქცევა, გაცივდება, ავად გახდება, შემოდი-მეთქი!
- ავთო. მატალე დედი. ცოტა კიდევ მინდა ვუყურო ქვეყნის სიდიადეს. შეხედე, როგორ გაიელვა! თითქოს ორი ცეცხლის გველეშაპი გადაეჭდო ერთიმეორეს! დედიკო, შეხე-

დე, მეხი გავარდა და სწორედ იმ კლდის წვერს დაჰკრა, მე რომ ტახტი შემომეფეთა. ჰო, ჰო, ჰო, იმხელა მთა როგორ დაამსხვრია?! ნახე, ნახე, მდინარესავით მოქუხს ქვემოთ. აი ძალა ამას ჰქვია ნეტავი ამირანს რომ დაეცეს, რას უზამს, ჰა? ნუთუ დღეს არ გამოჩენილა ჩემი ძმობილი?

დ უ ნ ი ა დ ა რ ი. არა, შვილო, არ ყოფილა. იმის გზაკვალს ვინ გაიგებს! დღეს რომ აქ არის, ხვალ ქვეყნის მეორე კიდეზე გადაინაცვლებს. რაც ის ყურშა ძაღლი ჰყავს, სხვა კაცად იქცა, გაუჩინარდა, უხილავი გახდა.

ა ვ თ ო. კარგი კაცია ჩემი დიდი ძმობილი. ხალხი უყვარს. მის ჭირვარამს ელოლიავენა.

დ უ ნ ი ა დ ა რ ი. მერე რა, რა გაგვიკეთა მისმა გულკეთილობამ. ჩვენ მაინც სიციზით ვკანკალებთ, 'ამ ცივ მთებში სხეული ვერ გაგვითბია.

ა ვ თ ო. ეს რამ გათქმევინა?! განა ეს მთები ცივია?! ხომ ხედავ, ქვემოთ ყურძენი ხარობს, დაფნის სურნელოვანი ფოთლები იკრიფება ზაფხულშიც და ზამთარშიც. (ამ დროს ისევ გაიფლავა და მეხი გავარდა.) ჩვენს ძველ სამყოფელოში ცუდი ადამიანები მომრავლდნენ. ამირანმა აქეთ წამოსვლა გვირჩია. სიცივე შენ ამ მთების გადაღმა ნახე!

დ უ ნ ი ა დ ა რ ი. განა აქ ცოტაა ცუდი ადამიანი?! ვინ ჯანდაბაა ეს დარისპანი აქეთ რად წამოიყვანა, ხომ იცოდა, რომ ბოროტებით სავსეა მისი გული?!

ა ვ თ ო. თვითონ გამოგვეკიდა. ამირანს დასდევს: სადაც სიკეთეა, იქ ბოროტებაც უნდა იყოსო.

დ უ ნ ი ა დ ა რ ი. ჰოდა, ბოროტმა რომ სძლიოს კეთილს?

ა ვ თ ო. ეს რა თქვი, დედი?! ამირანს დარისპანი მოერევა?

დ უ ნ ი ა დ ა რ ი. ბოროტება, შვილო, ყოველთვის ორპირია და გაუტანელი, სიკეთე კი — პატიოსანი და გულმართალი.

ა ვ თ ო. ამირანის დანები სულ კაჟის მთლიანი ძარღვისგანაა. ესეც მისი ნაჩუქარია. ერთის დარტყმით გავათავე ვეება ტახტი. (აჩვენებს ქვის დანას.)

დ უ ნ ი ა დ ა რ ი. დარისპანი მკერდი-მკერდ როდი მივა ამირანთან, ზურგიდან მოუვლის, დანას ზურგში ჩასცემს.

- (ამ დროს ისევ იღვავა, მეზი გაეარდა.) ვაიმე, შვილო, ხომ არა-  
ფერი მოგწია ამ დეტის ლახვარმა!
- ავთო. მე რას მერჩის, რას დამაკლებს.
- მზეონა: (გალმობიან). ჰაუუ, ავთო-ბიჭო, ცოცხალი ხარ?
- ავთო (სიხარულით). ცოცხალი ვარ, ცოცხალი მოდი, გოგო,  
მოდი!
- (მზეონა მორბის ძელქვის გადაკიდებულ ფესვზე.)
- მზეონა. ჰო, რა შემცივდა ნეტავი თუ ოდესმე გავთბები.
- ავთო. აქ არა ცივა, ახლოს მოდი.
- დუნია დარი. აქეთ მოიწით, გამოქვაბულში უფრო თბილა.  
(შველენ გამოქვაბულში).
- მზეონა. გამათბე, ავთო-ბიჭო, გამათბე. შენს ახლოს ყოველ-  
თვის თბილა. (ლოყას ლოყაზე მიაღებს.)
- ავთო. მოდი, მზეონა, დღეს მეტად ლამაზი ხარ. მაინც რა  
პატარა გული გაქვს, ჩიტის გულივით ფეთქავს.
- მზეონა. ჩიტის გული?! დარისპანი კი ამბობს, მიკიოტის  
გული გაქვსო.
- ავთო (ყურს არ უგდებს). შველივით ფეხები და თვალები გაქვს,  
კალმახივით ტანი. დედი, ხომ მართალი ვარ?!
- დუნია დარი. მამაშენიც ასე მეუბნებოდა. ასე იყო და ასე  
იქნება. სილამაზე მხოლოდ სიკაბუყეა, ახალგაზრდობაა.
- ავთო. რა რბილი თმა აქვს, დედი, მზეონას?! ერთი ხელში  
აგიყვანო და გარწიო.
- მზეონა. არ მინდა, ავთო-ბიჭო, ასე მიჩრევენია ხმელ ბალახ-  
ში წოლა. (წვიმამ თანდათან გადაიღო. მზეონამ კაბუჯს წელზე შე-  
მორტყმული ქვის სატევარი შეხსნა.)
- მზეონა. ჩვენი სატევარი!
- ავთო. ამან გადაგვარჩინა იმ დღეს.
- მზეონა. ჰოდა, მეც იმიტომ მიყვარს.
- ავთო. მაგარი ეშვები კი ჰქონდა იმ ტახს. ზურგზე შეევასწარი,  
თორემ გამათავებდა.
- მზეონა. მე კი ხეზე შევხტი. იქიდან ვუყურებდი, როგორ  
ლადრავდი კისერს ამ სატევრით.
- ავთო. სქელი კისერი ჰქონდა. ძლივძლივობით მოვერიე,  
ბარძაყზე მაინც გამკრა ეშვები.

მ ზ ე ო ნ ა. ოჰ, როგორ შემეშინდა! მეგონა, ვერ მოერეოდი, ისე ხროტივებდა, ტყეს ზანზარი გაჰქონდა.

ა ვ თ ო. მისი ჭაგარი სავარცხლებად გამომადგა. ერთი შენთვის გავაკეთე.

მ ზ ე ო ნ ა. ერთი დანა ხმელი ტალახით ჩაგეფშენა ხელში.

ა ვ თ ო. კბილი გაჰკრა. სუსტი დანა გამოდგა, ხოროში, უძარღვო.

(უკვე შუალამე გადავიდა. სინათლემ იმატა, ძელქვის ფესვზე ზის ხალიბა-ბიჭი. მისი თვალები დილის შუქზე გიშერივით ბრწყინავენ.)

ა ვ თ ო. შეხედე, მთელი ღამე, ალბათ, იქ გაათენა. დაკარგული კაცი მოსულა...

მ ზ ე ო ნ ა. შენი ჭირიმე, ხალიბა, აქეთ მოდი, ძამიკო, აქეთ.

(ხალიბა გამოიქცევა და შხეონას და აეთოს შუა ჩაწვება. თმა-აბურძგნულია, ფეხებზე ტალახი აქვს შემშრალი.)

ა ვ თ ო. სად დაიქარგე, ხალიბა? ათი დღეა არა ჩანხარ.

ხ ა ლ ი ბ ა. ამირანმა წამიყვანა, იცი, სად ვიყავით? ცეცხლის მთასთან ვიყავით.

მ ზ ე ო ნ ა. ალბათ, გარშემო ყველაფერს ათბობს ცეცხლის მთა!

ხ ა ლ ი ბ ა. კი არ ათბობს, წვავს, ყველაფერს წვავს. სული შემეხუთა, ყველაფერს დამწვრის და გოგირდის სუნი ასდიოდა.

მ ზ ე ო ნ ა. ნეტავი მეც წამიყვანა, გავთბები მაინც!

ა ვ თ ო. იქ რას აკეთებდი, ღმერთმა არ იწყინოს! არ დაგლახვროს!

ხ ა ლ ი ბ ა. ამირანმა თქვა, ღმერთი ჩემი ნათლიააო. ცეცხლს სთხოვს, ადამიანებს სცივათ, უნდა მივცეთო.

დ უ ნ ი ა დ ა რ ი. ღმერთო შემეწიე, ეს რა გავიგონე!

ა ვ თ ო. მერე რა პასუხი მიიღო?

ხ ა ლ ი ბ ა. ღმერთებმა უარი უთხრეს თურმე.

დ უ ნ ი ა დ ა რ ი. უარი უთხრეს?! რაღა გვეშველება!

ხ ა ლ ი ბ ა. უარი უთხრეს. ცეცხლით ადამიანები ერთმანეთს მოსპობენო.

მ ზ ე ო ნ ა. ვითომდა ჩატომაო?

დ უ ნ ი ა დ ა რ ი. ღმერთიც დარისპანს ეხმარება, ყოველი ადამიანი მასაც ბოროტი ჰგონია.

ხ ა ლ ი ბ ა. ყოველ ადამიანში ეშმაკიც ზის და ადამიანიცაო.

მ ზ ე ო ნ ა (წამობტება). უყურეთ ერთი მერე ვისი ბრაღია? განათვითონ ღმერთებმა არ დააკურთხეს ეს თვისება ადამიანებს?

დ უ ნ ი ა დ ა რ ი. რალა გვეშველება, სიცივისაგან გავიყინებით.

ხ ა ლ ი ბ ა. არ გავიყინებით. ამირანმა თქვა, ცეცხლს მაინც მოვტაცებო.

დ უ ნ ი ა დ ა რ ი. რა თქვი, შვილო, ღმერთებს ამირანი მოერევა?

ხ ა ლ ი ბ ა. ცეცხლი კი მოსტაცა და...

ა ვ თ ო. მერე რა უყო?

ხ ა ლ ი ბ ა. ჩემად იყავით, დარისპანმა არ გამოიგოს. ამირანმა მე გამომატანა. თიხის ქურჭელში, ცხელ ნაცარში მაქვს გავეული.

დ უ ნ ი ა დ ა რ ი. მერე რას გაჩუმებულხარ, რად მალავ?!

ხ ა ლ ი ბ ა. აეთოსთან და მზეონასთან გამომატანა — ყველას გაუნაწილეთო. თან დამაბარა: ხელი არ მიაკაროთ, დაგწვავთ, დაგთუთქავთ, მოგკლავთ კიდევცო.

მ ზ ე ო ნ ა. ვაშაა, ვაშაა, დიდება ამირან დევკაცს!

ა ვ თ ო. აბა, გამოაჩინე შენი ძღვენი.

ხ ა ლ ი ბ ა (უჩვენებს გაღმა). იმ გამოქვაბულში მაქვს. (ათოს ყურში რალაცას უჩურჩულებს. ისიც თავს უქნევს.)

ა ვ თ ო. კარგრ, აქეთ გამოიტანე, ფრთხილად, არ ჩაგიქრეს. (ხალიბა გარბის.)

დ უ ნ ი ა დ ა რ ი. ღმერთები დაგვრისხავენ, დაგვლახვრავენ!

ა ვ თ ო. ამირანმა უკეთ იცის.

მ ზ ე ო ნ ა. გავთბებით, გავთბებით, გავიხალისებთ, ვიცეკვებთ, ვიმხიარულებთ!

ა ვ თ ო. დედა, ჩვენს ძელქვას უნდა მოუუკიდოთ ცეცხლი. დე, ყველამ დაინახოს ამირანის საჩუქარი!

დ უ ნ ი ა დ ა რ ი. ეს ხე მამაშენის დარგულია.

ა ვ თ ო. მით უკეთესი, დე, მისი ხელით დარგული ხის ნაკვერცხალი იყოს ჩვენი ხალხის ოჯახებში სითბოს შემტანი.

მ ზ ე ო ნ ა. ნაკვერცხლებს მე დავარიგებ.



ხ ა ლ ი ბ ა (დიდი ქონით ნაკვერცხლები შემოაქვს). აი ამირანის სა-  
ჩუქარი!

დ უ ნ ი ა დ ა რ ი. ღმერთო, ნუ შეგვრისხავ, ამას რას ვხედავ!  
ა ვ თ ო. დედი, ძონძები მომეცი, ხეს შემოვაფენ, ცეცხლი  
უკეთ მოეკიდება.

ხ ა ლ ი ბ ა. ხმელი ხის ტოტებიც კარგია. ძლიერი ცეცხლი  
იცისო, ამირანისგან გამიგონია.

მ ზ ე ო ნ ა. ავთო-ბიჭო, კვერიც გამოვაცხოთ, ხომ გახსოვს,  
ამირანმა რომ გვასწავლა.

დ უ ნ ი ა დ ა რ ი. ჭერ გავთბეთ, შე ქალო, დაანთეთ, რაღას  
უცდით?

ა ვ თ ო. აბა, ხალიბა, აქეთ მოდი. (ხმელ ჩინჩხვარს ცეცხლს წაუკი-  
დებენ. ალი ნელ-ნელა მალღდება.)

მ ზ ე ო ნ ა. ხალხო, ჰეი, გამოიხედეთ, ამირანმა რა გვაჩუქა!!!  
(ხალხი თანდათან გამოდის გამოქვაბულებიდან, გაოცებით შეჰყუ-  
რებენ აბრიალებულ ცეცხლს.)

პ ი რ ვ ე ლ ი ხ მ ა. ჩვენც გაგვინაწილეთ!

მ ე ო რ ე ხ მ ა. ჩვენც გაგვათბეთ!

მ ე ს ა მ ე ხ მ ა. ჩვენც გავაჩაღებთ ცეცხლს!

ა ვ თ ო. უარი ვინ გითხრათ, აქეთ მოიწიეთ. (ხტუნვით მოდიან და  
ცეცხლის ახლოს გროვდებიან.)

ხ ა ლ ი ბ ა. ამირანმა თქვა, გამოქვაბულის შუა ადგილას კერიის  
ქვა დადეთ, ცეცხლი უფრო შეინახებაო. იცოდეთ, ახ-  
ლოს არ მიეკაროთ, დაიწვებით, დაიხოცებით.

პ ი რ ვ ე ლ ი ხ მ ა. კერიის ქვა!

მ ე ო რ ე ხ მ ა. კერიის ქვა!

მ ე ს ა მ ე ხ მ ა. კერიის ქვა!

ხ ა ლ ი ბ ა. ნაკვერცხალი და კერია დედ-მამას და შვილებს გა-  
ათბობს, უფრო შეაკავშირებს, უფრო დააახლოებს და  
ოჯახი შეიქმნებაო.

პ ი რ ვ ე ლ ი ხ მ ა. ოჯახი!

მ ე ო რ ე ხ მ ა. ოჯახი!

მ ე ს ა მ ე ხ მ ა. ოჯახი!

ხ ა ლ ი ბ ა. ისიც დამაბარა, ვისაც ნაკვერცხალი ჩაუქრება,  
მეზობელმა უჩხუბრად მისცესო.

ავთო. მეზობლებო, დღეიდან თქვენს ოჯახებში სითბო და-  
ისადგურებს.

ხალხი. დიდ ზრს ამირანი! დიდ არს!

მზეონა. ხშიადიკ გამოცხვება, ცეცხლი კეცს გაახურებს.

ხალხი. ხშიადი, ხშიადი, ხშიადი!

(ხალხი მღერის ლოლეს.)

ავთო. ამირანმა შემოთვალა ცეცხლს ფრთხილად მოუარე-  
თო, ხანძარი არ გააჩინოთ, კერიას იქით არ გაიტანოთ,  
ბავშვებს არ ანდოთ, ერთმანეთი არ გადაწვათო. ცეცხლი  
ძლიერია და შეიძლება უცებ მოგვლათ, უფრთხილდითო.

მზეონა. ცეცხლის სითბომ თქვენი გულებიც უნდა გაათ-  
ბოს, ერთმანეთის მტრობა არ იფიქროთ.

[ძელქვა ჩაიქვევა, თანდათან ნაკვერცხლებმა. ხალხი სიხარუ-  
ლის ყრიაშულს ატებს.]

ხალიბა. იცეკვე, მზეონა, გეხვეწები, იცეკვე!

მზეონა. ავთო-ბიჭო, ვიცეკვოთ!

ავთო. ვიცეკვოთ, ქალო მზეონა, ვიცეკვოთ!

[იწყებენ ცეკვას. ყველანი იღებენ ნაკვერცხლებს და ნაკვერცხ-  
ლებიან ჯამბოთ ცეკვავენ. შემდეგ ავთო-ბიჭი და მზეონა გამოდი-  
ან. მათი ცეკვა ძალიან ჰგავს ცეკვა ქართულს.]

დარისპანი [კოჭლობით მორბის). სალახანებო, ვინ მოგვათ ეს  
ცეცხლი! (ყველა შეშინდება, ყველანი გაშეშდებიან.)

ავთო. შენ რა გესაქმება?

დარისპანი. ვინ მოგვათ-მეთქი?

მზეონა. ამირანმა, ამირან დევკაცმა.

დარისპანი. სულელი, გიჟი, სალახანა.

ხალხი. დიდ არს ამირან, დიდ არს!

დარისპანი. სულელები, გიჟები, ცეცხლი რად გინდათ?

დუნიადარი. ვიყინებით. სიცივემ ძვალ-რბილში გაატანა.  
ხომ ხედავ, ვიხოცებით!

დარისპანი. იხოცებით? მერედა, რა მოხდება ამით. თქვენ  
თუ დაიხოცეთ, ხვალ მზე აღარ ამოვა?

დუნიადარი. ენა გაგიხმეს, ბოროტო კაცო! ბავშვებიც  
კი არ გეცოდება.

დარისპანი. დღეს ერთი მოკვდება, ხვალ ორი დაიბადება.

მ ზ ე ო ნ ა. შენისთანა გულქვა კაცი რომ არ დაიბადებოდეს,  
ისა სჯობია!

დ ა რ ი ს პ ა ნ ი. ცეცხლი ამირანმა მოგიტანათ, ხომ?

ხ ა ლ ი ბ ა. ჩვენ თვითონ ვიშოვეთ, ცეცხლის მთაზე ვიყავით.

დ ა რ ი ს პ ა ნ ი. უყურეთ ერთი ამ ქიალუას! შენ ვინ ავიყვან-  
და ცეცხლის მთაზე?

მ ზ ე ო ნ ა. ამირანმა თავისი მხრით აიყვანა.

დ ა რ ი ს პ ა ნ ი. ხომ ვთქვი, ეს მისი ოინია-მეთქი, ახლავე ჩა-  
აქრეთ.

დ უ ნ ი ა დ ა რ ი. ენა გაგიხმეს მაგ სიტყვისათვის, წყეულო  
ადამიანო!

დ ა რ ი ს პ ა ნ ი. შენთვისაც მოვიცილი, ენატარტალავ!

ა ვ თ ო. ენა ჩაიგდე, ბოროტების გულდავ!

ხ ა ლ ი ბ ა. ვინ გაბედავს ცეცხლის ჩაქრობას?

დ ა რ ი ს პ ა ნ ი. მე ვბრძანებ, აბა, გაბედეთ წინააღმდეგობა?!

მ ზ ე ო ნ ა. შენ ვინ ხარ, ჩვენთან რა ხელი გაქვს?

დ ა რ ი ს პ ა ნ ი. სულელო, ვინა ხარო? ვინა და ქვეყნის რჩე-  
ული ვარ, ცეცხლი ჩემისთანა ადამიანებს სჭირდებათ.

დ უ ნ ი ა დ ა რ ი. ვითომდა რაღაო, შენ უნდა გათბე და ჩვენა  
ბავშვები დაიყინონ?

დ ა რ ი ს პ ა ნ ი. მე დავიბადე ადამიანების მეთაურად, ცეცხ-  
ლიც მე უნდა მქონდეს. ვისაც მინდა, მას მივცემ .

დ უ ნ ი ა დ ა რ ი. ერთი თვალი მოთხრილი გაქვს, მეორეს კი  
ამ მუგუზლით ამოგწვავ, ამოგშანთავ, ბოროტო კაცო!  
ცეცხლი ერთ წუთს დაგფერფლავს, ხომ იცი, ქვასაც კი  
აღნობს.

დ ა რ ი ს პ ა ნ ი (შეშინდება). არ მომეკარო, წყეულო, მე შენ  
გაჩვენებ მუგუზალს!

ხ ა ლ ი ბ ა. ამირანმა თქვა, დარისპანი ბოროტებაა, ქვეყნის  
გაჟლეტაზე უკან არ დაიხვესო.

დ ა რ ი ს პ ა ნ ი. ქვეყანა იმდენია საჭირო, რამდენიც მე გამო-  
მადგება, თორემ ისე რა აზრი აქვს ჩემთვის ქვეყნის არ-  
სებობას.

მ ზ ე ო ნ ა. სწორედ ამიტომ ხარ ბოროტი.

დ ა რ ი ს პ ა ნ ი. ახალი ამბავი თქვი შენც. ვინ დაამტკიცა სი-  
კეთე სჯობია ბოროტებასო?

ხ ა ლ ი ბ ა. რას ამბობ, დარისპან? არა გრცხვენია?  
 დ ა რ ი ს პ ა ნ ი. რა არის, ზიკო, სირცხვილი? მომეცი ერთი  
 მუგუზალი, მე მოვუვლი ამ ცეცხლს კარგად.  
 ა ვ თ ო. არ მისცე, ხალიბა, ქვეყანას გადაწვავს!  
 ხ ა ლ ი ბ ა. ამირანმა თქვა, ცეცხლი ყველას მიეციო, ცოდვა  
 არიან, გათბებიანო.  
 მ ზ ე ო ნ ა. დაგვლუპავს, ბიკო, ეს ბოროტი კაცი.  
 დ უ ნ ი ა დ ა რ ი (ავთოს, ჩუმაღ). წაიღოს, იქნებ გაჩუმდეს და  
 სიკეთის გზას დაადგეს.  
 დ ა რ ი ს პ ა ნ ი. მომეცი, მე ვიცი, რასაც ვიზამ.  
 ა ვ თ ო. არ მისცე, არ დაგვლუპო!  
 ხ ა ლ ი ბ ა. (თვალს ჩაუკრავს ავთოს). მე ამირანის სიტყვას ვერ  
 გავტეხ, პა, წაილე!  
 დ ა რ ი ს პ ა ნ ი (მუგუზალს ხელს წააულებს, დაეწევა და აყვირდება).  
 ვაიმე, მომკლეს, მომკლეს!  
 ხ ა ლ ი ბ ა. ვინ გითხრა ხელი წააუღეო, დაგწვა, ხელი დაგი-  
 თუთქა. ხომ ხედავ, ბოროტ ადამიანებს ერჩის. ჩვენ კი  
 მოთვინიერებული გვყავს. შენ არ მოგყვება, იცის, ცუ-  
 დი გიღვეს გულში.  
 დ ა რ ი ს პ ა ნ ი. დაწყევლილი ხართ, დაწყევლილი! მაცალეთ,  
 მე მაინც ჩავიგდებ მაგას ხელში და მაშინ ნახავთ, მაშინ  
 ნახავთ, ნახავთ!

### მეოთხე სურათი

მღინარის ნაპირი. ნაპირზე ხარის ტყეის კარვები. პატარა  
 ბიჭები უში ზორცის ხაკრებს ღეპავენ, ძვლებს ხრავენ,  
 მშვილდ-ისარს რაღაცას უმიზნებენ. ეს უცხო ტომია, რომე-  
 ლიც დარისპანს ჩამოუყვანია. გამოჩნდება დარისპანი. ბავშ-  
 ვები დაიკვილებენ. კარვებიდან ხალხი გამოეფინება. წინ გა-  
 მოდის მეთაური.

დ ა რ ი ს პ ა ნ ი. აჰა, გვეშველა, მოვიტანეთ ცეცხლი. (ქოთნიდან  
 კვამლი ამოდის.) ეშმაკობა და ბრძოლა კი დამჭირდა. თვი-  
 თონ ამირანს გამოვგლიჯე ხელიდან.  
 მ ე თ ა უ რ ი. შენ რას წაართმევდი, თვითონ მოგცემდა. გუშინ  
 აქეთ ჩამოიარა და შევეცოდეთ, ბავშვები შეეცოდა.

- დ ა რ ი ს პ ა ნ ი. აქეთ იყო?! აი ბეჩაო! როგორ თავისუფლად დასეირნობს?!  
 მ ე თ ა უ რ ი. გავვიწყრა, რად წამოყევით დარისპანსო. შენზე თქვა, ცული კაცია, ხომ ხედავთ, მოგატყუათ, სიცივით დაგყინათო.  
 დ ა რ ი ს პ ა ნ ი. გაჩუმდი! აი ცეცხლი მოგიტანეთ. გინახავთ ცეცხლი?  
 მ ე თ ა უ რ ი. არა, არ მინახავს. (ბავშვები და ქალები შეჩვილებიან ქოთნის გარშემო.)  
 დ ა რ ი ს პ ა ნ ი. ეს ადამიანის ბედნიერებაა. გათბებით, სიცივეს ველარ იგრძნობთ. წელში გაიმართებით, კმუნვა მოგშორდებათ.  
 მ ე თ ა უ რ ი. გვაჩვენე, რალას უცდი. რაც ამ მხარეს მოგვიყვანე, ბავშვები სიცივით გვეხოცებიან.  
 დ ა რ ი ს პ ა ნ ი. საჭმელი ხომ ბლომად გაქვთ. ტყეში ნადირი უთვალავია, წყალში თევზს ვერ ამოლევთ, მინდორი და ტყე ხილითაა სავსე, მუცლები ხომ ამოიყორეთ. ასეთი მდიდარი მხარე გინახავთ?  
 მ ე თ ა უ რ ი. მუცლები კი, მაგრამ სიცოვე, სიცივე! თევზი და ხორცი იმ მხარეში ცხელი მზის ქვეშ მალე ხმებოდა, ინახებოდა, აქ კი ყოველდღე უნდა ინადირო.  
 დ ა რ ი ს პ ა ნ ი. გეყოფა წუწუნი, ვინ აგირჩია მეთაურად ასეთი ენატარტალა. სწრაფად, ხმელი ხის ტოტები მომირბენინეთ.  
 (ბავშვები და ზოგიერთი მოზრდილი გაიქცევიან. ხმელი ხის ტოტები და ჩინჩხვარი მოაქვთ.)  
 მ ე თ ა უ რ ი. აბა, გვაჩვენე ერთი, დაანთე, დარისპან. შენ რაც თქვი, თუ ის გამართლდა, მეთაური დღეიდან შენ იქნები.  
 დ ა რ ი ს პ ა ნ ი. ვიქნები კიდევ. თქვენნი კი არა, ქვეყნის მეთაური და პატრონიც გავხდები.  
 მ ე თ ა უ რ ი. ქვეყნის მეთაური ვერ გახდები. ამირანი ნამდვილი კეთილი დევკაცია, არ დაგანებებს.  
 დ ა რ ი ს პ ა ნ ი. უყურეთ ერთი ამ კუზიანს, ამირანი მოსწონებია! მე შენ გიჩვენებ ამირანს! (ცეცხლს ანთებს. ხალხი გაოცებით ეხვევა, საამოვნებით ეფიცებიან.)  
 მ ე თ ა უ რ ი. მართლაც სასწაული ყოფილა. (ცეცხლთან თბება.)

- დ ა რ ი ს პ ა ნ ი. ახლოს მიიწი, თუ გინდა, ხელიც შეახე. აი იმ ნაკვერცხალს ოდნავ მიაჯარე თითი.
- მ ე თ ა უ რ ი. ვითომ რა, მაშინებ? შენ ხომ გეჭირა ხელში? (დააიწყდება, რომ ცეცხლი ჭოთანში იყო.)
- დ ა რ ი ს პ ა ნ ი. მე სხვა ვარ, შენ სხვა. ჩემთან მოთვინიერებულა, არ მერჩის. შენ კი შეგჭამს.
- მ ე თ ა უ რ ი. ამირანი ხომ არ შეჭამა, ამირანის ხალხი ხომ არ შეჭამა? ვითომ ჩემგან რა უნდა?
- დ ა რ ი ს პ ა ნ ი (აძალებს). სინჯე, ხელი მოჰკიდე, მაშინ ნახავ. მ ე თ ა უ რ ი (ხელს წააუღებს ნაკვერცხალს და აყვირებს). ვაიმე, ეშმაკის გაჩენილი ყოფილა. ხალხო, არ მიეკაროთ! (ყველანი უკან მიაწყდებიან.)
- დ ა რ ი ს პ ა ნ ი. ხა, ხა, ხა. აი ხომ გითხარით! მაშ რა გეგონათ! ჩემს ხელში ძაღლივითაა მოთვინიერებული, თვალებში მიყურებს, რასაც ვუბრძანებ, იმას გააკეთებს.
- მ ე თ ა უ რ ი. აბა, მოკიდე ხელი, თუ არ გეტყვინება.
- დ ა რ ი ს პ ა ნ ი. ხელსაც მოვკიდებ და ჩავაქრობ კიდევც.
- მ ე თ ა უ რ ი. ნუ ცხარობ, მე ხელის ტკივილი ახლაც მკლავს.
- დ ა რ ი ს პ ა ნ ი. აი ნახეთ. (ჩუმად წყალში ჩაყოფს ხელს და სველი ხელით მუგუზს ეხება. ყველანი გაოცდებიან. მერე მუგუზს წყალში ამოაუღებს. ისიც დაიშინებებს და ჩაქრება.) ხედავთ? აბა, მოკიდე ხელი.
- მ ე თ ა უ რ ი. არ მატყენს?!
- დ ა რ ი ს პ ა ნ ი. გეუბნები, ხელი მოკიდე, არ გატყენს.
- მ ე თ ა უ რ ი (შიშით მოკიდებს ხელს. მერე ეჩვევა და გაბედულად ხელში აიღებს). გაშავებულა კი... (აყვირდება.)
- დ ა რ ი ს პ ა ნ ი. ჰო, დანახშირებულია. ნახშირის გაღვივება კი ისევ შეიძლება. ცეცხლზე ლითონის გადადნობასაც ახერხებენ.
- მ ე თ ა უ რ ი. აი, ეს მითხრა ამირანმა, ცეცხლზე ლითონის გადნობას ვასწავლიო. ისიც თქვა, ნაკვერცხლებზე ხორცი თუ შეიწვება, რბილი ხდებაო, პურიც ცხვება თურმე.
- დ ა რ ი ს პ ა ნ ი (დაცინვით). ამირანს უნდა შენ სულ მთლად ცეცხლზე დაიწვა, დაიფერფლო. იცოდე, უჩემოდ ახლო არ მიეკარო. ხომ ნახე, რა გიქნა!
- მ ე თ ა უ რ ი (შიშით). კარგი, უშენოდ ახლო არ მივეკარები.

და რ ის პ ა ნ ი. მე კი ამ ცეცხლს გამოვიყენებ, ყველაფერს გასწავლით, მხოლოდ იცოდეთ — ჩემი უნებური არ გაბედოთ. რასაც მე გიბრძანებთ, ის უნდა აკეთოთ.

მ ე თ ა უ რ ი. გემორჩილებით, მხოლოდ ბავშვებს ცეცხლი არ მოაკლო.

და რ ის პ ა ნ ი. არ მოვაკლებ, აბა, კიდევ შევუკეთოთ ხმელი შეშა, კიდევ. (უკეთებს. ოლი ამაღლდება. ბავშვებს შეუღახებს.) აბა, აქეთ მოდით, ნუ გეშინიან, სადაც მე ვარ, იქ თქვენ შიში ნუ გაქვთ. (ყველანი ცეცხლს მიეფიცებიან.)

მ ე თ ა უ რ ი. მართლაც ბედნიერებაა. ახლა საკრავები მოიტანეთ, ერთი ძველებურად გავემხიარულდეთ.

და რ ის პ ა ნ ი. მაშინ ჩემი ქოხიდან ყურძნის წვენიც გამოიტანეთ. დავლიოთ, გაგვამხიარულებს.

მ ე თ ა უ რ ი. ჰო, ჰო, ჰო! ეს კი სულ მთლად გაგვახარებს (თვითონ გაიქცევა, ხის კურკლით ღვინო გამოაქვს. ყველანი ჯამებით სვამენ. შეხურდებიან. ველური მუსიკა უკრავს. ისინი ცეცხლის ალზე ცეკვავენ.)

და რ ის პ ა ნ ი. ასეა, თქვენ ჩემი დაიჭერეთ და სიმხიარულეს არ მოგაკლებთ. ქვეყნის პატრონი კი მე უნდა გავხდე. მხოლოდ მე!

### მეხუთე სურათი

ფერდობზე ტყეა შეფენილი. ხის კენწეროებზე ვაზის მსხმოიარე ტოტებია გაბარდნილი. შიგადაშიგ მუხებთან ერთად ველური ვაშლის, თხმელის, მსხლისა და წიფლის ხეები მოჩანს. აქა-იქ გარეული ფუტკრის ოჯახი შესევია ხის ტოტებს. ხალიბა ხის ერთ ტოტზე ზის და ყურძენს კრეფს. ხელში წნელის გიდელი უკავია.

ხ ა ლ ი ბ ა (მღერის). ასეთი ტკბილი ყურძენი ჯერ არ მოწიკრეთია. ამირანი ამბობს, წლეულს ბევრი მზე იყო და მისი ბრალიაო. (კუმპლებს დამარცვლავს და პირში ჩაიყრის.) ოჰ, ოჰ, თათლზე უფრო ტკბილია. (შორს ტოტების მტრევის ხმა ისმის.) ვიდაც დააბოტებს, დარისპანი არ იყოს. (დაჰყურებს.) ორნი არიან, ერთის ფეხის ხმა რბილია, მსუბუქი. მაშასადამე,

მზეონას ფეხის ხმაა, მეორე აეთოა. აქეთ მოდიან მოდო-  
ერთი დაეფეთო! (შიყუეება ხის ტოტზე.)

ავთო (შემოდის, მზეონა მოსდევს). ამ ადგილებში დიდძალი ყურ-  
ძენი იცის. წელს ფუტკარიც მოძალდა. ხედავ, თაფლი  
როგორ ნაკადულივით გადმოჩქედს?

მზეონა. ძალიან მიყვარს ყურძენი და თაფლი.

ავთო. წელს ყურძნის წვენი უნდა დავწუროთ. კარგია, ადა-  
მიანს ძალას მატებს და სიხარულსაც.

მზეონა. პირველად ტკილია, გემრიელია, მერე, როცა დაძ-  
ველდება, თავს მიბრუებს.

ავთო. ბევრი არ უნდა დალიო. ერთი პატარა ხაპი კი სიამოვ-  
ნებას მოგანიჭებს.

მზეონა. შეხედე, როგორ დამქანარა მტევნები, ფუტკარი  
დასევია.

ავთო. დედაჩემის მოსვლამდე დავკრიფოთ. (უცებ ხიდან ვაზის  
მტევნებით სავსე ლერწი ჩამოწყდება და შათ წინ დაეცემა. მზეონა  
შეჰკივლებს. აეთო სატევარზე გაივლებს ხელს.) აბა, გამოდი, ვინ  
ბრძანდები?!

ხალიბა. დამნებდი, ვაჟაკო!

ავთო. შე მართლა გიყო!

მზეონა. ხალიბა, ხალიბა! შენი ჰირიმე, ჩემო ძმაო!

ხალიბა. ამას კი... (ავთოზე მიუთითებს.) ეწყინა ჩემი აქ შეხ-  
ველრა.

ავთო. გულები გადაგვიბრუნე, უცხო მეგონე, წუთი და სა-  
ტევარს გატაკებდი.

ხალიბა. დარისპანს ყურძნის წვენი დაუწურავს.

ავთო. ჩვენგან გადაიღებდა, ალბათ, გვითვალთვალებდა.  
კაცი კი არა, ქაჩია.

მზეონა. თუ დათვრა, იმ წუთში ჩემს ძებნას დაიწყებს.

ხალიბა. გუშინ უცხოელები დაუთვრია, ღრიალით ქვეყანას  
იღებდნენ.

ავთო. ამირანს უთხარი? თუ გაათრთხილე?!

ხალიბა. არა, არ მითქვამს, არც ვეტყვი.

მზეონა. მართალი ხარ. ამირანს მისი ხსენებაც კი ეზარება.

ავთო. დარისპანს სულ არ ეშინია ამირანის.



- ხ ა ლ ი ბ ა. იცის, არ ავნებს. ამირანი ხომ სასიკვდილოდ კაცს ვერ გაიმეტებს.
- მ ზ ე ო ნ ა. დარისპანი კი ყველას სიამოვნებით დაგვლადრავს ყელს.
- ხ ა ლ ი ბ ა (ჩაფიქრებული). ადამიანის სიკვდილი ჯერ არც მინახავს.
- ა ვ თ ო. მამის სიკვდილს რა დამავიწყებს. მდინარიდან ამოყვანილი თევზივით სუნთქავდა სიკვდილის ჟამს.
- მ ზ ე ო ნ ა. დედაჩემი კი მოწყვეტილი ყვაილივით ჰკენებოდა ნელ-ნელა.
- ხ ა ლ ი ბ ა. ტყუილია, ადამიანი ადამიანს ვერასდროს მოკლავს.
- მ ზ ე ო ნ ა. დარისპანმა დაიფიცა, თუ არ დამემორჩილებით, დაგხოცავთო.
- ა ვ თ ო. დედაჩემს მართალი ჰგონია.
- ხ ა ლ ი ბ ა. დარისპანი გვაშინებს, ადამიანების დამონება მოისურვა.
- მ ზ ე ო ნ ა. ცეცხლი მოუტანია, მოუპარავს.
- ა ვ თ ო. ო, ეგ ცუდი ამბავია.
- ხ ა ლ ი ბ ა. თუ იცით, ჩვენმა ლითონმა ცეცხლი რომ დაბადა?
- მ ზ ე ო ნ ა. ვერ გავიგე, ხალიბა, რას ამბობ?
- ა ვ თ ო. ხალიბამ ყოველდღე ახალ-ახალი რამე უნდა მოიგონოს.
- ხ ა ლ ი ბ ა (მიდის კაიანი კლდის ცხირთან). აი, ნახეთ! (ლითონია ნაპერს შემოკრავს, ნაპერწკლები დასცივია.) ხომ ნახეთ, კალიებივით დაფრინავენ ნაპერწკლები. ამ ლითონისა და კაქის შეჯახება ნაპერწკლებს ბადებს.
- ა ვ თ ო. ეს კი საოცარია, ამირანს არც ეს უთხარით?
- ხ ა ლ ი ბ ა. ამირანმა თვითონ მასწავლა.
- მ ზ ე ო ნ ა. აბა, აწი ცეცხლი აღარ ჩაგვიქრება.
- ხ ა ლ ი ბ ა. თუთის სოკო მდულარეში მოვხარაშეთ, ისე გაფუფუნდა, მზეონას თმებივით რბილი და ბეწვიანი გახდა.
- ა ვ თ ო. სოკო რა ეშმაკად გინდათ?
- ხ ა ლ ი ბ ა. იმ ლითონის ნაპერწკალს იტაცებს, ორჯერ თვალის დახუჭვაში ვეება ნაკვერცხალი გაჩნდება.
- მ ზ ე ო ნ ა (მოგზევა). ჩემო ხალიბა, შენისთანა ძმა არავისა ჰყავს; რომ გაიზრდები, ამირანს დაემსგავსები.

ხ ა ლ ი ბ ა. სისულელეს ნუ ამბობ, ამირანი ღმერთების მეგობარია.

მ ზ ე ო ნ ა. მეგობარია თუ მტერი?!

ა ვ თ ო. ღმერთების ტოლია. ამირანმა მტრობა არ იცის.

მ ზ ე ო ნ ა. ხალობა, შენი ჭირიმე, ერთი კიდეც დაკვესე.

ა ვ თ ო. ისიც გვაჩვენე, სოკო როგორ იტაცებს ნაპერწკალს.

ხ ა ლ ი ბ ა (ამოიღებს ტყავში გახვეულ აბედს, გაწეწავს და კლდის ცხვირს ლითონს დაჰკრავს). აი ნახეთ, დააკვირდით! (ცოტა ხნის შემდეგ აბედს მოეკიდება.)

მ ზ ე ო ნ ა. ნაპერწკალს წვიმის არ ეშინია?

ხ ა ლ ი ბ ა. ამის ნაპერწკალს არ ეშინია. აბედი კი, როცა სველდება ბწყალი არ ეკიდება.

ა ვ თ ო. წყალი უფრო ძლიერია ცეცხლზე. თვალის დახამხამებაში კლავს, აქრობს.

ხ ა ლ ი ბ ა. ამირანმა თქვა, დიდ ცეცხლს წყლის ამოშრობაც შეუძლიაო.

მ ზ ე ო ნ ა (მზეს გახედავს). აი, ცეცხლი იმას ექნება.

ა ვ თ ო. წვიმა, ალბათ, ვერ მოერევა მზეს, თორემ ამდენ ხანს ჩაქრებოდა.

ხ ა ლ ი ბ ა. ამირანმა ისიც თქვა, წვიმა მზის ქვემოთ ჩნდება, მზე ძალზე შორს არისო.

მ ზ ე ო ნ ა. მე კი მეგონა, წვიმა მზის მაგრილებელი იყო.

ა ვ თ ო. მზეონას თოვლი ვარსკვლავეთის თეთრ ყვავილთა ფურცლები ეგონა.

ხ ა ლ ი ბ ა. ხვალ ამირანი ჩამოივლის აქეთ.

მ ზ ე ო ნ ა. კარგ ამბავს ყოველთვის ბოლოს იტყვის ხალიბაბიკი.

ა ვ თ ო. დედას უნდა ვუთხრა, ხშიადს გამოაცხობს.

ხ ა ლ ი ბ ა. ახალი ჭურები უნდა დავრეცხოთ, შარშანდელი წვენი გადავიღოთ.

მ ზ ე ო ნ ა. ჭაშნიკს ჩვენც გავსინჯავთ, ხომ? -

ა ვ თ ო. ჩემი ჭური, აი, იმ პანტის ძირში ჩავფალი, მხოლოდ ქორწილის დღეს მოვხდი.

ხ ა ლ ი ბ ა. მალე საკლავისათვის ხარები უნდა ჩამოვდნოთ.

მ ზ ე ო ნ ა. ამირანიც გვაჩქარებს, ბარემ იქორწინეთო.

ხ ა ლ ი ბ ა. ამირანის მეგობარს ღარისპანისა გეშინია?!

მ ზ ე თ ნ ა. იცი, მე როგორ მოვირთვები? (ფიქრში შესული ხის დაბალ ტოტზე შეხტება.) სულ ყვეაილებით მოვირთვები, თავზე გვირგვინს დავიდგამ. აი ასეთს... (ყრფის ყვეაილებს და გვირგვინს აკეთებს, თავზე იდგამს.) ავთოს წელზე ლითონის სატევიარი ექნება შემორტყმული. ტანზე ვეფხის ტყავის სამოსს ჩავაცმევ. ორივე ხელში წაბლის ნაყოფით საესე რტოებს დავიჭერთ. სანთიობო სახლში შესვლის წინ რტოს სამჭერ დავკრავთ აივნის რიკულს. ნაყოფი ნაყოფიერებისა დაცვივა. დედა დუნიადარი იტყვის, ამდენი ვაგი, ამდენი ქალიო. „ამინ“! დაიბუხუნებს ამირანი და ხალხიც დაადასტურებს მის სიტყვებს. ასი სული ხარი დაიკვლება, სამასი ცხვრის ტყავი გაიკიდება მზეზე გასაშრობად. თორმეტი ვაჟიშვილი უნდა მყავდეს და ცხრა ასული. მერმე დრო გავა, შვილიშვილები დაგვესევა, ოჯახი გამრავლდება...

ხ ა ლ ი ბ ა. არა გრცხვენია! მე სულ დაგავიწყდი. ერთხელაც არ მახსენე.

მ ზ ე თ ნ ა (შეკრება). კი, შენ ჩვენი ხელისმომკიდე იქნები. (ისევ ჩაფიქრდება.)

ა ვ თ ო. ჩემი ძმა იქნები. სუფრის თავში ამირანი დაჯდება, შუაში ჩვენ ვისხდებით, მეორე თავში შენ, ხალიბა.

(ამ დროს ხეებში გამოჩნდება დარისპანი. ყელგამოლადრულ შველი გადაუკიდია მხარზე. უკან უცხოელები მოყვებიან. წინ მეთაური მოუძღვება. ეტყობათ, ძალზე ნასვამები არიან.)

მ ზ ე თ ნ ა. ვაიმე, დარისპანი!

დ ა რ ი ს პ ა ნ ი (გაიგონა ავთოს ბოლო სიტყვები). ჩემთვის სუფრაზე ადგილი არც კი დატოვეთ, ხომ?!  
მ ზ ე თ ნ ა. ავთო, ჩვენი საქორწილო ღვინო დაუღევიათ!

მ ზ ე თ ნ ა. ავთო, ჩვენი საქორწილო ღვინო დაუღევიათ!

ა ვ თ ო (გააფთრებული). უსინდისო, ეს როგორ გაბედღე?

დ ა რ ი ს პ ა ნ ი (ბანძალებს). უსინდისოები თქვენ ხართ, საწამლავი დამალევინეთ. ოპ, თავი მიბრუის. ყველაფერი ორად მეჩვენება. მაინც კარგია ეს ქვეყანა. ეტყობა, ყველაფერი ადამიანისთვის არის გაჩენილი. უნდა გამოიყენო, უნდა დაიმორჩილო, უნდა დაიმონო. (მტევანს აიღებს.) ვინ იფიქ-

რებდა, ასე წვრილ კუმპლებს ასეთი სიტყბო და ძალა ექნებოდა?!

მეთაური (ღარისპანზე უჩვენებს). ამ კაცმა შეგვეჭამა, ძვალისგან გახრა და სულიც.

ხალიბა. ღვინომ ალაპარაკა. ეტყობა, ყურძნის წვენს ეს ერთი კარგი თვისება ჰქონია, ადამიანს მართალ სიტყვას ათქმევინებს.

ღარისპანი (ვერ მიხვდა მეთაურის ნათქვამს. ისევ თავისას განაგრძობს). კი, ყველაფერი ადამიანისაა, თვითონ ადამიანებიც — ძლიერი ადამიანისაა. ბრბოს საბელი ჩააბი ყელში და საითაც გინდა, იქით წაიყვან. ჰე, ჰე, ჰე! კარგი წვენი დაუწურავს აეთო-ბიკს. საქორწილოდ მინდაო. არა, ერთი ჰკითხეთ, ვიზე აპირებს ქორწინებას. სიკვდილის ანგელოზზე? (შეუბრავს.) მე შენ დაგაქორწინებ! ისეთ დღეს დაგაყრიტ ყველას, ქორწილს პანაშვილად გადაგიქცევთ. უყურე შენ, ქორწილიო! ჰე, ჰე, მეცინება, თითქოს ილიაში მიდიტინებენ. არა, რა ყოფილა ეს ყურძნის წვენი? (შეველს დააგდებს.) მზეონა, ეს შენთვის მოკვალი.

მეთაური (აღელვებულია). აკი ამბობდი, შევწვათ და ყველამ ვქამოთო. ახლა მზეონას უნდა მიართვა, არა?! ცუდი კაცი ხარ, სულ შენკენ მიითლი ყველაფერს, ჩვენი არაფერი გწამს.

ღარისპანი (ისევ თავის ფიქრშია). სადამოთი ცაზე ვარსკვლავები აინთებიან, ისინი მთვარის ახლოს უფრო ფერმკრთალად კიაფობენ. ასეა ადამიანიც. ძლიერი კაცის გვერდით სუსტი ადამიანები უფერულნი ჩანან. აბა, ილხინეთ, იცეკვეთ, იმხიარულეთ. (უცხო ხალხი ცეკვას იწყებს, ძალზე მთვრალეები არიან, ღობე-ყორეს ედებიან, ზანცალებენ, ყვირიან, კივიან, გიჟებსა ჰვანან.)

ხალიბა. ყურძნის წვენს გაგიჟება სკოდნია, ეტყობა, არ დაილევა.

ავთო. ყურძნის წვენს ზომიერება ჰყვარებია.

მზეონა. თათლიც ასეა, ბევრი მწყენს, გულს მირევს.

მეთაური (ღარისპანს). მე გეკითხები, მთელ ქვეყანას აბუჩად რომ იგდებ, ვინა ხარ-მეთქი შენ? ერთი რომ მკლავებში მომხვდეს, წნელივით დაგგრებს, დაგფშენი.

დარისპანი. რას ბურტყუნებ შენ, რაებს როშავ?  
მეთაური. მე კი არა, შენ როშავ. სამყაროს პატრონი გგონია შენი თავი.

ხალიბა. გავშორდეთ ამათ. ესენი კარგს არ იზამენ.  
დუნიადარი (შემოვარდება). სადა ხართ, ნახეთ ჩვენი ქურები რომ ამოუსვრებიანთ?!

ავთო. რა უნდა ვიღონოთ, ქურდობა იკადრა.  
დუნიადარი (დარისპანს). ბოროტების ფესვო, ეს რა მიყავი? წლის ნაშრომი წაგვართვი. სისხლად დაგდინდეს!

დარისპანი. აი ასე შოვიქცევ ქვეყანას მუქში. თქვენ ყველანი ჩემი მონები იქნებით, ამირანიც. არა, ამირანს დაეჭავ, იალბუზის ქვეშ მივაბამ სამუდამოდ. დაე, უყუროს თავის კეთილ აღამიანებს, თუ როგორ დახოცავენ ერთმანეთს მისი მიცემული ცეცხლით, როგორ ჩასცემენ ერთმანეთს გულში ცეცხლში ნაწრთობ სატევრებს. აბრიალდება ხანძრები, დაიწვება სახლები, სოფლები, დაიფერფლებიან აღამიანები.

მეთაური (დარისპანთან მიღის). შენ მე პასუხის გაცემის ღირსადაც არ მთვლი?

დარისპანი (სატევაზე ხელს წაივლებს). ჯერ თქვენ ეს არ გინახავთ, ნახეთ! (ხის ვეება ტოტს მოუქნევს. ტოტი მოსხიბება და ჩამოვარდება. ყველას გაოცებისაგან ოხვრა აღმოხდება.)

მეთაური. ნუ მაშინებ. ჩემი ხელებით მოგახრჩობი (მიიწევს.)  
დუნიადარი (თავისიანებს). აქედან წავიდეთ. აქ ბოროტება დღეს.

დარისპანი (მეთაურს). აბა, მოდი, ახლოს მოდი. ორაგულივით გაგფატრავ!

მეთაური. მე გეუბნები, არ მეშინია შენი. აბა, ჩემიანებო, ერთი ამას ჩვენებურად კომბლებით შოვეფეროთ, აი, მხეცებს რომ ვეფერებით, ისე.

(მთვრალეები აბლავლებიან და მანქვა-გრეხით დარისპანისკენ მიიწევენ.)

ხალიბა. დაწყნარდი, დარისპან, ჩხუბი და დავა, აბა, და საკადრისია?

დარისპანი. წინ წამოდექით, რომელია ვაჟკაცი?!

მეთაური (კომლით ხელში). თავს გაგიხეთქავ, გაჩვენებ. როგორ უნდა ხალხის მოტყუება.

დარისპანი. სიკვდილი მოგენატრათ? ეს ქვის ხომ არ გგონია შენ? (სატევარს უჩვენებს.)

მეთაური. თავს გაგიჩეჩქვავ!

(ხალხი ღრიალით შემოერთყმება გარს დარისპანს.)

დარისპანი. მოდი-მეთქი, მოდი! (მეთაური წინ წაიწევს და დარისპანს კომბალს მოუქნევს. დარისპანი სატევარს გადაუსვამს თითებზე, თითები გადაიჭრება, სისხლი თქრიალით მოდის.)

მეთაური (გამოფხიზლდება). მკლავი მომჭრა ამ უნდო კაცმა.

დარისპანი. აბა, რა გეგონა. აბა, ვინ მოდის კიდევ!

(ყველანი გარბიან.)

დუნიადარი. ეს კაცი არავის არ დაინდობს. შეხედე, რა ბოროტად უელავს თვალები!

ხალიბა (გაოცებული უყურებს სისხლს). წითელია, აი რანაირი სითხე ჰქონია ადამიანს! (ავთოს.) მოკვდება ეს საწყალი!

ავთო. ვინ იცის, მე ჯერ ასეთი არაფერი მინახავს.

მზეონა (ჯანჯალებს. დარისპანს). ეს რა ჰქენ, შე უბედურო?!

დუნიადარი. ადამიანებო, მე დედა ვარ და სისხლის დაღვრის მეშინია. (მეთაურს.) ვაი, შენს დედას, უბედურო!

დარისპანი. ვინც არ დამნებდება, ასეთი დღე მოელის.

მზეონა. საზიზლარი ხარ, საზიზლარი!

დუნიადარი (ტირილით). ვაიმე, სისხლი! ნახეთ, როგორი წითელი ფერის ყოფილა. ვაი დედაკაცის ბედს, ამიერიდან ჩვენს შვილებს ფათერაკი არ ასცდებათ.

## მეამხმარე სურათი

მთები და ტყე. ტყის პირს ფერდობზე სამკვდლო ქურა მოხანს. ისმის შეძახილები და სიმღერა.

ხალიბა. ხვალ დილით ზევით ამოვივლიო, ამირანმა დამაბარა.

ხალხი. იდიდოს მისი კაცობა!

ავთო. წყვილი ხარბი უღელში გაუხედნავს. რკინის გუთნის

წვერი ღრმა ხნულს გააელებს, ხარები კარგად, მჩატედ  
გასწევენო. (აეთო საშველოში შედის და მუშებს ეხმარება.)

ხ ა ლ ბ ი. იდიდოს ჩვენი ამირანი, იდიდოს მისი სახელი!

ხ ა ლ ბ ა. დარისპანი აღარ ჩანს. ამბობენ, თავისი მომხრეები  
გაუმრავლებია. უცხო მხრიდანაც ბევრი მოუყვანია თურ-  
მე. მგონი, ცეცხლი მოუპარავს.

მ ზ ე ო ნ ა. მეუბნება, აეთოს თავი დაანებე, ჩემთან წამოდიო.

ხ ა ლ ბ ა. რა თქვი, მზეონა?!

მ ზ ე ო ნ ა. კი, ასე შემომითვალა, თვითონაც მითხრა პირში.

ხ ა ლ ბ ა. შენ რა უპასუხე?

მ ზ ე ო ნ ა. მანამ ის ცალი თვალი დაგიდგება-მეთქი.

ხ ა ლ ბ ა. ჰაი, ჰაი, კარგად გიპასუხნია.

მ ზ ე ო ნ ა. დედოფლად გამოგაცხადებ, მალე ქვეყნის ბატონ-  
პატრონი ვიქნებიო.

ხ ა ლ ბ ა. რა ვიქნებიო?!

მ ზ ე ო ნ ა. ხომ გითხარი, მეფე ვიქნები, ქვეყნიერება მე დამე-  
მორჩილებო.

ხ ა ლ ბ ა. სხვა რა თქვა კიდევ?

მ ზ ე ო ნ ა. ამირანს დავჯაჰვავ, იალბუზის ფესვზე მივაბამო.

დ უ ნ ი ა დ ა რ ი (გამოდის ქოხიდან, ყური მოჰკრა ნათქვამს). ჰოდა,  
შეასრულებს კიდევ!

ხ ა ლ ბ ა. ამირანს მოერევა?!

დ უ ნ ი ა დ ა რ ი. ეშმაკობა მოერევა, დარისპანი კი არა! ხომ  
ხედავ, რა უთქვამს, ჯაჰვს გავქედავ და ამით დავაბამო.

მ ზ ე ო ნ ა. მერე აეთოს და ხალიბას ჰკუყას ვასწავლიო.

დ უ ნ ი ა დ ა რ ი. აეთოს მომიკლავს ის წყეული, ყოველნაირ  
სიგლახეს ჩაიდენს, რატომ მიეცი ცეცხლი, რატომ?!

ხ ა ლ ბ ა. დუნიადარ დეიდა, ამირანს დარისპანი ვერაფერს  
დააკლებს, იცოდე.

დ უ ნ ი ა დ ა რ ი. აი ნახავთ, რას დაგვმართებს! ვაი, რომ მთე-  
ლი სიმწარე დედის ძუძუმ უნდა გადაიტანოს.

მ ზ ე ო ნ ა. აეთოს რომ რაიმე დამართოს, დარისპანს მე მოვკ-  
ლავ!

ხ ა ლ ბ ა. ხვალ ამირანს უნდა ვუთხრათ ყველაფერი.

ა ვ თ ო (გამოდის). შეხედეთ, თქვენი ჰირიმი, რა სახნის-საკვეთი  
გამოვიყვანეთ! ნაგვალავი მიწაც კი ვერ გაუძლებს, კლდის

ძარღვსაც მოხნავს. (ათვალიერებს.) აი, ადამიანის ბედნიერება! რამდენ მინდორს გადაეხნავეთ და დავთესავეთ გაისისათვის! ნალიებს დავავსებთ ხორბლით, ქორწილის მდიდარი წელი დაგვიღგება, მზეონა.

მზეონა. მე ხარებს გავუძღვები. პირველ კვერს კეცზე მე გამოვაცხობ.

დუნიადარი. იმ ბოროტმა კაცმა თუკი დაგვაცალა, მართლა ბედნიერება იქნება, შვილებო! ცეცხლიც კერიაზე გაბრწყინდება და ხორბალიც თავსაყრელად გვექნება!

ხალიბა. ხომ არაფერს ვუშავებთ, ჩვენთვის მოვხნავთ და დავთესავეთ.

დუნიადარი. შვილო, მაგან მოსვენება არ იცის, მაშინ ხარობს, როცა ადამიანებს უჭირთ.

მზეონა. ავთო-ბიკო, ქორწილი როდის გვექნება?

ავთო. ამირანს ვკითხვით და გვირჩევს.

დუნიადარი. საშემოდგომოდ აჯობებს, ნალიაც სავსე იქნება და ჭურ-მარანიც.

ავთო. ბიჭები ისეთ სიმღერას ამზადებენ, რომ ღმერთებსაც შეშურდებათ.

დუნიადარი. თუკი მშვიდობა გვექნება.

ხალიბა. ვაიმე, შეხედეთ, ესენი ვინ არიან? (მთაზე უცხო ადამიანებს გამოჩნდებიან.) დარისპანის ხალხია.

დუნიადარი. დავიღუპეთ!!!

მზეონა. დარისპანი გველსა ჰგავს.

ავთო. რა იყო, რამ შეგაშინათ?

დარისპანი. არ მელოდით, ხომ?! ვინ იცის, მკვლარიც გეგონეთ? (მხრებზე ჭაჭვი აქვს შემოხვეული. სარტყელში სატევარი გაურჭვია. ბეჭზე გალაკილებულ ხის ქარქაშში ისრები აქვს ჩაწყობილი.)

დუნიადარი. ხალხი ბედნიერი იქნება, შენ თუ მოგიშორებს.

დარისპანი. ცოცხალი ვარ. არ მოვკვდები, მანამ ამირანს არ მოვინელებ, სანამ მზეონას არ წავიყვან, არ მოგშორდებათ.

მზეონა. მანამდე იკვნესე!



დარისპანი. მე კი არა, ამ ჩია ყმაწვილმა უნდა იკენოს.  
(ავთოზე უჩვენებს.)

ხალიბა. უყურეთ, ღვინო უსვამს, ალბათ, ისევ ჩვენი მარ-  
ნიდან მოიპარა.

დარისპანი (ავთოს). ყველაფერი, რაც ადამიანების ხელით  
კეთდება, ჩემია, მე მეკუთვნის!

ღუნიადარი. ხომ გითხარი, შვილო, დაკეტე, მარნის კარებს  
კეტი გაუყარე-მეთქი!

ავთო. ვინ იცოდა, ქურლობასაც თუ დაიწყებდა ეს საზიზლარ-  
ი.

დარისპანი. ვინ არის ქურდი და საზიზლარი?

ხალიბა. შეხედეთ, ჩემი ლითონი მოუპარავს, სატევარი გამო-  
უჭედავს!

დარისპანი. სატევარიო? ახლა ამას შეხედეთ, ისრის წვე-  
რებია, ეს კიდევ შუბის. შორიდან ვტყორცნი ნადირსაც  
და ჩემს მტერსაც.

ღუნიადარი. ღმერთო, დაგვიფარე ბოროტი კაცისაგან!

ხალიბა. ეს ჩემი ლითონია, ამირანმა ჩემი სახელი — ხალი-  
ბაური დაარქვა კიდევ!

დარისპანი. ვისიკ გინდათ, იმის სახელი დაარქვით, მე კი  
ამ იარაღით ქვეყანას დავიმონებ.

მზეონა. ეს შენი მონებია?

დარისპანი. მაშ რა გგონია. აბა, (უცხოელებს უბრძანებს.)  
ერთი ეს ქალწული დაიჭირეთ და წამოიყვანეთ!  
(დარისპანის ხალხი იმ წუთშივე ეცემა მზეონას.)

მზეონა. ახლოს არ მომეკაროთ, საზიზლრებო!

ავთო. თავი თუ მოგძულეებით?! (წინ დაუდგება. მზეონა გარბის,  
უცხოელები მისდევენ.)

დარისპანი. შენი სიკვდილის დღე დამდგარა და ევ არის!  
ხალიბა. დარისპან, თავი დაგვანებე, იცოდე!

დარისპანი. ჭერ ამას ვასწავლი ჭკუას და მერე შენთვის-  
საც მოვიცლი! (ჩაჰვს მოხსნის, ავთოს მარყუჟად ესვრის და  
მხრებზე ჩამოაცემებს.) აბა, ახლა გაინძერი, ვაჟკაცო!

ღუნიადარი. ვაიმე, ხომ ვამბობდი ეს კაცი დაგველუპავს-  
მეთქი. რა დღე დაგვიდგა! რა შავი დღე!

(ავთოს ყოველ გატოებაზე უფრო მაგრად უჭერს ჩაქვი.)

დარისპანი (უცხოელებს). თქვენ კი, რაც გიბრძანეთ, ის შე-  
ასრულეთ! (ისინი გაქცეულ მზეონას დაედევნებინან.)

ხალიბა (უცებ დასწვდება და ისარს წაართმევს). აბა, დარისპან, ავ-  
თო გაანთავისუფლეთ, თორემ მეორე თვალს ამოგთხრი!

დარისპანი (შეშინდება). არ მესროლო! ცალი თვალირბა  
შემრჩა, ისიც რომ მომთხარო, ხომ იცი, რა დამემარ-  
თება?!

დუნიადარი. ესროლე, ხალიბა, ესროლე, თორემ არ და-  
გინდობს ეს ბოროტი კაცი.

ხალიბა. ახლავე გაუშვი ავთო და მზეონას დევნას თავი და-  
ანებე, ჩქარა, თორემ გვიან იქნება!

დარისპანი (მხვდება, რომ ხალიბა აღარ ხუმრობს. უცხოელებს  
შეაჩერებს, ავთოს კი ქაქვს შემოხსნის). ახლა ასე იყოს, მაინც  
ჩემი ლუკმა ხართ!

ხალიბა. ვნახოთ, ვნახოთ. ხვალ ამირანი ჩამოვა, ყველა-  
ფერს ვეტყვი და მან გადაწყვიტოს.

დარისპანი (განრისხებული). ამირანს არავინ ჰკითხავს ჩემს  
საქმეს.

ხალიბა. აბა, შენ გკითხოთ ქვეყნის საქმე?!

(ამ დროს მზეონას კვილე ისმის.)

დარისპანი (გახარებული). მოვდივარ, ჩემს მოსვლამდე არ  
გაუშვათ.

ხალიბა (ფეხებში გაეჩხირება. დარისპანი წაიქცევა). ავთო-ბიჭო,  
გაიქეცი, ისრებით გული გაუგმირე უცხოელებს, მზეონა  
გააშვებინე, ჩქარა გაიქეცი!

დარისპანი (ხელს სტაეებს ხალბას და სარტულიდან სატევარს  
ამოიღებს). ახლა ხომ ჩემი ტყვე ხარ?

ხალიბა. დამარტყი, რაღას უყურებ?

დარისპანი. დავარტყამ, იცოდე, არ დაგზოგავ!

(ხალიბა უცებ დაუსხლტება, ძელქვის ტოტებზე შეხტება და აქვ-  
დან აჭერებს. დარისპანი დაედევნება, მოულოდნელად სატევარს  
დაუმიზნებს და გსვრის, ხალიბა შეკვივლებს და ძირს ზღართანს  
მოადენს. სატევარი ბეჭქვეშ, ზედ გულის ირგვლივ აქვს გაყრილი.)

დუნიადარი. ვაიმე, შვილო, მიშველეთ, ხალიბა მოგვიკ-  
ლეს!

მ ზ ე ო ნ ა (შემოვარდებიან აეთო და მზეონა.) ვაიმე, ძმაო, ვაიმე,  
ძმაო ხალიბა!

ა ვ თ ო. რა ჰქენი, დამთხვეულო?

დ ა რ ი ს პ ა ნ ი. განგებამ ასე ისურვა.

დ უ ნ ი ა დ ა რ ი. გველო, ბოროტების ბუდევე, რად მოკალი  
ეს ჩვენი უღედმამო ბიჭუნა?

დ ა რ ი ს პ ა ნ ი. თვითონ შემომაკლა თავი. ეტყობა, უმსხ-  
ვერპლოდ არ ხერხდება.

მ ზ ე ო ნ ა. ჩემო საყვარელო ხალიბა! (ტირის.)

დ ა რ ი ს პ ა ნ ი. დღეიდან ყოველ მოსახვევში შიში დაგხვდე-  
ბათ, ყოველ გზაჯვარედინზე სიკვდილი ჩაგისაფრდებათ,  
ყოველი სახლის ლაფაროში სატევრისა და ისრის ცივი  
წვერი დაგელოდებათ. ადამიანო! ცეცხლმა მე სატევარი  
და ისარი მომცა, ხმალი და შუბი გამომაწროთბინა.

ა ვ თ ო. ცეცხლმა გუთანი, თოხი და ბარიც დაბადა, რატომ  
ისინი არ გააკეთე და ეს კაცის მოსაკლავი იარაღები შექმე-  
ნი, ბოროტი გველო?! თქვი, რატომ ისინი არ გააკეთე?!

დ ა რ ი ს პ ა ნ ი (დაცინით). ტყუილს ამბობ. რკინისაგან ცელი  
მეც გავჰედე და თქვენც გამოკვერეთ.

ა ვ თ ო (ვერ მიხვდა დაცინვას). ცელები გავჰედე?!

დ ა რ ი ს პ ა ნ ი. კი, ცელი გავჰედე.

ა ვ თ ო. მერე რისთვის გინდა ცელი. განა შენ ოფლს გამო-  
იღენ?! ბალახს მოთიბავ?!

დ ა რ ი ს პ ა ნ ი. ხა-ხა-ხა. ბალახს რა თავში ვიხლი?! აი მე  
რისთვის მინდოდა ცელი. (გასძახებს.) ჰეი, ჩემო ძმაკაცო,  
აქეთ შემოიარე. ერთი ამათ დაენახვე. (შემოდის ადამიანის  
ჩონჩხი. ხელში ცელი უჭირავს. ყველანი შეშინდებიან. ქალები შეჰ-  
კვივებენ.) რაო, არ მოგეწონათ?! ხა-ხა-ხა...

ა ვ თ ო. კაიკაცობაც ამას ჰქვია?!

დ ა რ ი ს პ ა ნ ი. მე ბატონობა მინდა. ბატონობა მხოლოდ ია-  
რალით შეიძლება. შიში უნდა იყოს ბატონსა და ყმას შუა.  
დღეიდან ჩემი ძმაკაცი შიშია.

დ უ ნ ი ა დ ა რ ი. წყუთულიმც იყავ, ადამიანთა შორის ყველა-  
ზე წყუთულო კაცო!

ხ ა ლ ი ბ ა (წაშიიწევს). მზეონა, აეთო-ბიჭო, ძალიან მიყვარ-  
დით. ეჰ, თქვენ ქორწილს როგორ ველოდი იცოდეთ,

თქვენს ბიჭს ხალიბა დაარქვით. არც ჩვენს ლითონს წაარ-  
თვით ჩემი სახელი. ამირანმა ხომ ხალიბაური დაარქვა.  
არ დამივიწყოთ! დარისპანზე კი შურს ნუ იძიებთ. არ მინ-  
და, არ ივარგებს!

დ ა რ ი ს პ ა ნ ი. ვინ იძიებს შურს, ეს ხომ არა?! (ავთო-ბიჭს  
ნიჟაზე ამოქრავს ხელს.) ხა-ხა-ხა-ხა!

დ უ ნ ი ა დ ა რ ი. გვიშველეთ, აღამიანებო, გვიშველეთ! ეს  
ბოროტი კაცი ყველას დაგვხოცავს, გვიშველეთ!

### მეოთხედი სურათი

პ ი რ ვ ე ლ ი ხ მ ა. ათასწლეული ათასწლეულს მისდევდა.

მ ე ო რ ე ხ მ ა. საუკუნე საუკუნეს ცვლიდა.

მ ე ს ა მ ე ხ მ ა. აღამიანებმა რა არ ნახეს და რა არ გადაიტა-  
ნეს, რა არ გამოიარეს!

პ ი რ ვ ე ლ ი ხ მ ა. ამირანის ხალხმა ბევრი სიკეთე მოუტანა  
აღამიანებს.

მ ე ო რ ე ხ მ ა. დარისპანის მიმდევრებმა მრავალჯერ უბედუ-  
რება დაატეხეს თავს კაცობრიობას.

მ ე ს ა მ ე ხ მ ა. სიკეთე სინათლისკენ ილტვოდა, ბოროტე-  
ბა სიბნელისკენ მიაქანებდა აღამიანებს.

მ ე ო რ ე ხ მ ა. მტრობა ანგრევდა, სიყვარული აშენებდა.

მ ე ს ა მ ე ხ მ ა. აი ჩვენს დროშიც ხომ ასე მოხდა.

პ ი რ ვ ე ლ ი ხ მ ა. ჩვენს თვალწინ, ჩვენი თანდასწრებით.

მ ე ო რ ე ხ მ ა. გაიხსენეთ, დაფიქრდით!

მ ე ს ა მ ე ხ მ ა. გაიხსენეთ და დაფიქრდით!

### მეხუთედი სურათი

გრანდიოზული კაფე-რესტორანი. იქით, მოედანზე, ცეკვაა,  
რომელიც ძალიან ჰგავს ველურების ცეკვას. წყვილ-წყვილად  
სხედან ქალ-ვაჟნი. კარმაგი აღამიანებიც საკმაოაა. განაპირა  
მაგიდასთან ქალ-ვაჟი ზის. ვიყების უმრავლესობა ფარაქებშია,  
ეტყობა, ოშია.

ვ ა ე ი. მე ცეკვის უფლებაც კი არა მაქვს.

ქ ა ლ ი. ან მესმის, რატომ?

ვ ა ე ი. მიბრძანეს, საერთოდ ასეთ ადგილებს თავი ავარიდო.  
ეშინიათ, რამე არ წამომცდეს ან ნილს ბორივით არ მო-  
მიტაცონ.

ქ ა ლ ი. ნილს ბორი ხომ ჩვენებმა მოიტაცეს?

ვ ა ე ი. ახლა შეიძლება მოწინააღმდეგემ შენ მოგიტაცოს.

ქ ა ლ ი. ალბათ, ჩვენთან შეხვედრაც არ შეგიძლია.

ვ ა ე ი. ფორმალურად კი, ფაქტიურად არა, ასე გამოდის.

ქ ა ლ ი. ეს შენი ბრალია, ბოროტ ადამიანებს მიჰყვები, ჩემო  
საყვარელო!

ვ ა ე ი. ბოროტ ადამიანებს! ვერ ხედავ, ერთი კაცი ქვეყნის  
დამონებას ცდილობს.

ქ ა ლ ი. ვერ შეძლებს, ჩემო ვაჟკაცო, ვერ შეძლებს. ხომ ხე-  
დავ, ვინ ებრძვის მას.

ვ ა ე ი. ამ სვებედნიერმა (აინშტაინის სილუეტზე მიუთითებს.) დიდი  
სიკეთე მოუტანა ადამიანებს.

ქ ა ლ ი. თქვენი იანკები კი მისი სიკეთით ქვეყანას ბოროტების  
წარღვნას ჰპირდებიან.

ვ ა ე ი. არა, ჩემო მშვენიერო. მე მხოლოდ ერთ ყუმბარას გა-  
ვაკეთებ, ერთხელ გავისვრი და გათავდება.

ქ ა ლ ი. სულელი ხარ, სულელი. მერე ამათ შენ გააჩერებ?

ვ ა ე ი. ვით ამირანმა ცეცხლი, ისე ჩაგვაბარა ამ დევკაცმა  
ბედნიერების ატომი. რომ იცოდე, ადამიანები ზღაპრუ-  
ლად გამდიდრდებიან, ყველაფერი იაფი და ხელმისაწვ-  
დომი გახდება, ყოველი კაცი მდიდარზე მდიდარი შეიქ-  
ნება.

ქ ა ლ ი. მერე, ამას ესენი დაუშვებენ?!

ვ ა ე ი. ვინ ესენი?!

ქ ა ლ ი. ვინც შენ ჩემთან მოსვლას გიკრძალავს, ვინც  
ცეკვას და ღიმისს გარიდებს, ვისაც ხალხის თვალის  
ეშინია, ვინც მხოლოდ თავისი დოლარების ჩხრიალზე  
ფიქრობს!

ვ ა ე ი. შენ არა ხარ მართალი. ხომ იცი, რა „დროში“ ვცხოვ-  
რობთ?

ქ ა ლ ი. ვიცი, ჩემო სიცოცხლე, და იმიტომ გეუბნები ამას.  
რამდენი ხანია გელოდები.

- ვ ა ჟ ი. კი, მართალი ხარ. ჯერჯერობით ჩაკეტილნი ვართ. სულ ცოტა კიდევ და ყუმბარაც მზად იქნება.
- ქ ა ლ ი. რად გინდა, რად?! ნუთუ შენი ხელით ნაკეთებმა ადამიანები უნდა იმსხვერპლოს?
- ვ ა ჟ ი. სულელო! პირიქით, ადამიანები უნდა დაიცვას. ხომ ხედავ, როგორ ჟღერენ ხალხს. იმ ერთი ყუმბარის გასროლა და — შიშით ყველა ბოროტება შეწყდება!
- ქ ა ლ ი. სულელი შენ ხარ, შენი ჭირიმე, მთელი კაცობრიობია წარყვანას მოინდომებენ. ეს შენი ნაშრომი თავიანთი გამდიდრებისა და ხალხთა დაშინების წყაროდ გადაიქცევა.
- ვ ა ჟ ი. კარგი, ვიცეკვით. შენ როცა ცეკვავ, სულ სხვანაირი ხარ.
- ქ ა ლ ი. შენც სხვანაირი ხარ, როცა უკრავ, სულ სხვა ხარ, ახლა კი...
- ვ ა ჟ ი. ახლა კი ცოტა ჩაფიქრებული ვარ. ხანდახან შენ მართალი მგონიხარ და მეშინია. იცი, რა ნიჭიერი ადამიანები შეკრიბეს ჩემს გარშემო!
- ქ ა ლ ი. უბედურებაა, უბედურება. მით უმეტეს, ერთი მეფისტოფელი მთელ ქვეყანას წარყვინის.
- ვ ა ჟ ი. ვინ არის მეფისტოფელი?
- ქ ა ლ ი. შენ. შენი ამხანაგებიც. სამყარო დაიღუპება. მე ქალი ვარ, მომავალი დედა ვარ და ამას ვგრძნობ. ფხიზლად უნდა ვიყოთ, არ მოგვატყუონ!
- ვ ა ჟ ი. ვიცეკვით, ჩვენც ვიცეკვით. (უკავვენ. ქალი ნაძალადე-ვად მიყვება.)
- ქ ა ლ ი. (ჩურჩულით). სულ რამდენი კაცი იქნება ნიჭიერი?
- ვ ა ჟ ი. ხუთი, ათი, ოცი!
- ქ ა ლ ი. ღმერთო ჩემო, ხუთი, ათი, ოცი მეფისტოფელი ერთად.
- ვ ა ჟ ი. ვერ გავიგე, ვინ არის ეს ოცი მეფისტოფელი!
- ქ ა ლ ი. თქვენ ხართ, თქვენ. სამყაროს მოსპობთ ამ იარაღით. ნუთუ ვერ ხვდებით, რის გაკეთებას აპირებთ?!
- ვ ა ჟ ი. ქვეყნის ყველაზე დიდ ბოროტებას დავთრგუნავთ.
- ქ ა ლ ი. ერთს კი დათრგუნავთ, მაგრამ მეორეს, უფრო საშიშს წარმოშობთ.
- ვ ა ჟ ი. იცეკვე, ჩემო მშვენიერო...

ქ ა ლ ი. ნუთუ ყველაფერი იცი და მაინც ამ გზით მიდიხარ?  
ვ ა ე ი. ხედავ, როგორ ცეკვავენ?! არ შეუძლიათ არ იცეკვონ!  
არა, არ შეუძლიათ, მათ ტანში ახლა ცეკვის ეშმაკი ზის.  
ჩვენც ისე ვართ. ჩვენ ერთი ყუმბარა უნდა გავაყეთოთ,  
ვისროლოთ, შევაშინოთ.

ქ ა ლ ი. ერთი შეაშინოთ, მეორე კი... არ სჯობია, სულ უარი  
თქვათ, არ შექმნათ, არ გააყეთოთ?

ვ ა ე ი. ეტყობა, არ შეგვიძლია.

ქ ა ლ ი. მე კი ქალი ვარ. ადამიანთა დედა ვარ და ქვეყნის უბე-  
დურების ნაპირებს ვხედავ, ვგრძნობ...

ვ ა ე ი. ახლა უსაშველო ომია. ხედავ, ბიჭებს ფარაჩები აც-  
ვიათ, ორი დღის შვებულება მიუციათ. ისინი კი აქ მო-  
სულან სიციქვაოდ. საოცრებაა, საოცრება!

(შემოდინა გლეხი და მისი ცოლი. კალათი უკავიათ, თითქოს მაწ-  
ვნის გაყიდვა უნდათ.)

გ ლ ე ხ ი. ხედავთ, ქვეყანა იქცევა, ესენი კი ცეკვავენ.

ც ო ლ ი. გაჩერდი, შენ ვინა გკითხავს, იქნებ მიგტყუპონ კი-  
დეც!

(ქალ-ვაჟი შენიშნავს მათ.)

ქ ა ლ ი. მგონი მაწონი გაქვთ, რას აფასებთ?

გ ლ ე ხ ი. ხომ იცით, ომია და ახლა ყველაფერი ძვირია.

ქ ა ლ ი. ვიცი, ომია, ადამიანები ხომ გიყვარს, გეცოდება.

ც ო ლ ი. ჩვენ გიყვარს... აი, შეხედე, როგორ ცეკვავენ!

გ ლ ე ხ ი. ახლა ჩემს ხელებს შეხედე, მზეს ავიღებ ხელში და  
არ დამწვავს. (დაცინვით.) ასეთი ჯავშანი ტანქსაც კი არა.  
აქვს.

ც ო ლ ი. მე კი, რომ გავთხოვდი, ავ თვალს არ შევეხედე-  
ბოდი. ახლა კი, ნახე, როგორ დავილიე!

გ ლ ე ხ ი. სამაგიეროდ, სამი ვაჟაკი გამოზარდე. მათ კი ომ-  
ში უკრეს თავი. დაბრუნდებიან?!

ც ო ლ ი. ეს გამხდარი ძუძუები მეწვის. თქვენ კი მაწვნის ფუ-  
ლი გენანებათ!

გ ლ ე ხ ი. თქვენ ცეკვავთ და ცეკვავთ არა?!

ც ო ლ ი. ამათი არაფერი ვარგა, ეს ცეკვა სიკვდილის მანქვას.  
უფრო ჰგავს. აბა, ჩემი ბიჭები რას დაუვლიდნენ!

- გ ლ ე ხ ი. ჰოდა, იცოდე, ქალიშვილო, გლახიკაცია ამ მიწაზე  
ქვეყნის ფესვი.
- ქ ა ლ ი. ვიცი, ძიაკაცო, მე ნამდვილად ვიცი.
- გ ლ ე ხ ი (ჩააშტერდება). იცი? კარგი ქალი ჩანხარ, გეტყობა,  
ჩვენი ანასხლეტი ხარ. ყველა კეთილი გლახის ანასხლე-  
ტია.
- ც ო ლ ი (იციანს). ასეთი ლაპარაკი უყვარს ჩემს კაცს.
- გ ლ ე ხ ი. ექიმიც, ხელმწიფეც, პრეზიდენტიც, ჭარისკაციც —  
ყველა გლახის ანასხლეტია, მაგრამ ზოგჯერ თავისი ფეს-  
ვის სიტყბო ავიწყდებათ. ნამდვილად ასეა, ავიწყდებათ!
- ქ ა ლ ი. საოცარი სიტყვები მესმის.
- ვ ა ე ი. რა თქვა, ჩემო მშვენიერო?
- გ ლ ე ხ ი (ქალს). ეს ვინ არის?
- ქ ა ლ ი. ჩემი საქმროა, ფიზიკოსია.
- გ ლ ე ხ ი. — ეგეც გლახის ანასხლეტია, მხოლოდ თვალებში სხვა  
სინათლე აქვს.
- ქ ა ლ ი (შეშით). რა თქვით?
- გ ლ ე ხ ი. კი, სხვანაირად იყურება. მაგას თავისი ფესვების  
სიტყბო არც ახსოვს და, მგონია, არც სიმწარე აგონდება!
- ქ ა ლ ი. ვაიმე, ასე რატომ ფიქრობთ?
- ც ო ლ ი (იციანს). ასეთი ლაპარაკი უყვარს ჩემს კაცს.
- გ ლ ე ხ ი (სოლს გაუწყრება). გაჩუმდი, შენ არ გესმის. იმ ბიჭის  
თვალებში დღის შუქიც ლიცილიცებს და ღამის წკვარა-  
მიც იხედება.
- ქ ა ლ ი. ღმერთო, მიშველე!
- გ ლ ე ხ ი. ჰოდა, დღის და ღამის საზღვარი რომ წაეშლება კა-  
ცის თვალს, ცუდია, ცუდი.
- ქ ა ლ ი. რაღა მეშველება!
- ვ ა ე ი. რა იყო, ჩემო ღამაზო, შემკრთალი ჩანხარ!
- გ ლ ე ხ ი. იდამიანი შვილია მიწისა.
- ქ ა ლ ი. რაო, რა თქვი?
- გ ლ ე ხ ი. კი, მიწის შვილია. მიწას უნდა მოეფეროს, მოჟ-  
აროს. ესენი კი მიწას ებრძვიან.
- ქ ა ლ ი. მეც ამას ვეუბნები!
- გ ლ ე ხ ი. ქვეყანა რომ დაიბადა, პირველად გლახმა ცხვარი  
მოათვინიერა, მატყლით შეიმოსა, ხორციით ისაზრდოვა.



- ცოლი (იონის). ჩემი კაცი სულ ასე ლაპარაკობს.
- გლეხი. ტყუილს ვამბობ თუ? მერე ცეცხლი იშოვა.
- ქალი. ამირანმა მოსტაცა ღმერთებს და ხალხს მისცა.
- გლეხი. ამირანი ჩვენს ფესვზე ამოვიდა, მკედელი კაცი იყო.
- ვაჟი. მკედლობა პირველი ფიზიკოსობაა.
- გლეხი. ჩემი უმცროსი ბიჭი ამბობდა, ფიზიკოსი გამოვალო.
- ცოლი. ერთხელ ცხვარი და ძაღლი სავარცხლით დეარცხნა, ნაპერწკალმა დაკვესა, შემეშინდა კიდეც.
- გლეხი. იმ ნაპერწკლის მიზეზს ეძებდა. აი ის კაცი უყვარდა ამირანივით კაციას. (აინშტაინზე მიუთითებს.)
- ქალი. კარგი კაცი დადგებოდა.
- ცოლი. არ აცალეს, მკერდზე მომაგლიჯეს.
- ვაჟი. ნაპერწკლის მიზეზი თუ მონახა ნეტავი?
- გლეხი. შენს თვალებში, ბიძია, შავი ნაპერწკალი მოჩანს.
- ქალი. რატომ ამბობ ასეთ სიტყვებს?
- ცოლი (ისევ იონის). ხომ გითხარი, ქალიშვილო, ჩემი ქმარი სულ ასეთ სიტყვებს ამბობს.
- ვაჟი. შავი ნაპერწკალი, შავი ნაპერწკალი.
- ქალი (სოლს). მე მაწონი გთხოვეთ, მომყიდეთ მაწონი.
- ცოლი. ხომ გაიგონე, რა თქვა ჩემმა კაცმა, თვალში შავი ნაპერწკალი აქვსო. ჰოდა, იმ ნაპერწკლით დამწვარს ჩვენი მაწვნით ვერ მოაშუშებ.
- ვაჟი (გლახს). ჩვენ ახლა ისეთი ყუმბარა უნდა გამოვიგონოთ, უცებ ქვეყანა დაანგრიოს. (აკვირდება, რას იტყვისო.)
- გლეხი. ტყუილია! არ დაიჯეროთ!
- ვაჟი (გაჯავრებით). არ არის ტყუილი. დღე-დღეზე მზად იქნება.
- გლეხი. ხომ გითხარი, შავი ნაპერწკალი გიჩანს თვალებში. ქვეყანას მაინც ვერ დაანგრევ. ღმერთო, შემიბრალე!
- ვაჟი. მე არ მინდა ქვეყნის დანგრევა.
- გლეხი. ვიცი. თქვენ გინდათ დაიპყროთ, დაიმონოთ, თქვენს სურვილზე ათამაშოთ.
- ვაჟი. რა თქვით?!
- ცოლი. ასე უყვარს ჩემს ქმარს ლაპარაკი.

გ ლ ე ხ ი. არც თავისუფლებაა ბიძია ყუმბარის მშობელი და არც ყუმბარა გამოდგება თავისუფლების დედად.

ქ ა ლ ი. აი, ჭეშმარიტება!

გ ლ ე ხ ი. ცხვარი პირველად გლეხმა გაკრიჭა, მოწველა, რქისგან ნივთები გამოთალა.

ვ ა ე ი. მერე?!

გ ლ ე ხ ი. თქვენც ჩვენი ანასხლეტი ხართ, მაგრამ დარისპანმა მოგატყუათ. მის ნაკვალევზე მიდიხართ.

ვ ა ე ი. თქვით სათქმელი.

გ ლ ე ხ ი. მთხოვე და გეუბნები. (უჩვენებს ბოროტების ხეს.) თქვენც იმ ხის ნაყოფი ხართ.

(შემოდის ევროპულად ჩაებული დარისპანი, სპეკულები წვერა აქვს, ცილინდრი ახურავს.)

ვ ა ე ი. დავიღუპე!

გ ლ ე ხ ი. (მოაჩერდება დარისპანს). აი ძველი ნაცნობი.

ქ ა ლ ი. ვინ არის ის კაცი?

გ ლ ე ხ ი. შავი ნაპერწკლის გამჩაღებელი, გლეხიკაცის მტერი.

ქ ა ლ ი. ნუთუ ეს ის კაცია?

გ ლ ე ხ ი. დაუკვირდი შენს საქმროს.

ქ ა ლ ი. (ვაჟს). ვინ არის ეს კაცი-მეთქი?

ვ ა ე ი. ჩვენი მბრძანებელია. (დარისპანი ათვალეირებს ყველას. ვაჟს თვალს აარიდებს.)

გ ლ ე ხ ი. ეს კი ნამდვილად არ არის ჩვენი ანასხლეტი.

ც ო ლ ი. (გულშოსული). ყოველ კაცზე ამბობდა ჩვენი ანასხლეტიო და მაინცადამაინც იმ კაი კაცზე ამბობს უარს!

გ ლ ე ხ ი. რითია კაი კაცი?

ც ო ლ ი. აცვია, ახურავს, ერთი სიტყვით...

გ ლ ე ხ ი. (გაუწარბა). გაჩუმდი, ისიც ეშმაკისაა და შენც...

ც ო ლ ი. ქურდია?

გ ლ ე ხ ი. გაჩუმდი, ქალო. ასეთები ერთნაირად ართმევენ ადამიანებს ცხვრის ტყავსაც და სიცოცხლესაც. წავიდეთ.

ც ო ლ ი. (ფინიანად). არ წამოვალ, შეიძლება მაგან ჩემი ბიჭების ამბავი იცოდეს.

გ ლ ე ხ ი. (შეკრთება). ეს შეიძლება მართლა იცოდეს, წაღმართად მაინც არ იტყვის! (ამ დროს საშუალო ხნის ელეგანტურად

ჩაცმული მამაკაცები შემოდიან. დარისპანს ვერ ამჩნევენ, შემოსვლის-  
თანავე ცეკვას იწყებენ.)

ვ ა ე ი. აი ჩემი მეგობრებიც მოვიდნენ.

გ ლ ე ხ ი (ცოლს). უყურე, უყურე, იმათაც რა სხვანაირი თვალები აქვთ!

დ ა რ ი ს პ ა ნ ი (დააჩერდება გლესს). მე ხომ არ მკითხეთ რამე?!

გ ლ ე ხ ი (თავისთვის). ისევ ეშმაკის ჩლიქები აქვს. (დარისპანს.)  
რა თქვით?

დ ა რ ი ს პ ა ნ ი (მბრძანებლურად). მგონი რაღაცის თქმას აპირებდით!

ცო ლ ი. კი, ბატონო, ჩემი ბიჭები ომში არიან. თქვენ ხომ არ იცით მათი ამბავი?

დ ა რ ი ს პ ა ნ ი. მე ამ კაცს ვეკითხები.

გ ლ ე ხ ი. თქვენც ქალის ნაშობი ბრძანდებით. ჩემი ცოლია და უთხარით, რა დაგიშავდებათ?

დ ა რ ი ს პ ა ნ ი. დღეს ყველას ბიჭები ომშია.

ცო ლ ი (ვაჟზე უჩვენებს). ეს რატომ არ წაბრძანდება?

დ ა რ ი ს პ ა ნ ი. (დააჩერდება ვაჟს). თქვენი ადგილი აქ არის?

ვ ა ე ი (შიშით). წამოვედი, დავიღალე. დასვენებული გონება უფრო იმუშავებს.

დ ა რ ი ს პ ა ნ ი (ანიშნებს ახალმოსულებზე). იმათაც დაუძახეთ, სასწრაფო საქმეა.

გ ლ ე ხ ი. ბედნიერი ვარ, რომ ჩემი ბიჭები ამათ არ ჰკვანან. ამათ ხომ ხალხისათვის მხოლოდ უბედურება მოაქვთ.

ცო ლ ი. ჩლიქები არა აქვთ, არც რქები, თორემ ხუთივე ეშმაკის ჭიშისაა.

გ ლ ე ხ ი. ახლავე წამოდი, ამათი სახლის ლაფაროში ჩვენთვის საჩრდილობელი არ დარჩება.

(ვაჟი სამივეს ეძახის და ისინიც სიცილით მოდიან. შენიშნავენ დარისპანს, შეჩერდებიან.)

გ ა მ ო მ თ ვ ლ ე ლ ი (ვაჟს). შენ დაგეძებდით!

ქ ო რ ფ ლ ი ა ნ ი. სუნით მოგაგენით.

გ ა მ ო მ თ ვ ლ ე ლ ი. მე გამოვითვალე, რომ აქ იქნებოდით!

დ ა რ ი ს პ ა ნ ი. მე კი თქვენმა თვალებმა მამცნო თქვენი სამყოფელი.

ვ ა ე ი. ნანახს ძებნა რად სჭირდება, უნახავეს ხილვაა ძნელი.

გამომთვლელი. დასრულდა, რასაც ვეძებდით, ვიპოვეთ  
კიდევ.

ვაჟი. როგორ, უჩემოდ?!

ქორფლიანი. უშენოდ რატომ, შენი დახმარებით.

გამომთვლელი. ცოტაც და ქვეყანას შევაზანზარებთ.

ქალი (სიკეთის ხესთან დადგება). დავიღუპეთ! სამყაროს დაანგ-  
რევენ!

გლეხი (ცოლს წააგლებს ხელს, მიჰყავს). წამოდი, ქალო-მეთქი, არ  
დაიჭერო, ეს ეშმაკები ქვეყანას ვერ დაანგრევენ, გაწვა-  
ლებით კი გააწვალებენ.

დარისპანი. ახლა სამიზნე აღგილზე უნდა გადავიტანო!

გამომთვლელი. მფრინავები თუ დათანხმდებიან!

გლეხი. ჩემი ბიჭები არასოდეს დათანხმდებიან!

ცოლი. რა თქვი?

გლეხი. შეხედე იმ ხეს. (აჩვენებს ბოროტების ხეს.) ამ დიდიდან-  
ვე გაეზარდა დიდი ტოტი.

ცოლი. კაცო, ჩვენი ბიჭები რატომ ახსენე?

გლეხი. ჩემი შვილები ამ ხეს არ გაახარებენ.

გამომთვლელი. ბევრი ვიწვალეთ!

ქორფლიანი. ბევრი ვიშრომეთ!

გამომთვლელი. მიზანს მივალწიეთ!

დარისპანი. სულელები, გიჟები, სწორედ ახლა იწყება  
დიდების დღეები.

გლეხი (ვაჟს). შენც მისი მონა იქნები!

ქალი. ვაი ჩემს ბედს!

ვაჟი (აინფთავის სურათს შესცქერის). შენი დიდი, კეთილი ფიქ-  
რი ამათ ვეება ბოროტებად აქციეს.

გლეხი. წამოდი, ქალო-მეთქი.

ცოლი (დარისპანზე მიუთითებს). მაინც ვერ დავაცდენინე სიტყ-  
ვა.

გლეხი. სიტყვაც ბოროტი აქვს და საქმეც.

ცოლი. ჩემი ბიჭები სად არიან, ჩემი ბიჭები, დედა ენაცვა-  
ლოთ.

გლეხი. ისინი ბოროტებას ებრძვიან, ესენი კი უფრო დიდ  
ბოროტებას ამზადებენ.

ვაჟი (ნერვებაშლილი). წადით, მომშორდით, თავი დამანებეთ!..

ქალ ი. მიშველეთ, შეიშალა კაცი, მიშველეთ  
დარისპანი. მავრმა თავისი საქმე გააკეთა, ახლა სიგიჟის  
უფლებაც მოიპოვა.

გამომთვლელი. საცოდავი, მგონი, მართლა შეიშალა.

ქორფლიანი. კიდევ კარგი, ნაწერები დარჩა.

გამომთვლელი. ჯერ კიდევ გამოსათვლელია ბევრი რამ.

გლეხი (ქალს). აკი ომი თავდებაო?

ქალი. ესენი ახლა იწყებენ.

კოლი. ვაიმე, შეილებო, ვაიმე, ოჯახო!

დარისპანი. დღეიდან ქვეყნის ყოველ კიდეს მისწვდება  
ჩვენი ხელი, ყოველი სინათლის შუქს ჩააქრობს ჩვენი  
სიბნელე, ყოველ მიუვალ ორმოში ჩააღწევს ჩვენი ძალ-  
ღონე! რამდენი ხანია ვეძებდით ასეთ ძალას და პა, რო-  
გორც იქნა, ხელში ჩავიგდეთ! პატარა, მრგვალი ბურთი-  
ვით ვაკოტრიალებთ ამ დედამიწას. ის, რაც ვერ შეძლო  
ვერაგინ, შევძელი მე. მე დავეუფლე ამ საოცარ ძალას.  
(აინშტაინის სურათისკენ მიბრუნდება.) აი, მეორე ამირანი, მა-  
სავით სულელი და გიჟი! სიკვდილი თვითონვე დაიჩქარა  
იმ მტანჯავი ფიქრით, მოვიხმარდით თუ არა ჩვენ ხალხის  
საწინააღმდეგოდ მის ნააზრევს. რა ვუყოთ! არც კი იყო  
მისი სიცოცხლე საჭირო. ამქვეყნად მან უნდა იცხოვროს,  
ვინც ძლიერია, ვინც ამ ქვეყანას და ადამიანებს თავისი  
ბედნიერებისათვის მოიხმარს. ხალხის სიყვარულს სამ-  
ყარო სიგიჟემდე მიჰყავს, გამოსათხიზლებლად კრემატო-  
რიუმებია საჭირო. არ სჯობია, ახლავე დავიწყოთ! ერთი  
ყუმბარის ანთება და მილიონობით ადამიანით შემგვირდე-  
ბა დედამიწა! ლამის გაიზნიქოს დედამიწის ბურთი ადა-  
მიანთა სიმრავლით.

გლეხი. ათასეული წლების წინათაც ბოროტი იყო.

ვაჟი. ხომ გაიგონეთ, რას ამბობს ეს უბედური.

დარისპანი (გლეხს). თქვენ ამ ადგილს მოშორდით, ყურებ-  
ზე საცობი დაიცავით, სჯობია არაფერი გაიგონოთ.

ვაჟი (გლეხს). უთხარით ყველას — მე მკვლელი ვარ. მე შეეკ-  
მენი სიკვდილის მანქანა!

დარისპანი. არ დაუჭეროთ, გიჟია, ნამდვილი გიჟი.

ქალი. გიჟი გუშინ იყო, დღეს თავის გონებაზეა.

დარისპანი. თქვენც მოგივლით.

გლეხი. ჩემი შვილების ამბავი მითხარით.

ცოლი. გვითხარით, შენ გეცოდინება, როგორ არიან ჩემი ბიჭები!

დარისპანი (გლეხს). დაიხსომე, კრინტი არსად დაგცდეს.

გამომთვლელი. ღალატი დაგბრალდება.

ცოლი. ჩემს უმცროს ბიჭს ფიზიკოსობა უნდოდა.

გლეხი (ცოლს). გაჩუმდი, ესენი დარისპანის ბნელ გზაზე დადიან.

ცოლი. რა ვქნა, ვინ მეტყვის, ჩემი ბიჭები სად არიან ახლა?

დარისპანი. დღეიდან ღმერთიც ვარ და მეფეც.

გლეხი. სტყუის, არ დაუჭეროთ, ამირანს ცეცხლი რომ მოპარა, მაშინაც ასე ტრაბახობდა.

ცოლი. რა ვქნა, კაცო, ბიჭების ამბავი ვკითხოთ ვინმეს.

გლეხი. დაიყინებ ბიჭები, ბიჭებიო, ხომ ხედავ, ქვეყანა რა დღეშია?

ცოლი. რა ვქნა, ქვეყანა მადარდებს, მაგრამ მე ჩემი ბიჭები, ჩემი შვილებიც მენატრებიან.

(გამოჩნდება ადამიანის ჩონჩხი, ხელთ ცელი უჭირავს.)

გლეხი. ნახეთ ერთი ძველი ნაცნობი მობრძანებულა. (ცელს სინჯავს.) ეს ოხერი, კინალამ გული გამისკდა, ჩემი მეგონა, ვიფიქრე, ხომ არ მომპარეს-მეთქი.

ცოლი. ესლა გვაკლდა, ვინ ეშმაკია, რას ჰგავს?!

გლეხი. აბა, ეს გვაკლდა. ამ ქვეყანაზე ყველა სულდგმულის სასულე მაგის ცელის პირზეა მიკვერილი. ჩვენც ცელი გვიჭირავს და მაგასაც.

ცოლი. რავე ცოცხალივით ემუსაიფები. ვერ ხედავ, გამოფიტული ძვლები რახუნობენ.

გლეხი. კი, ასეა. დარისპანის სიკვდილის ცელი ბრუნავს და ბრუნავს!

ცოლი. როდემდის, როდემდის უნდა ეპრუტუნო ამ საფრთხობელას?!

გლეხი. ასეა, ქალო, როდემდის, როდემდის უნდა ვითმინოთ. აბა, ახლა აქეთ წამოდი, წამოდი-მეთქი, (ძალით მიათრავს.)

(სასამართლო დარბაზი)

გ ლ ე ხ ი. (ნელა შემოდინა გლეხი და მისი ცოლი.) ამ ოთახში ყველა-  
ფერი მოღუშულია და დამწუხრებული.

ც ო ლ ი. სად მომიყვანე, კაცო, ამ უბედურ ადგილას.

გ ლ ე ხ ი. გლეხიკაცი ყველა საქმეში უნდა იყოს ჩახედული.

ც ო ლ ი. ამათი საქმე ეშმაკისაა.

გ ლ ე ხ ი. შენ გგონია, გლეხს ეშმაკი აჯობებს ჭკუით?

ც ო ლ ი. დარისპანის ხომ გეშინია?

გ ლ ე ხ ი. გლეხს არაეისი არ ეშინია.

ც ო ლ ი. იმ ბიჭს რას უზამენ, მოკლავენ?

გ ლ ე ხ ი. იმ ქალის საქმროს? ისიც ჩვენი ანასხლეტია.

ც ო ლ ი. ყუმბარით რომ იმდენი უდანაშაულო ხალხი გაწყვი-  
ტეს, თურმე მაგ საწყალს გამოუგონებია.

გ ლ ე ხ ი. კი, მაგ ბიჭმა გამოიგონა.

ც ო ლ ი. ხალხი სულ ამოუქლეტიათ!

გ ლ ე ხ ი. კი, ამოწყვიტეს.

ც ო ლ ი. მერე, კაცო, ესაა შენი ანასხლეტი?!

გ ლ ე ხ ი. (დარდით). ჩვენი ანასხლეტია. ნიჭი გლეხკაცისა აქვს,  
ჭკუა კი სხვისი, დარისპანმა ასესხა.

ც ო ლ ი. ამბობენ, გაგიჟდაო.

გ ლ ე ხ ი. ტყუილია, უგონებენ.

ც ო ლ ი. ავადმყოფი თუა, ვერ დასჯიანო.

გ ლ ე ხ ი. ვინ იცის?

ც ო ლ ი. საწყალი.

გ ლ ე ხ ი. აგერ, ამოვეფაროთ იმ ფართო სკამებს.

ც ო ლ ი. ის ოხერი ხე კი იზრდება და იზრდება. (ბოროტების ხეზე  
უთითებს.) ნახე, რამხელა გამხდარა!

გ ლ ე ხ ი. ნიადაგი გაუბოხიერეს. ამათ ხელში ის ხე ძალიან  
დიდი გაიზრდება.

ც ო ლ ი. კი, ნამდვილად სწრაფად იზრდება.

გ ლ ე ხ ი. ნუ სწუხარ, ჩემო ცოლო! ბოლოს და ბოლოს სიკეთე  
მანც მოერევა, მანც წააქცევს მაგ შხამფესვიანს.

ც ო ლ ი. (ყურს უგდებს). ხმაურია, მგონი მოდიან!

გ ლ ე ხ ი. იცოდე, ცხვირი არ დააცემინო, ჩუმად ისუნთქე. იცი,  
რა ეშმაკები არიან? დარისპანის შვილობილებია.

(იმალებიან. შემოდინ კორფლიანი, გამომთვლელი, დარისპანი და ვაჟი.)

დარისპანი. აბა, დაბრძანდიო. (იცინის.) ამბობენ, ჩვენი სასამართლო ქაჯთა სასამართლოაო, დე, იხუმროს!

კორფლიანი. ჩვენი ხელობა ხუმრობას ვერ იტანს.

გამომთვლელი. დავიწყით.

დარისპანი. დავიწყით. (ვაჟს.) გრძნობთ თუ არა თავს დამნაშავედ?

ვაჟი. მე?! რასაკვირველია! (ყველანი გაოცდებიან, მისკენ მიიწევიან.)

დარისპანი. ასე გეთქვა, რას გეაწვალე ამდენ ხანს. რამდენი ხანია შენს თავს გეთხოვენ!

გამომთვლელი. თქვენ ვერ გაიგეთ, ეს სხვას ამბობს.

დარისპანი (აღგება.) გრძნობთ თუ არა თავს დამნაშავედ სახელმწიფო დალატში?

ვაჟი. სახელმწიფო რა შუაშია, მე ხალხს ვულალატე!

დარისპანი. ერთი უყურეთ! ხალხი რა შუაშია?!

ვაჟი. მე დავხოცე ასი ათასები, მომავალში უფრო მეტიც დაიხოცება. ყველაფერი ეს ჩემი ბრალია, ჩემი გამოგონებაა.

გამომთვლელი. ნუ ყვირით, ჩვენ სულ სხვა რამეში გდებთ ბრალს. თქვენ ულალატეთ სახელმწიფოს, ვილაც უბირი გლეხის თანდასწრებით გაეცით საიდუმლოება, გამოიჩინეთ სისუსტე. ამისათვის პასუხი უნდა აგოთ.

გლეხი (ჩუმად). ნედავ, ქალო, ჩვენც გავუჩვევიართ ამ საქმეში!

ცოლი. რაღა გვეშველება ახლა?

დარისპანი. ავადმყოფობას ნუ იგონებთ, სიმულაცია ჩვენთან არ გაგივათ.

გამომთვლელი. თქვენ ატომის ყუმბარა შექმენით, უარესის შექმნაზე კი უარი თქვით.

კორფლიანი. მოიგონეთ სიგიჟე და გლეხის თანდასწრებით სახელმწიფო საიდუმლოება გაეცით.

ვაჟი. სად არის ჩემი საცოლუე?

დარისპანი. დაპატიმრებულია, ის წამლავდა თქვენს გონებას.

ვაჟი (ყვირის). ახლავე გაანთავისუფლეთ! მე ეწამლავდი მას!



- მე ვატყუებდი, მე ვლაღობდი იმ შესანიშნავ ქალს.  
**გ ა მ ო მ თ ვ ლ ე ლ ი.** დაუკვირდით, რა მოუჩმახავს იმ ქალს.  
 ის, ეტყობა, მხოლოდ ელექტრონის სკამზე მოისვენებს.  
**ქ ო რ ფ ლ ი ა ნ ი.** ასეთ სკამზე ძილი საბუდამოა, ამის შემდეგ  
 ველარავის შეაყდენს.  
**ვ ა ე ი.** თქვენ ხომ ჩემი მეგობრები იყავით, ერთად ვმუშაობ-  
 დით, ერთად შევექმენით პირველი ყუმბარა.  
**ქ ო რ ფ ლ ი ა ნ ი.** ეს პირველი ნაბიჯი იყო. შემდეგ შენ ხალ-  
 ხისაკენ გადაიხარე!  
**გ ა მ ო მ თ ვ ლ ე ლ ი.** გლახს შესჩივლე და გააგებინე ჩვენი სა-  
 იდუმლო!  
**ვ ა ე ი.** ხალხი ხომ გლახებისაგან შედგება.  
**დ ა რ ი ს პ ა ნ ი.** ხალხმა არ უნდა იცოდეს ჩვენი ჩანაჭიქრი.  
**ვ ა ე ი.** აკი მეუბნებოდით, ეს ყუმბარა ხალხს დაიცავსო.  
**დ ა რ ი ს პ ა ნ ი.** ჩვენს ნათქვამს თავი დაანებე, ლენჩო, თო-  
 რემ!..  
**ვ ა ე ი.** მართალი მითხარი. სად არის ჩემი საცოლვე?  
**დ ა რ ი ს პ ა ნ ი.** შენ კითხვებს უპასუხე.  
**გ ა მ ო მ თ ვ ლ ე ლ ი** (სიხარულით). ივენ შევექმენით შენსაზე  
 ასიათასჯერ მეტი ძალის ყუმბარა.  
**ვ ა ე ი.** ის მაინც მითხარით, რამდენი კაცი დაიღუპა ყუმბა-  
 რის აფეთქების დღეს?  
**ქ ო რ ფ ლ ი ა ნ ი.** შენ ისედაც შერყეული ხარ.  
**ვ ა ე ი.** თქვენ არ გაქვთ უფლება დამიმალოთ.  
**გ ა მ ო მ თ ვ ლ ე ლ ი.** თვითონ დაუკარგე საკუთარ თავს ევ  
 უფლება.  
**დ ა რ ი ს პ ა ნ ი.** უფლება ამქვეყნად ძლიერი კაცისაა. სუა-  
 ტის უფლება სიკვდილია.  
**ვ ა ე ი.** გახსოვთ ერთი შლეგი, ყველაზე დიდი ომი რომ ატე-  
 ხა! მასაც ძლიერ კაცად მიაჩნდა თავი.  
**ქ ო რ ფ ლ ი ა ნ ი.** ამით რა გინდა თქვა?  
**გ ა მ ო მ თ ვ ლ ე ლ ი.** ნუთუ ვერ მიხვდით, რისი თქმა უნდა?  
**ვ ა ე ი.** თვითონვე მოიკლა თავი. ძლიერმაც კი არ დაჰკარგა  
 სიკვდილის უფლება.  
**დ ა რ ი ს პ ა ნ ი** (აღელვებით). შენ კითხვებს უპასუხე, მოლალა-  
 ტვე!

- ვ ა ე ი. ქვეყნის გაჩენის დღიდან შენ მოლაღატე ხარ.
- გ ა მ ო მ თ ე ლ ე ლ ი. შენსავით რბილი ადამიანები ჩვენს დრო-ში ვერ იკხოვრებენ.
- ვ ა ე ი. ნველელები სჯობია, არა? მერედა, მე ცოტა დავხოცე?
- ქ ო რ ფ ლ ი ა ნ ი. ხომ გახსოვს, დარისპანთან როგორ იტირე? (შებრუნდება ხალხისკენ.) ამ ვაებატონმა დასწყევლა თავისი ტყინი და ხელები, რომელმაც პირველი ყუმბარა გაიაზრა და გააქცია.
- ვ ა ე ი. საწყალი ჩემი საცოლე, როგორ მათერთხილებდა, როგორ ვუყვარდა, არ დავუჯერე მე სულელმა!
- გ ა მ ო მ თ ე ლ ე ლ ი. დიას. დარისპანსაც კი არ მოერიდა, დაწყევლა თავისი გაჩინა, დაგვწყევლა და შეგვაჩვენა ჩვენც.
- დ ა რ ი ს პ ა ნ ი. სწორედ ამდროს უნდა მოიკვეთოს ის ჩვენგან!
- გ ლ ე ხ ი (ცოლს). სიკვდილს გადაარჩა, რატომღაც ვერ ბედავენ მის მოკვლას.
- ც ო ლ ი. სიკვდილი კი ურჩივრია. ქვეყნის საწყუევარი გახდა.
- ვ ა ე ი. ჩემი სახელი ჯოჯობეთის ეშპაკზე უფრო საზიზღრად მოიხსენიება დღიდან.
- ქ ო რ ფ ლ ი ა ნ ი (დარისპანს). მე არ ვიცი, რატომ გახადეთ ამ გიჟის საქმე საკამათოდ.
- დ ა რ ი ს პ ა ნ ი. საჭირო იყო! ხალხს იგი თავის კაცად მიაჩნდა!
- ვ ა ე ი. ნუთუ ჩემი საცოლე მოკლეს? ვინ მეტყვის მართალს?!  
ქ ო რ ფ ლ ი ა ნ ი. მტრებს პატივისცემით როდი ექცევიან.
- ვ ა ე ი. ულამაზესი ქალიშვილი, სულით და გონებით მდიდარი, მხოლოდ მისი თვალები მათბობდა ამქვეყნად, მე კი არ დავუჯერე.
- ც ო ლ ი. კაცო, ეს ის ქალიშვილია, ჩვენ რომ მოგვეწონა?
- გ ლ ე ხ ი. ის არის, თავი მოუკლავს საწყალს!
- ც ო ლ ი. თავი მოუკლავს, აბა, ჩემი ანასხლეტიაო, ჩემი სხე-  
ლის ნაწილიაო, რომ გამომაყრუე?
- გ ლ ე ხ ი. კი, ჩემი ანასხლეტი იყო. ჩვენი სისხლის და ხორცის, გლეხის ნასხლეტი თავს არ მოიკლავდა. არ მჯერა. ალბათ, დაავადმყოფდა, ძალა არ ეყო.

ცოლი. კარგი გოგო იყო.

გლეხი. ის ვაჟი ჩემს ბიჭს ჩამოჰგავს, მაგრამ ჩემი ბიჭი ასეთ რამეს არ იკადრებს.

ვაჟი. დარისპანს, როგორც ყოველთვის, დღესაც მკვლევები და ჯაღოქრები სჭირდება. მაგრამ არსებობს კეთილი ძალა! დიადი ძალა!

ქორფლიანი. ნუთუ თქვენ გგონიათ, ეს სიტყვები შეგვაშინებს?

ვაჟი. არც მიფიქრია თქვენი შეშინება. სიკვდილს, ამბობენ, არავისი და არაფრის არ ეშინიაო. თქვენ თვითონ ხართ სიკვდილი!

დარისპანი. ნუ იღიმებით! თქვენი დრო დასრულდა ის, რაც დღეს მეცნიერებამ მოგვანიჭა, ნამდვილ ღმერთად გვაქცევს.

ქორფლიანი. ადამიანი ნამდვილად გახდა სამყაროს გამგებელი.

გამომთვლელი. ჩემმა მანქანებმა გამოითვალეს ვარსკვლავთა შორის მანძილები.

დარისპანი. ყუმბარებს გაეტყორცნით და თითოეულ პლანეტაზე ჩვენს საგუშაგოს გაუხსნით.

ვაჟი. უანდარმთა სამმართველოს?!

ქორფლიანი. თუნდაც ასე იყოს!

გამომთვლელი. იქიდან დედამიწას ადევნებენ \* თვალყურს.

ქორფლიანი. შფოთიან ადამიანებს იქიდანაც დააშოშმინებენ.

ვაჟი. ოკეანესავით უძირო თვალები ჰქონდა ჩემს საცოლეს.

დარისპანი. ჰქონდა. ახლა აღარა აქვს.

გამომთვლელი. ყოველი ცოცხალი სხეული შეიძლება უსულო გახდეს.

ქორფლიანი. თუმცა შემადგენლობა ისეთივე რჩება.

ვაჟი. დამცინეთ, დამცინეთ!

დარისპანი. სასამართლო უნდა დავიწყოთ.

გამომთვლელი. დადგენილება დაწერე და გათავდება.

ქორფლიანი. უსულონიც შეიძლება გაცოცხლდნენ.

ვაჟი. ეს ხვალ მოხდება, ჯერ ადრეა.

გ ლ ე ხ ი (დასინეთ). მეკვდრების გაცოცხლებას ფიქრობენ.  
ცოცხლებს კი ანადგურებენ.

ცო ლ ი. დავიდალე, წამიყვანე აქედან, წამიყვანე!  
დ ა რ ი ს პ ა ნ ი (ვჟს). დანაშაულს აღიარებ თუ არა?!

გ ა მ ო მ თ ვ ლ ე ლ ი. მე თქვენ მოცებთ, დიღო დარისპანი!  
ქ ო რ ფ ლ ი ა ნ ი. დადგინეთ, დაწერეთ და ხელი მოგვაწერინეთ.

დ ა რ ი ს პ ა ნ ი. მაშ ასე. (ვჟს.) თქვენი საცოლე...

ვ ა ე ი. ვიცი, რისი თქმაც გინდათ. ყუმბარის წინააღმდეგი იყო. ვაბ, რომ არ დავუჭერე!

დ ა რ ი ს პ ა ნ ი. ესე იგი ჩვენი მტერი იყო.

ვ ა ე ი. ამქვეყნად მხოლოდ მას ვუყვარდი დიდი, ნათელი სიყვარულით.

დ ა რ ი ს პ ა ნ ი. თქვენ დიდი საიდუმლოება გაანდეთ უბირ გლეხს.

გ ლ ე ხ ი (ცოლს). გავალ ახლა და კომბლით თავს გავუჩქვავ.

ცო ლ ი. ასეთი ლაპარაკი რატომ იცი, ჩემო ქმარო?

დ ა რ ი ს პ ა ნ ი. რისთვის გაჩუმდი? თუმცა გაჩუმება თანხმობაა.

(ამ დროს პორიზონტზე გამოჩნდება თეთრი კვამლი და ამ კვამლში ნელა მიცურავენ კუბოები. კუბოები სხვადასხვა ფერისაა.)

ვ ა ე ი (დააკვირდება). ღმერთო ჩემო! ეს რა არის? ვაი ჩემს თავს, ვაი ჩემს გაჩენას!

დ ა რ ი ს პ ა ნ ი (უვირის). ეს დემონსტრაცია ვინ მოაწყო, ეს შეთქმულება ვინ გაბედა?

გ ა მ ო მ თ ვ ლ ე ლ ი. ეს ხალხმა შემოგვიტია, დასაფლავებია.

გ ლ ე ხ ი. რატომ არის სხვადასხვა ფერის ეს კუბოები?

ცო ლ ი. ვაიმე შვილებო, ვაითუ თქვენც რაიმე გიჭირთ?!

დ ა რ ი ს პ ა ნ ი. ნუთუ ვერაფერი მოახერხებს: პოლიცია, ჯარი, ათასნაირი სამმართველოები...

ქ ო რ ფ ლ ი ა ნ ი. ცაში ავარდნილმა თეთრმა სინათლემ და ტალახიანმა შავმა წვიმამ თავისი გაიტანა.

ვ ა ე ი. აი, რისი ეშინოდა ჩემს საცოლეს!

ქ ო რ ფ ლ ი ა ნ ი (ფიზიკოსს). შენი ყუმბარა ხომ ბევრად უფრო საშიშია?

გ ა მ ო მ თ ვ ლ ე ლ ი. მან ტალახიანი წვიმა არ იცის, თეთრი თოვლის ფანტელელებით მოეფინება მიდამოს.

ვ ა ჟ ი. თქვენ უკვე ისიც გამოგიცდიათ!

გ ლ ე ხ ი. ქალო, ხედავ რამდენი ადამიანი დაუხოცათ?

ც ო ლ ი. ჩვენი ბიჭები კი ისევ იქ არიან, შეეხვეწე, კაცო, დარისპანს, ამბავი გვითხრას.

გ ლ ე ხ ი. პირველად ხალიბა მოჰკლეს. ახლა ასიათასები, ხვალ მილიონებს არ დაზოგავენ, ოღონდ დოლარები დააგროვონ!

(კუბოს უკან სივრცეში ვაჟის საცოლე გამოჩნდება.)

ვ ა ჟ ი. შენც მანდ ყოფილხარ. მითხარი, ცოცხალი ხარ?

დ ა რ ი ს პ ა ნ ი (გაოცებულ). თითქოს ამ ხემ ზრდა შეაჩერა.

გ ლ ე ხ ი (ცოლს). ქალო, ერთი უკანასკნელად მაინც ვცადოთ და ვკითხოთ ჩვენი ბიჭების ბედი.

ც ო ლ ი. ჰკითხე, ჩემო კაცო, ჰკითხე.

დ ა რ ი ს პ ა ნ ი (სიკეთის ხეს აკვირდება). ეს კი უფრო გამოცოცხლდა, ტოტებს მეტი ფერი მოეცათ. უფრო ძალუმად შრიალებენ ფოთლები. რას ნიშნავს ყოველივე ეს?

გ ლ ე ხ ი (გამოდის საფარიდან). დარისპან, ერთი სიკეთე მაინც ქენი, გვითხარი ჩვენი ბიჭები სად არიან?

დ ა რ ი ს პ ა ნ ი (გაოცებულ). შენ აქ ვინ მოგიყვანა? (გაბრაზებული ყვირის.) სასამართლოზე ვინ შემოგიშვა?

ვ ა ჟ ი (გლუხს). შენ მაინც მითხარი მართალი, ნუთუ ჩემი საცოლე მოკვდა?

გ ლ ე ხ ი. დარისპან, ჩემი ბიჭების სამყოფელი შენს გარდა არავინ იცის, გვითხარი, შე კაცო!

ც ო ლ ი (გამოძვრება). გვითხარი, ბატონო დარისპან, გვითხარი!

დ ა რ ი ს პ ა ნ ი (გახელებული). მთელი ჭალაბი აქ ყოფილა. ამან ჰქვია დახურული სასამართლო?!

(უცებ გამოჩნდება სამი ბიჭი, ეტყობათ, ნაომარნი არიან, ფარაჯები გახსნილი აქვთ.)

გ ლ ე ხ ი (ცოლს). ქალო, გაიხედე იქეთ, ვინ არიან ის ახალგაზრდები?!

ც ო ლ ი (შეხედავს). უიმე! ჩვენს ბიჭებს ჰგვანან!!!

დ ა რ ი ს პ ა ნ ი (ბიჭებს უკვირდება). ესენი ვინლა არიან? ცეცხლით უნდა ამოვბუგოთ ეს ქვეყანა!

გ ლ ე ხ ი (ღიწად). იცი, რა გაგახსენოთ, სწორედ ასე უთხრა თურმე ღმერთმა არარატის მთასთან ნოეს: თუ კიდევ ხალხი გაირყვნა, მაშინ ცეცხლით იქნება წარღვნა!

ღ ა რ ი ს პ ა ნ ი. (გლახს). რა გაცილებს?

გ ლ ე ხ ი. ხედავ, ჩემი ბიჭები ცოცხლები ყოფილან!

ც ო ლ ი. ენაცვალოთ დედა, როგორ დავაუკაცებულან!

ვ ა ჟ ი (გლახს). ჰკითხეთ, ჩემი ცოლისა ხომ არაფერი სმენიათ?

გ ა მ ო მ თ ვ ლ ე ლ ი. ეტყობა, ამ ბიჭებმა ჩვენზე ნაკლებ არ იციან სამყაროს ნატამალის ამბავი.

ქ ო რ ფ ლ ი ა ნ ი. ნატამალი იგივე ატომია!

გ ლ ე ხ ი. ჰოო, თქვენ რაც გინდათ ის დაუძახეთ, ჩვენ კი ქვეყნის ნატამალს დიდი ხანია ვიცნობთ.

ღ ა რ ი ს პ ა ნ ი (თავისთვის). ყოველგვარი ძალა უნდა ვიხმაროთ ამის მოსათოკავად.

გ ლ ე ხ ი (გაიგონა). ძნელია, რადგან ეს ბიჭები გამოჩნდნენ, ძნელია. მათ მიწის გემო იციან, თქვენც გიცნობენ, ხომ იცი ვისი შვილებია?!

(ბიჭები ნელ-ნელა ჩამოდიან მალლიდან და დედ-მამას ეხვევიან.)

ღ ა რ ი ს პ ა ნ ი. ათასობით წელი ვებრძვი ამათ და მაინც...

გ ლ ე ხ ი. ხალხნო, აქეთ მომხედეთ, თქვენი შვილები ხომ გიყვართ? ეს ხე მომაჭრევენთ, მომათხრევენთ. თქვენ გგონიათ, ვერ მოვერევეთ? აი, ჩემი ბიჭები აქ არიან; ისინი ყველა ადამიანის მეგობრები არიან. ქვეყანა მოიარეს, ყველას იცნობენ, ადამიანებსაც იცნობენ და მათ მეთაურებსაც. შეიკრიბენით! ხელი ხელს ჩაჰკიდეთ! მხარი მხარს მიეცით, გული გულს დაუკავშირეთ! მტრობა განდევენთ, ძმობა დათესეთ. აბა, ბიჭებო, ცული მომაწოდეთ! (აძლევს ცულს. შემოკრავს ბოროტების ხეს). აი მე პირველმა შემოგვარი. ხომ ხედავთ, როგორ ჩამოაპო ცულის პირმა ეს ბოროტების ხე. აკი ამბობდნენ, ჩვენი ცული ვერ მოჭრისო. ხალხის მკლავი მაგარია, შეუღრეკელია, გაუტეხელია, რა არ გადახდათ ამ ბედნიერ ადამიანებს და აქამდე მაინც თავისი ბეჭებით მოიტანეს ეს მრგვალი დედამიწა აბა, თქვენც შემოჰკარით და საქმეც ყუაზე მივა.

ც ო ლ ი. ჩემი ქმარი სულ ასე უცნაურად ლაპარაკობს!

გ ლ ე ხ ი. უცნაური აქ არაფერია, ენა დაიმოკლე, ქალო, ენა!  
ც ო ლ ი. ისინი რა იქნენ, კაცო, ამირანის პირველი ადამიანე-  
ბი, მისი მეგობრები, ძმობილები და დობილები?!

გ ლ ე ხ ი. ხალიბა-ბიჭი უკვდავებაშია გადასული. რა ხნისაც.  
იყო, ახლაც იმ ხნისაა.

ც ო ლ ი. სხვები, სხვები რა იქნენ?

გ ლ ე ხ ი. ვინ სხვები, ქალო?

ც ო ლ ი. უმადური ხარ, უმადური. რა უყავი იმ ბიქს, იმ გო-  
გოს, იმ მოხუც ქალს, აი, დუნიადარს?

გ ლ ე ხ ი. ჰოო, ისინიც ამ წუთში მოვლენ. იმათ ჩვენზე უწინ.  
შემოჰკრეს ამ ბოროტებას ცული. აი ისინიც. ათასეული  
წლების მანძილზე ვებრძოდით ბოროტების ხეს და აჰა,  
როგორც იქნა მოსაჭრელად მივუდექით... დღეიდან ეს.  
ხალხის საქმეა! საბოლოო გამარჯვებაც შორს არ არის!  
აბა, დასცხეთ, ბიჭებო!

## ხალდეს ყვავილები

ჩემს მეუღლეს ჩუტა ასათიანს

რამდენი ვარსკვლავიცაა ცაზე, იმდენივე ფერის ყვავილია დედამიწაზე. ისინი მუდამ ერთიმეორეს შესცივინებენ, ვარსკვლავები ციდან ილიმებიან, ყვავილები მიწიდან ესვრიან ცის გუმბათს ფერთა სიმშვენიერეს. სოფელ ხალდეშიც ასეა, ზევით ვარსკვლავებია, ქვემოთ, საბალახოზე — ყვავილები. ამ სოფელში ერთი გლეხი კაცი ცხოვრობდა. ერთადერთი ქალიშვილი ჰყავდა, სახელად სირინო. ცისკრის თვალის გახელის დროს დაიბადა თურმე სირინო და ამიტომ ცისკარივით თეთრი იყო მისი სხეული. ხალდეს ხეებში მუდამ უკუნი დგას. ქვეყნად რომ გაჩნდა, სირინომ პირველად მათკენ გაიხედა და ამიტომ თვალეშიც ღამესავით შავი გამოჰყვა.

ხალდეს გარშემო, მთის კალთებზე, გაუვალი ტყეებია აშოლტილი. ისინი ხშირი ფოთლითა და წიწვით არიან დაბურული. სირინოსაც ტყერივით დალალები დაჰყოლია. გათენების უამს, მზე რომ მთის წვერზე შემოჩდება, დედამიწამ ჩაფიქრება იცის. ალბათ, ფიქრობს, ქვეყნისათვის ღამე ჯობია თუ დღის სინათლეო. სირინოც, რადვან ცისკრის გახსნისას დაიბადა, ჰკვიანს ქალიშვილი დადგა.

იზრდებოდა სირინო. დღითიდღე მშვენიდებოდა. როგორც ყოველ სვანს, შრომა მასაც ძალზე უყვარდა. დილით ძროხებს მოწველიდა, ყველს ამოიყვანდა, იატაკს დაგვიდა, საქონელს საბალახოზე გადენიდა, სანადიროდ წასულ მამას სადილ-ვახშამს დაუმზადებდა. მერე დღიმ-საეარცხელზე თავის ხელით ნართავ შალს ქსოვდა საჩოხედ.

კავკასიონის ყინულოვანი მწვერვალების ახლოს, ყველაზე



მაღალ კლდე-ფერდს არწივის ბუდესავით მიჰკერია ხალდე. არწივიც ბევრი ბუდობს მის პიტალოებზე. გაღმა-გამოღმა, ათასწლოვანი მარად მწვანე ხეები ცამდე აწვდილან. ლამაზი სოფელია ხალდე. ქვემოთ მდინარე ხალდეშურა ეხეთქება ტიტველ კლდეებს, ზემოთ საძოვრები იწყება. იქ მთის ყველა ბალახი ხარობს. ყველაზე მეტად კი სამყურა იყრის ტანს. მისი ღერო და ფოთოლი მზის შუქით და მიწის რძით არის სავსე. ამიტომ არის იქაური ოთხფეხი მსუქანი და გემრიელი. სირინოც სწორედ ამ იალაღებისაკენ მიდენიდა თავის ცხვარ-ძროხას. დილიდან დაღამებამდე უმწყემსოდ დაბალახობდნენ და საღამოს ჭიშკარს მოადგებოდნენ. ჭიქნები კოკებივით ეკიდათ, გავაზე ვეფხვი კბილს ვერ მოიკიდებდა.

ერთ დილით გაღმა საძოვარზე სირინომ სხვისი ნახირი შენიშნა. ნახირს ახალგაზრდა ბიჭი უღდა, ხელში ჭუნირი ეკავა და უკრავდა. წარმტაცად ნაზი ხმები მოდიოდა საძოვრიდან. ასეთი ხმები დღესასწაულის დროსაც არ გაეგონა სირინოს. ბიჭმაც დაინახა და მისკენ წამოვიდა.

— კარგი დაკვრა გცოდნია, — შესცინა სირინომ.

— ყვავილებმა მასწავლეს ასეთი სიმღერები.

— ყვავილებმა?!

— ჰო, ყვავილებმა. მათმა ფერმა და რხევამ, ნიავი რომ დაუბერავს.

— განა ყვავილები მღერიან?

— თუ დაუკვირდები და მოუსმენ, ამქვეყნად ყველაფერი მღერის.

— მე კი არ მესმის, — სინანულით თქვა სირინომ.

— მე მესმის, — მშვიდად მიუგო ბიჭმა.

— შენ რა გქვია?

— შერგილი.

— მე კი სირინოს მეძახიან. ნეტავ რატომ არ მესმის ეს სიმღერები?!

— მე ბაბუა მყავს, ჯოკია ბაბუა.

— მერე?!

— მან მითხრა, ამ სიმღერებს მხოლოდ ის გაიგებს, ვისაც შზისქვეშეთი ძალიან უყვარსო. ქვეყნის დიდი სიყვარული თუ გაქვს, ყველას სიმღერა გესმის და თვითონაც გემღერებაო.

— მე კი ბაბუა არ მყავს. არც დედა მყავს, არც და-ძმა.

— მაშინ რა გემღერება, ჩემო დაო?!

— არც მემღერება, შერგილ, სიმღერა კი მაინც მიყვარს.

— ნათელი გული გქონია, მაშინ ყვავილებისაც უნდა გა-  
იგონო!

— არ მესმის, ვაიმე, ნეტავ რატომ არ მესმის?!

— ყოველი ფერი თავის სიმღერას ამბობს.

— ეს არ ვიცი, შერგილ, არ ვიცი.

— ჰოდა, უნდა მიხვდე.

— ყვავილები სულიერია?!

— ფერები უდგამენ სამყაროს სულსო, — მითხრა ჯოკია  
ბაბუამ.

— ვითომ?!

— ასეა, ფერები თუ აირია, დაირღვა, გაქრა, ქვეყანაც წა-  
იშლება, გაქრება, ერთფერი გახდება.

— უიმე!

— ასეა. ხეს თავის ფერი აქვს, ქვას — თავისი. წყლის ფე-  
რი ხომ კლდისას არა ჰგავს, ცის ფერი — მიწისას? ცის სიმღერა  
სხვა არის, მიწისა კი სხვა: ყვავილებიც ასეა, კაცს იმ სიმღერის  
ეშხზე მოიყვანენ, რა ფერისაც თვითონ არიან.

— სიმღერის ეშხზე?!

— ჰო, ქვეყნად სიხარულს აფრქვევენ. აი, ხომ ხედავ, მეც ამ  
ეშხით ვმღერი, — წყნარად თქვა შერგილ-ჰაბუქმა და ჭუნირი  
ააჟღერა. სიმღერა ხალდეს მთის კალთებზე და მინდვრებზე გა-  
იშალა, ხალდეშურას ნაპირებს მოედო, რძიან ბალახს და აშოლ-  
ტილ ფიჭვებს მოეფერა. შეაჟრჟოლა ყვავილებს, ათრთოლდ-  
ნენ ისინი.

— ეს იის სიმღერაა — მისი ფერივით ნაზია.

სირინოს მართლა მოეჩვენა, თითქოს ხელში მთელი ბლუ-  
ჯა ია ჰქონდა და მათი სურნელება აბრუებდა კიდეც:

— აბა, გვირილების სიმღერას დაუგდე ყური!

ჭუნირმა ახლა სულ სხვანაირი ჰანგები მოჰფინა მიდამოს.  
სირინოს თვალი ღნებლივით მინდვრისაკენ გაექცა: ბალახებში  
უეცრად თითქოს თეთრკაბიანი გოგონები გაჩნდნენ. ნელი რხე-  
ვით ცეკვავდნენ. სწორედ ისე, როგორც გვირილებმა იციან  
ნიაზზე. შერე თანდათან იმძლავრა ქარმა, თეთრ და ყვითელ-

თავსაფრიანმა გოგონებმა ცეკვას უმატეს, უფრო აშრილდნენ, მთელ მინდორს მოედნენ.

შეშინებულმა გოგონამ ხელი მოჰკიდა ბიჭს. შერგილმა ათროლებული სიმები გააჩერა. ჭუნირიც დადუმდა. მიდამო დაწყნარდა, ადრინდელი სახე დაუბრუნდა.

ღრო გავიდა. სირინო ყოველ დილას და საღამოს ხედებოდა შერგილს. ჭაბუკმა მასაც გადასდო ყვავილთა ფერების სიყვარული. ისხდნენ და გარინდებული გასცქეროდნენ მიდამოს. საქონელი დაბალახობდა, ხარბად გლეჯდა სამყურას ყვავილებს, გული სტკიოდა შერგილს.

„ნეტავ რატომ გააჩინა ქვეყნის შემქმნელმა ასე, — ფიქრობდა, — ამ ფერთა სილამაზეს ხარ-ძროხა უნდა იწირავდეს?!“

ერთ საღამოს საქონელს სულ მოეტიტვლებინა პატარა. ლამაზი მინდორი. ღერი ბალახი არ დაეტოვებინა. მხოლოდ ყვავილთა ფურცლები ეყარა აქა-იქ საცოდავად. შერგილს თვალი გაუშტერდა, ერთ ადგილას ყვავილთა ფურცლები ისე მოჰფენოდა მიწას, ხარის ვეება თვალს ჰგავდა, ნამდვილ ხარის თვალს.

შერგილი დაიხარა. ფურცელთა შორის, სწორედ თვალის გუგის ადგილას, შავი კენჭი ელვარებდა.

„ვინ დააგდო ეს შავი კენჭი ამ ფურცლებში? ალბათ, უნებლიეთ მოხდა ასე. ხარის თვალი კი გამოვიდა. ეტყობა, კენჭებიითაც შეიძლება ხატვა. ხალდეშურას ნაპირას ხომ ათასი სხვადასხვა ფერისა და ზომის კენჭია. რასაც მინდა, იმას დაეუხატავ სირინოს.“

შერგილი თავქვე დაეშვა მდინარისაკენ.

ერთ ადგილს წყალს გვერდი ექცია და მომცრო მალლობი დაეტოვებინა. ნაპირზე კენჭები იყო მისილული: ჭაბუკმა ამ ნაპირს მიაშურა.

დაიხარა და კენჭების ამორჩევა დაიწყო. შავი და თეთრი, წითელი და ყვითელი, წაბლისფერი და რუხი, აგურისა და წყლის ფერი. ზოგი ცისარტყელასავით მრავალფერად ელვარებდა, ზოგი სულ უფერო იყო, ზოგან თითქოს ორს ერთი ფერი დაჰკრავდა და მაინც განსხვავდებოდნენ ერთმანეთისაგან.

— ყვავილებსაც კი არ აქვთ ამდენი ფერი — გაოცდა შერგილი.

„იქნებ სირინოს სახე დაეხატო?“ — უცებ მოუვიდა აზრი და გაუხარდა.

„ეს თვალეზი იყოს“, — ერთი ზომის ორი შავი კენჭი ამო-  
არჩია და სველ სილაზე დააწყო. „ეს წარბები, წამწამები“. მა-  
ლე სახის ნაკეთებზე გადავიდა. ეს შედარებით ეძნელა. ოფლი  
წურწურით ჩამოსდიოდა. კარგად მოსალამოვდა, გაბრუებულ-  
მა ყველაფერი რომ მოათავა. ნამუშევარს დახედა, შეერთა —  
ნამდვილი სირინო უყურებდა! ქალიშვილს ბრიალა, შავი თვა-  
ლები და გრძელი, შავი ნაწნავეები ჰქონდა.

თავი უხუზრდა, თვალეზი ბედნიერებით უბრწყინავდა ბიჭს.  
კლდის ქიმზე ჩამოჯდა და გარემოს თვალი მოავლო. მერე ისევ  
რალაც მოიფიქრა და წამოდგა. იქვე მდგარ თხმელას მკლავის  
სიმსხო ტოტები მოამტვრია, თავის ნამუშევარს შემოაარაგვა.  
დილამდე ნადირს რომ არ გადაევილო და არ წაეშალა, ზევი-  
დანაც ტოტები გადააფარა და შინისკენ გაუყვა.

მზე ჯერ კიდევ არ ამოწვერილიყო, რომ შერგილი სირინოს  
მამის კოშკს მიადგა.

სირინო ბაკში იყო, ძროხას წეეღიდა.

— ასე აღრე რამ მოგიყვანა, რა ამბავია?!

— ხალდეშურაზე ჩამოდი, რალაც უნდა გაჩვენო! — წყნა-  
რად უთხრა ჭაბუკმა.

სირინომ გაკვირვებით შეხედა მის გაბრწყინებულ სახეს.

— კარგი, შენ წადი და მეც მალე ჩამოვალ!

მოვიდა თუ არა, შერგილმა თხმელის ტოტები გადასწია.  
სირინომ გაოცებისაგან ერთ ხანს-ხმავერ ამოიღო.

— ეს რა გიქნია, შერგილ?! — აღმოხდა ბოლოს.

— შენ დაგხატე, ფერად-ფერადი კენჭები მოვძებნე და იმით  
დაგხატე. არ მოგწონს?

— უიმე, როგორ მგავს, ნამდვილად მე ვარ, ნამდვილად  
ჩემი თვალეზია, ჩემი ნაწნავეები. შენი ჭირიმე, მამამ არ ნახოს,  
ჯადო კაცი ეგონები, შერგილ!

• • •

დიდი დავით მეფე გელათის ტაძრის შენებას შეუდგა. სა-  
მასი ნაბიჯის დაშორებით ქვის სატეხებით ვეება კლდეებს

გლეჯდნენ და ხის მორებზე აცურებდნენ. ქვის მთლებს მოსვენება არ ჰქონდათ. კალატოზები მიწაყრილზე იდგნენ და ისე მუშაობდნენ. უზარმაზარ, გათლილ ქვებს აიტანდნენ, დაათარაზობდნენ, გაასწორებდნენ, დაკირავდნენ და ზევით მიიწევდნენ. ტაძარი ყოველდღე მთასავით მაღლდებოდა. გუმბათი დასრულდა და ახლა შიდა სამუშაოები გაჩაღდა. ტაძარს გარედნ მიწა შემოაცალეს. სარკმელებიდან მზის შუქმა შეიხედა. კედლების მოხატვა დაიწყო. ფერწერის ოსტატები ერთმანეთს ფუნჯებით ეპაექრებოდნენ. საკურთხეველის თავზე ამართულ ხარაჩოზე უწვერულეაშო ბიჭი შემდგარიყო და საზომით ხელში გუმბათს აკვირდებოდა. უყურებდნენ და ვერ მიმხვდარიყვნენ, რას აკეთებდა.

მხატვარი არ იყო, ფუნჯი არ ეჭირა. მღებავი რომ ყოფილიყო, საღებავევებით ექნებოდა ხელები დასვრილი! მღესავი არ იყო, ხელში ჭაფჩა არ უჩანდა. ქვის ოსტატი რომ ყოფილიყო, საჭრისი ეკავებოდა!

— ხომ არ თამაშობ, ბიძია, მანდ შენ, — ვერ მოითმინა ოკრიბელმა მღებავმა ლუკაია ლომთაძემ.

ბიჭმა ხმა არ გასცა, მხოლოდ ღიმილით ჩამოხედა.

ღიმილი მოეწონა ლუკაიას. თან ეს ბიჭი კიდევ შეეცოდა.

— არ ჩამოვარდე, ხომ იცი, მაგ სიმაღლიდან სული არ დაგყვება ძირს!

არც ახლა ათხოვა ყური ჭაბუკმა.

უცებ ჩოჩქოლი ატყდა. ტაძარში მეფე შემოსულიყო. ხუროთმოძღვარი ახლდა. ყველამ მოკრძალებით დახარა თავი. ჩოჩქოლმა ჭაბუკიც ჩამოახედა ძირს. მეფე რომ შეიცნო, შეიშმუშნა.

— მანდ რას აკეთებ, სვანო ჭაბუკო?! — გაიკვირვა მეფემ.

— უამისოდ არ შეიძლება, მეფეო, ზომა უნდა ავიღო, ზუსტი ზომა.

— ზომა? — ვერ მიხვდა მეფე.

— კი, მეფეო. ყოველი ფერის კენჭი თავის ადგილას უნდა იყოს. ადამიანის სხეულიც კი სხვადასხვა ფერითაა ნაქსოვი.

— მერე მანდ რას ზომავ, შერგილ ჩემო!

— აჰ, ბატონო, იმას ვითვალისწინებ, რომელი ფერის საროთი რომელ ადგილზე უნდა იქნეს ჩასმული. თუ ეს დანიშნავა, ყველაფერი წყალში გადაიყრება.

— დიდად ნიჭიერი ქაბუკია, — ჩაილაპარაკა ხუროთმოძღვარმა, — უსწავლელი და ასეთი გამკვეალავი გონება პირველად მხედება ჩემს ცხოვრებაში.

— მასალა თუ მოიტანეს? — ისევ ხმამაღლა იკითხა დავითმა.

— მაგის მასალა ზღვის კენჭია, მეფევე ბატონო, მთხოვა, გამიშვიო. მე თვითონ შეეპარჩევ და მოვაგროვებო.

— შენ სად ფიქრობ გაუშვა?

— საბერძნეთში მინდოდა გამეგზავნა. შერგილს დაუყინია, გონიოს კენჭს მეტი სილამაზე აქვსო. იმასაც ამბობს, ჩვენი ხატი ჩვენი მასალისა სჯობიანო.

— მართალი უთქვამს — ღმერთი ზომ სხვისია და სხვისი, ხატის მასალა მაინც იყოს ჩვენი.

— როგორ თუ სხვისი?! — გაიოცა ხუროთმოძღვარმა.

— ზიარი ღმერთია. ბერძნების ზიარი ღმერთი. ამან მისცა საშუალება ბერძნებს — საუკუნეების მანძილზე ჩვენი მიწა-წყლის მეუფენი ყოფილიყვნენ.

ხუროთმოძღვარს თვალები მოეწკურა, თვითონ ათინაში აღზრდილს, პალესტინაშიც ევლო და ინდოთა ქალაქებშიც. აფრიკის ნაპირები ფეხით მოევლო, ჩინეთის ტაძრების თვალსაზრისად სიცოცხლე სასწორზე დაედვა. ყველას ღმერთი და სალოცავი იცოდა. დავითისაგან მაინც არ ელოდა ამას. გაჩუმება არჩია. ერთი კი გაიფიქრა: დიდმა მეფეებმა ღმერთები თავიანთ სარღლებად გამოიყენესო. ეჰ, ასე ყოფილა და ასე იქნებაო, დაუმატა გუნებაში და კბილს კბილი დააჭირა. დავითი კი ამ დროს მინდორზე გავიდა. აკადემიის საფეხურებს ჩაუყვია. დიდი და მძიმე ხის კარი შეაღო. ოცდაათი ახალგაზრდა ბერი თავჩაჭინდრული საქმიანობდა. არსენ მოძღვარი დასავლეთით ამალღებულ ადგილას რალაცას ჩაპკირკიტებდა. არც ერთს მეფის მისვლა არ შეუტყვია. ძალზე გართულნი ჩანდნენ თავიანთი საქმით.

დავითს თვალეში სინათლე მოემატა. სახეზე სიამოვნება დაეტყო. ბატის ფრთის ყალმები ჩიტის ბარტყებივით წრიპინებდნენ პერგამენტებზე.

„უკვე შედგომია იოანე ბერი თავის დიდ საქმეს“, — გა-

იფიქრა მან და დარბაზიდან ისე გამოვიდა, იქ მსხდომთ ისევ არაფერი გაუგიათ.

ამან კიდევ უფრო გაახარა მეფე-ბატონი. როცა ზემოთ, მინდორზე ამოვიდა, დაინახა, ტაძრის ეზოში ქალიშვილი შემოდოდა. ეუცხოვა დაუსრულებელ ტაძარში ქალის ყოფნა. როცა დაუკვირდა, მისმა სიმშვენიერემ შეატოკა.

— შენ რამ მოგიყვანა, გოგო, აქ?

ქალიშვილმა კარგა ხანს უყურა მეფეს, ტანსაცმელზე შეამჩნია დიდკაცობა და წყნარად, მოკრძალებით ჩაილაპარაკა:

— ხალდედან ჩამოვედი. აქ ჩვენებურები მუშაობენ, მათი ნახვა მინდოდა.

— ხალდედან?! კარგა მანძილი გამოგივლია. ძმა ხომ არ არის აქ შენი?

— არა, ძმა არ მყავს.

— ბიძაშვილია?

— არა, არც ბიძის შვილია.

— ჰო, მაშ საქმრო ყოფილა.

ქალიშვილს ლოყებზე აღმური მოედო, სიბრახე დაეტყო.

— ქალის შეურაცხყოფა რა საკადრისია?!  
მეფე შეჩქვიფდა.

— უკადრისი რა გითხარი, ქალწულო?!

— თქვენ ბატონი ბრძანდებით, ხომ? — შეუტია გოგონამ.

— დიდი ბატონია, გოგო! — გაუსწორა ხუროთმოძღვარმა.

— ეტყობა, რომ ბატონია, ტყუილა როდი მითხრა მამამ. ბატონები მოურიდებელნი არიანო. ჩვენ კი ბატონი არ გვეყავს და არც გვეყოლება.

მეფეს თვალებში ასი სანთელი აენტო.

— მართალი ხარ, შვილო და დაო ჩემო. ქეშმარიტად, ბატონები მოურიდებელნი ვართ. შენ კი ვისი ხარ ხალდედან?

— გულდედან ქალდანისა ვარ. სირინო მქვია.

— ეს კი მეფე-ბატონია, გოგო, — ისევ დაიბუხუნა ხუროთმოძღვარმა.

— მეფე?! — ქალიშვილმა თავი გააქნია, — არა, მეფე ასე არ აჩქარდებოდა. მამამ თქვა, ისეთი ჭკვიანი და ბრძენი დუნიაზე არ დაბადებულაო, შერგილმაც ასე დამაჭერა.

— აი, ხომ ხედავ, მე კი მაინც პატარა მოკვდავი შეგეფეთე.

მაპატიე, შვილო! შერგილი კი იქ არის, ტაძარში. შეიარე და ნახავ. განამუსებ, ჩვენი შეხვედრის ამბავი არავის უთხრა.

სირინო გაშტერებული გასცქეროდა მიმავალ მეფეს.

— კი, ის არის, — ჩაილაპარაკა. უცებ ჩიტივით შეფრთქილა და დაედევნა.

— მეფეო! მამამ სიტყვა დამაბარა!

— თქვი, სირინო ჩემო!

— ცხენი გაგიზარდე ისეთი, თქვენს გარდა სხვა ვერ შეჯდებაო.

— მადლობა მოახსენე, სირინო, მამას, თან ეს საჩუქარი მიართვი! — დავითმა სავსე ქისა მიაწოდა ქალიშვილს.

— ჰა, ღმერთო მომკალი. მამამ ისიც დამაბარა, სვანმა ვაჭრობა არ იცის, ის ყველაფერს ქვეყნისა და მეფის სიყვარულით აკეთებსო.

— აქაც მაჯობე, სირინო! — მწარედ გაეღიმა მეფეს. — კარგი, ასე იყოს. როდის აპირებს იმ კვიცის გახედნას გულდედანი?

— ზაფხულის ბოლოს თვითონ ჩამოგიყვანო.

— მანამ შეიძლება ჩვენ მოგვიხდეს იქეთ ამოსვლა.

— უკეთეს ამბავს მამას ვერავინ უმახარობლებს! — გულწრფელად გაუხარდა სირინოს.

მეფეს მეტად მოეწონა გოგონა, თავისთვის რაღაც გაიფიქრა და ოდნავ თვალის მოჭუტვით ჰკითხა:

— სირინო, შენ მაინც არ გვითხარი, შერგილთან რისთვის შეწუხებულხარ?

გოგო ეშმაკობას მიუხვდა და გაწითლდა.

— ხალდეშურას ნაპირებზე მოგროვილი კენჭი ჩამოვუტანე.

— რა ჩამოიტანე, გოგო? — ველარ მოითმინა ნათქვამით და ეჭვებულმა ხუროთმოძღვარმა.

სირინოს ფერმა გადაჰკრა. მიხვდა, რომ შერგილის საიდუმლო გასცა და შეწუხებულმა მეფეს შეხედა. დავითიც იმ წუთში მიხვდა მისახედრს.

— მეფეს, შვილო, ქართველი კაცი ირაფერს დაუმალავს. ისე, თუ მენდობი, საიდუმლოს შენახვაც ვიცი.



ახლა სირინოს მამის ნათქვამიც გაახსენდა, მეფეს არაფერი დაემალება, ყველაფერი გაემხილებათ.

— შერგილმა რომ გაიგოს, შეიძლება ეწყინოს. საიდუმლოდ გეტყვი, მეფეო, მან ყვავილთა სიმღერები იცის.

ხუროთმოძღვარს თვალები აუბრიალდა. გოგო შეშლილიაო, იფიქრა და მეფეს შეწუხებულმა შეხედა. დავითს თვალი არ დაუხამხამებია, დაკვირვებით უცქერდა სირინოს.

— ყვავილთა სიმღერა ვინ გაიგონა, გოგო?!

— ქვეყანაზე არავის გაუგონია, მეფევ! მარტო მას ესმის. ჭუნირზეც გადააქვს. ყვავილთა ფერებით ისეთ რამეებს მოქარგავს, ყველა სულდგმული, ვინც კი შეხედავს, სიმღერის ხასიათზე მოვა.

დავითს გაეღიმა. ხუროთმოძღვარი ჯერ კიდევ ბურანში იყო.

— ჭუნირზე უკრავს თუ? — ისევ გაღიმებით შეჰკითხა დავითმა.

— ის რომ გვირილების სიმღერას დაუკრავს, გეგონება მთელი ხალდეს გვირილები ცეკვავენო. არა, კი არ გეგონება, მართლა დაინახავ!

— ხა, ხა, ხა, — ველარ მოითმინა ხუროთმოძღვარმა. — გრძნეული ბიჭი ყოფილა.

— კი მაგრამ კენჭი რა შუაშია? — იკითხა მეფემ.

— კენჭები ხომ ფერადია, სხვადასხვა ფერის ყვავილთა ფურცლებს ჰგავს. მასაც ისე დაალაგებს შერგილი, გალობას გათქმევენებს.

— გესმის, ხუროთმოძღვარო, რას გვეუბნება ჩვენი სირინო?

ეტყობა, ახლა ხუროთმოძღვარიც მიხვდა მისახვედრს.

— გვიან მივხვდი, მეფეო. ჰე, რა ბედნიერებაა, ბავშვთა ენით სამყაროსთან საუბარი და მათი თვალით ამ ქვეყნის ყურება?!

— ხუროთმოძღვარო, ხომ გაგიგონია გლეხკაცის ნათქვამი, ადამიანი ეშმაკის შექმნილიაო!

— გაგიგონია, მეფეო!

— ტყუილია, ქეშმარიტად მცდარი ნათქვამია. კაცის გონება მხოლოდ ღმერთს შეეძლო შეექმნა. ეშმაკს რა ხელი-

ჰქონდა მასთან. მიხვდი, რა უნდა გითხრა, ხუროთმოძღვარო?!

— ვერ მიეხვდი, დიდო მეფეო.

— ადამიანის გონება სიჭაბუკიდანვე ილტვის ჩაწვდენს ცხოვრების იღუმალებას, და თუ მთლად ვერა, რალაც ბილიკს მაინც მონახავს მის შესაცნობად. მომწიფდება და სიჭაბუკის ფიჭრიც სიღარბაისლეში შედის, ისიც მასავით მწიფდება, ნაყოფიც სრულდება და რთველიც იწყება.

— უცილოდ ასეა, მეფეო, სიჭაბუკეში მეც მესიზმრებოდა ტაძართა დიდი კედლები და ცადაზიდულ შვიდ სვეტზე ამართული მისი ლაქვარდოვანი გუმბათები. ახლა, სიჭარმაგეში, თუ მეასედს მაინც შევასხი ხორცი, ბედნიერი კაცი ვიქნები.

დავითს თითქოს არაფერი ესმოდა, გარინდებული მიაბიჯებდა.

— მე კი სიჭაბუკიდან ჩვენი მამულის აღდგენა მქონდა ფიქრად და დარდად. ასი რომ გავაკეთო, ასჯერ ასი გასაკეთებელი დამრჩება. ბედნიერია ის ბიჭი, რაც უფიჭრია, ასრულებს კიდეც.

უნებლიეთ უკან მოიხედა და ტაძრის კედლებს მიაჩერდა. ხარაჩოებიდან ჩამოსული შერგილი გაბადრული მიჰყვებოდა სირინოს. რომ დაინახა მეფე მისკენ იხედებოდა, სირბილით წამოვიდა.

— ხალდეშურას კენჭი ჩამომიტანეს ხალდედან. ნახეთ, მეფეო. იქნებ ფერთა ელვარება არ მოგეწონოთ.

მეფემ ხუროთმოძღვარს შეხედა.

— აკი გონიოს კენჭი მინდაო! — გაიოცა ხუროთმოძღვარმა.

— მე, ბატონო, ხალდეშურას ხეივნი მინდა გონიოსას შევადარო. თუ საჭირო იქნა, შევეუროო კიდეც. მთის გიჟმაჟ წყალს სხვა ზომისა და ფერის კენჭები აქვს, ზღვას კიდეც სხვანაირი, ჩვენ ორივე უნდა გავსინჯოთ.

— სიმონ გამდელს და თეოდორეს ჰკითხე, შერგილ. ეს საქმე მათ უკეთ იციან.

დავითმა წასვლა დააპირა.

— მათ გარეშე ბიჯს როგორ გადავდგამო, — თითქოს თავისთვის, მაგრამ მტკიცედ ჩაილურლულა შერგილმა და მეფეს გაჰყვა.

— მოძღვართ-მოძღვარ იოანეს უბრძანებია, მცხეთის ჭვარიც ნახოს, წრომის ტაძარშიც ავიდეს, ბიზანტიაშიც უნდა გავგზავნოთო.

— ეს კარგი უთქვამთ. იქ ბევრ რამეს ნახავ და ისწავლი. მაგრამ იცოდე, მათი მსგავსობა არ ქნა. შენ შენებურად უნდა გააკეთო.

ხუროთმოძღვარმაც შეხედა შერგილს, ეტყობოდა, მის თვალებში უნდოდა ამოეკითხა, გაიგო თუ არა მეფის ნათქვამი ყმაწვილმა.

— სიმონ გამდელზე და თეოდორეზე კარგად წერენ ხატებს ბიზანტიაში?! — გულუბრყვილოდ შეეკითხა ხუროთმოძღვარს შერგილი, თან მეფეს კითხვის თვალით შეხედა.

— იმათ რა იციან, შენი თვალთ ხედავ! ახალგაზრდა ხარ და ყველაფერი უნდა ნახო.

ეზოს კარში იოანე მოძღვართ-მოძღვარი გამოჩნდა. თვალი ჰკიდა თუ არა მეფეს, შექმუევხნილი შუბლი გაეხსნა.

ბიჭი უცებ შეაჩერდა დავითს და გაოცდა. მეფეც ისე იზრდიდა წვერ-ულვაშს, როგორც მოძღვართ-მოძღვარი.

„მე მაფრთხილებს, სხვასავით არ აკეთო ხატებიო, თვითონ კი გულთ უნდა, იოანეს დაემგვანოს. თურმე მეფეებიც კი სხვებს შენატრიან! როგორც ავალ სვანეთში, ბაბუას უნდა ვუთხრაო“, — გაიფიქრა.

იოანეს მოწიწებით მიესალმნენ მეფეც და ხუროთმოძღვარიც.

— მოძღვართ-მოძღვარო, მცხეთის ჭვრის და წრომის კონქები თუ გინახავს მიკენჭილ-მიხატული?!  
იოანემ შერგილს გადახედა:

— ეს არის, მეფეო, ის სვანი ბიჭი, შენ რომ მიქე?!

— კი, ეს არის, აუცილებელია ბიზანტიაში მისი გაგზავნა,

თუ ჩვენი ტაძრების ნახვაც საკმარისია?

იოანემ შერგილს თავზე შვართი თითები დაადო, თავისკენ მიაბრუნა და პირზე სხივები გაუმრავლდა.

— ამ ბიჭს ეტყობა, რომ გვასახელებს. ბიზანტიაში წასვლა კი ერთი ზამთარი მაინც მოუხდება. წერილს მივეუწერ დიდ მოძღვართან, მეც გთხოვდით, მეფეო, რომ იქ ორი ყმაწვილი

გაგეშვათ, ეტრატები უნდა გადავაწერინოთ, უამისოდ გაგვიჭირდება.

შერგილს ხმა არ ამოუღია, მხოლოდ ფიქრმა გაჰკრა, მაშინ სვანეთში უნდა ავიდე, ბაბუა ენახო, გამოვემშვიდობო, ვინ იცის, დამხედება თუ არა ცოცხალიო.

— ორი ვითომ საკმარისი იქნება, იოანე მოძღვარო?

— გავსინჯე და ხელწერაში სხვები ჯერჯერობით მოიკოჭლებენ. მომავალში მოვამზადებთ და მეტს გავგზავნით.

შერგილს თვალები გაუბრწყინდა.

— სირინო ისე ხაზავს, მეფეო, რომ მისი გამოყვანილი ასოები ჩიტის ნისკარტებივით ლამაზებია.

მეფეს და ხუროთმოძღვარს გაელიმათ.

— კი, მეფეო, — არ ცხრებოდა შერგილი, — ჩვენმა მოძღვარმა გადააწერინა საგალობლები და თქვა, ქვეყნად ასეთი ხელწერა არ მინახავსო.

— სირინო ვინ არის? — იკითხა იოანემ.

— ჩემი სოფელია, ხალდედანაა, ჩემზე ორი წლით არის უმცროსი.

— სვანთა მზეთუნახავია, — დაუმატა დავითმა და ღიმილით გადახედა შერგილს. იოანე, ეტყობა, მიხვდა მისახვედრს.

— მერე შენ გინდა, ყმაწვილო, ქალწული ქალი უცხო ქვეყანაში გადავკარგოთ, მშობლები ვითომ თანახმა იქნებიან?!

— მერედა, ასეთი მშვენიერება იქ რომ მოგვტაცონ? უცხო ქვეყანაში ვინ იქნება მისი მცველი?! — ისევ არ შეცვალა კილო მეფემ.

— მე იქ არ ვიქნები, მეფეო?! — გაუწითლდა ლოყები შერგილს. — სირინო კი უჩემოდ ფეხსაც არ გადადგამს.

სწორედ ამ დროს სირინომ კენჭებით სავსე, შაბში გამოყვანილი თხის თეთრი გუდა ქოშინით შემოათრია ჭიშკარში.

— ქალს ასეთ მძიმე ტვირთს ათრევიან, ვაჟო? — კეთილი ღიმილით შეუტია შერგილს მეფემ.

— სირინო! — დაუძახა შერგილმა. — ხომ გითხარი, ცხენიდან საპალნე უჩემოდ არ ჩამოიღო-მეთქი?

— მინდოდა მეფეს ენახა ხალდეშურას ხვინჭკის ნაირფერობა და სილამაზე.

— აქ მოიტანე! აბა, ერთი მუჟა მოლზე გადმოყარე! — შე-  
ვლაპარაკა ხუროთმოძღვარი.

შერგილი გაიქცა და სირინოს მიეშველა. გულა ხუროთ-  
მოძღვრის ფეხებთან დააგდო, ყელი შეხსნა და გასწი-გამოსწია,  
იქიდან წვრილ-წვრილი ყვავილებივით ნაირფერად ამონათა  
კენჭებმა. ყველანი დაკვირვებით დააქვერდნენ. შერგილმა რამ-  
დენიმე პეშვი ამოიღო და ახლად ამოწვერილ მოლზე დაყა-  
რა. სხვადასხვა ფერის კენჭებმა სიმწვანეში თვალეზი უფრო  
დაჰყიტეს.

— აი, ნამდვილი მშვენიერება, არ მეგონა, ხალდეშურას ნა-  
პირზე ამდენი ფერის კენჭებს თუ იპოვნიდა კაცი! — გაიოცა  
დავითმა.

— ეს სირინოს შეურჩევია, ასე შევითქვით, — გაელიმა შერ-  
გილს და მადლობის თვალით გაიხედა ყმაწვილი ქალისაკენ.

— „ქვეყნის-სამზომლო“ ხომ არ გისწავლია, შვილო! —  
გაოცებით შეეკითხა იოანე ქალწულს.

— რა ბრძანეთ, მოძღვართ-მოძღვარო? — ვერ მიხვდა შერ-  
გილი და მერე უდარდელად დაუმატა: — სირინოს მარტო მამა-  
მისი ასწავლიდა ანბანს.

მეფეს გაელიმა:

— მოძღვართ-მოძღვარო, სირინო შერგილის თვალეზით  
ზომავს ქვეყანას. მისი მეცნიერება ყველაზე დიდი მეცნიერე-  
ბაა ამქვეყნად.

ხუროთმოძღვარი დაკვირვებით ჩასცქეროდა პეშვზე დაყ-  
რილ კენჭებს.

— დიახ, საოცრებაა! — თითქოს არც გაეგონოს მეფის სი-  
ტყვა, ისე განაგრძო მან. — დაუკვირდით, სუნიც კი თავისებუ-  
რი აქვთ. მთის ყვავილის სურნელება რაღაცნაირად შემო-  
უნახავთ. მე მეგონა, ზღვის კენჭს ჰქონდა მარტო სურნელება.  
იოანემაც პეშვით აიღო კენჭები.

— წაბლის სურნელება აქვს, — წყნარად თქვა, მერე თვა-  
ლებთან ახლო მიიტანა და დააჩერდა. — თითქმის სუყველა  
ბრტყელ-ბრტყელია. მართლაც მისწრებაა მოსახატად.

— „სოფიას კენჭი“ მაინც დაგვკვირდება. გამპვირვალეა, მი-  
ნასავეით შუქს ატარებს. ეტყობა, ერთმანეთში უნდა შევეური-  
ოთ.

მეფემ არათერი თქვა, წყნარად გაემართა ჰიშკრისაკენ. როცა უკან მოიხედა, დაინახა, იოანეს და ხუროთმოძღვარს არსენ წინამძღვარი ესაუბრებოდა.

„ნეტავი იოანე და არსენი თუ კიდეც დაობენ ერთმანეთში, — გაიფიქრა და ფიქრშივე დაუმატა: — ბრძენთა დავა ხალხისთვის სასარგებლოა. მეფეთა დავაა სისხლიანი და კაცთსაძულველი, ხალხთა დოვლათის გამჩანაგებელი, ადამიანთა გონების დამსუსტებელი. თუმცა უმეფოდაც არ შეიძლება. გონიერებს უგნურები ჰკარბობენ ამ სოფელში ყოველთვის და უმეფოდ ისინი ყველაფერს წალეკავდნენ“.



იმ წელს ზამთარი ადრე მოვიდა. გიორგობის თვეში ხალდეს კალთებზე სამი წყრთა თოვლი იდო. მონადირეები მთაში გაიკრიფნენ საწადიროდ. სირინო შერგილის გამოგზავნილ თბილ შალის ჩაბალახს ყვავილებს აქარგავდა.

— უფრო რბილი და თხელი დაზლის ქსოვილი რომ იყოს, დარაია ძაფი. უფრო მიეფერებოდა ქსოვილს. ეს კი თბილი იქნება, მაგრამ უხეში ჩანს, — ელაპარკებოდა თავის თავს.

ძროხა და ხარი თივას ახრამუნებდნენ,

კერაზე ცეცხლი გიზგიზებდა. კოშკის თავზე ყინვის ლოლოები ეკიდა. ძელურში კვამლი ბრუნავდა.

უცებ ხმაური მოისმა. სირინომ ყურები ცქვიტა. მალე ზღურბლზე ვიდაცამ ფეხი შემოდგა.

— რომელი ხარ?

— კარი გააღე, შვილო, მე ვარ! — გოგონა ისე წამოფრინდა, თითქოს ფრთები შესხმოდეს. გათოვლილ გულდედანს კისერზე ხარჯიხვი გადაეწვინა. ნელა მივიდა და ტვირთი რბილად დადო კერიასთან. ვეება ხარჯიხვი იყო. სამ-სამი წყრთა რქები მოჭრილ მუხის ტოტებივით ეყარა მიწაზე.

— ჩვენს ძროხაზე დიდი! — გაიკვირვა სირინომ.

— დალის თვალი მწყალობს, შვილო. მეორეც მოგკალი, თოვლში ჩავთალი, გოგირდი ვუკმაე, ნადირი რომ დააფრთხოს. დილით უნდა გავბრუნდე.

— ნეტავი ერთხელ დალი მაჩვენა. ამბობენ, ქალს არ და-

ენახვება, ეჯავრებაო. შერგილი რომ შეხვედროდა, თუ ეჩვენებოდა ნეტავი?! კარგი ვაჟები უყვარს თურმე.

— რას ამბობ, გოგო. დალიზე ასეთი ლაპარაკი გამიგონია? რომ გამიჯავრდეს, ხომ დამლუპავს.

— შენ როგორ ფიქრობ, მამა, შერგილს ეჩვენებოდა თუ არა დალი?

— რას ამოიჩემე, გოგო, ის გადაკარგული ბიჭი!

— გადაკარგული კი არა, მეფის წარგზავნილია.

— მერე ამდენ ხანს რად არ გაგვიხსენა? შეიძლება იქ დაცოლშვილდა კიდევ.

სირინო ელდანაცემივით წამოვარდა.

— რას ამბობ, მამა! შერგილს ორი გული არა აქვს, ყველა სვანივით ისიც ერთი გულის პატრონია!

— ჰე, რა ვიცი, შვილო, მაშ ამდენხანს სიტყვა ვერ მოგვაწვდინა?! შენი შეხედვა გულს მიკლავს. ხანდახან დედაშენი მომელანდება, ალბათ, მასაც აწუხებს შენი გულისტკივილი!

— შერგილი მალე ჩამოვა, სულ მალე, დედას კი, თუ კიდევ დაგესიზმროს, უთხარი, სირინო ბედნიერია-თქო. მთელს სვანეთში ვის ჰყავს შერგილისთანა საქმრო!

გარეთ თოვლი აჭრიალდა.

— ვილაცაა, მამა! — გაფითრდა გოგო. მართლაც, რამდენიმე ხნის შემდეგ კოშკის ძირიდან ძახილი მოისმა.

— სირინო, სირინო, ძაძუ ვარ! სტუმრები მოგიყვანე, დიდი მეფის წარმოგზავნილებია!

— საპატიო სტუმრებია. ღმერთო, შერგილის კარგი ამბავი ათქმევინე მოსულებს! — პირჯვარი გაღიწერა ძველმა მონადირემ.

— გახედე, მამა, მე კი მანამ კაბას გამოვიცვლი, ასე სირცხვილია.

გულდედანმა კარი გამოაღო. მეზობლის ქალს ორი ნაბაღ-შემოხვეული ვაჟკაცი შემოჰყვა.

— მშვიდობა ოჯახს!

— გამარჯობა არ მოშლოდეს ამ კერას!

— მობრძანდით, მობრძანდით! მეფის მოგზავნილები — ღვთის მოგზავნილებია. რისთვის გაგსარჩათ დიდმა მეფემ ასეთ ამინდში?

— მოგიკითხათ მეფეთ-მეფემ, საჩუქარიც მოგიძღვნათ. მათ შორის ერთი შერგილს გამოუგზავნია შორეული ზღვისპირეთიდან.

— ღმერთმა თქვენს მარჯვენას უშველოს. თუ შერგილი ავად არ არის, ჩვენც ბედნიერები ვართ მაშინ, შვილებო!

— კარგად ყოფილა, ეს ზამთარიც და კვირიკობისთვეში მანდ ვიქნებიო, შემოუთვლია. მეფემ თქვენი ქალიშვილისთვის ცალკე გამოგვატანა მოსაკითხი.

ქაბუკებმა ხურჩინის თავი ნელ-ნელა გახსნეს.

— ამ თოვლში რომელი გზით მობრძანებულხართ, ვერ მიმიკვლევია?! — გაკვირვებით იკითხა მასპინძელმა.

— უშგულთ მოვედიო. ბანდულულებზე შეჩვეულნი, თვითონაც უშგულულები ვართ. ახლა მეფის კარზე ვიყავით.

— კარგი ყმები ყოფილხართ, შვილებო, ღმერთმა და მეფემ გაკურთხოთ! დავით მეფე ხომ კარგად გეყავს?

— შემოგიტვალათ — კვიციის გამოგზავნისთვის მადლობა მომიხსენებიაო.

— ღმერთმა უშველოს, ჩემი კვიცი რა სახსენებელია, მაგრამ მაინც მესურვილება გავიგონო, ხომ კმაყოფილია დიდი მეფე?

— ასეთი მძლავრი, მოუღლეელი მუხლი დუნიაზე ცხენს არ ექნება! დავითს არაბული ცხენების რემა ჰყავს. ვერც ერთმა ფეხი ვერ გაუსწორა შენ ნაჩუქარ კვიცს.

— მთის ცხენია, შვილო, ძლიერი წვივი აქვს. მერე მე ჯიხვის რძით ვზრდიდი სამეფო კვიცს. ნადირის რძეს კი სხვა ძარღვი აქვს, ცხელია, ცხენს სისხლს უთბობს, უდგარს და მოუღლელს ხდის.

სირინო კოშკის კიბიდან ჩამოვიდა და მოსულებს მიესალმა. ვაჟებს თვალეში სინათლე ჩაუდგათ.

— რად ირჩებოდა მეფე-ბატონი, განა ცოტა აქვს საზრუნავი? თქვენიც დიდი მადლობელი ვართ, რომ შერგილის სიკეთე გვითხარით.

სტუმრებმა სირინოს მეფის ძღვენი მიაწოდეს. ძვირფასობეწვეს ჯუბა იყო.

— უიმე, ამას ვინ ჩაიცვამს?



— ქორწინებამდე ეს იყოს და ქორწინებისთვის სხვა გვე-  
ვალეზოდესო, — ბრძანა დავითმა.

— შერგილი კვირიკობისთვის ჩამოვა. მწიფობისთვის  
ქორწილი უნდა გადავიხადოთ, ბრძანა მბრძანებელმა, —  
წყნარად დაუმატა მეორემ.

— თქვენ პირს შაქარი. ახლა ეს ჩიხვი გავატყაოთ და მწეა-  
დები შევწვათ.

— შერგილის საჩუქარი არ მოგვირთმევივა ჯერ.

პირველმა ვაჟმა ლამაზად ნაქსოვი ბოხჩა გახსნა. აბრეშუ-  
შის წითელ ქსოვილში რაღაც იყო შეხვეული. თვალეზაბრი-  
ალებულმა სირინომ მორცხვად ჩამოართვა და გაშალა. შიგ  
პატარა სახარება აღმოჩნდა. ვერცხლის ყდაზე დავითის სახე  
იყო მინასავით გამკვირვალე წვრილი კენჭებით ჩაქედლილი. მე-  
ფე საოცრად ცოცხალი თვალეზით იყურებოდა.

— შერგილის ხელია! — აღმოხდა სირინოს.

ფურცელი გადაშალა. ქართული ასოებით იყო ნაწერი.

— გელათშია ნათარგმანები, ყდა კი უცხო ქვეყანაში გა-  
უქეთებია. ბარაქალა, ბიჭო! სამწუხაროა, მეფეს არ უნახავს ეს  
წიგნი.

— რატომ არ უნახავს?!

— შეხვეული იყო და როგორ იკადრებდა მის გახსნას.

სირინო ჩაფიქრდა.

— მაშინ, როცა უკან წაბრძანდებით, თქვენ თვითონ წა-  
უღეთ მეფე-მბრძანებელს. ნახოს, გაეხარდება. ახლა კი, მამა,  
ვახშამს მივხედოთ, შენც დამშეული ხარ და სტუმრებიც.

მან წიგნი ასწია სახატეზე შემოსაღებად და უცებ იატაკზე  
ჯვირილის ხმელი ფურცლები გადმოცვივდა.

— ხალდეს ყვავილებია. შერგილს შეუნახავს ფურცლებ-  
შუა — გაეზადრა სახე სირინოს.

• • •

სოდომ-გომორის ქალაქია ბერძენთა ეს ქალაქი. რამდენი  
ადამიანია, იმდენი ენაა. ვის გაუგონოს სვანმა ბიჭმა! ბერძენი  
და სპარსელი, ისრაელი და არაბი, პაქანიკი და ათასი კი-  
დეე სხვა. დიდმა მოძღვართ-მოძღვარმა, სანამ მთვარე ათქვრ

დაიღეოდა და გაივსებოდა, ორი ღერი ბერძნული ასწავლა, ეს არის და ეს. ამ სიტყვებით პურს თუ იყიდის და წყალს დაღვეს. არაფერი არ მოსწონს ამ ქალაქში ერთის გარდა; ბაღჩები ვარდებითა და ყვავილებით არის სავსე. ასეთი ვარდები ხალდეს მინდვრებს არც დაესიზმრება. ორი პეშვის ხელაა თითო კოკორი. ახლა სურნელი?! ერთი ვარდის სურნელი მთელ ხალდეს გააბრუებდა! ნეტა ერთი სირინოსთვის გააგზავნიდა ეს ყვავილები უქკნობლად! იქნებ თესლი ჩავიგდო ხელში. იქნებ კი არა, აუცილებლად უნდა ვიშოვნო. დავით მეფეს გაეხარდება. მერე როგორ დაამშვენებს უქიმერიონის ბაღებს!

ცაზე კი ვარსკვლავებზე თითქმის ისეთივე ჩანდა, როგორც ხალდეში. ოღონდ ესაა, სხივთა ციალი იყო სხვანაირი! თითქოს უფრო მეტად ნაზი და ხავერდოვანი. იქ კი, მის ხალდეში, ვარსკვლავები მნათი და აილამას მწვერვალისგან მიუყარებელნი არიან. ეჰ, როდის გავა დავითის დათქმული დრო! შერგილმა საკუთარი თვალთ ნახა სანახავი. გასაკვირი არც არაფერია! იცის ხალდელმა ჰაბუკმა, ზღვის კენჭით როგორ მოხატოს ჩაფიქრებული სახე და ნივთი. ამ ქალაქშიც რომ არ წამოსულიყო, ისედაც დაძღვედა განზრახულს. ღმერთო, არ შეგცოდოდ და სწავლით არც თუ ცოტა ისწავლა. ბევრი რამ ახალი ნახა და შეითვისა.

დიდი ოსტატები ჰყავთ ბერძნებს. ისეთი თვალი აქვთ, მზის ფერს ათასნაირად დაგიხატავენ და მზეობას კი მაინც ყველგან აგრძნობინებენ მნახველს. მალე გელათშიც ეყოლებათ ასეთი ჰაბუკები. დიდი იოანე და მოძღვარი არსენი კავკასიის მთებს გადადგამენ, თუკი მოინდომეს. ჰოი, იოანე, იოანე! მართალია, დავით მეფეს არც რაინდობა აკლია და არც სიბრძნე, მაგრამ შენი მსგავსი აღამიანები აღამაღლებენ ერის გონებას, მისი სიბრძნის სალაროს შენისთანა შეწირული აღამიანები ამღიდრებენ.

ამ ფიქრში გართული შერგილი ნელი ნაბიჯით მიდიოდა ბოლაზისკენ, იქნებ ხომალდს ქართველი ვინაე ჩამოჰყვესო. იქაური ამბები აწუხებდა ძალუმაღ.

უზარმაზარი ბოლაზი ათასი ჯურის ხალხით იყო სავსე. ხომალდებს ნუ იკითხავთ! აფრების თვალუწვდენი ტყეები ირხეოდა ზღვაზე. ვაჭრები და მოღლები, მღვდლები და ბერები ერთ-

მანეთში ირეოდნენ. ქუჩები გლახაკებით იყო სავსე. სვანი კაცისათვის მაინც ყველაზე ლამაზი და საოცარი ზღვის ულამაზესი ლურჯი უბე იყო. სანაპიროზე დიდებულთა სასახლეები იყო წამოჭიმული. ბაღებში ათასნაირი ვარდი, ფორთოხალი და მისთვის უცნობი სურნელოვანი მცენარე ჰყვარდა.

სვანეთის წყლები და მდინარეები მაინც სხვა არის. ხალდეს ცას შეტოტებული მწვერვალები მთელ დუნიას ურჩევნია.

უცებ ორი უცხო კაცი დალანდა. მათი მიხვრა-მოხვრა, სიარული და სახის ნაკვთები ეცნაურა. ტანსაცმელი კი ნამდვილად ქართული ეცვათ.

— ქართველები ბრძანდებით? — შორიდანვე შეეკითხა.

— დიახ, საქართველოდან ვართ. შენ კი ვინა ხარ, ჭაბუკო? ახლა კარგად შენიშნა შერგილმა, ისინი უბრალო აზნაურები არ იყვნენ. ქამარ-ხანჯალი და ხმალი სულ ოქროთი ჰქონდათ მოჭედილი.

— შენ ის სვანი ჭაბუკი ხარ, ალბათ, გელათის ტაძრის გუმბათის მოსახატად რომ გელიან!

— ვინ მელის?! — შეცბა შერგილი.

— თვითონ მეფე დავითი. სულ მალე ყველაფერი დასრულდება. შენ კი გუმბათის კედლის აღმოსავლეთ მხარეს გიტოვებენ. ასე უბრძანებია ხუროთმოძღვარს.

— თქვენ რისთვის გარჯილხართ?!

— ჩვენ ბერძენთა მეფის კარზე ვართ წარმოგზავნილები მეფეთ-მეფის დავითისაგან.

— როდის წაბრძანდებით? იქნებ მეც გამოგყვეთ, ჩემიანებთან მგზავრობა გამეხარდება.

— ჯერ არ ვიცით, ჭაბუკო, თანაც მეფის დასტურის გარეშე ვერ წაგიყვანთ. მან დაგვისაგზლა, ინახულეთ და ჩემი ბრძანება უთხარით: ბევრი ისწავლოს, ჩვენს მიწაზე სასახლეების და ტაძრების შენება აწი უნდა დავიწყოთ.

— ნუთუ მეფეთ-მეფეს ვახსოვარ? — გაწითლდა შერგილი.

— ახსოვხარ კი არა, გვიბრძანა, მოინახულეთ და ჩემი საჩუქარი გადაეცითო, — უთხარეს და ხელში ოქრო-ვერცხლით სავსე აბრეშუმის ყაითნით ნაქსოვი ქისა ჩაუდეს. — არაფერა მოიკლოსო, დაგვაბარა.

ჭაბუკი გაოგნებული დასცქეროდა ქისას.

— იცოდე, ხვალ შინ გამოგივლით, არსად წახვიდე. ნაბრძანებ ადგილზე უნდა მიგიყვანოთ, — უთხრა პირველმა.

შერგილი ამის მთქმელს დააკვირდა. მეტად ახალგაზრდა ჩანდა მოსული. შავი, თხელი წვერ-ულვაში მის ნათელ სახეს ვაჟკაცურ იერს აძლევდა. „ვინ უნდა იყოს ნეტავი“, — გაიფიქრა შერგილმა. მერე უცებ მიხვდა, კინაღამ შუბლზე იტკიცა ხელი! კი, ნამდვილად სახლთუხუცესი იდგა მის წინ.

„ესენი დიდ საქმეზე არიან ჩამოსული. მეფე სახლთუხუცესს ადვილად არ გამოუშვებდა“, — გაიფიქრა მან.

— თქვენს ბრძანებას ვინ გადაუვა, სახლთუხუცესო! — უცებ წამოცდა ეს სიტყვები.

— მიცანი?! — გაოცდა სახლთუხუცესი. — იცოდე, არსად დაგცდეს! არაა საჭირო, ჩემი აქ ყოფნა სხვებმა იცოდნენ. ხვალ კი გამოგივლით, ბინა ვიცით, პირველად როდი ვართ ამ ქალაქში. აბა, თუ მიხვდები, სად უნდა წაგიყვანოთ?!

— აზრი ვერ მიმიწვდენია, სახლთუხუცესო.

— მეორედ არ წამოგცდეს ეს სიტყვა, აკი გაგაფრთხილე!

— ბოდიში, ბატონო, — შეწუხდა შერგილი.

— ხვალ მეფის სრა-სასახლე და ბალები უნდა დავათვალიეროთ. დავითს უნდა, საკუთარი თვალით ნახო მათი სიმდიდრე და მხატვრობანი.

შერგილს სიხარულისაგან ელდა ეცა.

— ეს ჩემი ფიქრი იყო! — წაილულულა მან.

— ასეა, ძმაო, დავით მეფემ ყველა მისი ქვეშევრდომის ფიქრი იცის და მის აღსრულებას თვითონ ცდილობს. ამიტომაც დიდი მეფე.

— ღმერთმა დიდი ხნის სიცოცხლე მოგცეს!

— აბა, ჩვენ წავედით. მშვიდობით.

ორი ნაბიჯიც არ გადაედგათ, რომ სახლთუხუცესი ისევ შემობრუნდა.

— შერგილი! — შემოსძახა ჰაბუკს. — ჭუნირი ხომ არ წამოგყოლია? დავით მეფე დაკვრას გიქებს. მისი ხმები სამშობლოს გვახსენებს.

— კი, ბატონო, ჭუნირი ჩემი ხმალიც არის და ფარიც.

— მაშ ხვალ ადრე გამოგივლით, წასვლამდე ერთ-ორ სიმღერას მოგვასმენინებ.

— როგორც თქვენ ბრძანებთ, ისე იქნება, ბატონო!

■ ■ ■

ზღვა წყნარი იყო და ლურჯი. საღამოს გრილი ნიავე ნელა არხევდა ხეების ტოტებს და ზღვაზე გაშლილ აფრებს. დიდი ხომალდები თეთრი ღრუბლებივით მოჩანდნენ შორიდან.

შერგილის სენაკის წინ სამნი ისხდნენ. ჭუნირის ხმა წყნარად დაირხა ზღვისპირეთში. წყნარადვე დაიგალობა შერგილ-ჭაბუკმა. ნელ-ნელა გაიღო მონასტრის სხვა სენაკთა კარები და თავი გამოყვეს ბერებმა და შეგირდებმა. ერთმა ვერ მოითმინა და ბერძნულად დაიძახა:

— შერგილი უკრავს. გამოდით, ბიჭებო, გამოდით!

— შენ, ჭაბუკო, ეტყობა, თავი გამოგიჩენია კიდევ! — გაეღიმა სახლთუხუცესს. შერგილმა ხმას თანდათან აუწია.

ახალგაზრდა შეგირდები გარს შემოეხვივნენ.

— იცოდე, ტოლივით მელაპარაკე, გინდა, ნათესავად გამოთქვი! — ხმადაბლა ჩაულაპარაკა სახლთუხუცესმა.

მოსულებს ერთი ახოვანი, შავთმიანი ყმაწვილი გამოეყო.

— ლილე იმღერე, შერგილ! — შეეხვეწა სუან ჭაბუკს.

— ჩვენი სიმღერებიც ასწავლე, ბიჭო, ამათ?! — გაოცდა სახლთუხუცესი.

— თვითონ ისწავლა. მეტად მოსწონს ჩვენი სიმღერები. ამ ბოლო დროს თვითონაც მეხმარება. ისეთი მოძახილი აქვს, მოგეწონებათ. ათინელი ბერძენია, ოქროს ხელი და გონება აქვს.

— თანამემამულეები არიან?! — იკითხა ისევ ბერძენმა. — დიდი კაცები ჩანან, ის ერთი მაინც ბრძენი იქნება!

სახლთუხუცესს კინადამ სიცილი შესკდა. შეგირდმა ის კი არა, მისი მხლებელი ჩათვალა ბრძენ კაცად. თავი შეიკავა, იცოდა, ბერძნულის ცოდნის გამქლავებმა საკუთარი თავის გამქლავებას ნიშნავდა.

შერგილმა ლილე წამოიწყო. სახლთუხუცესმა და მისმა მხლებელმა ვეღარ მოითმინეს და ხმა ააყოლეს. მწყობრი სიმღერა საოცარი სიძლიერით ამაღლდა. უსმენდნენ და ეგონათ,

კავკასიონის მთები თანდათან გუგუნით შიშვლდებოდნენ და მალღდებოდნენ, კალთებს იშმუშნიდნენ, მხრებს იბერტყავდნენ და ყინული და თოვლი ხევებში სცვიოდა, ქვესკნელში მიქშუოდა. თითქოს სამი ქართველი კი არა, ასი მწვერვალი მღეროდა. არა, პრომეთე-ამირანი გუგუნებდა ადამიანთა სიმძლავრეზე, ვაჟკაცობაზე, შეუდრეკელობაზე, ეს ღმერთების სიმღერა კი არა, მათი სიძლიერის დამხობის საგალობელი, ადამიანის ნიჭისა და გონიერების, მისი უტეხი რაინდობის ამალღებული ჰიმნი იყო, მათი თვალმიუწვდომელი სიმადლისა და ძლიერების სიმღერა.

უცებ მონასტრის წინამძღვარი გამოჩნდა. დინჯად მოდიოდა მათკენ. შერგილმა შეხედა და დაიბნა. არ იცოდა, რა ექნა. დაბნეულობა ხმაზეც დაეტყო ჭაბუკს, ეტყობა, წინამძღვარმა იგრძნო ეს და ანიშნა, ნუ გეშინია, იმღერეო.

ერთი კიდეც მძღავრად შეუგალობეს და დაამთავრეს. ხმას არავინ იღებდა. მხოლოდ მომღერლებს დასტყობოდათ სიმღერის ეშხით გამოწვეული სიწითლე.

— დიდებული სიმღერა გქონიათ, შვილებო, დაილოცა თქვენი კუთხე!

„სიმღერა შენ ჩვენი მეფე დავითისა უნდა მოისმინო! — გაიფიქრა სახლთუხუცესმა. — რომ დაიბუხუნებს, მისი ხმის სიძლიერე თქვენს მონასტერს ქვის გუმბათს ააგლუჯს“.

— შერგილი — მიუბრუნდა უცებ ჭაბუკს, — მეფემ მითხრა, ყვავილთა სიმღერა იცისო, ვაჟობას გაფიცებ, მომასმენინე.

შერგილი შეკრთა. „რა საჭიროა ახლა აქ ყვავილთა სიმღერა? ვაითუ ვერ გამიგონს სირინო და მეფე სხვაა, ამათ კი, ვინ იცის, დამცინონ კიდეც. უარს მაინც ვერ ვეტყვი მეფის სახლთუხუცესს. მერე სად, ამ უცხო ქვეყანაში განა ქართველი კაცი ქართველს სიმღერის მოსმენის ეშხს გაუმტყუნებს?!“

შერგილმა დაიწყო. ჭუნირის სიმებს ჯერ იის ჩურჩული აღმოხდა, ბგერები წყნარად, ნელა დაირხნენ მონასტრის ეზოში. მერე წყნარადვე გადაინაცვლეს ზღვის უბისაკენ, ბაღებისაკენ, სასახლეებისაკენ. წინამძღვარი წინ წადგა, — თითქოს ისედაც ლურჯი ფერები, ზღვას თხელი ნისლივით რომ გადაჰკვროდა, ახლა უფრო გამრავლდა, იის ფერი დაედო. თითქოს იის სურნელი გაჩნდა კიდეც მონასტრის ეზოში და გარემოს მოეფინა.

თვითონ შერგილის ფიქრი კი ხალდეს მინდვრებზე დაქროდა. ახლა თვითონ მოუნდა გვირილების სიმღერა — ხალდელი გოგონების ცეკვა. სიმები მწყობრად ირხეოდნენ და ცის გუმბათს აკანკალებდნენ.

— საოცარია პირდაპირ! — დამთავრებისთანავე თქვა წინამძღვარმა. — აჲ, ჩვენი, იოანე ქართველის მკრეხელობა უკვირდათ, ჩვენი ეკლესია მის ცოდვებს მისსავე მასწავლებელს იოანე იტალოსს აბრალებდა. ვინც თქვენ სიმღერებს მოისმენს, მიხვდება, საიდან მოდიოდა მისი წარმართული ფიქრები. ბრძენთა-ბრძენია იოანე პეტრიწონელი, მაგრამ ერთარსება ღმერთი მას ჩვენსავეთ როდი სწამს!

— იოანეს მკრეხელობა ვინ თქვა, წინამძღვარო?! — წამოდგა შერგილი.

— დაჯექი, ბიჭო! — უბრძანა სახლთუხუცესმა. — შენ რა იცი, შვილო. ამათ თავიანთი პაექრობა და დავა აქვთ. ეს ჩვენი საქმე არ არის!

— მიწის პირზე ისეთი მტერი ახლა მართლმადიდებელ ეკლესიას არა ჰყავს. გონებით ძლიერია და მით არის საშიში. გავიგე, თქვენს მეფეს იოანე პეტრიწონიდან თავისთან მიუწვევია.

— არ ვიცი, წინამძღვარო, — იუარა შერგილმა, — ჩემსობას იქ იოანე არავის ერქვა.

სახლთუხუცესს უღვაშებში ჩაეცინა. მოეწონა სვანი ჭაბუკის ტყუილი.

— ჭკვიანი კაცი ყოფილხარ, — ჩუმად ჩაულაპარაკა ქართულად, — ეტყობა, ამ ბერძენს იოანეს სიბრძნე ვერ მოუნელებია. იტალოსი დაღუპეს კიდევ. ახლა იოანეს ებრძვიან, რას უზამენ, შვილო. დავითის კალთის ქვეშ ახლა ვინ გაუბედავს რასმეს.

უკვე დრო იყო წასვლის.

შერგილი სენაკში შევიდა თმის დასავარცხნად. შეგირდებმა და ბერებმა თავიანთ სამყოფელს მიაშურეს. მარტო წინამძღვარი არ იძროდა ადგილიდან.

სახლთუხუცესი და მისი მხლებელი მიხვდნენ, რომ წინამძღვარს რაღაც აწუხებდა. მან ერთხელ კიდევ მოავლო თვალი გარემოს და რაკი შენიშნა, რომ მათ გარდა არავინ იყო, მოულოდნელად ქართულად დაილაპარაკა.

— არ გაიკვიროთ, მე იოანეს მოწაფე ვარ. ვიცი, იგი დავით მეფის სამსახურშია. მაპატიოს შეცდომანი ჩემი. მე რომ მის კვალს გავყოლოდი, არ შემეძლო, დავიღუპებოდი. იტალოსი ჩვენში სატანაზე უფრო საშიშად არის გამოცხადებული.

— ქართული იოანემ შეგასწავლათ? — არ დაიბნა მოულოდნელობით სახლთუხუცესი.

— არა, ჩემით შევისწავლე, ჯერ კიდევ ათონში. მერე პეტრიწონში მოვხვდი გრიგოლ ბაკურიანელის სემინარიაში. იქ შევხვდი დიდ იოანეს.

— ორიოდ წუთის წინ მეგონა, იოანეს თქვენზე დიდი მტერი არ ჰყავდა. — გაელიმა სახლთუხუცესს.

— რას იზამ, ადამიანს ხშირად უხდება თავისი ფიქრების მალვა. აქ წელან ორი ბერი იყო. ვიცი, ისინი მე მითვალთვალებენ. კათალიკოსი ეჭვიანობს ჩემზე.

— წინამძღვარო, შერგილი უნდა წავიყვანოთ ცოტა ხნით. შინაური საქმეები გვაქვს მასთან, — სხვაზე გადაიტანა საუბარი სახლთუხუცესმა.

— წაიყვანეთ, ვინ უშლის, თქვენი ქვეყნის შვილია, როგორც გნებავთ, ისე მოიქეცით, — სწორედ ამ დროს შერგილი გაფითრებული გამოვიდა თავისი სენაკიდან და პირდაპირ წინამძღვარს მოაშურა.

— წინამძღვარო, ჩემი სასთუმლიდან ვიღაც ხელცივს ჩემი სოფლის კენჭით მოჭიქული ნახატი მოუპარავს. იგი სახეა დავით მეფეთა-მეფის. თუ არ დამიბრუნებენ, სისხლი დაიღვრება! ამას ვერავის შევარჩენ!

წინამძღვარს მუხლი მოეკვეთა.

— ეს იმ ორი ბერის ხელის საქმეა, სხვების სასთუმლებში ბუჯურობენ, გვამოწმებენ.

— ეტყობა, დავითის სახე იოანეს მიამგვანეს, — წყნარად თქვა სახლთუხუცესმა და წინამძღვარს შეხედა.

— ნუთუ ისინი ერთმანეთს გვანან?! — კიდევ უფრო აკანკალდა წინამძღვარი.

\* — წვერულვაშით კი გვანან. ისე, დავითის ერთი მაჯა იქნება იოანეს ყელ-კისრის სიმსხო.

— დავლუპულვართ და ეს არის. კათალიკოსი იოანეს იცნობდა, მკრებელობას დაგვწამებს თქვენცა და ჩვენც.



— ნუ შეწუხდებით, წინამძღვარო, დავით მეფის სიძლიერე ახლა თქვენს კათალიკოსსაც კარგად მოეხსენება.

მონასტრის ეზოში ბერძენთა მეფის ათი ცხენოსანი შემო-  
ჯირითდა. წინ კარისკაცი მოუძლოდა. ჩამოქვეითდნენ და მოკ-  
რძალებით წამოვიდნენ სახლთუხუცესისკენ.

— მეფე გთხოვთ. სასახლეში გელით მეფეთა-მეფის და-  
ვითის წარგზავნილებს!

სახლთუხუცესს ფერმა გადაჰკრა, „ჯაშუშებს დავუსმენი-  
ვართ, აწი მალვა აღარ ღირს“, — გაიფიქრა და წამოდგა.

— მონასტრის სტუმრები ვართ, ერთი ჩვენი შეგირდი სწავ-  
ლობს აქ და მისი წაყვანა გვიბრძანა მეფეთა-მეფემ.

— მეფემ უკვე გაიგო, თქვენს შეგირდს დავითის სახე და-  
უხატავს.

— საიდან მოხვდა დიდ მეფესთან ყრმის ნაცოდვილარი?! —  
ვითომ გაიკვირვა სახლთუხუცესმა.

— კათალიკოსს უნახავს და მან უსაჩუქრა.

სახლთუხუცესმა წინამძღვარს გადახედა და ქართულად ჩა-  
ილაპარაკა:

— თუ ჩვენში წამობრძანებას ინებებთ, გამოგივლით. იყო-  
დეთ, მეფეთა-მეფე დავითმა იცის თქვენისთანა ბრძენი ადამი-  
ანების ფასი.

— უკვე მოხუცი ვარ. შორეულ მგზავრობას ველარც კი ავი-  
ტან. დავით მეფეს კი მოკრძალებით გადაეცით ჩემი კეთილი  
სურვილები.

— წინამძღვარო, ნუთუ თქვენ იცნობთ კოლხთა მეფეთა-  
მეფეს! — გაიოცა მეფის კარისკაცმა.

— ვიცნობ, შვილო, აი, მისი თხოვნით ეს შევაგროვე.

ამის თქმასთან ერთად წინამძღვარი თავისი სენაკისაკენ წა-  
ვიდა. ცოტა ხნის შემდეგ ხბოს ტყავის მომცრო ტომარა გამო-  
ათრია და ბალახზე პირი მოხსნა.

— მეფეს ზღვის კენჭები რად დასჭირდა? — კიდევ უფრო  
გაიოცა კარისკაცმა.

— ხომ ნახეთ დავითის სახე იმ საღვთო წიგნზე. ის ამ ბიჭმა  
მოჭედა. დავით მეფე დიდ ტაძარს აშენებს გელათში. იქ უნ-  
და დავითმშობლის სახე მიაკენქოს ტაძრის აღსავლის გუმბათს.  
წავა თუ არა ეს ბიჭი, მეც ეს თან უნდა გავატანო.

— ამ სიტყვებს არავინ ელოდა. ყველა გაოგნებული იდგა. სახლთუხუცესი კი გუნებაში ილიმებოდა.

— ბრძენთა-ბრძენია ჩვენი დავითი. ხელავთ, საიდან სად გადმოუწვდენია ხელი?

შერგილი მაინც ვერაფერს მიმხვდარიყო. გაოცებით შეკუთრებდა ყველას, განსაკუთრებით კი წინამძღვარს.

— აი, თურმე რატომ მეფერებოდა, დროს არ იშურებდა ჩემი გაწვრთნისათვის! იოანეს ძმობილი ყოფილა. დავით მეფის პატივისმცემელი. ახლა კარგად გაახსენდა, ერთხელ ღამე გააღვიძა წინამძღვარმა და არსენ წინამძღვრის ბარათი იღუმალად გადასცა. ბარათთან ერთად აბრეშუმის მომცრო ქისაში ხუთი ბრტყელი, ფერადი კენჭი ილა.

— ეს რა არის?! — გაოცდა წინამძღვარი.

— ჩემი სოფლის მდინარის კენჭებია, — აუხსნა მაშინ შერგილმა. გულში კი ფიქრობდა — სირინო ისევ გელათში იწვრთნება ხელსაქმეზე. ეტყობა, ხალდეშურას კენჭები შიკრიკს ბარათთან ერთად ნამალევედ გამოატანა.

„ნეტავი ყვავილების სიმღერა თუ ესმის ახლა სირინოს?!“

• • •

მრავალმა წელმა განვლო. დავითი კარგა ხანია გელათის მიწაში, უხარმაზარ ლოდქვეშ განისვენებდა. დემეტრეც გარდაიცვალა. არსენ წინამძღვარმა გელათიდან იყალთოში გადაინაცვლა, იქ იმოღვაწევა და კახეთის მიწაზევე მიიძინა. სულმნათი იოანე, მუდამ ადამიანთა სიკეთეს რომ ქადაგებდა, ისე წავიდა ამ ქვეყნიდან, ბედნიერებას ვერ ეღირსა.

შერგილს და სირინოს უკვე ათი შვილი და ოთხმოცამდე შვილთაშვილი ეხვიათ. სად არ იარა შერგილმა: გელათიდან ისევ საბერძნეთში მოუხდა წასვლა, იქიდან ახალ გაქრისტიანებულ ჩრდილოეთში იმოგზაურა. იქაურ ტაძრებს თავისი ხელი დაატყო, ნახეტიალეები და მოღლილი დაბრუნდა სამშობლოში. სირინომ იუარა სხვა ქვეყანაში ცხოვრება, უკვე მოხუცები ისევ ხალდეში დაბრუნდნენ. ბიჭები დააცოლშვილეს, ქალები დაითხოვეს და თვითონაც დაწყყნარდნენ. შერგილმა ზედ წყაროს თვალზე კოშკი ააგო, რომ მტრის შემოსევისას უწყლობა არ

ეგრძნო შთამომავლობას. ისხდნენ ახლა სვანეთის გრძელ ზამთრის ღამეებში და წარსულს იხსენებდნენ. შერგილს მუხლში იმდენი ღონე კიდევ ჰქონდა, გარედან შეშა შემოეტანა და ჭიხვის ხორცი შამფურზე აეგო. სირინო კი ლოგინად იყო ჩავარდნილი. ფეხზე ადგომა უჭირდა.

— მართლა ღამაში ქალი იყო ჩვენი ბებია?! — ილიმებოდნენ შვილიშვილები. სირინოს სადღაც მაინც გაკრავდა თვალებში ელვის მსგავსი პატარა ნაპერწკალი.

— ნუ ხუმრობთ, ცელქებო! ჩემი სიღამაზე მხოლოდ ჩემმა შერგილმა იცის. თქვენ კი თქვენ ქმრებსა და სიღამაზეს მოუხარეთ, ეშმაკისფრთიანებო!

თვითონაც ილიმებოდა, აკვირდებოდა შვილებს და შვილიშვილებს. ხედავდა, ზოგი მას ჰგავდა, ზოგი შერგილს. აი, ბეჩაო! მისი ნაქარგი ღროშით სულცხონებულმა დავით მეფეთა-მეფემ სად არ შეუღეწა მტერს კარი, სხვა რომ არა, მარტო ის რად ღირდა, რომ მისი ნახელსაქმევი თბილისის ცაზე გადმოკიდეს გამარჯვებულმა ქართველმა მეომრებმა? ახლა ეს ცხვირმოუხოცელი გოგოები დასცინიან სირინოს?! არა, კი არ დასცინიან, ასე ღიმილით იხსენებენ მის სიკეთეს. იციან ცელქებმა, ბებოს გულში რომ უხარია ასეთი საუბარი. აბა, როგორ ჰგონიათ. შერგილმა მოაჯადოვა სირინო ქალი, თავდაპირველად საწყალ მამასაც არ მოეწონა მათი ამბავი, მაგრამ მერე ისიც სულს ლევდა შერგილის გახსენებაზე. ვაჟი არ ჰყავდა და შვილივით შეითვისა სირინოს რჩეული.

ან კი ვინ იყო შერგილისთანა? რასაკვირველია, არავინ: სოფელი ვერ მიხვდა პირველად შერგილის სიკეთეს. კინალამ გიჟად მონათლეს.

ვინ გაიგონა ყვავილთა სიმღერა და ცეკვა-თამაშო?! უკვირდათ. მარტო მე მივუხვდი შერგილს, მე გაუხგე. მე ჩავიხედე მის გულში. სხვანაირად ცოლქმრობა არ შეიძლება. საყვარელ მამაკაცს კარგი ცოლი ყოველთვის მიუხვდება ფიქრს. შერგილს კი თავისი ფიქრი აწვალებდა, სირინოს შემხედვარე გულში ბოლმას იხვევდა.

„ნეტავი მე დავვარდნილიყავი, ეს ქალი კი არ წაქცეულიყო. ნახევრად მკვდარია და თვალები მაინც ჩემკენ აქვს. მეცოდება, მეცოდება. მთელი ცხოვრება სიხარულით ამივისო. არას-

დროს ბედი ჩემი არ მიწყევლია, არასდროს დარდი არ შემომპარვია გულში. ახლოს ვუყურებდი, თუ შორს ვიყავი, მაინც მისი თვალების შუქი მინათებდა გზა-კვალს. ცაზე ახედავ მიხაროდა და ქვეყნის თვალის გადავლებაც. ყველაფერი მისი სიყვარულით იყო. მეფენიც კი არ ყოფილან ჩემზე ბედნიერნი: ღმერთო შენით და, არც არავინ მინახავს ჩვენზე უფრო სიხარულით ავსილი. აბა, ვინ იყო: იოანემ ქვეყანას შესწირა თავი, ბევრი იმოგზაურა და იმოღვაწევა. უკვდავება დაიმსახურა, ბედნიერება კი — ვერა. არსენსაც ასე მოუვიდა. ბოლოს და ბოლოს მეფეთა-მეფე იყო დიდი დავითი, თითქმის ქვეყნის მპყრობელი გახდა, მერე რა?! ჩემზე ბედნიერი მაინც არ ყოფილა. საოცარია მაინც! ამდენი ომი გავიარეთ, რამდენი ავადმყოფობა შეხვდა ხალხს, ჩემი ახლობელი ავადაც კი არ გამხდარა. სად არ იბრძოლეს ჩემმა შვილებმა, ცოტა სასახელო საქმე როდი აკეთეს სამშობლოსათვის, ტყვია კი არ გაჰკარებიათ. ბედია, მაშ რა არის! ჩემი ოჯახის წევრს ჯერჯერობით მწუხრის ცრემლი არ გადმოვარდნია თვალთაგან! მეტად გასაკვირველია; მაგრამ ასე მოხდა. მწამს, ყველგან სირინო-ქალის სიყვარული გვიფარავდა მეც და ჩემი ოჯახის წევრებსაც. მასაც და ჩვენც მისი ნათელი ფიქრის შუქი გვინათებდა გზა-კვალს, მისი ლოცვა მიგვიძლოდა წინ. მეტად მიყვარდა ეს ქალი, მასაც ვუყვარდი. ერთმანეთი ვაცოცხლეთ და ვაცხოვრეთ. ნეტავი ჩვენი შთამომავალნიც ასევე ივლიდნენ ამ ბედნიერ წუთისოფელში. ახლა კი მეტად დაჩიავდა და მოტყდა საწყალი. ჩემი რომ არ ედარებოდეს, რამდენი ხნის წასული იქნებოდა ამ ქვეყნიდან. ჩემი ჯავრი ამაგრებს კიდევ; ეშინია, უჩემოდ რა ეშველება, ვინ მოუვლის. ვინ მოეფერებაო. ძალ-ღონემ უმტყუნა, მაგრამ მის თვალებში ისევ ის ცეცხლი ანთია, პირველად რომ აგიზგიზდა. ღმერთო შენით და, მეც ველარ ვძლებ უმისოდ. წინათ წლობით ვიყავი გადახვეწილი, ოჯახს და მის სახეს მოშორებულნი. სადაც კი ვიყავი, მისი შუქი მიმყვებოდა და მაძლებინებდა, ახლა აღარ შემიძლია სირინოს მოშორება, უმისოდ მგონია უფსკრულში, სასიკვდილო წვეარამში ვარ ჩავარდნილი. მას რომ რაიმე დაემართოს, მე, შეიძლება, უცებ არ მოგვკვდე; მაგრამ ჩემი სიცოცხლის: ყველა ნაპერწკალს ცივი ფერფლი გადაეფარება. განგების მადლობელი ვარ, რომ სირინო შემახვედ-

რა ამქვეყნის თანამგზავრად. მეც ბედნიერი ვიყავი და ისიც“.

ეზოში ამ დროს ხმაური გაისმა, უმცროს შვილიშვილებს სტუმრები მიეწვიათ, კოშკის ძირში სუფრა გაეშალათ, სულ არ დაეძებდნენ, ავად იყო თუ არა მოხუცი სირინო, თავიანთი ფიქრი აწუხებდათ, თავიანთი საზრუნავი გასჩენოდათ. ასე იყო და ასე იქნება. შეენოდათ ჯაჭვის პერანგები, მოკლე ხმლები და მუზარადები. ოდესღაც შერგილიც ასე იყო, მოვა დრო ისინიც მოხუცდებიან.



ხალდეს მინდვრებზე მზე ყოველთვის აილამას მწვერვალ-დან გადმოიხედავს. ამოსცდება თუ არა მის ყინულოვან, ცაღ-აზიდულ წვერს, ერთბაშად დაანათებს მთელ სოფელს. იმ დი-ლასაც ასე იყო, ოდნავ გრილოდა და სირინომ შერგილი მოიხ-მო.

— მხრებში შემიდექი, შერგილ, კოშკის ძირას სკამლოგინი გამიშალე, მინდა ჩვენ ეზოს და გაღმა მთის კალთებს ვუყურო.

შერგილმა ციმციმ ასწია სირინო და დაგებულ სკამლოგინ-ზე მიაწვინა. ხალდეშურა კლდეს ასკდებოდა, ღურღულულებდა, გრიალებდა, გარშემო ცასა და მიწას აზანზარებდა.

— რა პატარაა და რამდენი ძალა აქვს, შერგილ, ჩვენს ხალ-დეშურას? ყველა მდინარე რომ ასე ძლიერი იყოს, ქვეყანას წალეკავენ.

— პატარაა, მაგრამ ცეცხლია, მისი ტალღები შევარდნის ფრთაზე უფრო სწრაფია. ხომ გიყვარს, სირინო, ჩვენი ხალ-დეშურა?

— გახსოვს, შერგილ, ჩემი სახე რომ მოხატე მის ნაპირზე? მეუბნებოდი, ყვავილთა სიმღერა ვიცო. მე სულელმა დავი-ჯერე კიდევ! — გაეღიმა სირინოს.

— ნამდვილად ვიცოდი. აკი გიმღერე, თვითონ არ მითხარი, იები, გვირილები ცეკვავენ და იმღერიანო?| კარგად მახსოვს, ასე მითხარი.

— გითხარი და ასეც იყო. ნამდვილად მესმოდა მათი სიმ-ღერა, ნამდვილად ვხედავდი მათ ცეკვას... ჭუნირი მინდა მო-ნასმენინო, დაუკრავ, შერგილ?

— ხელი არ მემორჩილება, ქალო!

— სცადე, შერგილ, მე მაინც გამიხარდება, ჭუნირი კედელ-  
ზეა, დაუძახე, მოგიტანონ.

შერგილი წამოდგა.

— არა, შენ ნუ წახვალ, ხომ გითხარი, ბავშვებს დაუძახე  
და ჩამოგიტანენ. მიიდა ასლოს იყო, მარტო ნუ დამტოვებ.

შერგილმა რძალს შეუძახა, ჭუნირი მომიტანეო.

— ნეტავი მეფეთა-მეფე დავითს თუ ესმოდა ყვავილთა სიმ-  
ღერა? — იკითხა სირინომ.

— არა, არ ესმოდა, სირინო, არც შეიძლებოდა გაეგონა!

— რატომ, შერგილ, ის ბრძენი კაცი იყო, ღვთის ტოლი კა-  
ცი იყო.

— კი, ღვთის ტოლი კაცი იყო. მაინც ვერ გაიგონებდა ყვა-  
ვილთა სიმღერას.

— მეფე თუ ვერ გაიგონებდა, მაშინ ჩვენისთანები რას შე-  
ისძენენ, შერგილ?!

— მეფეთა-მეფე დავითს კაცი უნდა მოეკლა, მტერი უნდა  
ეხოცა.

— მამულის მტერი კაცი არ არის, შერგილ!

— მე ერთხელ წმიდა გიორგის ეხატავდი, საღებავი და-  
მეჭყა, ნახატი დამედლაბნა და წაეშალე. როცა დავხედე და მისი  
სახე ადგილზე ვერ ვნახე, ენა დამება, მომეჩვენა, კაცი მოვ-  
კალი-მეთქი.

— შერგილ?

— სწორედ ამ დროს ტაძრის ეზოში მღეროდნენ. როგორც  
კი სურათი დავდლაბნე — კაცი მოვკალი, უცებ დავყრუვდი,  
ველარაფერი გავიგონე, გონებაზე ბინდი გადამეფარა. კაცს  
რომ მოკლავ, ყვავილთა სიმღერას კი არა, ადამიანის ეშხს და-  
კარგავ. გონი აგეშლება.

— მაშინ მეც მომეჩვენა ყვავილთა სიმღერა. ის კი არა, გვი-  
რილების ცეკვაც დავინახე.

— მაშინ სხვა იყო.

— დაუკარი, შერგილ, დაუკარი.

შერგილმა რძალს ჭუნირი ჩამოართვა და თითები ჩამოჭკ-  
რა...

სირინოს უნებლიეთ თვალები დაეხუჭა. მიხვდა შერგილი,

ძველებურად ველარ აუღერდა ჭუნირი. სირინოს ენიშნა და თვალები მიტომ დახუჭა.

— დავით მეფე დიდი მეფე იყო, ის მაინც გაგიგონებდა!

— ხომ ნახე, რამოდენა ლოდის დადება ბრძანა სიკვდილის ქამს, ისიც დააწერინა, ზედ გადამიარეთო.

— ყვავილების ენას მაინც გაიგებდა. ჩვენ მაშინვე უთქმელად მიგვიხვდა ტრფიალს.

— ღვთის ტოლი კაცი იყო. დიდი ლოდიც იმიტომ დაიღო, დიდი ცოდვა შემინდეთო.

ისევ ჩამოკრა შერგილმა, გაიხედა. რძალი ზღურბლზე იდგა და გაოცებული იყურებოდა.

— სიმები ხომ არ დალამებულა, მამამთილო?!

— არა, ჩემო რძალო. თითები მიკანკალებს, თითები

შერგილმა ცოლს გადახედა. სირინოს თვალები ფართოდ გაეღო, ოღონდ შიგ ახლა მარტო ერთი უფერო ფერი ედგა, ცეცხლგამოლუული, მიმქრალი, უნაპერწყლო.

— დაუკარი, შერგილ, გენაცვალე, დაუკარი — ჩიფჩიფით თქვა.

— მერე რა? კიდევ რომ დავუკრა, ყვავილთა სიმღერას ველარ გავიგონებთ! მაშინ სხვა იყო, სიჭაბუკე იყო, სიყვარული იყო.

— მე ახლაც მიყვარხარ, შერგილ, — თითქოს მორცხვად ჩაილაპარაკა მოხუცმა ქალმა.

— მაშინდელი სხვა იყო, სირინო, სხვა. ის გვამღერებდა, ის გვასმენინებდა, ის გვაყრუოლებდა ტანში.

— აბა, ხალდეს ყვავილები არ მღერიან?


— მღერიან, ქალო, მღერიან. შენც ხომ ნახე, როგორი სიმღერა იციან აქაურმა გვირილებმა.

→ ენახე, მაშინ ენახე, ახლა კი...

— ახლა, სირინო, მზეს გახედე, უკვე ჩასულა დასალაერში. გრილა, შინ შევიდეთ.







შვედის სახლი

საქართველოსთვის





## დიდ ჰადართან

### 1

ხეები ადამიანებივით არიან. თავისი ცუდი და კარგი დღეები აქვთ, თავისი ღზინი და ჭირი; თავისი წილი ცრემლიც უღვრიათ და სიხარულის დღეებიც შეხვედრიათ. ზოგი მათგანი ადრე წაქცეულა, ნაცრად ქცეულა. ზოგიერთს კი საუკუნეთა ქარიშხალში გამოუვლია, ასეული წლები უცოცხლია და ჩვენი ისტორიის ავბედითსა თუ ნათელ დღეებს დასწრებია, არ დაცემულა და დღესაც წარბშეუხრელად შეჰყურებს ხალხს.

ამბობენ, ხეებს შორის ყველაზე გამძლე მუხა არისო. არ ვიცი, რამდენად მართალია ეს ნათქვამი, მაგრამ ქუთაისის ჭადრის ხნოვანების მუხა საქართველოში, ვგონებ, არ მოიგულება. ხეებს შორის ყველაზე გამძლე ძელქვეც არ უნდა ცოცხლობდეს ჭადარზე დიდხანს. ამ ხნის ძელქვეს დღეს ვერსად შეხვდებით. თუმცა ამის მიზეზი შეიძლება ისიც იყოს, რომ ძელქვეს ასეული წლების მანძილზე, სადაც კი მოახელთებდნენ, სჭრიდნენ, მორავდნენ, დაუნდობლად ანადგურებდნენ. მათი ბედი ძალიან ჰგავდა ქართველი ბავშვების ბედს, რომელთაც მონებად თუ იანიჩრებად ყიდდენ უცხო ქვეყნების ბაზარზე. ძელქვის მორებიც იყიდებოდა სტამბოლს და აქედან გაჰქონდათ ევროპია თუ აზიის სხვადასხვა კუთხეში. ჩვენდა სავალალოდ, მოხუცებას არ აცლიდნენ ამ შესანიშნავ ჯიშს. მრავალსაუკუნოვანი ჭადრები კი აქა-იქ მაინც გვხვდება. ქუთაისის ჭადარიც ერთი

იმათგანია. მისი წვერი ოდესღაც ცის გუმბათს ებჯინებოდა, ახლა კი მთავარი ღერო-წვერი ჩამომტვრევი და ტოტებიდა შერჩენია.

ეს მოხდა 1951 წელს: დიდთოვლობა იყო. ბებერმა ხემ ვერ გაუძლო თოვლის სიმძიმეს და ჩამოინთქა. წელთა სიმრავლისაგან მისი გული სულ დაჭიავებულიყო, ხელისგულზე მოფშენილ ხმელ თამბაქოსავეთ მტვრად ქცეულიყო. მიწაზე დაცემული მისი ტოტები გუმბათჩამოქცეულ ტაძარს მოჰგავდა — მტრის ხელით მოსრულს. მახსოვეს, როგორ ეყარნენ ეს ვეება მორები გაციებულ, თოვლიან მიწაზე და თითქოს საუკუნეებში ისმოდა მათი სასიკვდილო ამოქშენა. პატარაობისას ხარის ან კამეჩის დაკვლას მოუხდენია ჩემზე ასეთი შთაბეჭდილება. მათი სასიკვდილო ქშენა რატომღაც ძალიან მაგონებდა ჭადრის ტოტების წყნარსა და მწუხარე სუნთქვას. ამ ჭირ-ვარამში მისი ქვედა ტოტები მაინც გადარჩენია ქარიშხალს. თითოეულ მათგანს კარგი ვაჟკაცის გაშლილი მკლავები ვერ შემოსწვდებოდა. ხოლო მისი ფუძე-ტანის გარშემო ხელიხელჩაკიდებულ ექვს ქალ-ვაჟს გაუქირდება შემოწვდენა.

დგას ეს ჭალარა საუკუნეების მანძილზე. დგას დინჯად, ბეჭებგაშლით და სიდარბაისლით. რა არ უნახავს, რა არ გამოუვლია, რას არ მოსწრებია. და მაინც მოულწევეია ჩვენამდე! ჭადარი რიონის ნაპირიდან თხუთმეტი ნაბიჯით თუ არის დაშორებული. ქალაქის ხელმძღვანელებმა ჯერ კიდევ ოციან წლებში ქვიტყირის გალავანი გარს შემოავლეს და ზედ წააწერეს: „აკრძალულია ხელის ხლება“.

ჩვენი ახალგაზრდები მიდიან ჭადართან და მოწიწებით შეპყურებენ მას.

აღამიანებმა იციან ღვაწლის დაფასება!

ამიტომ მინდა ამ ისტორიული ხის გმირული წარსულიდან ცოტა რამ გავიხსენო.

## 2

მონღოლებისაგან შერისხულმა თამარ მეფის შვილისშვილმა დავით ნარინმა იმერეთს მოაშურა. სამშობლოს სიყვარულით გულანთებულმა ლიხთიმერეთის დიდებულებმა რუსუდან დე-

დოფლის ვაეს ტახტი დაუთმეს. არგვეთის, თაკვერის, ეგრისის, გურიის, აფხაზეთისა და სვანეთის მთავრები დარბაისლური პატივისცემით, სიყვარულით შეეგებნენ დიდი თაძარის ნაშინებს. მარტო რაჭის ერისთავს კახაბერ კახაბერის ძეს უელავდა თვალი ცუდად მეფის სასახლის სადარბაზოში. ეს მოხდა იმ დღეს, დავით ნარინი რომ იმერთა ტახტზე აბრძანდა.

ძლიერი და მზაკვარი კაცი გახლდათ კახაბერი. აბალა ყაენი იმერეთის ახალი მეფის მტრებთან აბამდა ქსელს. მონღოლთა ბელადს ვერ მოენელებინა ლიხთიმერეთის ურჩობა და მტრობა. დავით მეოთხეც ყოველი საშუალებით ებრძოდა მონღოლთა ყაენს, რომელსაც თბილისი ეკავა. აბალამ ვერა და ვერ დაიმორჩილა იმერეთი. ის კი არა, მისი მეგობარი იალხურა ნონიცი გადაუდგა და ქუთაისს — დავითთან შეაფარა თავი. ნარინმა პატივით მიიღო იალხურა, კახაბერ კახაბერის ძე აქ გაეცნო იალხურას. იალხურამ იმ წუთსავე იგრძნო ორჭოფი და ბუნებით მოღალატე კახაბერი. ცოტა ხნის შემდეგ, როცა იალხურას აბალაზე გული მოუბრუნდა, დავითის ღალატის ფასად შეეკრა ყაენს. იალხურამ კახაბერიც შეითქვა. აღმოსავლეთს გადავიდა და ერთ ღამით, კახაბერის თანხლებით მოულოდნელად დაესხა თავს იმერეთს. რიონის მშფოთვარე ტალღებს კამკამა ცა თავს დაჰყურებდა. ცის გუმბათზე ვარსკვლავები ელავდნენ. ქვემოთ კი ერთმანეთს შეხეტქებული რიონის ტალღების ნაპერწკლიანი შხეფები თეთრად ბრწყინავდა.

მონღოლები თითქოს ფეხაკრეფით შემოვიდნენ ქალაქში და მეფის ციხე-დარბაზსაც ფეხდაფეხ მიეპარნენ. მეფე მთელ სახლობასთან ერთად აბანოში წასულიყო იმ ღამეს.

— მეფეო, მტერი თავს დაგვესხა!.. — შევარდა გაცეცხლებული სახლთუხუცესი შიშველ მეფესთან.

გაოგნებული მეფე შილიფად ჩაცმული გამოვარდა გარეთ. მტერი უკვე ეტანებოდა დიდ ციხე-სასახლეს და ადგილ-ადგილ ცეცხლის ალიც დაენტო.

სანამ საქმის ვითარებას აცნობდნენ მეფის სახლობას, რომელიც იმავე შენობაში ქალთათვის განკუთვნილ აბანოში იმყოფებოდა, მეფემ გასაქცევი გზა აირჩია. ნაბდებწამოხურული მეფე-დედოფალი რიონის ჭალებს დაუყვა. დილამდე მეფის სახლმა ბაშის სანაოსთან გაფონა, საჩინოს ჭალებს გასცდა და

მდინარე სულორზე გადავლით თავად ჩიჯავაძის სასახლეს მი-  
ადგა.

ჩიჯავაძეს ორი ვაჟი და ერთი ქალიშვილი ჰყავდა. ახალგაზ-  
რდები ერთიმეორეზე უკეთესები იყვნენ. ქალიშვილი კი მა-  
ინც სულ სხვანაირი იყო. სურის ყელივით მოღერილი ყელ-კი-  
სერი, ტურფად ნაზარდი ტანი და სულორის შხეფივით სუფთა.  
თეთრად ნისლდაკრულ გარსში ჩასმული შავი თვალები მნახ-  
ველს ნაპერწკალს უჩენდა ტანში. ლაღი ქალიშვილი იყო ნი-  
ფიდო. დილიდან საღამომდე იჯდა ახლად გახედნილ თავნება  
კვიცზე და ხელზე მიმინოთი დანავარდობდა მჰადის ყანებში.  
ფეხზე უძირო წაღები ეცვა, თავზე იისფერი თავსაბური ეხურა.

ჩიჯავაძის სასახლე პატარა, მაგრამ თევზებით სავსე მდინა-  
რის მარჯვენა ნაპირზე იყო შემოციხული. სასახლიდან მთელი  
კოლხეთის დაბლობი ხელისგულივით ჩანდა. როცა ქუთაისის  
ციხე-გალავანში სანთლები აინთებოდა, მისი შუქი უნისლო და  
ულრუბლო ღამეში ამ კორტოხიდან კარგად მოჩანდა.

— წუხელი, როცა ცეცხლის ენები შევენიშნე ქუთაისის ცა-  
ზე, მიეხვდი, უბედურება. რამ დაგვტეხოდა თავს, — თქვა ნი-  
ფიდომ.

მეფე-დედოფალმა მადლიერი თვალით შეხედეს ტურფა ქა-  
ლიშვილს. საჩინო თავადის სასახლის წინ ვეება ჰადარი ცამ-  
დე ირხეოდა. მის ჩრდილში მარმარილოს დაბალი სუფრა იდ-  
გა, გარშემო ძელქვის ჭოროგო-სკამები ჰქონდა შემოსწრაფული.  
ჰადრის ვეება ტოტები ალადასტურის ვაზით იყო დაზუნძლუ-  
ლი. ნიფიდოს ცისკრის ამოსვლისას უყვარდა ადგომა. იქ კითხ-  
ულობდა ქალიშვილი „ვეფხისტყაოსანს“, თავის ხელით რომ  
გადაეწერა ხბოს ტყავზე. იქვე აკმევდა თავის შვლის ნუკრებს,  
ეზოში თიკნებივით რომ დაქუნტრუშობდნენ. ჰადრის ტოტზევე  
ეჯდა ქარვისფერთვალებიანი მიმინო-კაპუეტი.

მეფე-დედოფალს შვილივით შეუყვარდათ ნიფიდო.

— სასახლეშია შენი ბინაო, — უთხრა ერთ დილით დედო-  
ფალმა ნიფიდოს.

— არა, დედოფალო, ამ ჰადარს თუ ყოველდღე თვალი არ  
შევავლე, სიცოცხლე არაფრად მიღირსო, — უპასუხა მოკრძა-  
ლებით ნიფიდომ.

დედოფალი გააოცა ჩიჯავაძის ქალის უარმა. ალბათ, ვინმე

აქაური უყვარს, და მოშორება ეძნელებათ, — მიხვდა დედოფალი. მართლაც, კვირა დღეს ახალგაზრდებს შორის საოცრად უცხო სილამაზის ვაჟაკი შენიშნა დედოფალმა. არც მეფეს გამოპარვია მხედველობიდან ის ჭაბუკი. არც შეიძლებოდა ვინმეს არ შეენიშნა იგი. ყველა მისი ტოლი პატივისცემით ეპყრობოდა ჭაბუკს. მოსულის ვინაობა როცა იკითხეს, გაოცდნენ. იგი გლეხკაცის, რაფო ჩახუნაშვილის ნაშვილები ყოფილა. ვაჟს სახელად ხალალამპრი ერქვა. თავადთა შორის გამოირჩეოდა. მისი ბეჭები იმ ჭადრის ტოტებივით იყო გაშლილი, მისი წელი ვაჟაკის მუქშიც ხალვატად იგრძნობდა თავს. მისი საზრიანი ფართე შავი თვალები თითქოს ოდნავ იისფერით იყო შენისლულნი. წულასაცვეთში ამოწკებილი მისი ფეხები ჩქერზე შეტოტებული კალმანებივით მოჩანდა ჩოხაში. სიტყვა-პასუხი დინჯი, დამაჯერებელი ჰქონდა, ნაბიჯი მტკიცე და მიმზიდველი.

შეხედა თუ არა მეფემ, დედოფალს გადაუჩურჩულა:

— ვერც ერთი მისი მნახველი ქალი ვერ გადაჩრება გულგრილადო.

დედოფალს გაეღიმა.

ისიც გაიგეს, რომ ცხენოსნობაში თუ ბურთაობაში, ჭიდაობასა თუ ნადირობაში ტოლი არ ჰყოლოდა მთელს საჩიჯაოში.

ხალალამპრმა მდაბლად, მაგრამ დარბაისლურად დაუკრა თავი დამხვდურებს. დედოფალს არ გამოჰპარვია არც ნიფიდოს შეწითლებული ღაწვები, არც მოსული ჭაბუკის თვალთა გაკვესება.

პურად როცა დასხდნენ, უცხო სიმღერები თქვეს. ხალალამპრის ხმა სულ სხვა იყო. მისი ომახიანი ბანი ღმერთების ხმას უფრო ჰგავდა.

— ასეთი ჯერ არავინ უნახავს ჩემს თვალს, — წამოცდა დედოფალს. ნაღვლიანი, მაგრამ მაღლობის თვალით გახედა ნიფიდომ დედოფალს.

— ჩემი მესამე შვილია, ჩემი სახლის ერთი საძირკველია, — სიამაყით განაცხადა ჩიჯავაძემ.

ჩიჯავაძის ვაჟებმაც კეთილი ღიმილით გადახედეს ძმობილს.

— იცოდე, მეფეო, — განაგრძო ჩიჯავაძემ, — მტრის რისხვა გახლავთ. ამას წინათ თურქებმა საბალახო მთებიდან ჩვენი

ჯოგის მოტაცება მოინდომეს. სანამ ლამაზგორს თუ საბურღაოს გადავიდოდნენ, ხალალამპრი წამოეწიათ. მათი სარდლისთვის შორიდანვე ისრით გაეპო თავის ქალა, ხოლო, როცა დაბრუნდა. ორი სავსე ძარი ჩამოიტანა დასაპალნებული თურქთა მოხაზული თავებით. თითონ კი ერთი კრილობაც არ მიუღია ამ ცხარე ბრძოლაში.

— დამხმარეები თუ ახლდა ვინმე? — იკითხა მეფემ.

— არა, მეფე ბატონო, მხოლოდ ერთი მწყემსი გადარჩენოდა თურქებს და მას ჩამოეტანა მისთვის ამბავი. ხალალამპრი, ბედად, თავის ხარ-ძროხის დასახედად წასულიყო მთაში და ის მწყემსიც იქ შეხვედროდა იღბალზე.

ჩახუნაშვილი თვითონაც ისე ისმენდა, არც გალიმებია. მხოლოდ მეფეს შეჰყურებდა სატევარზე ხელდაბჯენილი და ჩაფიქრებული.

მერე თითქოს რალაც გადაწყვიტაო, წინ წამოდგა.

— ვისი შვილი ვარ, არ ვიცი, მეფეო, — ნელა დაიწყო მან, — დევნილი და ფეხმძიძე დედაჩემი ვინმე შარაშენიძეს და მიქელაძეს მოუყვანიათ ჩემი მამობილისას და თითონ კი უკან გაბრუნებულან. დედაჩემი ჩემს ძეობას გადაყოლია. მხოლოდ ორი სიტყვა დაუწერია ბერძნულად კოპიტის ნაფოტზე: „მეფისაა, ხალალამპრიო“. და გარდაიცვალა კიდევ. ჩემმა მამობილმაც ეს დამარქვა და გამზარდა. ახლა ჩახუნაშვილად ვიწოდები, სხვა გვარი არ მინდა. მხოლოდ ეს მინდა გაჩვენოთ! — ფერდაკარგულმა ჩახუნაშვილმა საკინძე გაიხსნა და მკერდზე შებმული ჯვარი და ავგაროზი ერთად ამოიღო.

პატიოსანი თვლებით მოჰქედილმა უცხოდ ნაკეთებმა ჯვარმა ყველას გაკვირება გამოიწვია.

ავგაროზი შაგრენის ტყავით იყო ნაკერი.

მეფემ ხელი მოჰკიდა ავგაროზს.

— გახსენი, მეფეო. აქამდე ვშიშობდი მის გახსნას. ცუდისა მეშინოდა. ახლა კი სულ ერთია, თქვენმა ნახვამ ასე მომასურვილა.

მეფემ გასანთლულ ძაფს ფრჩხილი მოსდო, ვერ გაწყვიტა. ჩიჯავაძის უფროსმა ვაჟმა ხანჯლის ბუში მიაწოდა. პატარა და წერილი დანით მეფემ გადაჭრა ძაფები. ავგაროზი გაიხსნა. ისევ გასანთლული ქათქათა ნაზი ტყავი იყო დახვეული. როცა ისიც



გახსნეს, პატარა წიგნის ყდისმსგავსი ოქროს ფურცლები გაიშალა. შიგა ფურცლებს შუა წარწერა იყო. მეფეს თვალები გაუფართოვდა.

„ბაგრატოვანთა ძე არის, დედით კეთილშობილ ბერძენთა ქალის შვილი. შეუნდე უფალო მის მშობლებს ცთუნება“, — ხმადაბლა წაიკითხა მეფემ.

ხალალამპრს ცეცხლი მოჰკიდებოდა სახეზე. იგი ახლა თავად ჩიჯავაძეს შეჰყურებდა ასიორებულ თვალებით.

— მხოლოდ ღმერთია შეუცთომელი — ხმამაღლა თქვა დავით მეფემ.

ჩახუნაშვილი წინ წამოდგა. ნანახი მეფეს ჩამოართვა და დახედა.

— შეილის გულიდან მოგლეჯა უღვთობაა. გულქვა და ბოროტი კაცის შვილი ვყოფილვარ, — დაიბუბუნა მან.

ყველა გაშრა, ფერი დაკარგეს. დედოფალი კანკალებდა. ნიფიდოს საცაა ცრემლი წასკდებოდა.

— არ დაგვიღონდე, შეილო, მეფეს ვთხოვ, თავადობა გიბოძოს, — შემობრუნდა მეფისაკენ დაბნეული ჩიჯავაძე.

— არა, თავადო, მე სხვა გვარი არ მინდა. ჩახუნაშვილს კი აზნაურობაზე მეტი არ ვგების. ესეც ჩემს მამობილს უბოძეთ კაცობისათვის, ადამიანობისათვის. კიდევ კარგი, რომ დიდგვაროვანთა ცოდვებს გლეხკაცი ასწორებს ხოლმე თავისი მადლით! — ეს სიტყვები ხალალამპრმა წყნარად წარმოთქვა, მერმე ნიფიდოს გახედა და უკან დაიხია. და ვიდრე წასასვლელად შებრუნდებოდა, მეფეს მოუბოდიშა, წასვლას უზრდელობაში ნუ ჩამომართმევო. მერმე ცხენს მოახტა სანამ ვინმე რასმე მოიფიქრებდა, დაღმართს დაუყვა ჰენებით.

ყველანი გამშრალი გაჰყურებდნენ მიმავალს. კარგა ხანს სიტყვა არავის ამოუღია.

— აზნაურობა თქვენ უბოძეთ, მეფეო, მე კი ჰიშურას გაღმა სამოსახლოსა და ვენახებს ვაჩუქებ. სულორის პირის ჭალებზე სახნავ-სათესს მივაკუთნებ. დანარჩენს თითონ გააკეთებს ჩახუნაშვილი, — დაფიქრებით და მტკიცედ თქვა თავადმა ჩიჯავაძემ.

თავდახრილი ნიფიდო წამოდგა და სახლში შევიდა.

მეფემ ჩიჯავაძის თხოვნა შეასრულა, თავადმა კი თავისი სიტყვა

დავით მეფე დიდხანს არ დარჩენილა საჩინოს სტუმრად. მან ჯარი შეკრიბა, მონღოლები განდევნა და ტახტი ისევ დაი-  
ბრუნა. კახაბერ კახაბერიძის სამაგალითოდ დასჯა გადაწყვი-  
ტეს, მაგრამ დემეტრე მეფე, რომლის ბიძაც გახლდათ კახაბე-  
რი, საქმეში ჩაერია და დავითმა აპატია ღალატი რაჭის ერის-  
თავს.

აბაღა ყაენის ნოენი სირმონი არ მოეშვა კახაბერიძეს. იცო-  
და მონღოლთა სარდალმა, ვინც ერთხელ გაყიდდა სამშობლოს,  
არც მეორედ დაიხვედა უკან.

სირმონმა სურამს გადაღმა იღუმალ დაიბარა კახაბერი და  
ისევ ჩაითრია დავით მეფის წინააღმდეგ შეთქმულებაში.

ახლად ჯვარდაწერილი ნიფილო და ხალალამპრი არგვეთს  
იყვნენ გადაპატივებულნი. მთელი კვირა დაჰყევს იქ სტუმრად  
და კვირა დილით, როცა შორაპანს გადმოუარეს, ციხის მისასვ-  
ლელებთან სირმონ ნოინის ურდოს წააწყდნენ. ჩახუნაშვილის  
ამალამ, რომელიც ოცდაათი კაციისაგან შედგებოდა, იმ წუთში-  
ვე იაზრა მტრის განზრახვა — რაკი შორაპანს მოაღწიეს, ქუთა-  
ისისკენ აპირებენ გადასვლასო. ისიც იაზრა ჩახუნაშვილმა, რომ  
შორაპანის ციხემ ჯერ არაფერი იცოდა. შიშით აკანკალებული  
ნიფილო ორი კაცის თანხლებით ქუთაისისაკენ გაუშვეს სასახ-  
ლეში ამბის მისატანად, თვითონ კი ციხესთან ჩაუსაფრდნენ  
მოსულებს.

ამასობაში შეთენდა კიდეც. მტერს ორი შავცხენოსანი მო-  
უძლოდა. ისინი ძირულის ნაპირიდან ათვალეირებდნენ ციხის  
მისადგომს. ეტყობოდათ, ღამე უნდოდათ შემოსვლა, მაგრამ  
რალაც დაბრკოლების გამო დაჰკვიანებოდათ. მეციხოვნეები,  
ალბათ, მიხვდნენ მტრის მიახლოებას და ციხეზე ხიფათის სა-  
ნიშნო ცეცხლი ააბრიალეს.

ჩახუნაშვილის ჩასაფრებულ რაზმს ვერც ერთი მხარე ვერ  
ხედავდა.

— შეგვამჩნიეს, — მოესმა ხალალამპრის ქართულად ნათქ-  
ვამი სიტყვები.

„ერთი ქართველია, მოღალატეა, ალბათ?!“ — დააცქერდა  
ჩახუნაშვილი ერთ ცხენოსანს. დააცქერდა და იცნო კიდეც.

— ისევ კახაბერია, — გადაუჩურჩულა ძმადნაფიცს იესე

ეთამაშვილს და თან დასძინა: — ცოცხლად უნდა შევიპყრათ ან აქვე უნდა დავიხოცნეთ.

ძირულას ჯერ ისევ ნისლი დასწოლოდა. მზის პირველი სხივით გამთბარი ის-ის იყო ნელი-ნელ ზევით იწვევდა.

მტრის ჯარი გაღმა ვენახებში შემალულიყო. მხოლოდ რამდენიმე კაცს თუ შენიშნავდა დაკვირვებული თვალი. ეს ორი ცხენოსანი კი პირდაპირ მოადგა ძირულას გაღმიდან.

— ეი, მეციხოვნენო! — დაიღრიალა კახაბერმა. — ჩვენ ქართველები ვართ. ყაენის დესპანები მიგვყავს დავით მეფესთან. თან ჩემად დაატანა: — თუ ხიდი გადმოგვიწიეს, მაშინ... — მაგრამ აღარ დუმთავრებია სათქმელი. ეტყობა, ციხეში დაიჭერეს ნათქვამი. ზემოდან ორი მეციხოვნე ციხის ბოგირზე შედგა და საკეცი სალტეების დაშვება დაიწყო.

ხალალამპრმა ხელი უბიძგა იესეს და ისიც ჟალტამში გველივით გაცურდა.

— მტრებია, ხიდი არ ჩაუშვათ, — უჩურჩულა ქვემოდან მეციხოვნეებს ეთამაშვილმა.

მეციხოვნეები შეყოვნდნენ.

სწორედ ამ დროს ტანსაცმელგანძარცულმა ჩახუნაშვილმა, რომელსაც შიშველ წელზე მხოლოდ ყაბალახი შემოეხვია, მდინარე მხარულით გასცურა და სანამ ორი შავცხენიანი რასმეს მოისაზრებდა, წინ გადაუდგა მათ.

კახაბერი არც განძრეულა, ან კი რას შეაშინებდა უიარალო ტიტველი კაცი.

— ვინ ხარ, ბიჭო?! — ჩაეკითხა კახაბერი.

— ეს კაცი ვინ ბრძანდება? — შეეკითხვა დაუბრუნა ჩახუნაშვილმა.

კახაბერს სახე გაულუტრჯდა.

— შენ ვინ გკითხავს, ყაძახო? ეს მე და მეფემ ვიცით!

— თქვენ ვინ ბრძანდებით, ბატონო? — ახლოს მიიწია ხალალამპრი.

კახაბერის ძეს თითქოს სუნთქვა შეეკრა, შეფიქრიანდა.

— თბილისიდან მოვდივართ მეფე დავითთან. ეს კაცი კი დესპანია.

— თქვენ რა გვარი ბრძანდებით, ბატონო?

— შენ რა გესაქმება, ბიჭო?! — ველარ შეიკავა თავი კახა-ბერნა.

— ისე აკრძალული გვაქვს ხიდის ჩამოშვება, — გაიღიმა ჩახუნაშვილმა და კიდევ ერთი ნაბიჯი თითქოს უღარდელად გადადგა წინ.

ახლა კახაბერამდე მკლავის ერთი გადაწვდენალა დარჩა.

შავცხენოსანი მონღოლი გაოცებული ისმენდა მათ საუბარს.

— მე?! — ენა დაება კახაბერს. — დემეტრე მეფის ბიძა ვარ... — გვარი მაინც არ დაასახელა მოლაღატემ.

— ჰოი, მე კი მეფე დავითმა კახაბერ კახაბერის ძის პატიმრობა მიბრძანაო, — უპასუხა ჩახუნაშვილმა და ცხენიდან ისე სწრაფად მოაძრო ერისთავი და ძირულის შავ ტალღებში გადაისროლა, რომ სირმონ ნოინმა თვალის დახამხამებაც ვერ მოასწრო. წუთი და ჩახუნაშვილი წყალშივე წამოეწია კახაბერს. გულზე შეაჯდა, წელზე შემოხვეული ყაბალახი შემოიხსნა და გაგუდული ერისთავი ხელგაკრული გაათრია გაღმა. ოცდაცხრა ვაჟკაცი გადაფრინდა ცხენებით ძირულას გაღმა. სირმონი მიხვდა მისახვედრს. შებრუნდა და ზეძახილით გააჟენა ცხენი ჩასაფრებულ მონღოლთა ურდოსაკენ.

გაოცებულმა მონღოლებმა, რომელთაც თავის დღეში არ ენახათ და დიდი შიში ჰქონდათ ამ ტყე-ვენახებისა, რაკი თვალი მოჰკრეს ნოინი მორბისო, თითონაც უკან შებრუნდნენ და გაქუსლეს.

ორასი კაცი მეციხოვნენიც გადმოეშველნენ ჩახუნაშვილს შორაპნიდან. სანამ ხელგაკრულ კახაბერს შორაპნის ციხე-გალავანში სხვები აათრევდნენ, ჩახუნაშვილმა წინ გაირეკა მონღოლები. მონღოლთა მთავარი ურდო თურმე ჯერ კიდევ სოფელს არ იყო გადმოვლილი, რომ უკუქცეულნი შეხვდნენ მტრის მთავარ ლაშქარს, რომელსაც ალანაყ ნოინი სარდლობდა. გამარჯვებით დაბრუნებულ ჩახუნაშვილის რაზმს მთელი ლაშქარი შემოესია შროშის ვიწროებში. ახალუხის ამარა და შიშველი ლეკური ხმლით ხელში ცხენზე მჯდომი ხალალამპრი მონღოლებზე უფრო საშიში შესახედი იყო. მისი მოქნეული ხმალი ცხენსა და კაცს ერთად ჰკვეთდა.

ალანაყ ნოინი მიხვდა, თუ ამ ნახევრადშიშველ გალომგულელებულ კაცს დაიჭერდა ან მოცელავდა, საქმე გათავებული

იყო. იგი თითონ გამოიჭრა მისკენ. არ იცოდა ნოინმა, ვისთან  
ქჳონდა საქმე. შეიძლება იმიტომ შეჰბედა, რომ ეს საკინძეგახს-  
ნილი, ნახევრადშიშველი მამაკაცი ახლა უფრო მონღოლს ჰგავ-  
და, მისმა ნასროლმა ისარმა ყურთან გაუზუზუნა ხალალამპრს  
და ელვის უსწრაფესად შემობრუნდა მისკენ. ახლო მოსულს  
ხმალზე ხმალი აუკრა და ლოდივით მუშტი ცომის საზელ გო-  
ბივით ბრტყელ სახეში ისე დაჰკრა, რომ ამოდენა კაცი ხევში  
ციმციმ გადავარდა. ამან უშველა ნოინს. მტრის ჯარმა ისრები  
ხოშაკალივით დააყარა ჩახუნაშვილს. შვიდმა ისარმა გაუარა  
ტანში ხალალამპრს. კიდევ ვერ იგრძნო სიკვდილის უამი და  
სხეულიდან საკუთარი ხელით ამოგლეჯილ ისრებს ცალ-ცალკე  
თხრიდა პირში ახლო მოსულ მონღოლებს. ეს კი აღარ ენახათ  
მონღოლებს. შეკრთნენ და შეჯგუფდნენ. იესე ეთამიშვილი მა-  
ინც მიხვდა — აჰ ვერაფერს გახდებოდა მათი რაზმი. იგი ცხენ-  
დაცხენ მივარდა ჩახუნაშვილს. ძმადნაფიცს ტანზე ნაბადი შე-  
მოახვია და ბილიკით აღმართზე აიყვანა. თან მთელი რაზმი ყი-  
ჟინით გაიყოლია უკან.

დავით მეფის ლაშქარი შორაპნის ზემოთ შემოხვდა იესე  
ეთამიშვილს, რომელსაც სასიკვდილოდ დაჰკრილი ძმობილა  
გულზე ესვენა. შვიდივე ისარს გულმკერდში გაევლო ვაჟკა-  
ცისათვის. მას თვალები მიელულა და მეფეს რომ შეხვდა,  
მხოლოდ მაშინ თქვა წყნარად: ჰადრის ძირში, ჰადრის ძირ-  
შიო... სიტყვა ველარ დააბოლოვა ვაჟკაცმა, იგი მოსხლტა და  
ჩაითენთა. მეფე მიუხვდა ჩახუნაშვილს. ჰადრის ძირს ისე-  
ნებდა ხალალამპრი. ისიც იგრძნო მეფემ — სწორედ იმ ჰადრის  
ძირში პირველად იხილა, ალბათ, ამ უებრო ვაჟკაცმა ჩახუნა-  
შვილმა ნიფილო. მეფე დიდხანს იდგა გაოგნებული. მერმე  
მივიდა და მიცვალებულს მკლავზე ეამბორა.

გადარჩენილი ქუთაისის სასახლე ხალალამპრის დაკარგვას  
გლოვობდა. საჩიჯაოში მთელი ლიხთიმერეთი შემოკრები-  
ლიყო.

იმ ჰადრის ძირში, სადაც პირველად იხილა ვაჟმა თავისი  
ნიფილო, კვარცხლბეკზე კუბო იდგა, გვერდით ხმალი ესვენა.  
მისი დარახტული ცხენი შავით შეემოსათ. იმერეთის კათალი-  
კოსი უხდიდა პარაკლისს.

მეფე-დედოფალი თმაგაწეწილ ნიფილოს უდგნენ გვერდში.

აესე ეთამიშვილი და ნიფიდოს ძმები შავ სამოსში მუხლდაჩოქილი დაჰყურებდნენ ძმისა და მეგობრის ცხედარს. ტყველანის საზღვართან, თამარის ნაშენ ეკლესიაში დაკრძალეს.

გლოვის დროს მეფე დავითმა ჩიჯაუაძის დიდი ჰადრის ახლოს ორი ლორთქო ჰადრის ძირი შენიშნა. ორივე ნორჩი, მაგრამ აშოლტილი იდგა მოშორებით. მეფის თვალეში გაკვესა რაღაცამ.

მეორე დღეს მან ნიფიდოს ხელი მოხვია და წყნარად უთხრა:

— შეილო ჩემო, შენი ეზოს ორი ჰადრის ძირი უნდა გადავარგვევინო სასახლის ეზოში. დე, იქ დაიზარდონ შენი ჭმრის ხსოვნის, მისი ვაჟკაცობის სადიდებლად. შენი და მისი გმირობის მოსაგონებლად დავაწესებ, სამშობლოს ყოველი მოღალატე ამიერიდან მათ ტოტებქვეშ იქნეს განსჯილი და აქვე მიეზღოს სასჯელი.

ორმოცი დღის შემდეგ გამოიყვანეს კახაბერ კახაბერის ძე დილეგიდან. იგი გააოცა სასახლის ეზოში მდგარმა ორმა ჰადარმა. ერთი ახლა უფრო მომცრო ჩანდა, ალბათ, გაუჭირდა ახალ ნიადაგზე ფესვის გადგმა, მეორეს ტოტები ლალად გაეშალა. მათ შუა ლამაზად თლილი ვეება ლოდი იდო. კახაბერმა ისიც შენიშნა, რომ თვით მეფე იჯდა მსაჯულად. მთელი ლიხთიმერეთის ერისთავები თუ თავადები მოეწვიათ ხალხთან ერთად, ორი დღე გრძელდებოდა სამსჯავრო.

გურიელის კითხვაზე — რატომ უღალატა რაჭის ერისთავმა სამშობლოს და მის მტრებს მონღოლებს რამიზნით შეეთქვა? — კახაბერმა უსირცხვილოდ უპასუხა: — სხვის მეფობას, ჩემი მეფობა მერჩიაო. ხალხი აღელდა. ჩაქოლვა მოითხოვა. დადიანმა ხმალზე იტაცა ხელი და მეფეს შეჭლალადა:

— ნება მომეცი, მეფეო, თავი ძალღის ლეკვივით გავაგდებინო!

მეფეს გაუკვირდა დადიანის სიფიცხე.

— მთავარო, სამსჯავროში ხმლით ჯდომა არ გეკადრებათ! დადიანს შერცხვა, გაწითლდა. მეფესთან მაინც თავი იმართლა: ეზოში ვართ, მეფეო, სასამართლო დარბაზში რომ ვიყოთ, ხმალს როგორ შემოვირტყამდიო.

მეფე წამოდგა. ხალხმა უკან დაიწია.

— ამიერიდან ვბრძანებ, ეს დატოტვილი ჭადარი სამშობლოს და მამულის მოღალატეთა სამსჯავრო აღგილად იქცეს. დაე, ახსოვდეს ჩვენს მიწაწყალს, ნიფიდო ჩიჯავაძის ქალის და მისი მზექაბუჯის თავგანწირვას როგორ აფასებენ მისი შვილები. ამ ჭადრის ძირში მიბრძანებია სამშობლოს მოღალატის კახაბერ კახაბერის ძის უვნებელყოფა. ორჯერ უღალატა მან თავის მამულს. ჩვენი ქვეყანა როდია ღირსი მის მშვენიერ, მზიურ მთასა და ველს, მჩქეფარე მდინარეებსა და ბალ-ვენახებს მოღალატის თვალეზი უყურებდეს. ამიტომ მიბრძანებია — პირველი: ქვეყნის გამცემლობისათვის რაჟის ყოფილ ერისთავს კახაბერ კახაბერის ძეს დღესვე ორთავ თვალი დაეთხაროს! მეორე: რადგან იგი თავის ფეხით შემოუძღვა ქვეყნის მტერს მამულში და თავისივე მარჯვენა აღმართა სამშობლოს წინააღმდეგ, მარჯვენა ხელ-ფეხიც მოკვეთილ ექნეს! მესამე: ეს ორი ჭადარი იდგეს ქვეყნის თვალგასახარად. იმ ორ ნათელმოსილი ქალ-ვაჟის დიდსახსოვრად, რომლებმაც თავი არ დაზოგეს თავისი ქვეყნისათვის, თავისი მიწაწყლისათვის, თავისი ხალხისათვის! კურთხევა მათ სახელს! დიდება მათ სიყვარულს!

ეს სიტყვები წყნარად წარმოთქვა მეფემ და ოღნავ ფერ-შეცვლილი დაჯდა.

ასე თავდება ლეგენდა.

გამაოცა ერთმა გარემოებამ. ლეგენდაში მოხსენებულია ორი ჭადარი. გამოირკვა, რომ ოდესღაც, მართლაც, ორი ჭადარი მდგარა მეფეთა ამ ეზოში. ერთი უფრო მომცრო, მეორე უფრო დიდი. პირველს მეტვრამეტე საუკუნის მეორე ნახევარში მეხი დასცემია და დაუმსხვრევია, მეორე კი, ის ჭადარია, ახლაც რომ ასე ამაყად აღერებულა. ზოგი ფიქრობს ეს ჭადრები უნდა იყოს დაახლოებით მიქელ მეფის დროს დარგული თუ აღმოცენებული. ცნობილია, რომ სწორედ ამ მეფის გარდაცვალების შემდეგ გიორგი ბრწყინვალემ, ისარგებლა რა მისი სიკვდილით, იმერეთიც შემოიერთა და საქართველო ამით გააერთიანა. ეს მოხდა 1329 წელს, ხოლო დავით ნარინი 1249 წელს დაბრუნდა მონღოლთა ურდოდან, განუდგა აბაღა ყაენს და იმერეთში გადავიდა.

1259 წელს იმერეთი უკვე ცალკე სამეფოდ იქნა გამოცხადე-

ბული და იმერეთის დიდებულებმა მეფობა დავით ნარინს (რუსუდანის ძეს). უბოძეს, ასე რომ, ლეგენდაში ნაგულისხმევ და ზემოთ მოყვანილ აზრს შორის დაახლოებით ასი წელი სხვაობაა. ამას კი ასეთი ხის ბიოგრაფიისათვის დიდი მნიშვნელობა არა აქვს. ასე თუ ისე ერთი კი ნათელია, ქუთაისის ჭადარი ამჟამად 600—700 წელზე ნაკლები ასაკის არ არის. ამ ჯიშის ხეთათვის კი ეს უნიკალური ასაკია. არის ერთი გარემოებაც, რომელსაც არ შეიძლება ანგარიში არ გაეწიოს. ვანში (საჩინოში) ახლაც ჰარბად ცხოვრობენ ჩახუნაშვილები. ერთნი სახლობენ სოფელ ტყეველანში და რევოლუციამდე გლეხებად იყვნენ წოდებულნი, მეორენი კი სახლობენ ვანში, მდინარე ჭიშურას მარჯვენა ნაპირას (ე. ი. ლეგენდაში მოთხრობილი ამბავის მიხედვით, სწორედ ჩიჯავაძის სასახლის გორაკის პირდაპირ, სადაც ახლა ახვლედიანები, ნანაძეები და სანადირაძეები ცხოვრობენ). ჩახუნაშვილები აზნაურებად იწერებოდნენ და იყვნენ საკმაოდ მდიდრები და შეძლებულნი. უნდა ვიგულისხმოთ, რომ ჩიჯავაძეების სასახლე სწორედ იმ ადგილებში იდგა, სადაც უკანასკნელმა არქეოლოგიურმა გათხრებმა დიდფასეული განძი აღმოაჩინეს. საკვირველი არ არის, რომ ამ წლებამდე ჭიშურას პირზე, „ახვლედიანების გორაკს“ ზემოთ, სიკვდილამდე ცხოვრობდა თავად ჩიჯავაძეთა უშუალო წარმომადგენელი ერემია ჩიჯავაძე. ასე რომ, ამ ლეგენდაში ბევრი რამ არის ისეთი, რომელიც არ შეიძლება უგულებელვყოთ.

ქართველი (იმერეთის) მეფეები ამ ჭადრის ქვეშ იღებდნენ საპატიო სტუმრებს და სასამართლო პროცესებსაც მის ჩრდილქვეშ აწარმოებდნენ. ისტორიულად ორი ქუთაისიაცნობილი. ერთი ზემოთ, სადაც ახლა უქიმერიონის და ბაგრატიის ტაძრის ნანგრევია. ეს ნაწილი „დიდ ქუთაისად“ იწოდებოდა. მეორე კი სწორედ ის ადგილი, სადაც ჭადარი დგას. მას „პატარა ქუთაისი“ ერქვა. ამ ადგილას იყო „ოქროს ჩარდახი“, რომლის სამი ფუძე-თალი მდინარე რიონში იყო ჩადგმული და რომელზედაც ახლა ხის შენობაა დაშენებული. აღსანიშნავია ისიც, რომ გიმნაზიის (ახლა პირველი სკოლა) მშენებელი შენობა მეფის სასახლის ცოკოლზე ყოფილა დაშენებული, ე. ი. ფუძედ მშენებლებს მეფის სასახლის ბალავერი გამოუყენებიათ.



პროკოფი კესარიელის ცნობით იმ ადგილზე, სადაც ახლა წულუკიძის ბაღი და სკოლა დგას, ციხე ყოფილა, რომელიც 551 წელს სპარსეთის სარდალს ეკავა თურმე. ბევრად ადრე კი აქ ყოფილა ლაზების ციხე-სიმაგრე „კოტაია“, რომელიც მათვე დაანგრის მაშინდელი სტრატეგიული მოსაზრებით. შემდეგ საუკუნეებში იმერთა სამეფომ ქუთაისთან ერთად ბევრი რამ განიცადა, ბევრი ლხინი და ჭირი გამოიარა. ყველაზე დიდი ჭირი ქუთაისმა მაინც თურქების ველური შემოსევებისაგან იწვნია.

მეჩვიდმეტე საუკუნეში იმერეთის მეფეს სტოლნიკი ალექსანდრე ტოლოჩანოვი ეწვია ელჩად. მან შედარებით დაწვრილებით აღწერა ქუთაისის მიდამოები. ამ აღწერის მიხედვით ნათელი ხდება ქუთაისის მაშინდელი მდგომარეობა.

ჯერ კიდევ მეოთხმეტე საუკუნეში ვენეციელმა ამბროზიო კონტარინიმ ინახულა ქუთაისი, დაათვალიერა და აღწერა იგი. რასაკვირველია, მეფის კარმიდამო ბევრად უფრო ადრე იყო აგებული. მეფის რეზიდენციას სამი მხრიდან დაახლოებით 700 მეტრის სიგრძის ჭვიტკირის მაღალი კედელი ერტყა გარშემო. მეოთხე მხარე ზედ რიონზე იყო გადამდგარი, ამ ადგილას რიონი მეტად ძნელად გასაცური იყო, უბაწროდ ნავი კი არა, ვერც ერთი თავზე ხელაღებული მცურავი ვერ გადაჭრიდა ამ მუდამ აღელვებულ და ბობოქარ ტალღებს. საუკუნეების მანძილზე კლდოვანი თეთრი თხემები რიონის მჩქეფარე ტალღებს დაუფარავს, მეტად ჩაულრმავებია და ჭვის ნიადაგზე ვეება ღარები გაუკეთებია. ახლა, როცა რაიონში წყალი იკლებს, მისი კალაპოტი თეთრი ხიდიდან სიცოცხლეგამოფიტული კრატერების ფოტოპანორამას ჰგავს.

მრავალ ნაგებობათა შორის „ოქროს ჩარდახი“ მეტად ლამაზი ყოფილა. მისი ვრცელი ღია აივანი ზედ რიონზე დაახლოებით ექვსი არშინი სიმალიდან ყოფილა გადმომდგარი. მეფის სასახლეს ორი კოშკი ჰქონია, ერთი მომცრო, სასახლის კარიბჭესთან, მეორე კი დაახლოებით ოცდაათ მეტრზე მეტი სიმაღლის ყოფილა. აქ ზარბაზნები იდგა თურმე. ერთ-ერთი კოშკი — სამრეკლო ინახულა და მისი სილამაზე აღწერა ცნობილმა მოგზაურმა დიუბუამ. შემდეგ ეს კოშკი ვილაყას მსახვრელმა ხელმა ადგავა. მეფის სასახლეს ჰქონია დიდი ღარბაზი, რომელიც

მოხატული ყოფილა ქართველი მხედრობის ბრძოლათა ამსახველი მშვენიერი სურათებით.

სასახლის წინ დიდი მოედანი ყოფილა, ვაჭრებითა და ხელოსნებით დასახლებული. ცნობილია, რომ მაშინდელი ქუთაისის სასახლეს უხვი სავაჭრო ურთიერთობა ჰქონდა სხვადასხვა ქვეყნებთან.

ჰადრის ჩრდილში იყო დასასვენებელი ვეება ნათალი ქვა. ამ ქვაზე არათუ მარტო ისვენებდნენ მეფენი, ზოგჯერ სტუმრებსაც იღებდნენ და საქმიანი საუბრებიც ჰქონდათ მათთან. როგორც ეტყობა, სიბერის გამო ჰადარი ჯერ კიდევ ადრე ყოფილა დაზიანებული. გიმნაზიის დირექტორს სტოიანოვს მისი ფულუროები ფისით ამოუესია და ამით უწამლია ხისათვის.

ჰადარს ძველთაგანვე და ახლაც „საქართველოს ხეთა პატრიარქს“ უწოდებენ. მის გვერდით დგას მგზნებარე ქართველი მოაზროვნის ალ. წულუკიძის ძეგლი. ოდესღაც ამ ჰადრის ტანზე რკინის ბაწარი ყოფილა შემოხვეული. დაკვირვებულ თვალს ახლაც შეუძლია შეამჩნიოს მისი ნაჭდევი — ნაკვალევი. ამ ბაწარზე, როგორც ამბობენ, სანაო ყოფილა გაბმული. ახლა მის ახლოს რკინა-ბეტონის ლამაზი სტილიზებული კოშკია. იგი აწალი საჰაერო გზის ერთი კოშკთაგანია. ქუთაისელი ახალგაზრდები ჩასხდებიან ხოლმე ლამაზად შედებილ საჰაერო ძარაში და როცა ისინი ზემოდან გადაუქროლებენ ჰადრის გაშლილ ტოტებს, არ შეიძლება მოკრძალებით არ დახედონ ამ სახელოვან ჰადარს, არ შეიძლება პატივისცემით არ მოიხსენიონ იმ ადამიანთა გმირობა და ღვაწლი, რომელთაც ეს ჰადარი მოსწრებია.

სულ ათიოდე წლის წინათ ამ ჰადრის ახლოს, ზედ რიონის ნაპირას იდგა დავით ჩხეიძის (დია ჩიანელის) სახლი. მისი ბინა სწორედ ოქროს ჩარდახის ღია აივნის ადგილას იყო გადმომდგარი რიონის ტალღებზე. ამ სახლში იკრიბებოდნენ ჩვენი დროის გამოჩენილი მოღვაწენი: ვალაკტიონ ტაბიძე, პაოლო იაშვილი, ტიციან ტაბიძე, ნიკო ლორთქიფანიძე, მიხეილ ჯავახიშვილი, ნიკოლოზ მიწიშვილი, ბენიტო ბუაჩიძე, ლადო ასათიანი, ირაკლი აბაშიძე, გ. ლეონიძე, სერგო კლდიაშვილი, კონსტანტინე ლორთქიფანიძე, სიმონ ჩიქოვანი, ბესო ჟღენტი, პეტრე ბახტურიძე, ნიკა აგიაშვილი, ბონდო კეშელავა, ვიქტორ გაბეს-

ყირია, დავით გაჩეჩილაძე და სხვები. ამავე სახლში არაერთხელ ყოფილა ქართული თეატრის ჯაღოქარი კოტე მარჯანიშვილი და მისი ბუდიდან აფრენილი ჩვენი სცენის არწივები: უშანგი ჩხეიძე, შალვა ღამბაშიძე და გიორგი შავგულიძე. ბევრი მათგანი აღარ არის ჩვენთან, ბევრი კი დღესაც უშუბლნათლად ემსახურება საბჭოთა საქართველოს ბედნიერ დღეებს. მათ არაერთხელ დაუსვენიათ ამ ჰადრის ძირას, შეჩერებულან მისი ჩრდილის ქვეშ.

და განა დიდ აკაკის, ნიკო ნიკოლაძეს, გიორგი წერეთელს— ქართული სიტყვის და სიბრძნის ამ დიდკაცებს მშვენიერი დღეები არ უტარებიათ მისი ჩრდილის ქვეშ?! რამდენი უფიქრიათ, რამდენი ცრემლი დაუღვრიათ ან სიხარული განუცდიათ ამ ჰადრის ტოტებქვეშ. ესეც ხომ ამ „საქართველოს ხეთა პატრიარქის“ ბიოგრაფიაა! ნამდვილად ასე არის და ამიტომაც გვიყვარს ეს შესანიშნავი ჰადარი.

## უშრძნის მტევენებო

აქარაში ცა თითქო უფრო ახლოა. აქ მხოლოდ ცა როდია ლაქეარდოვანი. ლაქეარდი დაქფენია მიწის ყოველ გოჯს და ცისა და მიწის ზღვარი წაუშლია. მოდის და მოდის ციდან ცვარ-ნამი. ნახევრად მოღრუბლულ ცაზე ხშირად შხაპუნა თუ ეუუუნა წვიმა გადაივლის, მზის სხივში განბანილი წვეთები აი-აზმასავით ეპკურება ფორთოხლისა და მანდარინის ბაღებს. ღრუბელი რომ გადაიყრება, მზის სხივები თაფლის ნალევნით აელვარდება ზურმუხტოვან ფერდობებზე.

ამიტომ არის აქარის ბუნება ასე სიხარულის მომგვრელი. ეს ბუნება უწინ მხოლოდ რჩეულთ ეკუთვნოდათ. ერთი მუჭა გაბატონებულნი ჭამდნენ და სვამდნენ, რაც მოესურვებოდათ, ქეიფობდნენ და ილხენდნენ, იშენებდნენ სასახლეებსა და გემებს, ბაღებსა და თევზსაჭერ ტბებს. ტყეში ნადირს ისაკუთრებდნენ, ჰაერში — ფრინველს.

ახლა აქარის მთებს, მის ბაღებს თვითონ აქარელი მშრომელი პატრონობს. ამ დოვლათის პატრონთაგანია სოფელ ურეხის კოლმეურნეობის წევრი შუშანა დევაძე. ამ ქალიშვილის შრომა და სიმდიდრე, სილამაზე და კეთილშობილება ვის არ მოხიბლავს და არ გაახარებს?!

როდესაც ჩვენ მივედით, იგი თავის მეგობრებთან ერთად ჩაის მწვანე ფოთოლს ახარისხებდა.

ახლად დაკრეფილი ფოთოლი გოდრისხელა ზვინებად ეყარა ამადლებულ, სუფთა, გასალაშინებულ ფიცრულზე. აქეთ ბრიგადირი, სანდომიანი ახალგაზრდა კაცი დურსუნ ვაშანიძე იდგა და მკლავებდაქარწახებული ეხმარებოდა მათ. გარეთ მზის სხივები ოქროსფრად გადაფარებოდა ყველაფერს, შემაწუხე-

ბელი სიციხე იდგა. შიგ კი, ფიცრულში, გრილოდა. ქალიშვილები ფეხმორთხმულნი ისხდნენ. იქვე წყაროს წყლით საესე ვოზრდრილი დოქი და კრიალა ჭიქა იდგა ლამბაქით. ჭიქას წყლის წვეთები მარგალიტებივით დასცვაროდა.

დარეჯან სიმონის ასული გუჩმანიძე, რვაწლიანი სკოლის დამთავრების შემდეგ, კოლმეურნეობაში შრომობდა და თან დამის სკოლაში სწავლობდა. ასევე სწავლობს და შრომობს ლიანა შავლიძე. ეს გოგონა დარეჯანის უახლოესი მეგობარია.

კომკავშირელი ქალიშვილები ლილი ვარშანიძე, ნათელა ფარტანიძე და თუნთული დიასამიძე მოწინავე კოლმეურნეები არიან და თან დაუსწრებლად ინსტიტუტშიც სწავლობენ.

- შეკითხვაზე, თუ როგორია მათი წარმატება, კოლმეურნეობის თავმჯდომარემ, ისრაფილ სურმანიძემ, ღიმილით გვიპასუხა:

— ჩაისაც პირველხარისხოვნად კრეფენ და საგნებსაც ასე აბარებენო.

დარეჯანი ყოველდღიურად ორი-სამი ადამიანის მოსაკრეფ ფოთოლს კრეფს, იგი საშუალოზე მაღალი ტანისაა და თხილის წნელივით მოქნილი. მისი თათლისფერი თვალები არაერთ ვაჟაკს აუტოკებს გულს, ხოლო მისი შრომისმოყვარეობა ბევრ სადედამთილოს ჩააფიქრებს და მისკენ მიახედებს.

შუშანა კი მაინც გამოირჩევა მათგან. იგი დღეში ხუთი-ექვსი ადამიანის ნორმას კრეფს და თავისი ოჯახისა და კოლმეურნეობის დოვლათს ყოველდღე ზრდის, ბარაქას მატებს. მაისისა და ივნისის თვეში მარტო ფულადი შრომის საფასური ხუთას-ხუთასი მანეთი მიიღო და შემდეგ თვეებში უფრო მეტი ჯან-ღონით შეუტია საქმეს. იგი სამაგალითო ქალიშვილია.

ჩვენ ისევ კოლმეურნეობის თავმჯდომარეს მივუბრუნდით.

— წელს ჭეშმარიტად სახელმოსახვეჭი წელიწადია ჩაის მკრეფავთათვის, ფერდობებზე გაშენებულ ჩაის ბუჩქებზე ყოველდღიით ახალ-ახალი ყლორტები ამოწვევრავს, პირველ ორ ფოთოლს მზეს შეახედებს და პატარა გოგონას თმაში ჩასკვნილი აბრეშუმის ბაფთასავით ორწვერად გაიშლება, — აი, მაშინ უნდა მოკვნეტა ბუჩქზე ფოთოლს, თორემ თუ დააგვიანდა, გაუხეშდება, ყვარავით გაქერქეშდება და ხარისხს დაჰკარგავს, — გვითხრა ისრაფილ სურმანიძემ.



ჩვენი მანქანა სარფისკენ მიჰქრის. გაღმა-გამოღმა მანდარინისა და ფორთოხლის ბაღები და ჩაის ბუჩქებია. ფერდობზე ტერასებად დაუქვალავთ ისინი და საოცრი სილამაზით ამკობენ გარემოს.

ზღვა ლურჯია და წყნარი. ტალღა არ ირხევა. ხანდახან თოლიები თუ გაჰკრავენ ფრთას და ორ პუჟო ქაფს დატოვებენ ნაკვალევად.

ჩვენ თანდათან მალლა მივდივართ, ზღვის პირი ქვემოთ იწევს. გონიოსთან ჩავიქროლეთ. ცადაწვდილი, ვეება ქონგურებიანი ქვითკირის კედლებით შემორტყმული ძველი ციხე-ქალაქია გონიო, ოდესღაც აქედან იძვროდა უსასრულო ქარავნები საბერძნეთისა თუ რომის იმპერიის მიწაწყლისაკენ. აქედან მიდიოდა კაკლის ხის, ძელქვის და ბზის მორები, აბრეშუმის ქართული ქსოვილები. ზღვის უბის ულამაზესი და შესანიშნავი ნავსაყუდელიდან მიდიოდნენ ქართველი ახალგაზრდები საბერძნეთისა თუ იერუსალიმის მაშინდელ მაღალკულტურულ ტაძრებში მეცნიერული წყურვილის დასაკმაყოფილებლად.

აღბათ, აქედან დაადგა შორეულ გზას შოთა. აღბათ, აქედანვე შემოვიდა სულხან-საბა ორბელიანი, ლუდოვიკო მეთოთხმეტის უყურადღებობით გულგატეხილი.

ჩემს სიჭაბუკეში ერთმა აქარელმა ქარმაგმა კაცმა, გიორგი მიქელაძემ, ერთი ხალხური ლექსი მითხრა. მე მაშინ არც სარფი მენახა და არც გონიო. ახლა, როცა მის კედლებთან გაოცებული და მოკრძალებული ვიდექი, ის ლექსი გამახსენდა:

სარფში ვიყავ, სარფი ვნახე მოხატული ლაევარდ ცაზე,  
ფესვი ლურჯ ტალღაზე ედგა, თავი კავკასის კალთაზე,  
გონიოში შოთას ტერფის კვალი ვნახე ბეჭდად ზღვაზე,  
ქალ-ვაუებოც დაზრდილიყვნენ მისი სიბრძნის ოქროს ბეჭარზე.  
ზურმუხტოვან ვაზის ბაღებს ბულბულები ასხდნენ რქაზე,  
გემი ტალღებს მიაპობდა ლაშქრის ასი დროშით ბანზე,  
ქართვლის ღერბი მრისხანებდა იმ დროშების ძელქვის ტარზე...  
ზღვის ჩაეხედე, გავროცე, ფსკერი ჰქონდა სადაფისა,  
ტალღა ტალღას შექლეწოდა, ქაფი იდგა ლაევარდისა,  
შენც გემბანზე დაგინახე, ქალ-ჰო, ანგელოზო ცისა,  
მეტო, აბა, რა მინდოდა, გავლაზავდი ყველა ქირსა..

შეიძლება შოთას ფეხის კვალი, მართლაც, სადმე იყოს. ახლომახლოს-მეთქი, გავიფიქრე ამ სტრიქონებით შთაგონებულმა.

სარფი ზედ ზღვის უბეზეა მიშენებული, ასეთი ნაპირი იშვიათია შავი ზღვის ულამაზეს სანაპიროზე. ლურჯი, ლურჯი ზღვა, თვალისმომკრელად მოლივლივე მზის სხივები თითქოს მის უღრმეს უფსკრულამდე ჩაღწეულა. ტალღებს სუფთა და ლამაზი წვრილი სადაფის კენჭებით გაუვსია ნაპირი. ფერდობებზე კი ნარინჯთა თვალუწვდენი ბალები მოჩანს. შრიალეებენ ბალები. შრიალეებს ზღვა და როცა აქ დგახარ, სულ სხვანაირ ნეტარებას, ზეადამიანურ ნეტარებას განიცდი.

სოფელი შუაზეა გაყოფილი. გამოლმა საბჭოთა მიწაზე ორ-სართულიანი სკოლა, კოლმეურნეობის მაღალი კანტორა, ბალებში ჩაფლული ორსართულიანი აგურის სახლებია, თეთრად შეფეთილი და ელნათურებით გაკაშკაშებული, გალმა თურქეთის მიწაზე — სილარიბე და სიბეჩავე.

როცა დაღამდება, ელექტრონით გაჩახახხდება გამოლმა ყურე, გალმა საცოდავად ბეუტავს კრაქი.

ახალგაზრდა ყმაწვილმა ნოდარ ვახიძემ გვითხრა:

— მამიდაჩემის ოჯახი იქით ცხოვრობს, ჩვენ კი — აქეთ, ჩვენ უკვე დიდი ხანია აღარ ვიცნობთ ერთმანეთს, შთამომავლობას და მონაგარსო.



ჩვენ ისევ უკან დავბრუნდით.

დღეს ბათუმის რაიონის სოფელ ახალშენში დიდი ზეიმია — ახალი კულტურის სახლის გახსნა.

ახალშენი დიდი სოფელია. ათასამდე კომლი ცხოვრობს, მაგრამ ასეთი კულტურის სასახლე დიდ ქალაქებშიც არ არის. არქიტექტორ ქემალ ბურჭულაძეს შესანიშნავი ნაგებობა დაუდგამს ამ სოფლის კოლმეურნეთათვის. მაყურებელთა ორ-სართულიანი დარბაზი შვიდას სავარძელს იტევს, ვეებერთელა სცენა და ტალანები ქართული ჩუქურთმებით არის შემკული და მოოქროვილი. მის მაღალ თაღზე მსხმოიარე ვაზებია გამოხატული. სამ საუკუნეზე მეტხანს აქაურ ქართველ კაცს ვაზის გა-

შენება ჰქონდა აკრძალული. ახლა კი არქიტექტორმა საუკუნე-  
ებით ნანატრი ხალხის სურვილი გაიხსენა და სასახლის გუმბათს  
მიახატა იგი.

კოლმეურნეობის თავმჯდომარემ ალექსანდრე ქერქაძემ თა-  
ვის ეზოში გვაჩვენა უძველესი ვაზის ჯიში — კაქიჭი და მერე  
მისი ღვინოც გავვასინჯა. იგი მეტად ნაზი, იზაბელასავით თხე-  
ლი, მაგრამ უფრო სურნელოვანი და შედარებით მაგარი სას-  
მელი ღვინოა.

ახლა უკვე თანდათან ფეხს იკიდებს აჭარაში ვენახი: დიდი  
ქირ-ვარამის შემდეგ ისევ აღსდგა ვაზი.

კულტურის სახლის გახსნისადმი მიძღვნილ საზეიმო კრე-  
ბაზე აჭარის მრავალი წარჩინებული ადამიანი გამოვიდა.

აი, სიტყვას ამბობს აჭარაში განთქმული მკრეფავი ქალი ფა-  
ტი წითელაძე. მისი ბრიგადა, რომელიც თერთმეტ ჰექტარ  
ჩაის პლანტაციას უვლის, კომუნისტური ბრიგადის საპატიო სა-  
ხელს ატარებს.

ამ ქალიშვილის სიტყვა და საქმე ერთია. სწორედ ამიტომ  
იყო, რომ პარტიულმა ორგანიზაციამ იგი საბჭოთა კავშირის  
კომუნისტური პარტიის ოცდამეერთე ყრილობაზე თავის დე-  
ლეგატად წარგზავნა.

სოფლის პარტორგი ნოშრევან დუმბაძე და სასოფლო საბ-  
ქოს თავმჯდომარე შაქრო სურმანიძე შუბლგახსნილი გაჰყუ-  
რებენ დარბაზს. კოლმეურნეობის ხასულე ორკესტრი გრგვი-  
ნავს. ფართო ფანჯრებიდან მოჩანს ტერასებად ასული მანდა-  
რინის, ფორთოხლის და სხვა ნარგავთა უსასრულო ბაღები.

სიხარულით აღსავსე ადამიანები იღიმებიან.

დარბაზში ჩამოვედით, წინა რიგში მოხუცი კაცი ზის.

— ლაზი ვარო, — თქვა. სარფიდანაა, ამ სოფელში სიძე  
ჰყოლია, ზვიმზე ჩამოსულა, თურმე ოჯახებში დღეს ყველგან  
ლხინი ჰქონიათ. ნათესავ-მოყვარენი დაუპატიჟენიათ, საკლავი  
დაუკლავთ, სუფრა გაუშლიათ.

— დღეს ისეთი ლხინი აქვთ ჩემს დისშვილებს, მათ მშობ-  
ლებს ქორწილი არა ჰქონიათ ასეთიო, — მიმახარობლა მო-  
ხუცმა. — წინათ აჭარელი და ლაზი შორეულ ქვეყნებში ეძებ-  
დნენ ბედნიერების ხვიწოს, — განაგრძო მან, — ჩვენ თურმე  
იგი ჩვენს საძირკვლის ქვეშ გვქონია, ჩვენი თავანის ჩრდილ-



ქვეშ ყოფილა ჩაბუდებული. აი, აი, რომ არ ვიცოდი, კო! ჩვენი ბაღნები მიხვდნენ და ცხოვრებაც ჩონგურივით ააწყვეს. გაგიგონია ერთი თქმულება? — მკითხა უცებ მოხუცმა და თან გუმბათზე მიხატულ მსხმოიარე ვაზს შემახედა.

მე მხრები ავიჩჩე, — არა-მეთქი. მაშინ მან სკამი მოსწია ჩემსკენ და დაიწყო:

— აბა, დაიხსომე, შვილო, სიბრძნით სავსე თქმულებაა. მე მგონია, ლამაზიც უნდა იყოს. ჰოდა, ერთ ჩვენს პაპის-პაპას ნადირას (ასე რქმევია სახელად) მეტად ლამაზი ცოლი ჰყოლია. თვითონ შორეული გზების ნირგაუტეხელი მენავე ყოფილა. კუნაპეტ ლამეში, მაშინაც კი, როცა ერთმანეთს შეხეტქებული ტალღა და ქარი ცის კალთებს ლოკავენ, მისი თვალები ველურ კატასავით ხედავდა თურმე ბურუსიან ნაპირებს. წყლის ქვეშ გამძლეც ყოფილა. ვეება გემის ფსკერს ყვინთვით ათგზის შემოუვლიდა ქარიშხლის დროს.

ტანად დიდი არ ყოფილა, მაგრამ სხეული გემის ბაწარივით დაგრეხილი ჰქონია. ხელის გულზე წისქვილის დოლაბს მოაბრუნებდა თურმე, მის ბეჭებზე კი ლელო ბურთის მინდორი გაიშლებოდა. მუხლიც მაგარი ჰქონდა, ჭეირანს დაეწეოდა სირბილში. მის მეუღლეს სახელად დინდინა რქმევია. შავი თვალები და წარბ-წამწამი ჰქონია, ტანი კი თეთრი და თვალმიმტაცი. მისი ღიმილი გულწასულ ვაჟკაცს მოაბრუნებდა.

მაშინ ლაზეთში ბეჭა ჯაყელი ყოფილა ქვეყნის ბატონ-პატრონად. სწორედ ის ბეჭა, რომელმაც გაცვალა რჯული და სამშობლო, სახელადაც საფარა დაირქვა. დინდინას ქებას სასახლემდე მიუღწევია. საფარსაც მოუკრავს ყური, ამბობენ, ქალების მოყვარულობამ რჯული გამოაცვლევიან ბეჭა ჯაყელსო. ბედნიერება ცოლების სიმრავლეში კი არ არის, შვილო, ცოლქმრულ სიყვარულშია — ოჯახის სიყვარულში. კეთილშობილი ვაჟკაცი მეგობარს და მეზობელს არ უღალატებს.

ბეჭა-საფარას კი სხვა სანთელი ენთო გუნებაში. ქალთან სიამოვნება ქვეყნის გათენებას ერჩია.

შიკრიკის პირით ნადირა თავისთან უხმია.

ნადირას უგრძვნია ხიფათი, თვალებში სისხლი ჩასდგომია. ცოლისთვის მაინც პირი მოურიდებია და საგზლის მომზადება უთხოვია.

საზრისიან ქალს არ გამოჰპარვია ქმრის თვალთა ფერისცვალება.

— შენი სამი შვილის დედა ვარ, ნადირა, დასამალი რაი უნდა გქონდეს ჩემთან, მითხარი, რა უბედურება დაგვატყდა თავსო. —

ვეჯაცი კაცი ოჯახს თუ ატყუებს, ყველასთან პირგაცუნებული იქნება, ქვეყნადაც აღარავის დაინდობს. ნადირას ვერ უთქვამს სიცრუე და თავისი ეჭვიც გაუმხელია ცოლისთვის.

— ბოროტება უდევს გულში, ნადირ, ბექა-სათარს, — დაუსკვნია ქალსაც.

— შეიძლება სხვა კეთილი ფიქრი უდევს გულში, შეიძლება ხონთქართან მგზავნის მენავეთუფროსად.

— არა, ნადირა ჩემო, მგელი ფარეხთან მხოლოდ ცხერის ხორცს ეძებს დასაგლეჯად.

— რა ვიღონოთ, აბა? — შეეკითხა ქმარი.

— მეც წამოვალ.

— შენ იქ რა გინდა, ქალო, თვითონ უახლოვდები ჩვენი ოჯახის გაბახებას?!

— ნადირა, იცოდე, შენთან ახლოს ყოფნა ძალას მომცემს. ავ ფიქრს მომამორებს თავიდან, შეიძლება ერთად ყოფნამ ავი საქმეც აგვარიდოს. ხომ იცი, ორი ადამიანის ნაფიქრალი მაინც სხვა არის. შენ ჩოხა-ახალუხს ჩავიცვამ, მამაკაცურად გამოვეწყობი.

ნადირა თვალებში ჩააცქერდა ღინღინას, ღიღინას. იფიქრა და გადაწყვიტა:

— კარგი, წავიდეთ, ბავშვები შენს ძმასთან გავგზავნოთ იმერეთს.

ახლანდელ ტრაპიზონს წინათ, უხსოვარი დროიდან, ლაზები „რკინის პალოს“ ეძახდნენ თურმე. პირველად გემთა მისაბმელად რკინა იქ იხმარა ლაზმა. ხის ბოძზე მიმაგრებული საზღვაო დიდი ნაგებობანი ქარიშხალს ვერ უძლებდა. ლაზი კაცი კი ჰკუამაძიე კაცი იყო. თვალუწვდენ ზღვაზე გზებს ეძებდა და კვალავდა. მიწის გულში წიაღისეულ მადანს თხრიდა. აი, მიწას რკინა გამობღღენა, ერთმა პირველმა გასინჯა მისი სიმაგრე და გამძლეობა. ბოძად გამოიყენა და გემის ცხვირები რკინის ბაწრითვე მიაბა უბედურების თავიდან ასაცილებლად. პირველად

რკინის ბოძები სწორედ იმ ბოლაზზე შეუნიშნავთ შორეული გზებიდან მოსულ ნაოსნებს და ამ ბოლაზ-ქალაქისთვის „რკინის პალო“ დაურქმევიათ.

ჰოდა, სწორედ ამ ქალაქში ცხოვრობდა მაშინ ბექა-საფარი. გათენების უამს მოსულა ნადირა სასახლეში.

ჭიშკართან ხეადი ლომი და ჭიჭი ება თურმე შვიდფა ჩაქვით. მოსულ სტუმარს ბექა ჩაყელის გაწვრთნილი მხეცები შიგ შეუშვებდნენ, გარეთ კი პატრონის უნებართვოდ თავი ვერ გამოძვრებოდა.

— ვინ არის ეს ყმაწვილიო, — უკითხავს ბექას, როცა ლამაზი ყმაწვილი შეუნიშნავს ნადირას გვერდით.

— ჩემი ცოლისძმაა, — უპასუხნია ნადირას, ნაოსნობას ვასწავლი, თან წამოვიყვანეო.

— ლამაზი ბიჭი ჩანს, ალბათ, მისი დაც ლამაზი იქნება!.. — და თვალის ეშმაკურად ჩაუჭუტავს ბექას.

ხერხიანი კაცი იყო ნადირა, მაგრამ არც ბექა ჩაყელი იყო მიუხვედრელი. ეშმაკს ორი შავი ფრთა აქვს, ბექას კი სამი აღმოაჩნდა. არ გამოეპარა მის თვალს, რომ მის წინ ქალი იდგა.

— ჩემთან გიხმე, ჩემო ნადირ, მოეფერა სტუმარს, ხონტ-ქართან უნდა წამეყვანე, მაგრამ ახლა სხვა გავიფიქრე. დაისვენე შენს ცოლისძმასთან ერთად, ხვალ კი სადილად გიწვევო.

ნადირა მიხვდა მისახვედრს. იმ დამით ნაცნობ მეზღვაურებში მიიკითხ-მოიკითხა, დინდინას ფერ-ხორცის მსგავსი მეძავი ქალი მოანახვინა, საჩუქრებით აავსო და თან ხვალინდელი დღის საქმეში შეიპირა.

თუ ქალმა მამაკაცის ტანსაცმელი ჩაიცვა, ულამაზოც რომ იყოს, მაინც მშვენიერდება. ოდნავ კარგი შესახედავი ქალი კი მეტად მიმზიდველი ხდება ხოლმე. ნადირას შეპირებული ქალი ავთვალა როდი იყო, ამიტომ ვაჟის ტანსაცმელი მეტად დაიმშვენა.

მეორე დღეს სადილზე ნადირა თავის მხლებლებთან ერთად ეწვია სასახლეს. ფრთხილად ჩაუარეს ჭიშკართან მიბმულ ლომსა და ჭიქს, აივნის მაღალი კიბეები ალიეს და ბექას ეწვივნენ. ღიმილით შეხვედრია ბექა სტუმრებს. ორივენი გვერდზე მიუსვამს, ახალი სჯულის თანახმად შარბათით გამასპინძლებია.

— ეს შენი ცოლისძმა მომეწონა, ნადირ, — უთქვამს სა-

ფარს,—დამიტოვე, ნაოსნობას მე თვითონ ვასწავლი, გაეზრდი და ხონთქრის სასახლის რჩეულ კაცად ვაქცევო.

ამას რომ ამბობდა ბექა, რასაკვირველია, თვალეში ცხრა ეშმაკი უცინოდა, გონებაში ასი მზაკვარი ეჭდა.

— თქვენი ნება იყოს, ბატონო, — უთქვამს ნადირას და თან უთხოვია: — ცოტა ხნით მეც ზღვაგაღმა ქვეყნებისკენ გავივლი. დაბრუნებისას შემოგივლით, თქვენც განახავთ და ჩემს ცოლის-ძმასაცაო.

აღვილად მიზანმიღწეულ მთავარს გონებაზე ნისლი გადაჰკვრია, ნადირასათვის ოქრო-ვერცხლი უბოძებია და გზა დაულოცნია. ნადირას იმსალამოსვე შორეულ ქვეყნებში წამსვლელი უცხო გემი მოუნახავს, დინდინაც თან წაუყვანია და გზას გასდგომია. საფარ-ბექას ნადირასთვის მოთვალთვალეები დაუდევნებია და მათაც მოუხსენებიათ ნადირას უცხო გემით გამგზავრება.

ბექას ეს ცნობა სიამოვნებით მიუღია. ნადირა კი შუა ზღვაში სხვა ნაეში გადამჭდარა, აგრე ნაპირ-ნაპირ უვლია და ფაზის ჩასართავთან მიწაზე ფეხი დაუდგამს. როცა ბექა ჯაყელმა თავისი გაბიაბრუება შეიტყო, ნადირა თავისი ცოლით საშიშ საზღვრებს გაცილებული იყო. ბექა ცხენს მოახტა და სარფისკენ გამოსწია. იგი უფრო გახელდა, როცა ნადირას ოჯახი იმერეთს შეხიზნული დახვდა. ბექას ცხენი უკან მოუბრუნებია, ისევ რკინის პალაში ჩამოსულა. უბედურება დაატყდა თავს მთელ მის სახლობას, ნადირას მოყვანილი ქალი გაპარული აღმოჩნდა, ვერც მეთვალთვალეებმა, ვერც გზირებმა ქალი ვერ იპოვეს.



წლები გავიდა, სტამბოლში ხონთქრის სასახლესთან ბექა-საფარას მხლებლები ჩამოხტნენ. ცხენოსანთა ჯგუფს ერთი ჩადრიანი მდიდრულად გამოწყობილი ქალი მიუახლოვდა და საფარა იკითხა:

— მე გახლავართ, უთქვამს ბექას და თან — რა გინდათო, — უკითხავს.

— თქვენი ნახვა მინდა, ბექა-ბატონო!

ბექას გაკვირვებია ქართულად ნათქვამი სიტყვები.

— ამალამ მარტო თქვენ გელით, მხლებლების გარეშეო, — უთქვამს ქალს და ადგილი დაუნიშნავს.

დიდი და ლამაზი ქალაქია სტამბოლი. მისი სასახლეები და ცაში ატყორცნილი სვეტები ზღვის ულამაზეს უბის ნაპირზეა გადამდგარი. ერთი ასეთი სასახლის წინ გაჩერდა იმ საღამოს ბექა ჭაყელის ბედაური.

უმშვენიერესი ბალი ერთყა გარშემო სასახლეს. მარმარილოს კიბის თავზე ბექას თავაზით სთხოვეს, იარაღი იქ დაეტოვებინა.

ზვიად და ამაყ კაცს უარი ვერ უთქვამს. იარაღი ჩაუბარებია. გაოცებული ადიოდა ბექა ჭაყელი ცაში შეტყორცნილი მარმარილოს ჰაეროვანი სასახლის კიბეზე. ტალანებს ჰკვრეტდა და უფრო და უფრო აოცებდა თვალუნახავი სიმდიდრე, ოქრო-ვერცხლი. აბრეშუმებით მორთულ დარბაზში ათასსანთლიანი კანკელი ეკიდა. დარბაზის შუა ადგილას ორი სავარძელი იდგა. ერთ მათგანზე ქალი იჯდა პირბადით. ბექას დანახვაზე წამოდგა და შეეგება. მდუმარედ მიუთითა მეორე სავარძელზე. ბექა გაოგნებული ჩაქდა. ქალისთვის თვალი არ მოუშორებია.

— რას მიბრძანებ, ქალბატონო?!

— არ გაგიკვირდეს, ბექა-ბატონო, — წყნარად თქვა ქალმა, — დიდი ხანია გელოდით. ვიცოდით, ხონთქართან მოგიხდებოდა ჩამოსვლა. ეს სასახლე და ოქრო-ვერცხლი თქვენი და ერთი კაცის წყალობაა. მოთმინება იქონიეთ, და მომისმინეთ. თან პირობა უნდა მომცეთ, რაც არ უნდა გაიგონოთ, არ აღელდეთ. თუ სიტყვას, მომცემთ, მხოლოდ მაშინ გაიგებთ ყველაფერს.

ბექა კიდევ უფრო გაოცდა.

„ჩემი წყალობით ეს ოქრო-ვერცხლი და ქონება?! არა, ეს ქალი ნამდვილად შეირყა ჰკუაზე“, — ამ ფიქრმა გაუელვა უცებ ბექა-საფარას თავში.

— არ აღელდებით?! — ისევ წყნარად იკითხა ქალმა.

ბექა შეირბა.

— მე აზრზე ვერ მოვსულვარ, ქალბატონო, არც ვიცი, რა გნებავთ ჩემგან. ან მაინცდამაინც რატომ უნდა ავლელდე?!

ფანჯრები გაღებული იყო. ბალი ზედ ზღვისპირზე იყო. ერთ

ხეზე ორი მიმინო-კაპუეტი კიპკიპებდა. ფეხებზე ეყვანი  
ებათ.

— თქვენ მიმინოები გიყვარდათ, ბექა-ბატონო! — თქვა  
ქალმა, — მეც შევიყვარე ეს ფრინველები. ჩემი მოსამსახურენი  
ხანდახან მწყერზე მანადირებენ. მწყერზე ნადირობა ხომ თქვენ  
შემაყვარეთ.

ბექას თითქოს ხანჯალი დაარტყეს, ვეფხვივით წამოვარდა  
ზევით.

— ნუთუ ეს თქვენა ხართ?! — წამოიყვირა ბექა-საფარამ.

— მიცანით? თუ მართლაც არ დაგავიწყდით, მაშასადამე,  
არ შეგძულებივართ. მე კი მეგონა მომკლავდით.

— თქვენ ნადირას მოყვანილი ქალი ხართ, აი ის ქალი, დინ-  
დინას მაგივრად რომ...

— სწორედ ისა ვარ, — წყნარადვე თქვა ქალმა და პირბადე  
გადაიძრო, — მიცანით?

ბექას წინ იდგა სწორედ ის ქალი, მაგრამ საოცრად დამშვე-  
ნებული და დამწიფებული. მაშინ გამხდარი გოგონა იყო, ახლა  
ხორცშეპატიებული და ელვარე, მაშინ, მართლაც, თითქოს  
მცირეწლოვანების ბუსუსები ეყარა სახეზე, მაგრამ არც ისე  
ლამაზი ჩანდა. ახლა კი მისი თვალები ცეცხლს აფრქვევდნენ.  
პაი, ბექა ჭაყელო, ნუთუ ასეთი ქალი გყავდა იმ ორიოდე ლა-  
მეს, არა, ეს შეუძლებელია... ბიჭოს... თავში დაჰკრა სულ სხვა  
ფიქრმა ბექას, შეიძლება იმ ნადირამ ნამდვილად მისი ცოლი  
დამიბოვა. მერე იმ ქალმა, ე. ი. ამ ქალმა თავისთავზე ის ზღა-  
პარი შეთხზა, ამით ისარგებლა და ხელიდან დამისხლტდა. ნამ-  
დვილად მომატყუეს, დაასკვნა ბექამ და ისევე ქალს შეხედა.

„სწორედ ნადირას ცოლია, მხოლოდ ასეთ ლამაზ ქალს  
შეეძლო ისეთი სახელი გავარდნოდა მთელ ლაზეთში“.

— მიცანით თუ ვერ მიცანით?! — ღიმილით შეეკითხა ისევე  
ქალი. ბექას ახლა სხვა აზრი ჩაუჭდა თავში. სიფრთხილემ სიბ-  
რძნის ჯავშანი ჩააცვა. თავი სრულიად დაბნეულ ადამიანად  
მოაჩვენა და კითხვაზე მხრები აიჩეჩა.

ქალმა მისკენ ნაბიჯი გადმოდგა. იგი მიხვდა, რომ ბექამ შე-  
იძლება მთლად ვერ იცნო, მაგრამ იმასაც მიხვდა ქალის გუმა-  
ნით, რომ ცუდი შთაბეჭდილება არ მოუხდენია.

— მაშასადამე, დაგავიწყდით? მე კი სულელი ვარ. მეგონა,  
არ დამივიწყებდით. თითონ მე ბევრი უბედურება ვნახე, მაგრამ

ვერ დაგივიწყეთ, ან კი როგორ შემეძლო, მე ხომ თქვენი ბავშვის დედა ვარ.

ეს კი მეტიხმეტი იყო. ბექა ჯაყელს ტანში ქარიშხალი ჩაებუდრა.

— რა სთქვი, ქალო, მე შეილი მყავს?! — მან მკლავები დაუჭირა ქალს და თვალებში ჩახედა.

— თქვენ თვითონ ნახეთ და მიხვდებით, ნამდვილად მიხვდებით, — ისევ წყნარად თქვა ქალმა.

არ იცოდა, რა ეთქვა. მაშასადამე, ბექა ჯაყელს, რომელსაც არც ერთ ცოლთან ბავშვი არ ეყოლა, ღვიძლი შეილი ჰყოლია. ეს შეუძლებელია. ეს ქალი რომავს, ან რაღაც ქაჯურს ქსელავს. არა, არ წამოეგო ახალ სიცრუეს ბექა. შენი სიმტკიცე და სიბრძნე არ დაჰქარგო, არ აცერცეტდე!

— რატომ გაჩუმიდით, — იწყინა ქალმა, — არ გაგეხარათ ეს ამბავი? ან შეიძლება გრცხვენიათ ჩემგან შეილის შეძენა. ჰოი, ღმერთო ჩემო!.. — ქალს დიდი წუხილი დაეტყო. ბექა კი კვლავ დუმდა.

— დაბრძანდით, მომისმინეთ, მერმე, როგორც გინდათ, ისე მოიქეცით, — იგი სწრაფად შემობრუნდა უკან და სავარძელში ჩაჯდა. ბექას კი ხელით უჩვენა მეორე სავარძელი.

ბექა უნებლიეთ დაემორჩილა ქალის ბრძანებას თუ გულწრფელ თხოვნას.

— მე, — დაიწყო ქალმა, — არც კი ვიცი სადაური ვარ, ოთხი წლისა მომიტაცეს. მხოლოდ ის მახსოვს, ცხენზე, ნაბადში გახვეული როგორ მიეყავდი პირახვეულ მამაკაცებს... შემდეგ ჩამომიყვანეს სტამბოლში და ერთ ვაჭარ კაცს მიმიყიდეს. ცამეტი წლისა ვიყავი, როცა იმ ველურმა კაცმა თავისი სურვილი აისრულა. შემძულდა ყველაფერი. ჩემთვის ქვეყანა დაბნელდა. ჩემს ბედზე, ვაჭარი მალე ზღვამ შთანთქა. მეც გავიპარე, თქვენს ქალაქში მოვხვდი და სწორედ იმ ხანებში ნადირას გადავეყარე. მისმა პირობამ შემაცდინა. ოქროებით დამაჯილდოვა. შეიდი დღე-ღამე ვიყავი შენთან, და შეიდას წელსაც რომ ვიცოცხლო, არ დამავიწყდება. მეფერებოდი როგორც ცოლს, ყველა სურვილს მისრულებდი, ყველა ჩემს ნაფიქრალს ხვდებოდი. შემიყვარდი პირველი მართალი სიყვარულით. მაშინ შენც ახალგაზრდა იყავი. მე უბედურს მომეჩვენე-

ნა, რომ შენც გიყვარდი. შენი მოტყუება არ მოვისურვე და სიმართლეში გამოვტყდი — გითხარი, რომ მე ნადირას ცოლი არ ვიყავი. შენ ჩერ გაოცდი, მერმე ხელი მკარი და სადღაც გაქარი. მივხვდი, რომ, როცა თქვენ დაბრუნდებოდით, მე იქ არ დამედგომებოდა. ხომ გახსოვს, რა უხვად დამასაჩუქრე. ყველაფერს ხელი მოვხვიე, ღამით გავიპარე და ისევ სტამბოლს ჩავედი. მას შემდეგ აქ ვარ. ერთი კაცი მომეხმარა, ვაქრის ქონებიდან მეგვიდრეობის ნაწილი მივიღე, შენი და ნადირას ნაბოძები ოქროც დავატრიალე, და აი ხომ ხედავ, სტამბოლში დავსახლდი. შენი ქალიშვილი ახლა პატარა აღარ არის. მას საუკეთესო აღმზრდელები ზრდიან, მაგრამ მამის შესახებ არაფერი იცის. მრავალი დამე გელოდი. ვიცოდი, ჩამოხვიდოდი, გითვალთვალებდი. თქვენ მხარეშიც დავიქირავე მოთვალთვალენი, მთელი შენი ცხოვრება ხელისგულზე მიზის. ყველაფერი ვიცი ბექა ჩაყელის შესახებ. აი, ახლა შევიყარენით და შენ პირში წყალი დაიგუბე, გაჩუმდი, ალბათ, ჩემთან შეილის ყოლბ გრცხვენიათ.

— არა ხართ მართალი, — წამოიყვირა ბექამ. ამდენხანს გაჩუმებულმა ახლა კი ველარ მოითმინა. — მე დავიბენი, დავიბენი იმიტომ კი არა, რომ ვერ გიცანი, არა, ჩვენი შეხვედრა, დაშორება და ისევ თავშეყრა უჩვეულო გარემოებაში მოხდა. სწორედ ამან დამაბნია, ათასი ფიქრი ჩამიღო თავში, არ დაგიმალავ და ათი ათასმა ექვმა დაიუფლა ჩემი გონება. ჯანდაბას ყველაფერი, რადგან შვილი მყოლია, ბედნიერი კაცი ვარ. ეს ერთი მაკლდა ამქვეყნად და ისიც მომანიჭა გამჩენმა. მე ამდენ ხანს იმ ხეს ვგავდი, რომელსაც ტანიც ჯანსაღი აქვს და რტოებიც ფართედ აქვს გადაშლილი, მწვანე ფოთლებიც ასხია, ნაყოფი კი მაინც ვერ გამოუხსამს. ამიერიდან სულ სხვა კაცი ვარ. გამიძეხ და შვილი, მაჩვენე, ქალო, გემუდარები, შვილი მაჩვენე!

ქალს ფერი დაჰკარგოდა. თვალები ცრემლით ჰქონდა სავსე. ბექაც აცახცახებული იდგა და შეტყუებდა.

— კარგი, წავიდეთ, აღსრულდეს, — თრთოლვით თქვა ქალმა და ბექას გაუძღვა.

ენით უთქმელი სილამაზის გოგონა იყო ბექას ნაშიერი. მამასაც საოცრად ჰგავდა. მისი ფართოდ გახეილი ნისლდაკრუ-



ლი შავი თვალები, შოლტივით ტანი და წელამდე თარხეული მსხვილი თმა უთუოდ ჩაყელების გვარზე მეტყველებდა. სიარული ქურციკივით ფრთხილი და ნაზი ჰქონდა. ნაბიჯს რომ გადაადგამდა, გეგონებოდათ, რალაცას ეპარებო. მეტად სწორი და ულამაზესი სახის ნაკეთები მნახველს ატყვევებდა. ჯერ კიდევ ლოგინში იწვა იგი, როცა დედამისმა ბექა შეიყვანა საძინებელ დარბაზში. გოგონამ გაიღვიძა და გაოცებული თვალები მიაპყრო უცხო კაცს.

— აი, შვილო, შენი მამა, მოეხვიე და გაიხარე, — ნაზად უთხრა დედამ. ნამძინარევეა გოგონამ უცებ ვერაფერი გაიგო. ბექას სუნთქვა შეეკრა.

— შენ მიშველე, ქვეყნის გამჩენო! — დაიბღვლა მან და გოგონა გულში ჩაიკრა. გაფრთხილებული გოგონა წივილით გაუსხლტა ხელიდან უცხო კაცს და დედას მოეხვია.

— ვაი ჩემს დღეს, ერთადერთი შვილი უცხოლად გამხდომია! — ისევ აღმოხდა ბექას.

ქართულმა სიტყვებმა გამოაფხიზლა გოგონა, დედა<sup>1</sup> ასწავლიდა და მხოლოდ მისგან ესმოდა ასეთი ლაპარაკი. ახლა იგი გაკვირვებით დააქჟერდა მოსულს. ახსოვს, მხოლოდ ერთხელ ზღვისპირზე გაიგონა ასეთი ქართული მან. აი იმ უცხო და ლამაზი ახალგაზრდა ვაჟუკისაგან. ის ბიჭი მაშინ გემს გაჰყვა და აღარ უნახავს. მას შემდეგ ხშირად დადის იგი ბოღაზზე, მაგრამ, როგორც საღამოს ალვის ხის ჩრდილი, ისე გაქრა ის ყმაწვილი.

„იმ ბიჭის მამა თუ არის, — გაიფიქრა უცებ და ისევ ფიქრშივე გააბათილა თავისი ნაფიქრალი, — იმ ბიჭს ხომ მამამისი ახლდა. აკი თვითონვე გაიგონა, როგორ შეესიტყვა გემის ბაქანზე მდგომ ჯმუხა და ჭარმაგ მამაკაცს ის ჭაბუკი. ისიც კარგად ახსოვს, მამაო, დაუძახა.

„ნუთუ ეს კაცი მე მეძახის შვილს?!“ — უცებ ლოყები გაუწითლდა ქალიშვილს.

— თამუნია, შვილო, — მოესმა ისევ დედის ხმა, — ეს შენი ღვიძლი მამაა, გესმის, დედიკო!

— მამაჩემია! — უცებ შემობრუნდა დედისკენ გოგონა. — მერე ამდენხანს სად იყო, რატომ ჩვენთან არ დადიოდა?!

— ყველაფერს გეტყვი, — დაიბნა დედამისი, — ყველაფერს.

ბექამ გოგონას წინ დაიჩოქა.

— მოდი, შვილო, შემხედუე, კარგად დამაკვირდი, როგორ ვგავართ ერთმანეთს, განა შეიძლება უცხო სისხლი და ხორცი ასე დაემგვანოს ერთმანეთს?! არა, შენ ნამდვილად ჩემი შვილი ხარ, ნამდვილად.

გოგონას კარგად გაახსენდა დედის ნამბობი — მამაშენს მიმინოები უყვარდაო. ამიტომ თვითონაც ხომ ზედ ფანჯრის ახლოს ჰყავდა მიბმული. ისე ქამაც არ შეეძლო, მეც ამიტომ მიყვარს ესენიო. გაახსენდა და უნებლიეთ გახედა ღია ფანჯარას.

მიმინოები ისევ კიპკიპებდნენ. მამამაც თვალი გააყოლა გოგონას თვალებს. ბექა მიხედა გოგონას ფიქრს.

— კი, შვილო, ჩემი საყვარელი ფრინველებია, როცა შინ წაგიყვან, შენ თვითონ ნახავ, სწორედ ასევე ფანჯრის ახლოს მუყახან დაბუდებულნი.

— განა თქვენ სხვა სახლში ცხოვრობთ?! — გაიოცა გოგონამ.

— ისიც შენია, ჩემო შვილო, და ესეც.

„ალბათ, ის ლამაზი ბიჭიც იქ ცხოვრობს“, — გაიფიქრა გოგონამ.

— როდის წამიყვანთ?! — იკითხა უცებ თამუნამ.

— როცა შენ მოისურვებ.

— დედიკო, შენც წამოხვალ ხომ? ალბათ, ის ვაჟიც იქიდან იყო, ხომ გახსოვს, მე რომ გითხარი?!

დედას მკვდრისფერი დაედო. ბექას არ გამოეპარა თამუნიას დედის ფერისცვალება.

— რომელ ვაჟზე ლაპარაკობს, ქალო, ჩემი შვილი?

— ბოლანზე შეხვედრია, ორი სიტყვაც არ უთქვამთ ერთმანეთისათვის, — ჩაფიქრებით თქვა ქალმა, — მგონია, ნადირას ბიჭი უნდა იყოს.

— ნადირასი?! — ენა დაება ბექას. — ნუთუ ისინი გადარჩნენ?!

— ფაზისის ნაპირებიდან მოჰყავს მომცრო გემი. ჩემმა მეთვალყურეებმა მითხრეს.

— დედიკო, შენ გცოდნია და მე კი არ მითხარი, — დალონდა თამუნია.

ბექამ დაკვირვებით შეხედა თამუნისას. მიხვდა ბექა ჯაყელი, გოგონას გულში ჩაფარდნოდა ქაბუჯი.

— სად შენ და სად ის, შვილო. შენ მეფის შვილი ხარ, ის კი მონის ნაშიერია.

თამუნამ გაოცებით შეხედა ბექას. დიდხანს უყურა მას და გაჩუმდა.

წყნარად გაუშვა დედას ხელები, წყნარადვე შებრუნდა და ნელი ნაბიჯით გავიდა გარეთ.

ბექა და თამუნისას დედა გაოგნებული მისჩერებოდნენ ქალიშვილს.

მესამე დღეს თამუნისას დედას მეთვალყურეებმა ამბავი მოუტანეს, ნადირა თავისი ცოლით და ვაჟით სტამბოლს ჩამოვიდაო.

ქალი ჩაფიქრდა.

„თუ ვაყსაც გულში აქვს ჩაფარდნილი თამუნისას სახე, აუცილებლად მოაკითხავს, თადარიგი მმართველს“.

მართლაც, საღამოს ზღვისპირზე უცხო ვაჟი შენიშნა. თან ქალი ახლდა. იგი კიბეზე დაეშვა, პირბადე აიფარა და სანაპიროზე გავიდა.

— ამ სახლში უნდა იყოს, დედი, — მოესმა ვაჟის ხმა.

„ნამდვილად ეს არის ნადირას ბიჭი, ტანსაცმელიც ქართული აცვია... ეს ქალი ვინ არის, შეტოკდა თამუნისას დედა. ღმერთო ჩემო, რა მშვენიერია, ალბათ, ეს არის დინდინა, რა ტანი და სახე აქვს, ბექა ჯაყელი ახლაც თავს გასწირავდა მისთვის, ჯანდაბას, მან არ უნდა გაიგოს ამათი მოსვლა. ეს ბიჭი კი თამუნისას ეძებს. გულში ჩაფარდნია და დედა წამოუყვანია სანახავად“.

— შვილო, იქნებ მოგელანდა, ქართველ ქალიშვილს ამ ოხერ ქალაქში რა უნდა?

— არა, დედი, ჩემი თვალით ვნახე, ჩემი ყურით გავიგონე მისი სიტყვები.

— თუ ესაუბრე, შვილო, არ გითხრა, ვისი ქალია, მშობლები ვინა ჰყავს?

— მითხრა, მამაჩემი ჩვენგან შორს არის, დედასთან ერთად ვცხოვრობო, მდიდარი ჩანს ძალიან.

— შვილო, გული დაიოკე, მდიდარი ქალიშვილი ჩვენს ოჯახს არ ეგებოს!

— ვითომ რატომ, განა მე ცუდი ვაჟი ვარ. დადიანი ვერ შეტყვის უარს, მე მხოლოდ ის მომეწონა. უმისოდ სიცოცხლე გამიმწარდება.

— შვილო ჩემო, შენ ცოდნა დიდი გაქვს, ზღვისა და გემის საქმე კარგად იცი, მაგრამ სიმდიდრეს თავისი კანონები აქვს. ჩვენ კი მხოლოდ დადიანის მოსამსახურენი ვართ.

— დედაჩემო, ხომ გითხარი, ქალიშვილმა თვითონ მიხმო მაშინ.

— გაჩუმდი, ბიჭო, ვილაც ჩადრიანი ქალი გვითვალთვალებს მგონი.

დინდინა ჩადრიან ქალს დააკვირდა.

თამუნიას დედას თითქოს რაიმე დაჰკარგვოდეს, ისე დაიწყო გარემოს თვალიერება.

— ჩადრიანი ქალი, დედი, ჩვენს საუბარს ვერ მიხვდება.

— რა იცი, შვილო, ეს ქალაქი, მამამ ასე თქვა, ფათერაკიანი ქალაქიაო. — სწორედ ამ დროს ვაჟმა უცხო ქალისაკენ მიიხედა. თამუნიას დედას გაცეცხლით კინალამ კენესა აღმოხდა.

ასეთი სილამაზის ვაჟკაცი მას არსად ენახა. ხორბლისფერი სახე ჰქონდა. მისი თაფლისფერი, ჰკვიანი თვალები ნაპერწკლებივით გარემოს ანათებდა. ახლადამოსული ულვაში ოღნავ ეძინეოდა. მაღალი, მაგრამ ძარღვიანი ბეჭები მეტად ვაჟკაცურ იერს აძლევდა. ისიც შენიშნა თამუნიას დედამ, მსუბუქი, მაგრამ მტკიცე ნაბიჯი რომ ჰქონდა.

— რას ეძებ; ხანუმ, იქნებ მოგეხმაროთ კიდეც, — ოსმალურად ზრდილობით და მოკრძალებით შეეკითხა ვაჟი.

„ხმაღ მეხივით ჰქონია, ამ დალოცვილს, — გაიფიქრა ქალმა, — აქაური ენაც სცოდნია“.

— ბეჭედი დავკარგე, შვილო, ალბათ, ზღვისკენ გადაგორდა.

— ძვირფასი იყო, ხანუმ, თქვენი ბეჭედი? — ისევ შეეკითხა ვაჟი.

— სახსოვარი იყო, შვილო ჩემო, თქვენ აქაური არ უნდა ზრძანდებოდეთ? — თავის მხრით შეეკითხა თამუნიას დედა.

— ჩვენ შორიდან ვართ, — უპასუხა დინდინამ შვილის მაგივრად.

„პო, ამასაც სცოდნია თურქული“, — გაიფიქრა ისევ თამუნიას დედამ, თან ხმამაღლა დაუმატა:

— ქრისტიანი იქნები, ჩადრი არ გხურავს.

— კი, ქრისტიანი ქალი ვარ.

— ქმარი ვაჭარი კაცი იქნება, ალბათ, თუმცა სახით დედოფალს გავხართ, — ეს ქართულად უთხრა, დედა-შვილი გაოცდა. დინდინამ საყვედურით გადახედა შვილს.

— ჩემი ქმარი უბრალო მენავე, ზღვაზე მოარული კაცია, მე, ჩემო დია, ამ ვაჟის დედა ვარ.

— ქართველი ქალი ჩანხარ, ქალბატონო, ჩადრი კი მოგიხურავს. ალბათ, რჯული გამოგიცვლია? — შეეკითხა ვაჟი.

— რჯული არ გამომიცვლია, ხასითი კი შემიცვალა წელთა სკლამ.

— ხასიათის გამოცვლას რჯულის გამოცვლა სჯობია, დედა.

დინდინას სახეზე აღმური მოეკიდა. ამ ქალმა ჩვენი საუბარი გაიგონა, ფათერაკი რამ გველისო, გაიფიქრა. იგი ქალისკენ მიიწია.

— თქვენ ჩემი შვილის საუბარს ყურს უგდებდით, ხომ?!

— დიახ, ყველაფერი გავიგონე.

— იცნობთ იმ გოგონას? — ისევ შეეკითხა დინდინა.

— თქვენ, ქალბატონო, მართალი ბრძანდებით, ის გოგონა მდიდარია, და უბედურება ის არის, რომ თქვენი ოჯახის მტრის ქალიშვილია.

— ჩემი ოჯახის მტრის ქალიშვილია?! — გაოგნებით გაიმეორა დინდინამ, — მტრის ქალიშვილი, — ისევ ჩაიჩურჩულა მან, — ვინა ჰყავს ჩემს ოჯახს მტერი, ქალო?!

— ის, ვინც ლაზეთს დააშორა შენი ოჯახი.

დინდინას ფერი წაუფიდა. შვილის მხარს დაეყრდნო.

— რა მოგდრს, დედა?! — გაოცდა და თან მოეხვია ვაჟი:

— სწრაფად, სწრაფად წამიყვანე აქედან, შვილო, ეს ქალი ჯადოქარია.

— არა, დინდინა ქალო, მე აღქაჯი კი არა ვარ, ვინც შენს ოჯახს ჰირი ააშორა, თვითონ კი მსხვერპლი გახდა იმ საშინელი თუ ბედნიერი ღამისა.

— ვაი, ჩემს ღღეს უბედურს, — წამოიყვირა დინდინამ, — გემზე, დათო, შვილო, გემზე წამიყვანე ახლავე, მამაშენი, მამაშენი... — რამდენჯერმე განწირულივით გაიმეორა ეს სიტყვა.

ბიჭი გაოგნებით შესჩერებოდა ორივეს. მას არაფერი არ ესმოდა, დედა მაინც მკერდზე მიიკრა და ჩასძახა:

— კარგი, დედი, გული გაიმაგრე, წავიდეთ.

— დინდინა, ისიც უნდა იცოდე, ბექა ამ ქალაქშია ამჟამად, მხლებლებიც ბლომად ახლავს.

დათომ გაიგონა თუ არა ეს სახელი, ტყვიამოხვედრილივით შემობრუნდა.

— რა სიტყვით, ბექა ჯაყელი ამ ქალაქშია?! თამუნია ქართველია, მამასადამე, მისი ქალიშვილი ყოფილა, ვაი მე უბედურს! — ეს უკანასკნელი უნებლიეთ გულიდან აღმოსკდა დათოს.

— არაფერია, შვილო! — აკანკალდა დინდინა. — ღმერთი დაგვიფარავს. დრო გავა და გადაგავიწყდება ის გოგონა. ახლა კი ამ ადგილს გავშორდეთ.

— არ გადამავიწყდება, დედაჩემო, არა... — ეს ისე გულწრფელად წამოიძახა, რომ თამუნიას დედას ცრემლები გადმოსცვივდა.

— იცოდეს ღმერთმა, შენზე უკეთეს სიძეს არ ისურვებდა დედის გული, დათო შვილო, მაგრამ არ ეგების. ბექა პირსისხლიანი კაცია, მამაშენის დაუძინებელი მტერია, არ მოხერხდება ეს ამბავი.

— თქვენ თამუნიას დედა ხართ?! — უცებ შემობრუნდა დათო მისკენ, — გვევლრებით ერთხელ მანახეთ მხოლოდ. სიტყვას გაძღვეთ, ამ ქალაქში ფეხს არ დავდგამ შემდეგ... ვიცი, რომ მასაც ვუყვარვარ, ვიცი, ვერც ის მოიშორებს ადვილად ჩემს სახეს. ვაითუ ის ჩემზე მეტად გაიტანჯოს, მაშინ რალა მეშველება მე უბედურს!..

თამუნიას დედას თითქოს რკინის კეტი დაჰკრეს მუხლებზე. „ვაითუ მართალი ხარ, — გაიფიქრა თავისთვის, — ღამეც კი, ძილშიც შენს სახელს ახსენებს, შვილო, მაგრამ მე რა მეშველება?!“

— მხოლოდ ერთხელ შევხედავ მას, — ემუდარებოდა ვაჟი, — ნუთუ არასდროს არავინ არ გყვარებიათ. თამუნიას დედა

არ იქნებით ასე ბოროტი. მე თქვენ დედად გიგულეობდით, ფიქრით გეფერებოდით, ხომ ხედავთ, საიდან სად ჩამოვსულვარ, დედ-მამა შემიწუხებია. მხოლოდ ერთხელ მინდა დაეინახო და მერმე ყველაფერს ავიტან.

— კარგი, ამობრძანდით ჩვენსას, — უცებ გადაწყვიტა თამუნის დედამ. მაგრამ იცოდეთ, ვაჟკაცის სიტყვა სიტყვად დარჩეს. მე შენს სახეს ვენდობი. რატომღაც მწამს, ნებამაგარი ვაჟკაცი იქნები, ავიდეთ, თამუნიაც იქ არის. მხოლოდ უთხარი, ისევ ჩამოვალ-თქო და შემდეგ კი შენ იცი და შენმა კაცურმა სიტყვამ...

— არ წახვიდე, შვილო! — თითქმის დაიწვილა დინდინამ. — ვგრძნობ, უბედურებას შეემთხვევი!

— არა სთქვა ცუდი, დინდინა, შენც დედა ხარ და მეც. ჩემს სახლში დათოს ავი არ შეემთხვევა.

— დათო, შვილო, მამაშენს მაინც შეეკითხე, გული გამისკდება აქვე, თუ უმამოდ გაბედე იმ სახლში ფეხის შედგმა!

დათო შეყოყმანდა. ჩაფიქრდა. მერე ზღვისპირისკენ შემოტრიალდა და თან მტკიცე ხმით თქვა:

— კარგი, მე გემზე ავალ, მამას ვეტყვი და ამ წუთს აქვე გავჩნდები.

იგი სირბილით წავიდა ნაპირისაკენ. ორივე ქალი გაშეშებული დარჩა ადგილზე.

— უმალ თამუნის მოხვედრა ტყვია, ვინემ შენს შვილს ცუდი შეემთხვევა ჩემს ოჯახში, — უსაყვედურა უნდობლობა ქალის დედამ ვაჟისას.

— მამამ უნდა იცოდეს ყველაფერი, მე უიმისოდ ასეთი ნაბიჯის გადადგმას ვერ გავბედავ, — დააშოშმინა ნაწყენი ქალი დინდინამ.

სასახლის ბაღში ხეებზე ფრინველები ჭიკჭიკებდნენ, ხანდახან მიმინოების კიპკიპის ხმაც აღწევდა. ამ ხმამ ისევ ბეჭასათარი გაახსენა დათოს დედას.

— მართალი ყოფილხარ, ბექაც აქვია, ალბათ, — ისევ შეესიტყვა დინდინა ქალის დედას.

— ახლა ზონთქართან არის, მან თქვენი აქ ყოფნა არ იცის, მაინც მითხარი, დინდინა, დათომ იცის იმ ღამის ამბავი?!

— ჩვენს ოჯახში იღუმალი არა არის რა. მამამ უამბო შეი-  
ლებს ყველაფერი.

— შეილები კიდევა გყავთ?

— სამი ვაჟის დედა ვარ.

— მე კი მხოლოდ თამუნია მყავს. ეტყობა, მისი ბედიც ნის-  
ლიანი და სევდით სავსე იქნება.

— რათა, ქალო, ალბათ, ლამაზია, ბექას ქალიშვილს ისეთი  
რა გაუჭირდება?!

— დათო უყვარს, ბექასაც უშიშრად უთხრა თავის გულის-  
ნადები.

— ვაი ჩვენს დღეს უბედურს, ალბათ, ბექა სიკვდილით გვე-  
მუქრება.

— არ ვიცი, სიტყვა კი არ უთქვამს, ცივად მოშორდა ქალი-  
შვილს და მის შემდეგ გარე-გარედ დადის.

— ავი ნიშანია, ისედაც სისხლმწყურვალ კაცია.

— ამის მეშინოდა, აი რატომ გითვალთვალეზდით.

სწორედ ამ დროს დათო გამოჩნდა, მის გვერდით ნადირა  
მოდოდა იარაღსხმული.

— აი მამაც აქ დაგვიცდის, ჩვენ იქ ავიდეთ, — მოსვლისთა-  
ნავე უთხრა დათომ დედას.

— წავიდეთ, შვილო, რას იზამ, ავბედს თვითონ მიჰყავს  
ადამიანი თავის ნებაზე.

— ნუ შიშობ, დედი, მხოლოდ ერთი სიტყვას ვეტყვი... უთ-  
ქმელად წასვლა არ შემიძლია.

თამუნია ჯერ კიდევ იწვა, ძილმღვიძარედ იყო. კარის ხმაჰ  
შეაფხიზლა. ფეხის ხმას დაუკვირდა, უცებ აიღოწა და წამო-  
ვარდა. დედა შემოვიდა თუ არა, სახეზე ამოიკითხა დათოს  
ჩამოსვლა.

— ჩამოვიდა, ხომ, იცანი?!

— ჩაიცივი, შვილო, და შეხვდი, — ქალიშვილმა შეხედა,  
დედას ფერი დაკარგული ჰქონდა. თამუნისას ელდა ეცა.

— შენ რატომ წვალობ, დედი, მამასთან პასუხს მე ვაგებ.

— ეჰ, ჩემო სიცოცხლე, სამწუხაროდ, დედები ყველას წი-  
ნაშე აგებენ პასუხს.

თამუნია ჩასაცმელ ოთახში გავიდა. ცოტა ხნის შემდეგ



იგი უკვე მზად იყო. სახე ვარდისფურცელივით ეშხით გაეცნო, თვალებში ნაკვერჩხლები გაუჩნდა.

აკანკალებულმა დედამ თამუნია დარბაზში შეიყვანა, დინდინას ოხერა აღმოხდა.

— ქალი კი არა, ანგელოზი ყოფილა! — ჩაიჩურჩულა უღლონოდ და თან კარს შეხედა, ბეჭა ხომ არ შემოვიდაო.

— თამუნია, — დაიწყო დათომ, — ღმერთმა იცის, უშენოდ სიცოცხლე არ შემიძლია, შეიძლება მოვკვდე კიდევ...

თამუნიამ დათოს სიტყვა შეაწყვეტინა:

— მე განა შემიძლია უშენობა, ახლავე წამიყვანე შენს ქვეყანაში.

დათო — სწორედ მისთვის ჩამოვედი და მშობლებიც ჩამოვიყვანე.

თამუნია — ნუთუ ეს დედაშენია, რა ლამაზი და კარგი ყოფილა. დედაჩემსაც ჰგავს, ოჰ, რომ იცოდეთ, როგორ შეგიყვარებთ, ქალბატონო!

დინდინა — მე უკვე მიყვარხარ, შეილო, მაგრამ ბედსა ჰკითხეთ, იმ ოხერ ბედსა.

თამუნია — რათა სთქვი, დედა, ასეთი სიტყვა. ჩემი ბედი დათოს გულშია.

დათო — ვაი, რომ ჩემი გული ხდება ჩემივე საფლავის გამთხრელი.

თამუნია — რას ამბობს, დათო, აზრი შეგეცვალა? ვაიმე უბედურს!

დათო — არა, ჩემო სინათლევ, ჩემი აზრიც და გონებაც შენ გეკუთვნის.

თამუნია — მე კი შემაშინე; გული გამიხეთქე.

თამუნია ს დედა — შეილო თამუ, შენი მამა და დათოს ოჯახი დანასისხლად არიან...

თამუნია — ჰოდა შერიგდებიან, ნუთუ მამებს შვილები არ უყვართ.

დათო — ჩემი მამა ორივეს მტლად დაგვედება.

თამუნია — განა ჩემს მამას ვძულვარ მე?!

სწორედ ამ დროს კიბეზე ბეჭას ლანდი გამოჩნდა. თამუნიას დედამ თავისი ჩადრი დინდინას მოახვია — სახე დამალე, მძახალო. ასე აჯობებს, — ჩაიღუღუნა მან.

ბეჭა — მე შენს გარდა შეილი არა მყავს, დღეს ჩონოქარსაც კი ვახარე ჩემი სიხარული.

თამუნია — ჩემი სიხარული კი ეს არის, მამა! შეხედე, აი, დათო ჩამოვიდა.

ბეჭა — შენი არჩევანი, შეილო, ჩვენი ოჯახის დალუპვაა.

თამუნია — შენი სიტყვა კი, მამაჩემო, ჩემი სიკვდილია.

დათო — ბეჭა-ბატონო, შეგვიბრალე, შეგვითვისე.

ბეჭა — უთვისარს ვინ შეითვისებს, მტერს ვინ შეიყვარებს, გლახას ვინ გააკაცებს!

დათო — ვერც კაცურ კაცს დააგლახავენ, ბეჭა-ბატონო, იცოდე! ჩვენც აღამიანები ვართ!

ბეჭა — მე ჩემი მითქვამს, კარგი ვაჟკაცი ჩანხარ შენს ეზო-გარემოში, ჩემი ეზოს ჭიშკარი კი სხვა გვარის კაცმა უნდა შეალოს.

დათო — ჩვენ ერთი ხალხის შეილი ვართ.

ბეჭა — მე თავზე ჩალმა მხურავს.

დათო — მე კი ჩემი ხალხის ქულს თავიდან ვერ მოვიშორებ.

დინდინა — უმალ ჩვენს ოჯახს მეხი დასცემია, შეილო!

ბეჭა — ჰა, ეს თქვენა ხართ, დინდინა? არ მინახიხარ და შენი ხმა კი მაინც ვიცანი.

თამუნიას დედა — ბეჭა, ჩემი ცხოვრება მღვრიე და უპატიურია, არც მამა მახსოვს, არც დედაჩემის მკერდის სითბო. მაგრამ მამაკაცის თავზე მაინც ქართული ქული მიჩვენია.

ბეჭა — გაჩუმდი! მამაკაცთა ქულის გამოცვლა დედაკაცის საქმე როდია.

თამუნიას დედა — მე ჩალმებიანი კაცების ღირსება ვიცი და ქართულ ქულიანისაც.

ბეჭა — ქულის გამოცვლა როდი ნიშნავს ტვინის გამოცვლას, განა მე ქართველი არ ვარ?

დინდინა — შენი ხალხი ქართველს აღარ გეძახის, ბეჭა-ბატონო!

ბეჭა — ვითომ და რატომ? მე მწამს, ეს ახალი რჯული უფრო აღამაღლებს ჩვენს ოჯახებს, ჩვენს ხალხს. დაუკვირდით

ოსმალთ, ძალით ძლიერი სამეფო შექმნეს. დედამიწას შიშით აზანზარებენ.

დ ი ნ დ ი ნ ა — ხალხი შიშით როდი ყუჩდება, ბეკა, ძალით ხალხის დარდს ვინ დაამებს?! იგი უფრო ბრაზდება, სისხლს გულში იხვევს და დროს უცდის.

ბ ე კ ა — თითქმის ნახევარმა საქართველომ ახალი რჩული მიიღო. მალე თბილისს ქალაქშიც ოსმალთ დროშა აფრიალებდა.

დ ი ნ დ ი ნ ა — ღმერთმა აშოროს ჩვენს ქვეყანას ასეთი ჭირი!

დ ა თ ო — ბეკა-ბატონო, ნუთუ არ იცნობთ თქვენ ქართველი კაცის გულსა და ფიქრს. განა არაბებმა ან მონღოლებმა გასტეხეს იგი?!

თ ა მ უ ნ ი ა — მამაჩემო, ამ ვეება ქალაქში მარტო მე დედეაჩემი ვართ ქართველები. განა ჩვენ ოდესმე ოსმალონი გავხდებით?!

ბეკამ თვალი დააშტერა თამუნისას. „მამაჩემის სიჯიუტე დაჰყოლია, ისიც რომ ცოცხალი იყოს, თავის ხელით ჩამცემდა სატევარს ტარამდე“. მერე დათოს მიუბრუნდა:

— მე შენზე ბევრი რამ მითხრეს საქები, ამ საქმეშიც საქებარი საქმე ქმენ. თამუნია შენი ცოლი ვერ გახდება. ამბობენ, ბევრი გისწავლია. დღეს ერთიცი შეიძინე გონების სიმდიდრისათვის, ყმაკაცი მეფის ქალს მხოლოდ სიზმარში და ზღაპარში თუ ეღირსება მეუღლედ. მე მდაბიოსთან პაექრობას არ ვარ მიჩვეული, შენთან ამას ჩემი ერთადერთი ქალის პიტივისცემა მალაპარაკებს, ვიცი, რომ მასაც მოსწონხარ. შენ ვაჟკაცი ხარ და თავიცი ვაჟკაცურად დაიჭირე. ერთიცი გახსოვდეს, მამაშენი ყმა კი არა, დადიანიც რომ ყოფილიყო, მისი შვილი ჩემი ქალის ქმარი ვერ გახდებოდა. აწი შენ იცი, ბიძია, თუ ხვალ შენი თანხლებლებით სტამბოლის ნაპირებზე გნახეს, ზეგ დილით შენი თავი ხოცორა კვახივით სულთანის კარიბჭეზე იქნება დაკიდებული. მე ჩემი ვთქვი, შენ კი შენი ჰქენი. ვინძლო ჰქუა არ წააგო!

იგი შებრუნდა და კარისკენ გაემართა. თითქოს რაღაც გაახსენდაო — უკან შემობრუნდა და თამუნისას დედას უბრძანა:

— ხონთქარს შევპირდი, ხვალ ჩემს ქალიშვილთან ერთად უნდა ვესტუმრო!

სიჩუმე ჩამოვარდა, ყველას ზარი დაეცა, ყველანი მიხვდნენ თამუნისას თავზე მეხის დაცემას.

დათო ერთიანად კანკალებდა. ხელი ხანჭლის ტარს მოავლო უნებლიეთ.

თამუნიამ ყველას სათითაოდ შეხედა და მერე დედას მიუბრუნდა:

— მამა კი არა, შვილის მკვლელი მოგსვლია, დედაჩემო!

ბექას თითქოს არც კი გაეგონოს ეს სიტყვები, კიბე ჩაიარა და ბალის კარით ქალაქს გავიდა.

დათომ შეხედა, როგორ შემოეხვივნენ მხლებლები და როგორ დაუწყო მათ გაცხარებული საუბარი ბექამ. ისიც დაინახა დათომ, მამამისი ნადირა როგორ ქურდულად უთვალთვალებდა ბექას თავის მხლებლებითურთ.

„რასაც მამა მიჩჩევს, იმ გზას დავადგებო“, — გაიფიქრა მან და სირბილით გაიქცა მამისკენ.

— ამ წუთს დავბრუნდებო, — ეს კი დაუძახა დედას.

— გველმა შხამი შემოგანთხია?! — შეეგება შვილს მამა.

შვილმა არათფერი უპასუხა, მხოლოდ შეხვედრის ამბავი უამბო.

არავინ იცის, რა ითათბირეს მამა-შვილმა, მაგრამ იმ ღამით მათი გემი ყველას დასანახად გასცილდა სტამბოლის ბოლანს. გემის ცხვირთან სამთავენი ერთად იყვნენ. ხოლო როცა გემი ზღვაში შევიდა, ვერავინ დაინახა პატარა ნავი როგორ მოსწყდა გემის კუდს და შეუმჩნევლად ნაპირისკენ წამოვიდა. სწორედ ათი დღის შემდეგ, როცა ხონთქარმა ბექა ჩაყელი თეირანში ერთი კვირით დაასაქმა, სტამბოლიდან უკვალოდ გაქრნენ თამუნისას დედა და მისი ქალიშვილი.

გაცოფებული ბექა მიწასა და კლდეს გლეჯდა, ქვეყნის ყველა მხარეს დაგზავნა მეთვალთვალენი. ვერსად ვერ მიაკვლია მათ ნაგზურს. თამუნისას დედამ მთელი ქონება თითქმის ხელუხლებლად მიატოვა.

— ყველაფერი წყალს წაუღია. კარგი იყო, თავიდან არ მენახა ჩემი ქალიშვილი, ვნახე, შევიყვარე, შვილად ვიგრძენი და მაშინ დავკარგე. არა, მე რა კაცი ვარ, თუ ისინი არ მოვნახე!..

სამი წელი არბენინა შიკრიკებზე ყველა ქვეყანაში ბექაძე. სამი წელი თვითონაც გადაიარა სხვადასხვა კუთხის მიკვლევულ-მიუხვლეველი გზები. ვერსად ვერაფერი ვერ გაიგო. ბოლოს რკინის პალოში ჩამობრუნდა, სასახლეში ჩაიკეტა და გაირინდა. ამ ხნის მანძილზე სამცხე-საათაბაგო თავის რწმენაზე გადაიყვანა და თავის მამა-პაპის ძელები ქვეყანას გადააფიქსა. თითონ კი მოტყდა, ჭალარა შეეპარა და სახეზე ნაოჭები გაუჩნდა.

ერთ ღამეს მოახსენეს ბექა-საფარს — უცხო კაცი მოვიდა, შენს ნახვას თხოულობსო. დარბაზში ჭარმაგი კაცი შემოვიდა. შეხედა თუ არა მოსულს, ბექას ცეცხლი ჩაუდგა თვალებში.

შეხვედრისთანავე იცნო ნადირა, იგი ტახტიდან წამოვარდა და ათრთოლდა.

— დაწყნარდი, ბექა-ბატონო, დიდი სათქმელისათვის მოვსულვარ.

ბექამ ოდნავ წინ წამოდგა ნაბიჯი. შეატყო თავის თავს, რომ ხმა სადღაც გაუქრა.

„დავბერებულვარ, მტერი სახლში თავის ფეხით შემოტანტალდა, მე კი ხმაე ჩამივარდა“.

ეს თავისთვის გაიფიქრა მან და თან ხმამაღლა დაუმატა:

— ჩემი მასპინძლობა ვერ გიშველის, ნადირა, ცხოვრება შენ მომიწამლე, სიცოცხლეს მე გაგიმწარებ, აი, მერე, თუ გინდა ცოცხლად ჩამმარხონ მიწაში.

წარბი არ შეუხრია ნადირას. იგი მხოლოდ ერთხელ შეტოკდა, ისე რომ ბექას არც შეუმჩნევია.

— მე, ბექა, კიდევ გიმეორებ, პირად საქმეზე არ მოვსულვარ. ხალხმა გამომგზავნა. უნდა მომისმინო, მერე კი შენ იცი, — ბექას მშვიდ მიმინოსავით აბრიალებული თვალები ოდნავ დაუცხრა. ნადირას დააჩერდა, მერე უკან დაიხია და სავარძელზე დაჯდა. სტუმარს მაინც არ უთხრა, დაბრძანდითო.

— აბა, მოყვივი სათქმელი, გისმენ!

— ქართველ ხალხს უჭირს, ოსმალები გლეჯენ და სწეწენ ნაწილ-ნაწილად. შენ გადაგვიდექი. ეს მიწაწყალი მტრებს მიუგდე საჯიჯგნად. ვინც რჯულს არ გამოიცვლის, ყველაფერს ართმევენ, უკეთეს ოჯახებს შიგ ოსმალეთში ასახლებენ, მონებად ჰყიდან. ბექა-ბატონო, განა ჯაყელების გვარი ასე იქცეოდა ოდესმე?!

— მე საფარ-ბეგს მეძახიან ახლა, მონავ!

— მართალია, საფარ-ბეგს გეძახიან, მაგრამ გვარად კი ისევ ჭაყელი ხარ!

— ბექა ჭაყელის გვარ-სახელი ჩემს სიცოცხლეშივე ჩაიფერულა, აწი მას აღარავის დაარქმევენ.

— ჩემმა რძალმა და შენმა ქალიშვილმა სახელად მაინც ბექა დაარქვეა შენს შვილიშვილს, — თვალი თვალში გაუყარა ნადირამ.

— რაო?! — ველარ დაეტია სავარძელში ბექა-საფარი. — ვინ დაარქვეა, ვის დაარქვეს?!

— შენმა ქალმა, შენს შვილიშვილს ბექა დაარქვეა, ლაზთა ბატონო.

— ბექა დაარქვეს სახელად? — დაიბნა ბექა ჭაყელი, — მაშასადამე, ვაჟი ყოფილა ჩემი შვილიშვილი, — ეს ჩურჩულით თქვა. თათრული ფორთოხლისფერი დაედო, კანკალი აუტყდა.

— ვაჟია, მესამე ვაჟი.

— მესამე ვაჟი?! მაშასადამე, სამივე შვილიშვილი ვაჟი ყოფილა.

— კი, სამივე ვაჟია. უმცროსი შენ გვარზე მონათლეს, ესეც შენმა ქალიშვილმა დაიყინა, თუმცა მღვდელი კი წინააღმდეგო იყო.

— მღვდელი წინააღმდეგი იყო? — კიდევ უფრო გაოგნდა კაცი, — შერედა, აბა, ვინ ჩაწერა ჭაყელად?!

— კათალიკოსმა დართო ნება. იმედი აქვს თქვენი, შეცდომას მიხვდებოდ.

— ვისა ჰგავს ეს პატარა შვილიშვილი? — თითქოს არ გაეგონოს უკანასკნელი სიტყვა, ისე ჰკითხა ბექამ ნადირას.

— შენ გამგვანებენ, კათალიკოსმა თქვა, ნამდვილი ჭაყელიაო, და თან დაანათლა, განსვენებულ თქვენს მამას ჰგავდესო.

ბექამ უნებლიეთ ხმლისკენ გასწია ხელი, მაგრამ ისევ შედრკა, ისევ ჩაფიქრდა და გესლიანად უთხრა ნადირას:

— ჰო, მე მოღალატედ მთვლიან ბაგრატიონები, ურჯულო კაცი ვარ, ხომ?

— კი, ასე გთვლის მთელი შენი ხალხი — დინჯად დაუკრა კვერი ნადირამ.

— კიდევ რა დაგაბარეს? — პირისპირ შემობრუნდა ნადირასკენ ბექა.

— კიდევ? აი ეს გამომატანეს, — ნადირამ ჩოხის უბეში ხელი ჩაიყო და იქიდან მუჭის ხელა გასანთლული ქალაღდის ტომსიკა ამოიღო. გასანთლული ქალაღდის პარკიდან ხოჭო-ებივით იღანდებოდა და მოძრაობდა ფრთიანი კიები.

— ეს რაღა ბიქო?! — გაოცდა ბექა-საფარი.

— ეს, ბატონო, ქართული დედაფუტკარი გამომატანეს გელათის მონასტრიდან, ოდესღაც თქვენს პაპის პაპას შეუწირავს ღვთისმშობლისათვის, მამლებიც გამოაყოლეს. ერთ ჭიშხე იმრავლებენო.

— მერე, და რად მინდა ფუტკარი, თაფლი მაკლია თუ სანთლის არაყი?!

— ამის სანთლით შეევედროს ოშკის წმინდანებსო, დანაშაული ეპატიებო.

— ნადირა, — უცებ უკან დაიხია და სავარძელზე ჩამოჯდა საფარ-ბეგი, — ყველაფერი მიპატიებია, ახალავე გამშორდი, თავი არ შემომმაკლა, არ მინდა ჩემს შვილიშვილებს მეორე ბაბუაც მოვაშორო, წადი, ძმაო, წადი, შენი გზა ნახე!

— ერთი შვილიშვილიც გამომატანეს შენთან. თუ მიბრძანებ, მოვაყვანიებ. — ეს კი მეტისმეტი იყო. ბექას ქვედა ყბის ძვალი უკანკალებდა.

— ვინ მომიყვანე?! — ველარ მიხვდა ბექა ჯაყელი.

— უმცროსი შვილიშვილი. როგორც მოგახსენეთ, ბექა ჯაყელი დაარქვეს კათალიკოსის რჩევით.

— მართლა მომიყვანე? — ველარ გაუძლო ბექამ ამ ცთუ-ნებას. — სულ მომიყვანეთ, თუ გინდათ მაჩვენოთ და სიბერე მომიშხამოთ?!

ნადირამ არაფერი უპასუხა, მხოლოდ ისე შეხედა, ეტყობო-და, რაღაც იღარდა, იგი დიდხანს შეცბუნებული იყო და ბო-ლოს უთხრა საფარს:

— ჩემს მუხლებზე გაზრდილია და გულითაც მე მგავს, ისე კი გარეგნულად გამოცხადებული შენი სურათია, ხალხის გუ-ლისთვის გავწირე იგი მე, აქედანვე იცოდე, ოსმალური ტალა-ვერი არ მიაკარო და არც თვითონ ჩაიცვამს.

— შემახედე, სად არის, მომიყვანე!.. — წაიყრუა უკანანკნელი სიტყვები საფარმა.

ნადირა უკან გაბრუნდა. სარკმლიდან დიდხანს ადევნებდა თვალუფრს ბექა-საფარი მიმავალს, მერე ტაში შემოჰკრა. ოთახში მსახური შემოვიდა.

— იმ კაცს შორიახლო უთვალთვალეთ, არსად გაგეპაროთ, თორემ!...

მსახური გააკვირვა საფარის სახის ფერმა და სისხლიანმა თვალბმა. იგი უხმოდ შემოვიდა და უხმოდვე გავიდა.

როცა ბავშვი შემოიყვანა ნადირამ, ბექა თითქოს წყნარად იჯდა სავარძელში. ბავშვი ექვსი წლისა თუ იქნებოდა.

შეხედა თუ არა დიდმა ბექამ პატარას, თვალეზი დაეწკურა. ქვედა ყბა ისევ აუკანკალდა.

„ღმერთო ჩემო, ჩემი ბავშვობაა, ჩაქურაც თითქოს მისივე იყოს, — უცებ გაუელვა ამ ფიქრმა ბექას. — აი, ის სირმები, მამამ რომ ჩამოატანინა თბილისიდან სააღდგომო ტანსაცმლისათვის. ნამდვილად ის არის, აგერ სამხრეზე გადიას ხელით მოქარგული ფრთაგაშლილი შევარდნის ბარტყი...“

— თქვენი სიცოცხლე, ბაბუა ბატონო, — სიზმარეულივით მოესმა ახლა ბავშვის ტკბილი ხმა ბექას.

— მოდი, შვილო თუ ძმაო, — აებლუჯა ენა ბექა-საფარს. — მოდი.

ბიჭმა ფეხი აუჩქარა, ტახტზე მჯდარი ბექას გამოწვდილა ხელებიდან მარჯვენა აირჩია და ხელზე ხელი დაჰკრა.

— გამარჯობა, ბაბუა! — ისევ გაისმა ბავშვის იაღონივით ხმა.

— გაგიმარჯოს, ბაბუ; გაგიმარჯოს. ერთი ეს მითხარი, საიდან მიცნობ, ბიჭო?!

— სურათიდან, მამამ დახატა თქვენი სურათი.

— ჩემი ბიჭი ხანდახან სურათებს ხატავს, თქვენი სახე გაუხსენებია და დაუხატავს, — ჩაიბუბუნა ნადირამ.

— იქ სხვანაირად ხარ დახატული, ბაბუ, ქართული ქული გახურავს თავზე, აქ თათარივით რატომ გაცვია?! — ატიკტიკდა ბავშვი.

ბექას ხმა არ ამოუღია. მხოლოდ ნადირას შეავლო ეჭვით სავსე თვალეზი. იგი დიდხანს იყო ჩაფიქრებული.



ბავშვი ხელიდან კი მაინც არ გაუშვა.

„მათ უნდათ, ეს ბავშვი შემაყვარონ და ხელები მაგრად ჩამავლონ. მერე კი...“ — ფიქრი არ დაასრულა მან.

ნადირას არ გამოეპარა ბექას თვალელებში გაცრული კვესი.

— ბაბუა ნადირა, ნათლიას საჩუქარი არ აჩვენებ ბექა ბაბუას?.. — გაახსენდა ბავშვს.

ნადირა შეინძრა, მის თვალელებში ნაპერწკლებმა დაკვესა. ბექამ კიდევ უფრო იქვენეულად შეხედა ნადირას.

— ვინ არის ბავშვის ნათლია? — წყნარად იკითხა ახლა ბექამ.

— ხომ მოგახსენეთ, თვითონ კათალიკოსი.

— რა საჩუქარზე ამბობს ეს ბალანა?! — ისევ წყნარად და დაკვირვებით შეხედა ნადირას ბექამ.

ნადირამ თითქოს უხერხულობა იგრძნო და ფიქრი დამალა, ისე გადაინაცვლა ფეხიდან ფეხზე.

— კაჭიჭის მტევანი გამოგიგზავნათ, ერთ დროს თქვენს პაპას, დიდ ყვარყვარე ჭაყელს ფიცის გასახსენებლად გელათის ღვთისმშობლის კეთილ სახისთვის მიუტანია საჩუქრად.

ბექა-საფარს თვალეები გაუფართოვდა.

— კაჭიჭის მტევანი?.. — ისევ ფერი შეეცვალა ბექას და ახლა მარჯვენა ბეჭი აუკანკალდა.

— დიახ, გელათის წიგნ-ეტრატის გამომშრალი კაჭიჭის მტევანი. გეცოდინებათ, თქვენი წინაპრის დიდი ყვარყვარე ჭაყელის ხელით ყოფილა მოწყვეტილი და კობტასთავში ჩატანილი, ცოტნე დადიანის ხელშესაფიციად.

— მერმე ვითომ მე რათ მინდა ასეული წლების წინ გამომხმარი მტევანი?!

— თვითონ მიხვდები, ბატონო ბექა.

ბექამ ახლა ბავშვს ხელი გაუშვა და ნოხებით მოფენილ იატაკზე აღელვებით დაიწყო სიარული.

— ისინი ფიქრობენ, მონღოლების წინააღმდეგ ყვარყვარეს შეფიცება ოსმალთა განსადევნად მიემართო, არა?

— ორივენი ჩვენი ქვეყნის დამრბევენი არიან, ბექა ჭაყელო, ორივენი სხვა რჯულისანი არიან.

— თქვენ დაგავიწყდათ, რომ მეც მაჰმადის რჯული მივიღე და თავზე ჩალმა მხურავს?!

— შეცდომა გამოსწორდება, ლალატი კი არა.

— საქართველოც მალე მიიღებს მაჰმადის რჯულს. სხვა გზა არა გვაქვს, ნადირა.

— თქვენ რა მოგიტანათ მაჰმადმა, ჩვენ რომ ის ვიწამოთ, ბექა-საფარო?! განა ახალციხის ფაშის მონობა დასაკეცხნია?!

— ჩემმა გონებამ ეს ირჩია, თქვენმა თქვენი თქვას.

ახლა ნადირას ეცვალა ფერი.

— ეს არის თქვენი პასუხი, ბექა-საფარო?!

— ეს არის, ნადირა, მაღლობა მითხარი, ჩემს თავთან ფიცა რომ გავტეხე და ცოცხალი მიდიხარ. ბავშვიც თან წაიყვანეთ, მხოლოდ მალე გამშორდი, სხვა ფიქრი არ დამედევნოს, ავი საქმე არ მაქნევინოს!..

— შვილიცა და ყურძნის მტევანიც, გეტყობა, ორივე ერთად შეგძლებია, ჭაყულო!

— წადი, ძმაო, წადი, იცოდე, აწი სამცხე-საათაბაგოში ვერც ეს ჭვრიანი ბავშვი იხეირებს და ვერც საღვინე ყურძნის მტევანი!

— გონებაძალუმი კაცი მეგონე, საფარო ჭაყულო, შევეცი, ეს მიწა ამ ბავშვსაც ნახავს და ყურძნის მტევნებსაც მოისხამს!



მოხუცმა დაამთავრა თქმულება და ქისა ამოიღო. აჭარული ყვითელი თუთუნი გრძელბეწვად დაეჭრა და იქიდან ოქროს წვრილი ფურცლებივით ამობრჭყვიალდა. მან ჩიბუხი თამბაქოთი გატენა და ისევ განაგრძო:

— შეცდა ჭაყული, ახლა ხომ ხედავთ, ჩვენმა ბავშვებმა სად მიახატეს ყურძნის მტევნები ამ სასახლეს. არა, ძმაო, ხალხს თავისას ვერავინ დაავიწყებს, აჭარა თანდათან იმოსება ყურძნის მტევნებით. ხეებზე ისევ მრავლდება კაჭიჭის დახუნძლული ნედლი ლერწი, ისევ გამოთალეს ჩვენებმა ცაცხვის საწნა-ხელები, ისევ მონახეს ჭურისთავის გადასაგლეხი აყალო მიწა. აღარ ჩაქრება აწი ჩვენს მარნებში მაჭრის ჩუხჩუხი.

მოხუცი გაჩუმდა და კულტურის სასახლის გუმბათს კიდეც ახედა. იქიდან ისევ მომაჯადოებლად იყურებოდნენ თაფლჩაწვეთებული სავსე მტევნები, ისევ ზურმუხტისფრად იმზი-

რებოდნენ კაჭიჭის ფოთლები, ისევ გაღიმებით შესცქეროდნენ ადამიანები ამ დიდებულ ნახატს.

სცენის წინ არქიტექტორი ტრიალებდა.

— აი, ამ ბიჭს მოუფიქრებია ამ თეატრის გეგმა, — ჩურჩულთ მითხრა მოხუცმა და თან თვალებით ჭემალი მაჩვენა, — შეხედე, რა ლამაზი ვაჟაკიაო, ის ბიჭი, მგონია, ნადირას შვილიშვილი, საფარა ჯაყელს რომ ეგონა, არ დაბრუნდებაო, — მერმე ისევ დაფიქრდა, თვალები ისევ გუმბათზე მოხატულ ყურძნის მტევანს მიაშტერა, ცოტა ხანს გაჩერდა და გასასვლელისაკენ წავიდა. არ ვიცი, მე მითხრა თუ თავისთვის ჩაილაპარაკა. როცა კარებთან მივიდა, ისევ შემობრუნდა და წყნარად ჩაილაპარაკა:

— ის ბიჭიც დაბრუნდა და ყურძნის მტევანიც, საკვირველია, ორივენი დაბრუნდნენ, ორივენი...



ეზოში უამრავი ხალხი ირეოდა. მოხუცის ნაამბობით აფორიაქებული ჩამოვედი სასახლის მაღალი კიბით ეზოში. რატომღაც ნადირა დამიდგა თვალწინ. ნადირა კი არა, ისევ ის მოხუცი, ვინც მისი ამბავი მიამბო. მართალი რომ გითხრათ, ორივე ერთმანეთში ამერია. ვიფიქრე, თვითონ ნადირამ ხომ არ მიამბო-მეთქი ეს ამბავი.

ასეა, ალბათ, ამ ცხოვრებაში, დღევანდელი ადამიანი გუშინდელი კაცის ცხოვრების ამბავს გიყვება და თვითონ ჰგავს სადღაც თავისი ნაამბობის გმირს. ეს მოხუცი ისე, ვით ნადირა, მტკიცედ უყურებს თავისი სამშობლოს ქვაკუთხედს, თავისა სამშობლოს დღესა და ხვალეს. სწორედ ამ ნათელი, წრფელი და სწორი გზით მავალი ადამიანების კვალს მიჰყვება ხალხი. იმით სუნთქავს, იმით ცოცხლობს, იმ აზრით და საქმით მიიწევს წინ

სხვანაირად არც შეიძლება. ასე ყოფილა და ასე იქნება.

## გელათის ქრონიკები

გეგუთის თამარის სასახლესთან ახლო მინდვრებზე თუ გივლიათ, რატომღაც იქ, იმ მიდამოებში, ცა დაბალი მოგეჩვენებოდათ. გგონიათ, ხელს ავიქნევ და აუცილებლად მოვახვედრებო. უმზეო ამინდში ღრუბლის ფთილები თითქოს შიწას ეხებინან და ენარცხებიან. მაგრამ როგორც ცოტას ხელმარცხნივ, ნანგრევებისაკენ გაიწევ, რიონის პირს გადაადგები და იქიდან გელათის მთისა თუ ბაგრატის ტაძრისაკენ მიიხედავ, ცის თალი უცებ აიწევს, მაღალი და მიუწვდომელი ხდება. უსასრულობის ეს ლურჯი გუმბათი უფრო მშვენიდება, შორეულ, მაგრამ მეტად წარმტაც სილამაზედ იქცევა. რიონის მქუხარე ტალღებთან ერთად ვარციხის ქალების გაღმა აჯამეთის უსიერი ტყე ზურმუხტისფრად შემოგანათებთ. შეიძლება ეს ტყის ფერი უმატებდეს გეგუთის ამ ადგილს სილამაზეს.

ბუნების ამ იღუმალ სიმშვენიერეში ერთი წერტილია, სადაც ცის ეს სიდაბლე თუ სიმაღლე იყოფა. სწორედ სივრცის ეს გამყოფი მოუნახავთ ჩვენს წინაპრებს და ზედ გეგუთის მშვენიერი სასახლე აუგიათ. ხელმარკენივ კოლხეთის თვალუწვდენი ტანმაღალი ძელქვის გაუვალი ტყეები და რიონის ტანგაშლილი ჭონჭყოიანი ტევრები იწყებოდა, ჩრდილო-აღმოსავლეთით კი დიდი კავკასიონი მალდდება თავისი თეთრი ყინულოვანი მწვერვალებით. ისინი ზღაპრული სვეტბივით შესტოტებიან ცის ამალღებულ გუმბათს.

ხანდახან, როცა უღრუბლო ამინდი დგება და კავკასიონის ყველა მწვერვალი თვალსაწიერზე, ხელმისაწვდომი მოჩანს, მაშინ ცის ლურჯ გუმბათში შეცურებული ვეება მწვერვალები ცაში შეტყორცნილ მარმარილოს კიბეებსა ჰგვანან. აქედან თითქოს ყველაზე მოკლე მანძილია ადამიანებიდან ღმერთამ-

დე. შეიძლება სწორედ ამ კიბეებით აღიოდა შოთას ესოდენ მაღალი აზრები ზეადამიანურ სიბრძნემდე და სილამაზემდე. შეიძლება სწორედ ამ მწვერვალთა თეთრი ყინულის წვერები, საფეხურებივით რომ ამალღებულან ცის თალისაკენ, მართლაც, შოთას ფიქრის და აზრის ესოდენ ამალღების საფეხურებიც გახლდათ?! ვინ იცის, ვინ მიხვდება?! ვინ გამოარკვევს ამას?! დიდ შემოქმედს ვინ გაუგებს, სად დაიწყო მისი ფიქრის სათავე და ფუძე?!

ასეა თუ ისე, გეგუთის მინდვრებიდან, გეგუთის ამ სასახლიდან ჰაბუკს თუ ჰარამაგ წლებში შესულ რუსთაველს არაერთხელ შეუვლია თვალი ამ ცისა და მიწისათვის. ვინ იცის, რამდენჯერ გადმოუვლია ხან გონიოს შემოვლით და ხან კიდევ პირდაპირ, ზეკარის უღელტეხილით თუ ლამაზგორის გადმოვლით, საირმის წყაროების ბილიკებით მესხეთიდან მომავალს.

შეიძლება გეგუთის ამ სივრცის გამყოფი წერტილიდან დაინახა მან ასე სიციხალით ცის თალში შეტოტებული დიდი კავკასიონის თეთრი მწვერვალები, რომელთა სიმაღლემ ჰეშმარიტად მისი გონების თავანიც ესოდენ აღამაღლა. შეიძლება სწორედ ამ ციური კიბეებით შეფიქრებულმა შოთამ ძლიერების და მშვენიერების ერთადერთ შემოქმედად აღამიანი აღიარა და არა სხვა ბუნდოვანი ძალები, რომ მაშინდელი აღამიანის გონიერების გასაოცებლად დიდი რუსთაველის გენია ჩასწვდა იმას, რაც აქამდე უცნობი და მიუწვდომელი იყო კაცთა მოდგმისათვის.

იმ დროის აღამიანების აზრით მხოლოდ ღმერთებს, ან ქრისტესა თუ მაჰმადის მსგავს შეუამავლებს შეეძლოთ ბოროტების დაძლევა, აღამიანები კი სუსტნი არიან ამქვეყნიურ საშინელებათა დასათრგუნავად. ჩვენს სამყაროში სიკეთისა და მშვენიერების აღამიანის სიძლიერესთან შერწყმა, მისი ამალღება და ესოდენ ხელმისაწვდომად გახდომა შოთას პოეზიის სასიცოცხლო მაჯისცემია. მისი აზრით, აღამიანი ძლიერია, ლამაზია, მშვენიერია...

ღიახ, აქედან, გეგუთის სასახლის კარიბჭედან, სადაც „ვინმე მესხი მელექსე“ ჯერ კიდევ, ალბათ, ჰაბუკი მოვიდა, იშლებოდა მისი გონების მაღალი დასალიერი, ახლა როგორც იტყვიან, მისი თვალისა და გონების ფართო ჰორიზონტი.

ვინ იცის, იქნებ პირველი გულისდამწველი ნაპერწკალიც სწორედ გუგუთის მინდვრებზე ჩაეკვსა ჭაბუკ გენიას, რომელიც შემდეგში ამოდენა დამბუგავ ცეცხლიან ქარიშხლად იქცა მის ისედაც ამალღებულ, ბობოქარ სულში?! მეჩვენება: ტახტის ნამდვილი მემკვიდრის დემნა ბაგრატიონის ტოლი შოთა რუსთაველი უთუოდ აქ, გეგუთის მინდვრებზე თუ გელათის აკადემიის კარიბჭესთან შეხვდებოდა მეფე გიორგის ყრმა ასულს თამარს.

და აი ახლა, როცა ჩვენი მანქანა გეგუთიდან გელათისაკენ მიგვაფრენს, ნამდვილად მწამს, რომ შოთას ნაგზაურზე მივდივარო. ეს ქუჩა მწვანე ყვავილას ფერდს მოჰყვება და გელათისაკენ მიემართება. ამ ქუჩას ახლახან დავით აღმაშენებლის სახელი დაარქვეს. ქუთაისის ამ ქუჩაზე, ზედ სატელევიზიო კოშკის ქვემოთ, დასაბამიდან „ლარსიკეთის წყარო“ ამოქუხდა. ქუთათელებს იგი შესანიშნავად მოუპირკეთებიათ და „შოთას ლარსიკეთის წყარო“ დაურქმევიათ.

გალმიდან ცის სილურჯეში შეტყორცნილი ბაგრატის ტაძრის კედლები ფრთებჩამომტვრეული არწივივით იყურება. ბაგრატის მთიდან კი თეთრი ნისლით შემოხვეული გელათი ცაში შეფეთქებულ გედსა ჰგავს, ნიშნეულია ისიც, რომ ამ მთიდან თამარის ეკვდერის კედელი განზრახ დამიზნებულებით იხედება მისკენ, ბაგრატის ტაძრისაკენ.

გელათის ტაძარი კირითხუროებს მტკიცედ უკეთებიათ. მისი ფუძე და კედელი მტერთათვის ადვილად დასაპატრონებლად როდი უშენებიათ! ტაძრის ეზომდე საკმაოდ მაგარი და ღრმა თალიანი გვირაბი ამოუყვანიათ. ტაძრის ეზოში სამტროდ მოსული ოცი კაცი ერთად ვერ შევა. სამ-სამს, თუ ხუთ-ხუთს, ალბათ, უფრო ადვილად მოუვლიდნენ წინათ, ეტყობა, შესავალიდანვე იწყებოდა რალაც შენობები, ახლა უკვე აღარაფერია. მცოდნე თვალი დაკვირვების შემდეგ თუ შეატყობს ნასახლარებს.

გვირაბის გასასვლელიდან იწყება უმშვენიერესი მწვანე ეზო. გაგაოცებს ამ წრიახებში ასეთი ფართო და თითქმის სრულიად უცებ გაგაყვებული მინდორი.

გელათის დასავლეთით, დაქანებულ ფერდზე, ზედ აკადემიის კედელთან მიწა მოწყვეტით წყდება და თვალუწვდენი ხევი იწყება. როგორც ამბობენ, აკადემიის ასტრონომთა გან-

ყოფილება სწორედ ამ მაღალი ხევის პირზე ყოფილა გადმომდგარი. აქედან კარგად ჩანს სამხრეთის თუ დასავლეთის ციხეგუმბათი. აქედან აწარმოებდნენ ჩვენი წინაპრები, ალბათ, ციურ მნათობთა დაკვირვებას და შესწავლას. ამ კედლის გასწვრივ აკადემიის გრძელი ქვის მუხლმოსართხამზე ისხდნენ აკადემიის მოსწავლენი. შუა ადგილას მოძღვრის ადგილი საპატიოდ და სრულიად ცალკე დგას. აქ იჯდა, ალბათ, დიდი იონანე პეტრიწონელი თუ არსენ იყალთოელი...

ეს შენობა კარგა მანძილით არის დაძორებული გელათის მთავარი ტაძრის ადგილს. ტაძრის ჩრდილოეთით წინათ, ეტყობა, ბერების სადგომი თუ ბიბლიოთეკა იყო, ქუთაისის დღევანდელმა ხელმძღვანელებმა ეს შენობა გაამშვენიერეს, მოაპირკეთეს და გამოიყენეს დიდი წამოწყებისათვის. ამიერიდან აქ მუზეუმი იქნება. საქართველოში პირველად სწორედ გელათის ტაძრის ეზოში გახსნეს ქუთათელებმა შოთას სახლი — შოთას მუზეუმი. უკვე მოიტანეს ექსპონატები, მოზიდეს შესანიშნავი ფერწერული ნამუშევრები, ჩვენი ისტორიული ძეგლების კინოფირები, რომლებსაც აქ დამთვალეირებლებს უჩვენებენ. სხვათა შორის აქვე აქვთ ზიჩის მიერ დახატული ტიპები, რომლებსაც უნგრელი მხატვარი წინასწარ ჰაშნიკად აკეთებდა და ასე ემზადებოდა „ვეფხისტყაოსნის“ ილუსტრაციების დასახატავად. მეტად საინტერესოა მამია გურიელი, რომელიც ვეფხისტყაოსნის გმირთა ტანსაცმელში დაუხატავს ზიჩს. ეს სურათი შეიძლება ერთადერთი იყო საქართველოში!

იქვეა დიდი დავითიდან ვიდრე სოლომონ პირველამდე გელათის სამარხში დასაფლავებულ მეფეთა სქემა, საქართველოს რაოდენი მეფენი წვანან თურმე გელათის მიწაზე, რომელთაც ლოდის დადებაც არ უნებებიათ?! აქვე მოუტანიათ ბეჟა ოპიზარის ნახატების შედევრების რეპროდუქციები. აი მეორე კაცი, რომელსაც აგრეთვე შეეძლო კავკასიონი ღმერთებთან ასასვლელ კიბეებად მოსჩვენებოდა და იქ, როგორც ჩანს, მათთან მისასვლელი გზაც მიკვლეული ჰქონდა.

ხახულის ღვთისმშობლის ხატის ორეული კი ცალკე დგას. ეს უნიკალური შედევრი გელათის საკუთრებაა. ამიტომ ამაყოფს ქუთაისი. მართლაც, განა არის მეორე ქალაქი, რომელ-

საც ასეთი განძი ჰქონოდა სახატეზე, ან ისეთი ზურმუხტოვანი ეზოები ამშვენებდეს, როგორც ამ ქალაქის საოცრად ლამაზსა და საცხოვრებლად მოსახერხებელ სახლებს თან ახლავს! კლდეზე დაშენებულ მის ფუძეს თითქმის ზამთარ-ზაფხულ ეზოებში კონინდარი უბიბინებს. შეიძლება ეს იყოს ერთი მიზეზიც, რომ ქუთათელ კაცს სიცოცხლე უღიმილოდ არ შეუძლია. ღიმილი კი სიცოცხლის გახანგრძლივების პირველი წამალია.

გელათის ტაძრის ეზოც ხომ მუდამ მწვანე და მოლიმარია ცნობილი მისი ცივი წყარო კი მუდმივად ღურღღლებს და კისკისებს. სიცოცხლის მომგვრელი წვეთები აიაზმის შხეფით ეპყურება ამ ეზო-გარემოს და კიდევ მეტად აცოცხლებს მის ბალახს, ყვავილებსა და ხეებს.

გელათში სინათლე არ იყო და ახლახან ესეც გაიყვანეს. ამიტომ ახლა, როცა მის კარზე დიდ სინათლეებს დაჰკიდებენ, ხომლის მთიდან გადმომდგარი სვანი, რაჰველი თუ ლეჩხუმელი შოთას მუზეუმს და გელათის აკადემიის კაბადონს თვალს ვერ მოაშორებს. გელათისადმი ქალაქის მეთაურთა ამ სიყვარულმა სხეებსაც აღუძრა კეთილი სურვილები. ქუთაისის მანქანათმშენებლებმა მისი შესანიშნავი ინჟინრისა და დირექტორის ხარებავას მეთაურობით გელათის ზემოთ არსებული უძველესი ნიში-ეკლესია ეკალბარდისაგან გაწმინდეს, გააპატიოსნეს და გაამშვენიერეს. ამით ქართველი კაცის თვალსა და გონებას ერთი მეტად საინტერესო ძეგლი შემატეს. ახლა გელათის მთელი კომპლექსი ჩვენს თვალწინ იქნება განლაგებული, ყველაფერი თვალთდასანახად გვექნება. ეს კი პატარა საქმე როდია.

მწვანეყვავილიდან „შოთას ღარსიკეთის წყაროს“ გავლით მანქანა გელათში ოც წუთში აფრინდა. დავით აღმაშენებლის ქუჩის მცხოვრებლები მზად არიან სტუმართა მისაღებად.

იმერელი კაცის სახლკარი ხომ ყოველთვის ელოდა პატივსაცემ სტუმრებს.

— ეს დიდი დღეა ჩვენთვის, დიდი დღესასწაულია! — გვითხრა ამ ქუჩის ერთმა მცხოვრებმა. — სტუმრებს ჩვენს ოჯახებში ველით. ნახონ, რა მასპინძლობას გავუწევთ!

ქუთაისის ქალაქის საბჭოს თავმჯდომარეს უჩა ცქვიტინიძეს



ელიმება, ვატყობ, ეამაყება, რომ დღეს ყოველმა ქართველმა იცის ამ დღის სიდიადე.

გასაკვირველი კი არაფერია. ქუთაისმა უთუოდ იცის პოეზიის ფასი. იმიტომ კი არა, რომ იგი აკაკისა და გალაკტიონის ქალაქია, დავით კლდიაშვილის მშობელია, რომ თანამედროვე ქართული პოეზიის ხმაძლიერი ვაჟკაცები ამ ქალაქში დაიბადნენ, დაფრთიანდნენ და მისი ბუდიდან აფრინდნენ. არა. თქვენ ერთი ლიტერატურული საღამო გამართეთ და მაშინ მიხვდებით ამ ქალაქის პოეტურობას. პოეზია და თეატრი ქუთათელი კაცისთვის პურიც არის და ღვინოც.

რვა საუკუნეა მიუძღვის ქართველ კაცს შოთა რუსთაველის ნათელი გონება ქირში თუ ლხინში, ამ საოცარი ადამიანის უკვდავი სიცოცხლე, რომელიც „ვეფხისტყაოსნის“ ყოველ პწკარში ასე სიბრძნით და მუსიკალობით ჟღერს, ჩვენი აზროვნების ეროვნულ მწვერვალად იქცა. რვაასოწლის მანძილზე, ვინ იცის, რამდენი მეფე წაიქცა, რამდენი ქვეყნის მპყრობელის ტახტი დაინგრა, რამდენი ცად აზიდული სიმაგრენი ჩამოიქცნენ და მტვრად იქცნენ. ადამიანთა ხელით ნაკეთები რაოდენი ძეგლი დაიმსხვრა და დაიშალა! ცრუ კაცთა სადიდებლად აღმართული რაოდენი ტაძარი აღიგავა პირისაგან მიწისა! გაჩნდნენ ახალი ქვეყნები, დაინგრნენ სახელმწიფოები, როგორც იტყვიან, მთებს სიმძლვე მოაკლდა და ზღვებს სიღრმე. რუსთაველის სტრიქონებო კი თანდათან ამალდნენ და მეტი პატივისცემა მოიპოვეს ადამიანებში. საუკუნეების მანძილზე თანდათან შარავანდელით შეიმოსნენ, ყველა ხალხის საკუთრება გახდნენ, კაცობრიობის უსაყვარლეს საკითხავ პწკარებად ამალდნენ, სამყაროს ოქროს ფონდში ჩაირიცხნენ.

ჩვენი დიდი რევოლუციის საოცარმა ძალამ მთელი მსოფლიოს სხვადასხვა ერის სიბრძნე საერთო-საკაცობრიო განძად აქცია, საქვეყნო სიმდიდრედ გახადა. რა საოცარი გენიალობით აღსრულდა ვლადიმერ ილიას ძე ლენინის აზრი, რომ რუსეთის დიდი რევოლუცია უსათუოდ სამყაროს ადამიანთათვის დიდი სიკეთის და ბედნიერების მომტანია, რომ განთავისუფლებული ადამიანი არა მარტო თავისი ეკონომიკით გახდება დამოუკიდებელი და მდიდარი, იგი აღამალლებს თავის ცოდნას,

განათლებას, აღორძინდება ეროვნული კულტურის ჩარჩოები, დაფასდება მისი საუკეთესო ნიმუშები და, თუ კი ღირსია, ეს ნიმუშები საერთო-საკაცობრიო გახდება.

და მართლაც, რევოლუციის ორმოცდაათი წლის მიჯნაზე საბჭოთა ქვეყანა არა მარტო თავისი ეკონომიკით და ტექნიკის უდიდესი მიღწევებით გახდა მდიდარი და ძლიერი, მის კავშირში შემავალი ძმური ხალხების ეროვნული კულტურა უფრო ამალდა, უფრო გამოიკვეთა და საკაცობრიო ასპარეზზე გამოვიდა.

ქართველ კაცს დიხაჯ ბევრი რამ აქვს საამაყო. შოთა რუსთაველის „ვეფხისტყაოსანი“ ჩვენი ხალხის, ჩვენი ერის შუბლის სინათლის მუდამ ჩაუქრობელი მზეა. აი ეს მზისებური ლიტერატურული დისკო ასწიეს დღეს საბჭოთა კავშირის ხალხებმა სამყაროს დასანახად. იგი თარგმნეს რუსულად, ინგლისურად, ესპანურად, ფრანგულად თუ გერმანულად. იგაითარგმნა მოძმე ერების თითქმის ყველა ენაზე. იგი მოექცა ჩვენი სამყაროს ხუთივე კონტინენტის ყურადღების ცენტრში. ეს მხოლოდ და მხოლოდ ჩვენი რევოლუციის მეშვეობით მოხდა. რასაკვირველია, პირველ ყოვლისა, ეს იმასაც ნიშნავს, რომ რევოლუცია თავისი განვითარებისა და სიძლიერის უბრწყინვალესი სიმადლიდან მოქმედებს ადამიანთა ეროვნული სიკეთისა და მიღწევათა გამოსაჩენად, ამ სიკეთით ყველა ხალხის ბედნიერების ასამაღლებლად. შოთას ეროვნული პრემიის დაარსებაც უთუოდ ჩვენი რევოლუციის უდიდესი მონაპოვარია.

რევოლუციის ასეთი კეთილი და საამაყო ზემოქმედება კი უსათუოდ ძალღონეს მატებს ადამიანებს, ხალხებს, ერებს, ამტკიცებს რევოლუციისადმი დიდ სიყვარულსა და პატივისცემას, დაუშრეტლად აცისკროვნებს ჩვენს ხვალისდელ დღეს, ჩვენს მომავალს.

გელათის აკადემიის ფუძემდებელნი, როცა მას აშენებდნენ, ერთ რამეზე ფიქრობდნენ — აღემალლებინათ ქართველი კაცის გონება, მისი ცოდნა და სიბრძნე. იოანე პეტრიწის თუ არსენ იყალთოელის კვალი ყოველ ფეხის გადადგმაზე ილანდება გელათის ფართო ეზოში. დადიხარ აქ და არ შეიძლება არ გაიხსენო ის, რომ ჭერ კიდევ XI საუკუნეში ქართ-

ველი კაცი ეროვნულ ენაზე გაეცნო კაცთა შორის პირველ კაცურ გენიას და ადამიანთა შორის უპირველეს ტიტანურ ადამიანს ჰომეროსს; რომ ჯერ კიდევ მანამდე ჩვენმა ერისკაცებმა ღრმად იცოდნენ ბერძნული ფილოსოფია და გელათის დაფუძნების პერიოდში პეტრიწონელის სახით უკვე ჰყავდათ საქვეყნოდ განთქმული ფილოსოფოსი; რომ მის უკვე უძლიერეს მწერლობას გვერდით ედგა მდიდარი და მრავალფეროვანი მუსიკალური კულტურა.

ქართველ კაცს ხომ დასაბამიდან მოსდევდა მრავალხმოვანი ხმიერი და საკრავების მუსიკა; რომ ამ დროისათვის საქართველოში ამ ხელოვნებას საკმაოდ გამოკვეთილად უკვე ცალკე გამოეყო საკომპოზიციო ხელოვნებაც! განა ეს სამუსიკო ხელოვნების გვირგვინად არ უნდა ჩაითვალოს? დღეისათვის ნათელია ისიც, რომ იმდროინდელ საქართველოში კედლის მხატვრობა და ოქრომჭედლობა უმაღლეს საფეხურზე ავიდა. ქართულ ოქრომჭედლობაში უკვე რამდენიმე მიმდინარეობაა— ტბეთის, ოპიზის თუ გელათის ოქრომჭედლობა. თვითეულს თავისი ხელწერა და სტილი აქვს; რომ ჯრუჭის ოთხთავის, წყაროსთავისა და ტბეთის სახარებათა თუ ხახულისა და ანჩისხატის მოქედლობა ოქროში ჩადგმული დიდი საგალობლებია ლითონის გაჭედვის ურთულეს ხელოვნებაში. ბეჟა და ბეშქენ ოპიზარები ხომ ოქროთი წერის უდიდესი პოეტური გენიები არიან!

და განა მარტო ესენი?! აბა, რა ხელმა მოქარგა გელათის ეს ციური მოზაიკა?! არ შეიძლება ადამიანის თვალმა ამ მზიურ დიდებულ ფერებსა და ხაზებში ქართველი ქალის სახე არ დაინახოს; რომ მოზაიკის თვითეული კენჭი შერჩეულია ქართველი თინათინის თუ ნესტანის ფერხორცის ეშხიანი ნათებითა და საღებავებით.

დადინარ გელათის ტაძრის ვეება თლილ ლოდებთან და თვალწინ გიდგება ქართველის გოლიათური ძალღონე და ეროვნული ენერგია.

გელათი, როგორც ჩანს, მაშინდელი ქუთაისის ერთი ფრთა იყო, მეორე კი გეგუთი. თუ გელათის ტაძარი სიბრძნის და აზროვნების, მხატვრობისა და ოქრომჭედვის ცენტრი იყო, გეგუთში, ეტყობა, დასვენებისა და სამსახიობო თუ საღალღობო

ხელოვნების ტაძარი ჰქონიათ. განა თეატრონის მაღალი ჰერი ამას არ მეტყველებს?! იქ ჩვენი წინაპრები, ვინ იცის, ისმენდნენ კიდევ ანტიკური პოეტური სამყაროს ესოდენ მომხიბლავ ნაწერებს! ხომ შეიძლება ისიც, რომ სწორედ ამ სასახლეში თუ მის ახლომახლო რიონის ტალღების მშფოთვარე ღულუნში იკითხებოდა პირველად შოთას სტრიქონები?! ვინ იცის?! გასაოცარი ამ შემთხვევაში არაფერია.

ვისაც თავისი დრო არ უყვარს, მას არც შეიძლება ჩვენი წარსული ნამდვილად, მართალი გულით უყვარდეს. ვინც დღევანდელ დღეს სიყვარულით არ იღვწის და შრომობს, მას უფლება არა აქვს ჩვენი დიდი მამა-პაპის სახელი მოიხსენიოს. ამიტომ, როცა ქუთაისში შეხვალ და ქალაქს თვალს შეავლებ, არ შეიძლება, ბევრმა რამემ არ გაგახაროს.

გეგუთიდან ჩვენი მანქანა ქუთაისის ახალ ხიდზე გავიდა. ვის არ ახსოვს ქუთაისის ძველი ხიდები. სამი ხიდი იყო ქუთაისში: თეთრი, წითელი და ჭაჭვის ხიდი. მეოთხე, მშვენიერი და ყველაზე დიდი ხიდი რევოლუციის შემდეგ აშენდა.

ახლახანს კიდევ ერთი ულამაზესი ხიდი მოუმატეს ქუთაისს ქალაქს. ქართველმა ინჟინრებმა გიორგი ჩომახიძემ და გივი თოღაძემ ძალღონე არ დაიშურეს ამ ხიდის სილამაზისთვის.

ხიდის ქვედა ნაწილი ეკლარის თეთრი ფიქალით თოლიას მოქნეულად გაშლილი ფრთასავით არის ამოძერწილი, ზემოდან კი კურსების ცნობილი ჭროლა ქვის თალი გადაუჭიმავთ. როცა თვალს შეავლებთ, ეკლარის თეთრი ქვის ელვარება სპილოს ძელის შუქით შემოგეფეთებათ.

რაც უფრო დააკვირდებით, მით უფრო მოგეწონებათ ეს ხიდი. თანდათან გული გაგეხსნებათ, სხეულში სიამოვნების შუქი ჩაგიდგებათ. რიონი ამ ადგილას ყველაზე ვიწროა და კლდოვანი ნაპირები აქვს. ამიტომ ხიდიც პატარაა. მაგრამ საქმე მის სიპატარავეში როდია. მისი არქიტექტურა და ფერი მეტად წარმტაცია.

ამ ადგილზე რიონის ფუძე და მისი მთელი კალაპოტი საუკუნეების მანძილზე მდინარის დინებას კლდეზე ამოუყვებითა, იქა-იქ თეთრი კლდისავე ბორცვებია ამოშვერილი. ასეთ თეთრ და კლდოვან მდინარის კალაპოტს იშვიათად შეხვდება ადამი-

ანი. ეს კიდევ მეტად ორიგინალურსა და მშვენიერს ხდის აქაურობას და მეტად ესიტყვება ამ ულამაზესი ხიდის არქიტექტურას. ეს ხიდი რუსთაველის პროსპექტზეა. სწორედ ამ ხიდის ახლოს თავდება ილიას ქუჩა და იწყება შოთას პროსპექტი, რომლის ბოლო ახალი თეატრისა და ქუთაისის ბაღის წინ იშლება.

სწორედ ამ მშვენიერი მოედნის წინ, მუზეუმის შენობის აღმოსავლეთით დაიდგმება მერაბ ბერძენიშვილის ბრწყინვალე მონუმენტური შოთას ქანდაკება. ამ უთუოდ მეტად ნიჭიერად შეთხზულ ძეგლს მკერდზე თამარის სახით ამოტვიფრული მედალიონი აქვს ჩამოშვებული. მე მგონია, იაკობ ნიკოლაძის ჩახრუხაძის ჩაბალახივით თამარის ეს მედალიონიც მხატვრის აფორიაქებული ძიების დიდი მიგნებაა.

ქეშმარიტად ქუთაისის ეს მშვენიერი მოედანი ნამდვილი სწორუბოვარი ძეგლით დაგვირგვინდება. დასავლეთით — ულამაზესი ტანმალაღი ხეებით ცის სილურჯეში შეტოტებული ბაღი, ჩრდილოეთით — უბრწყინვალესი თეატრის ფიქალი კედლები და აღმოსავლეთით — შოთას ეს შესანიშნავი ძეგლი.

ისიც ნიშნულად მეჩვენა, რომ ილიას ძეგლი სწორედ ძველი მესხეთის ქუჩის თავიდან გეგუთისაკენ გასცქერის სამხრეთს. ვის უვლია რუსთაველის ნაკვალევზე ისე ნაყოფიერად და მამულის საამაყოდ, როგორც დიდ ილია ჭავჭავაძეს?!

ქუთათელებს ეს კარგად გამოუვიდათ.

მესხეთის ძველი ქუჩა ბაკისუბნის გავლით სოფელ მესხეთში თავდება. რატომ ჰქვია ამ სოფელს მთელი კუთხის სახელი?! განა ვისმეს გაუგონია სოფელს „გურია“, „სამეგრელო“, „კახეთი“, ან „ქართლი“ ერქვას?!

ამ სოფელს კი მესხეთი ჰქვია.

გადმოცემა ამბობს, სწორედ მესხების რაზმი წამოეწია თურმე ამ ადგილებში შეთქმული გიორგი რუსის ჯარის უკანა ნაწილს და დაამარცხაო. მართლაც, მოსაზღვრე სოფელი „უკანეთია“; ხოლო უკანეთის, გეგუთის და ოფშკვითის შუა საყანე მინდვრებს ახლაც „ნაომარი“ ეწოდება. ხომ შეიძლება, ამ ამბის პატივსაცემად, მართლაც, მესხეთი დაერქმიათ ან სოფლისათვის?!

დღეს კი ქუთაისელები დღედაღამ შრომობენ თავიანთი ქალაქის კეთილმოწყობისათვის.

ქალაქის საბჭოს თავმჯდომარის მოადგილემ მიხეილ მამფორიამ მუხნარის ტყის დასაწყისთან, სწორედ იქ, სადაც ოდესღაც სამსონ თოფურია მშვენიერი საავადმყოფო ააშენა, ახალი გზის გამტარი მაჩვენა. ზემოთ რკინიგზა მიდის, ქვემოთ—საავტომობილო და საცალფეხო გზა. ამით ქალაქს მეტად დიდი შეღავათი მიეცემა და სილამაზე შეემატება.

აქვე განზრახულია აშენდეს მეექვსე ხიდი, რომელიც ასე სასიცოცხლოდ სჭირდება ამ ქალაქს.

ეს იქნება ყველაზე დიდი და ლამაზი ხიდი. იგი თბილისიდან დასავლეთში მიმავალ ავტოტრანსპორტს ქალაქიდან გვერდს აუქცევს და ისე გაატარებს.

ფოთში, ბათუმში და, საერთოდ, დასავლეთ საქართველოს სხვა ადგილებში მიმავალი მგზავრი, თუ არ დასჭირდება, ქალაქში აღარ გაივლის.

ეკონომიურად ეს ხიდი იქნება ქუთაისის ყველა ხიდზე უფრო სასარგებლო და რენტაბელური, ამიტომ, რასაკვირველია, ყველაზე საჭიროც. შოთას დღეებისთვის ჩქარობდნენ ყველანი და შესეული იყვნენ გზის გამტარზე, გელათის გზატკეცილზე, „შოთას წყაროს“ მოპირკეთებაზე თუ გელათის მუზეუმის დასრულებაზე. იუბილეს შემდეგ კი დაწყნარებულად შეუდგებიან ამ დიდი საქმის მოგვარებას.

აქედან შეიძლება გონიოში სამ-ოთხ საათში ჩახვიდეთ. ოდესღაც შეიძლება სწორედ გონიოს ნავსადგურით გავიდა საბერძნეთში განათლების მისაღებად დიდი პოეტი. შეიძლება გეგუთის სასახლეში დაემშვიდობა სწავლას მოწყურებული ჰაბუკი თავის გულის სინათლეს და ისე წავიდა ამ გზით უცხო ქვეყნებში?! შეიძლება გელათის აკადემიის ზღურბლზე დაალოცვინა სამგზავროდ გამზადებულმა თავისი თავი ოსტატებს და თანაც წერილი მიაწერინა უცხოეთში სარეკომენდაციოდ?!

ვინ იცის, ერთიც შეიძლება ყოფილიყო და მეორეც. ერთი კი ნათელია, რომ ქუთაისის ეს ხიდი დღეს დიდ სამსახურს გაუწევს ჩვენს თანამედროვე ადამიანებს და ქალაქსაც მეტად გაამშვენიერებს, გაშლის, ადამალლებს, გააკეთილშობილებს.

კლდეთა კვართოვანი ძარღვებით არის ამალლებული ბაგ-

რატის მთა ქუთაისში, ამ ცის გუმბათივით მზისკენ აწეულ მუდამ მწვანე გორაკს მოწყურებული ლომივით ერთი ტოტარიონის ტალღებში ჩაუყვია. ადამიანებს სწორედ ამ ტოტზე გაუჭრიათ კლდე და სვანეთისაკენ თუ რაჭა-ლეჩხუმისაკენ გზა გაუყვანიათ. ამ კლდოვანი ტოტის პირდაპირ საბჭოთა ადამიანებმა რიონი გადახიდეს, გადალობეს და მისი უღეგარი ტალღები ჭერ დააოკეს, მერმე გვირაბით კოლხეთის დაბლობისკენ დააქანეს. იქ კი, სადგურ რიონის გვერდით, მდინარეს ტურბინები დაუდგეს და ქვეყნის სამსახურში ჩააყენეს. რიონი დღეა ჩვენი ქვეყნის ერთ-ერთი უპატიოსნესი თანამშრომელია. დი-ახ, მისი უდიდებულესობა რიონი ჩვენს სოციალიზმს გულწრფელად და თავდადებულად ემსახურება. რიონზე ელსადგურის მაღალი კაშხალის გამოღმა ბაგრატის კლდის ტოტზე ზემოდან წყაროს ფესვი მორაკრაკებს. იგი იმ გვირაბს მოჰყვება, რომელიც ოსტატურად გამოუძერწიათ ბაგრატის ციხეგალავნის მშენებლებს. აბა, უწყლო ციხე-სიმაგრე ვინა თქვა?!

ნუთუ ეს ვეება დაძარღვული გრანიტის კლდე-მთა გაფატრეს და ხელოვნური მიღებით გზა მისცეს წყაროსთვალს? გაფატრეს, მაგრამ რითი?! რა იარაღი, რა ძალა იხმარეს ამისათვის?! აი კითხვა, რომელიც სიკაბუჯიდან ამდევნებია დღემდე თავსამტვრევად და პასუხი ვერ გამიცია!

ვინც ჭომაში ყოფილა, მან კარგად იცის ამ წყაროს ხავერდოვანი სიგრილე და გემო. ზედ კლდის გულიდან გადმოდის ეს დალოცვილი!

წყაროსთვალიდან ბაგრატის მთას ძნელად ასასვლელი ბილიკი აჰყვება ტაძრამდე. ძნელად ასასვლელი კი არა, გაუვალი ბილიკია! ყაჰის ძაფივით წვრილია და მზის შუქივით დაკიდებული. მზის შუქივით იმიტომ ვთქვი, რომ როგორც უხვ სინათლეში მცირე შუქის ძაფს ვერ გამოკვეთ, გამოარჩევ და შენიშნავ, ისე იმ ბილიკის თვალთ დანახვა ძნელია. სიკაბუჯის ჟამს სწორედ აქედან შევეტოტებოდით ხოლმე მთას.

საჭირო იყო ცხვირის დაცემინება, რომ ზემოდან ვაშლივით მოვწყვეტილიყავით. მერმე ასეთ კლდეებზე მოწყვეტა ხომ უცილო სიკვდილი იყო?! აკი ჩემს მეხსიერებაში ერთხელ მოხდა კიდეც ასეთი უბედურება! არც ამას ვუშინდებოდით, ბაგრატის ტაძრის მთის ციცაბო ფერდობიდან გადმოვხედავ-

დით ჩიონის გაშლილ ნაპირს და აქედან გავცქეროდით გელათის თეთრ გუმბათებს, რომელიც ამ ფერდიდან კავკასიონის კალთაზე ხელით მიხატულ გრანდიოზულ სურათს უფრო ჰგავს. არცთუ იშვიათად ჩავცუქქდებოდით ამ ფერდზე, გავყურებდით და ვბანაობდით მზის თბილ შულოებად ჩამოშლილ სხივებში, რომლებსაც ჩიონის ტალღები აგრილებდა და იისფერ სასიამოვნო სივრცეში ახვევდა. ამიტომ სულ სხვანაირი ფერებია აქ, ამ მიდამოებში.

ბაგრატის ნანგრევები ახლად გაამაგრეს, ადგილ-ადგილ რესტავირება მოახდინეს, უნდათ, არ დაინგრეს, სულ არ ჩაიქცეს და, რაც ჩვენ თვალს შემორჩა, სასიამოვნოდ დარჩეს.

ათასობით ტურისტი ამოდის აქ. მათ ყოველთვის წინ მიუძღვის შესანიშნავი ქართველი მოხუცი პეტრე ჭაბუკიანი. წლებმა ვერ მოხარა ეს ფუტკარივით მოუღლეელი და წმინდა კაცი. იგი ყოველ მოსულ უცხო ადამიანს საგალობელივით ღაღადით ესაუბრება ბაგრატსა თუ გელათზე, სათაფლიასა და გეგუთზე. ესაუბრება ისე, რომ, ისინი სულგანაბული უსმენენ და წასვლისას თან მიაქვთ ამ საუბრის დაუვიწყარი შინაარსი და პეტრეს ნათელი სახე.

ღღეს საბჭოთა საქართველო მთელი თავისი ძალდონით ცდილობს მსოფლიოს მოწინავე ქვეყნების რიგებში იდგეს. იგი თავის ნაბიჯს უსწორებს მთელი პროგრესული სამყაროს სვლას. ჩვენც ამიტომ გვიყვარს ის ადამიანები, რომლებიც ამ სრბოლაში გამოიჩენენ თავს, შექმნიან ისეთ რასმე, რაც მამულს აღამაღლებს და წინ წასწევს. მართლაც, ვის არ უხარია და არ ეამაყება თბილისის მეტროპოლიტენი, რომელიც ასე უხმაუროდ და უტრაბახოდ გააკეთეს ჩვენმა ადამიანებმა!

როდესაც მეტროს რუსთაველის მიწისქვეშა სადგურზე ჩადიხარ და ელგუჯა ამაშუკელის ნაძერწსა და ნაფიქრს ათვალიერებ, გიხარია და გეამაყება, რომ საქართველოში ცხოვრობ, რომ მსოფლიოს უდიდეს ქალაქთა რიცხვში ჩვენი რესპუბლიკის დედაქალაქიც ჩადგა.

რომელ ქართველს არ გაეხარდება ის, რომ ძმები რეზო და თამაზ გამყრელიძეები სულ სხვადასხვა, მაგრამ თანამედროვე მეცნიერების მაღალი აზრის ერთ-ერთი უნიჭიერესი წარმომადგენელნი და შემოქმედნი არიან?!



განა შეიძლება აულელევებლად გაიარო ჩვენს მშვენიერ სანაპიროზე, რომლის შემოქმედი ჩვენი ხალხია. ან ისე შეხედო სპორტის სასახლის უნიკალურ სახურავს, რომ მისი ავტორის ნიჭმა სიამაყე რა გაგარძობინოს?

რასაკვირველია, ქუთაისელებს ეამაყებათ, რომ ამ ქალაქის კლდოვანი ბუდიდან აფრენილი ჯერ კიდევ ახალგაზრდა ვაჟკაცი სიმონ ხეჩინაშვილი საკავშირო აკადემიის წევრ-კორესპონდენტია და მისი სამედიცინო შრომები სამყაროს დიდ სარბიელზე ავტორიტეტით სარგებლობს;

რომ ამ ქალაქში დაბადებულ და შექმნილ ავტომობილს ყველგან იცნობენ, როგორც ქართველი ვაჟკაცების შემოქმედებას, რადგან მას ატყვია ქართველი კაცის ხელწერა. ამ ხელწერას ახლა შესანიშნავად ხელმძღვანელობს ქართველი ავტოინჟინერი, ბრწყინვალე კონსტრუქტორი დიმიტრი ქართველი-შვილი.

შოთა კობახიძემ კავკასიონის კალთებიდან ვიდრე ბერლინამდე ბრძოლით და გამარჯვებით განვლო ეს გრძელი და ძნელად გადასარჩენი გზა. მის მკერდს ხომ ჩვენი სოციალისტური ქვეყნის სიამაყის არაერთი ორდენი ამშვენებს.

მახსოვს — სსრ კავშირის უმაღლესი საბჭოს დეპუტატობის კანდიდატთა დასახელების დღეს ქუთაისის თეატრში რამდენიმე მწერალი შევედით. დაგვაინტერესა კანდიდატის ბიოგრაფიამ და მისმა ორდენების სიუხვემ. მას უბრძოლია არა მარტო ჩვენი საბჭოთა მიწაწყლის დასაცავად, არა მარტო კავკასიის და მოსკოვის გადასარჩენად, იგი საკუთარი სიცოცხლის სასწორზე დადების ფასად ფაშისტთა ურდოებს ვარშავის კარიბჭესთან თუ ბერლინის მისადგომებთან ანადგურებდა. იგი, როგორც თავის სამშობლო მიწას, ისე თავდადებით იცავდა რუმინეთის თუ ბულგარეთის მიწაწყალს, ჩეხოსლოვაკიის, ავსტრიის სახელმწიფოების ეროვნული თავისუფლების დროშას.

განა მარტო შ. კობახიძე იცავდა ხალხთა თავისუფლებას. ვის დაავიწყდება საბჭოთა ავიაციის მრისხანე შევარდენი და გმირი ოთარ ჩეჩელაშვილი, მისი ცის გუმბათში ყოველი შეფრენა ომის დროს გერმანელი ფაშისტების სიკვდილს რომ ნიშნავდა.

მას ტოლს როდი უდებს წყნარი და ჩუმი ვაჟკაცი უკანეთელი გვანცელაძე. ამ ნათელ ადამიანს, სიჭაბუკეში ფეხშიშველს არაერთხელ ურბენია გეგუთის მინდვრებზე, ია დაუკრეფია სასახლის ნანგრევების კედლებთან და, ვინ იცის, რამდენი რიონის წვერა გაფართხალებულა მისი მარჯვენით მოქნეულ სასროლ ბაღეში.

ასეული ათასების თავდადება, ჩეჩელაშვილების თუ გვანცელაძეების გმირობამ, მათი მსგავსი ვაჟკაცების რაინდულმა ბრძოლებმა მოიტანა ეს დალოცვილი ნათელი დღეები ჩვენს სამშობლოში, ჩვენს მამულში, ჩვენს გამარჯვებულ ქვეყანაში. ახლა ჭრილობამოშუშებული ჩვენი რესპუბლიკა აშენებს ქუჩებს, მოედნებს, ბინებს, თეატრებს, სკოლებს. ისიც გასახსენებელია, რომ ქუთაისში დიდხანს მუშაობდნენ ქალაქის საბჭოს თავმჯდომარედ და მის მოადგილედ საბჭოთა კავშირის გმირები—გენერალი ჭიჭიკო ჩხობაძე და კოწია ტყაბლაძე. ახლა ეს ორივე გმირი პენსიაზე გავიდა და ახალგაზრდა ინჟინრებს— უჩა ცქვიტინიძესა და მიხეილ მამფორიას გადააბარეს ქალაქის ბედი. ისინიც ქედს როდი იხრიან სიძნელეთა წინაშე! დღედაღამე შრომობენ, რათა თავიანთი ქალაქის სილამაზე და დოვლათი გაამდიდრონ, აამაღლონ, გააკეთილშობილონ, მისი ქუჩები და მოედნები, მისი ხიდები და ბაღები სანიმუშო გახადონ.

დასრულდა რუსთაველის საიუბილეო დღეები. ჩვენი საპატრიო სტუმრები თავიანთ ქვეყნებში გაეშურნენ. ისინი უთუოდ თავიანთ ხალხში ჩაიტანენ იმ დიდ სიხარულსა და სიყვარულს, რომელიც გამოთქვა მადლიერმა ქართველმა ხალხმა თავისი პოეტი-ტიტანის შოთას სახელის სადიდებლად. მათ ნახეს ზეიმი თბილისში, ახალციხეში, ქვის ქალაქში — ვარძიანში. ნახეს მცხეთა და სიონიც. ზოგიერთი მათგანი ქუთაისსაც ეწვია. დაათვალიერეს გელათი და ბაგრატი, გეგუთი და უქიმერიონი. ქართველმა ხალხმა თვითეულ მათგანს გაატანა დიდი პატივისცემა თავისი ბრძენი პოეტის ესოდენ დაფასებისათვის.

შოთა უმღეროდა ადამიანთა შორის უზადო სიყვარულს, რომელიც ამაღლებს და აკეთილშობილებს სამყაროს, ნამდვილად ამშვენიერებს მას და ბედნიერსა ხდის ადამიანთა ცხოვრე-

ბას. აკი ამიტომ თქვა ქართველმა კაცმა, რაც მტრობას დაუნგრევია, სიყვარულს უშენებიაო.

როგორც ქვეყანას კიდევ, ისე ცის გუმბათს თავანი არა აქვს. ამ უსასრულობაში დასაბამიდან იბრძვის კარგი და ცუდი, სიკეთე და ბოროტება. გეგუთის სივრცის გასაყარიდან თუ გელათის წყაროსთვალიდან ცა უფრო მაღალი და ლაქვარდოვანი მოჩანს, უფრო ნათელი და ადამიანის ბედნიერების მანიშნებელია. აკი შოთამ აქედან დაინახა, რომ

„ბოროტსა სძლია კეთილმან,  
არსება მისი გრძელია“!

## რუსთავის ჰვათა ლალადი

ჩვენ კი დღეს სწორედ,  
ჩვენ კი დღეს სწორედ  
ათას წელს ქვებში მოწმედ დებულებს  
ათას წლის შემდეგ მაღლა ვწევთ სურებს,  
სასმურებს მათგან მოწოდებულებს.

ი რ. ა ბ ა შ ი ძ ე

თბილისის ცისკრის გახსნა ჟრუანტელმომგვრელი რამ არის. სხვისი რა ვიცი და, გათენების უამს თუკი მეტეხის სანახებთან მოვხვედრივარ, იმ დღეს ჩემთვის ბედნიერებაზე მეტი რაღაც მოუტანია.

იმ დილასაც ადრე ავდექი, მტკვარს ჩავხედე და ქალაქში გათენების შუქის შემოსვლას სწორედ მეტეხის ხილთან დავხვდი. თენდება ნელა, წყნარად, შაბიამნისფრად. მეტეხის კლდის ტყვიისფერი ფლატე ისე იშმუშნება და ილანდება მდინარის ამ თხელსა და გრილ ნისლში, თითქოს ახლა იბადებოდეს, სამყაროს ახლად ეყოფოდეს. ზემოდან, წამოსათრენ მიმინოსავით გადმომდგარა დემეტრე თავდადებულის აშენებული მეტეხის ქვის ეკლესია, ქვემოთ ტყვიისფერსავე კლდის ქვის მძლავრ კალაპოტში მტკვარიც შაბიამნისფრად მოედინება. ამ გათენებაში არის რაღაც ადამიანის სულის დამაშოშმინებელი, დამაწყნარებელი, სასიამოვნო და გამხარებელი. როცა ამ ადგილს გამთენიას, დღის და ღამის შეგუფთების ზღვარზე შევხვედრივარ, მიგრძენია, რომ სიცოცხლე მთელი თავისი ძალით ნამდვილად დიდებულია, მშვენიერია, განუუმეორებელია. დიახ, ასე ძალუმაღ მიყვარს თბილისის ეს კუთხე და მისი ცისკრის გახსნა. შეიძლება ეს იმის ბრალიც იყოს, რომ მტკვარი ამ აღ-

286

გილებში ჩვენი ქვეყნის ისტორიასავით კლდოვანია და ვიწროობის გამო მდინარისათვის ძნელად სადინებელი. შეიძლება იმიტომაც, რომ პირველი ქართული მხატვრული შედევრის გმირის—შუშანიკის საფლავი სწორედ აქ, ამ კლდის თავზეა ჩაჭრილი, შეიძლება თუნდაც იმიტომ, რომ ალექსანდრე სუმბათაშვილის დრამის ფინალი ამ ადგილებში მიმდინარეობს — სწორედ მეტეხის კლდეებთან ამარცხებენ ქართველები მოძალადეთა ურდოს. და ადრევე წაკითხულმა გამარჯვების ამ კარგად დაწერილმა დრამამ, ალბათ, განსაკუთრებული გავლენა მოახდინა ჭაბუკის გონებაზე.

ყველამ იცის, რომ ამ ადგილებში ბალები მაინცდამაინც ახლო არ არის და მე კი რატომღაც მეჩვენება, თითქოს ია-იას სუნიც კი ტრიალებს ყველგან, ყოველთვის მელანდება, რომ დილის სიგრილეში შეზავებული ეს იის სურნელება თითქოს თან მოყვება კლდის ზედაპირზე შემოფრენილ ნიავს და ყველაფერს აბრუებს.

რუსთავში მიმავალი ავტობუსიც მეტეხის პირდაპირ ჩერდება. მზე მალლა ჭერ კიდეც არ შემომდგარიყო, რომ ფეხი მანქანაში შევაბიჯე. ხალხი ბევრი იყო, დასაჯდომი ადგილიც კი არ ჩანდა. მეც შესვლისთანავე ისანისკენ შევბრუნდი და, სანამ მომიხერხებოდა, მტკვარზე ამალღებულ მეტეხის კლდის კედლებს თვალი ვერ მოვაშორე.

თბილისის სანახებს გასცდებით თუ არა, მანქანა ხელმარცხნივ, სწორედ იქ გადაუხვევს, საიდანაც რუსთავის პირველი ქუჩა იწყება. ქალაქი ჭერ კიდეც ახლოს როდია! ეს ქუჩა კი თითქოს მარტოღმარტო, ქალაქის გარეშე შემოგხვდებათ, მას აქ გარშემო ხეივანი მიყვება. შუაში ყვავილნარი და ლამაზად მოვლილი ბუჩქები ამალღებულან. ქალაქი კი, იქიდან, ჰე, ჰორიზონტიდან, მთელი თავისი დიდებით შემოგანათებს. მანქანა ქვემოთ იწევს. ღრუბლიანი დღეა. მზის სხივის ნატამალა არ ჩანს. იქით მიმავალ კაცს კი, რომელიც ამ ადგილებში მოხვდება, თუნდაც საღამო იყოს, მაინც ჰგონია, მზე საცაა ამოგორდება ცის გუმბათზე, ამოგორდება და ისიც უსათუოდ რუსთავის მხრიდან. სწორედ ცაში შეტყორცნილ ახალთახალი შენობების კედლების ზემოდან გადმოადგება ქვეყანასო.

როცა დავფიქრდი, გამელიმა. ეს მოჩვენება ახალი

ქალაქის ცად შებჭენილი ფიქალი კორპუსების ბრალია. მათი კედლების თეთრად ელვარება უნებლიეთ ამას აფიქრებინებს იქით მიმავალ მგზავრს. შეიძლება ეს იმიტომაც შემართებოდა, რომ ქართველი კაცი თავის სისხლსა და ხორცს, თავის საყვარელ გამქრალ ქალაქს რვა საუკუნეს დაეძებდა ისტორიის მიცრეცილ ბინდბუნდში. დაეძებდა, რადგან აშკარად იცოდა, იგი სწორედ აქ, ამ ადგილებში მდებარეობდა, იცოდა ისტორიული გადმოცემების მიხედვით. ქალაქი კი აღარ იყო, მსახვრელი ხელისგან ადგილიყო მიწის პირისაგან. ეს იყო ქართველი კაცის ერთი მრავალთაგანი მოურჩენელი ჭრილობა, მისი დიდი ეროვნული სატკივარი. დიახ, რვა საუკუნეს ეძებდა ქართველობა ამ ქალაქს და აი, მოვიდა ერის ფიქრზე ყურის მიმდები და მისი ტკივილების დამყურებელი თაობა; მოვიდა და ისტორიკოსის უტყუარი ხელით მინიშნებულ ადგილას ფოლადისა და ქიმიის უბრწყინვალესი ახალი ქალაქი წამომართა. მე მგონია, ამ მიწის პირზე ჭერჯერობით მეორე ქალაქი არც კია, რომელსაც შეუძლია ასე თამამად თქვას „რვა საუკუნე მეძინა და ახლა კი მძლავრად წამოვიწიე და წამოვდექიო“.

დადინხარ მის ულამაზეს ქუჩებში და გრძნობ, რომ შენს ქვემოთ, ყოველი მტკაველი მიწის ქვეშ შენი წინაპრების ძვლები ასვენია. ისინი დაღლილნი არიან, ომგადახდილნი, ბრძოლაში დაჭრილნი და უკვდავებაში მითვლემილნი. სამშობლოსათვის ჩაჩოქებულან, მამულისთვის სიცოცხლე გაუწირავთ. მათ ახლომახლო ჩაფხუტები ყრია, ფარები მიმობნეულან; ხელში ისევ სატევრები და ხმლები უკავიათ, გვერდით ისრები და შუბები ულაგიათ. ასე იწვნენ ისინი თითქმის რვა საუკუნე — ჩუმად, წყნარად, თავისთვის. მათ მოფერება არ უთხოვიათ, დაჭრილებსა და ჩაჩეხილებს ალერსი არც კი გახსენებიათ. არც შეეძლოთ, რადგან მიწის ქვეშ ეძინათ. თითქოს რევოლუციის დიდ დღეებს უცდიდნენ; მათი შთამომავლობის ახალმა თაობამ, რომელმაც რვა საუკუნის შემდეგ ამოისუნთქა თავისუფლად, ნაომარი ქვეყნის წამოდგომის პირველ დღეებშივე მათ საფლავებზე ჭეშმარიტად ხელთუქმნელი ძეგლი — ახალი რუსთავი აავგო.

თანამედროვე ქართველებმა კარგად იციან, თუ რას ნიშნავს ფოლადი და ქიმიია. მათ კარგად ესმით, რომ ეს ქალაქი

არის ქართველი კაცის სიმდიდრისა და სიუხვის ქალაქი; მისი ცხოვრების ამბებებისა და კეთილმოწყობის ქალაქი, რომლის ქუჩები ფართოა, მზეუხვია, მაღალკედლიანია, ახალი ნარგავებით ამრიალებულია.

დადიხარ ამ ქალაქში და გეამაყება, რომ შენც იმ დროის შვილი ხარ, რომლის ნათელმა სხივებმა ქალაქი ქვითა და ბეტონით ასე ლამაზად ამოქსოვა. ცის ლურჯ გუმბათში შეტყორცნილი საცხოვრებელი ბინები, ხალხით სავსე სავაჭროები და ლამაზი ქვაფენილები, კულტურის სასახლეები, კინო-თეატრები, ფართე მოედნები, რომელთა თავზე ლურჯი ცის გუმბათი ისე გადაშლილა, თითქოს ისიც იმ ხელით იყოს ნაშენები, ვინც ასეთი ბრწყინვალე ნაგებობანი და მოედნები აღამალა.

მართალი გითხრათ, ერთი დღით წავედი ამ ქალაქში და ხუთ დღეს კი დავრჩი. მარტოდმარტო დავეხეტებოდი მის ქუჩებში, მოსახვევებში, ხეივანებში. ქალაქის უმშვენიერეს პარკში ვიმუხლებდი, ძველი ციხის ნანგრევებზე სულს ვითქვამდი. ასეთ პარკსაც იშვიათად ნახავთ ამ ქვეყნად: მისი ხეები საუკუნოვანია; იგი რაღაცნაირად, საოცრებით შემორჩენია ისტორიულად ცნობილ იმ ადამუჟამობის ქალა-ტყეს, რომლის ერთი თავი თითქმის სოღანლულში იყო, ხოლო მეორე—დღევანდელ აზერბაიჯანში. ამ ტყეში აქა-იქ გაველურებულ თუთის ხეებსაც შენიშნავთ. საკვირველი არაფერია! წერილობითი საბუთები გვამცნობენ, რომ ოდესღაც შუა საუკუნეებში აქაური მცხოვრებნი აბრეშუმის შულოებით (ნატურით) იხდიდნენ სახელმწიფო გადასახადს. ამ პარკში, სწორედ ძველი ციხის ნანგრევებთან, საკმაოდ მოზრდილი ხელოვნური ტბა იწყება. ზაფხულობით რუსთაველები აქ ბანაობენ და ნავებით ასეირნებენ თავიანთ ოჯახის წევრებს.

ქალაქში ფეხი შევებიჯე თუ არა, თვალი ველარაფერს მოვაშორე. ვიარე და ვიარე! სახლი მომეწონა — შევჩერდი; ქუჩა მომეწონა — შევიმუხლე, ნანგრევებს შევაშტერდი, სავაჭროების მორთულობამ მიმიზიდა, ქუჩაში მოსიარულეთა სახეებმა მომხიბლა!

და აი, მოსალამოვდა კიდევც!

ძლიერ მომინდა რამდენიმე დღეს მევლო ამ ახალ ქალაქში. შევჩვეოდი მის ქუჩებს, მოედნებს, ადამიანთა სახეებს. მარ-

თალი გითხრათ, ნაცნობების ნახვასაც კი მოვერიდე. მინდოდა მეელო მარტოდმარტო, ყველაფერზე თვალი დამედგა და გულთან მიმეტანა.

სასტუმრო მოეძებნე.

სასტუმროს გამგე, ქართველი დიასახლისი ქალი ისე გამოგეგება, თითქოს მისას მივსულიყავი სტუმრად! ყველაფერი სუფთა, მოვლილი და თავის ადგილზეა სასტუმროში. გაკრი-ალებული და კარგად გაუთოებული თეთრეული, ფაქიზად დაგვილი და ლამაზად მორთული ოთახები მეტად დიდ სიამოვნებას აგრძნობინებს სტუმრად ჩასულ კაცს.

მხარეთმცოდნეობის მუზეუმში მის დირექტორთან — ლუიზა ბასიაშვილთან და მეცნიერთანამშრომელთან — ლია ცინცაძესთან ერთად ხეყური ქალი მზექალა ჭინჭარაულიც დამხვდა. მზექალა ჭარმაგი ქალია, თავისიანებს შატილიდან ჩამოჰყოლია და უკვე თხუთმეტი წელია ამ ქალაქის მცხოვრებია. ხუმრობა ხომ არ არის, მის თვალწინ აშენდა ქალაქი! უხარია მზექალას! იგი თავისი უმწიკვლო შრომით ახლაც შუბლნათლად ემსახურება მუზეუმს. ფაქიზად უვლის მას და მეთვალყურედ უდგას ყოველ ახლად შეძენილ მასალას. ლექსი უყვარს მზექალას. თვითონც გეტყვით თავის ლექსებს, მერედა როგორ ლექსებს?! ისეთ ლექსებს გეტყვით, ტანში გაგაჟრეოლებთ!

— თქვენ იღბალი გქონიათ, — გვახარა ლუიზამ, — არქეოლოგიური ექსპედიციის წევრთა ნაწილი ახლაც აქ არისო.

მართლაც, ორი წუთის შემდეგ უკვე ვესაუბრებოდი საქართველოს მეცნიერებათა აკადემიის ივ. ჭავჭავაძის სახელობის ისტორიის ინსტიტუტის უფროს მეცნიერთანამშრომელს გ. ლომთათიძეს (ექსპედიციის ხელმძღვანელს) და მის ახალგაზრდა მოწაფე-თანაშემწეებს: ეკა ჯანდიერს, თინათინ არჩვაძეს, მერი ჩხატარაშვილსა და მიხეილ კოზლოვსკის (ეს უკანასკნელი ხელოვნებათმცოდნეა და ამჟამად განათხარის ფოტოგადაღებაზე მუშაობს). ამათ უნდა დაემატოს რამინ რამიშვილი, ჯამლეთ ჯღამაია, ნანა მამაიაშვილი, ცისანა ჩიკოიძე, ბესიკო ჯორბენაძე და ვახტანგ ჯაფარიძე (აგრეთვე ჩვენი ცნობილი მწერლის ნიკოლოზ მიწიშვილისა და თამარ ბაგრატიონის ქალიშვილი მარინე, რომელიც დედის ავადმყოფობის გამო წელს ველარ წამოსულიყო ექსპედიციაში). ისინი რუსთავის ნაქალაქარში გ. ლომ-



თათიძის მეთაურობით აწარმოებენ დიდ არქეოლოგიურ გათხრას.

გოგი ლომთათიძე არც ისე ახალგაზრდა კაცია: იგი ჯერ კიდევ ომამდე ყოფილა მონაწილე მცხეთის ცნობილი დიდი ექსპედიციისა, რომელმაც ახალი, მეტად საინტერესო ფურცლები გადაშალა ძველი საქართველოსა და მისი კულტურის ისტორიაში. ჩვენი აკადემიის ისტორიის, არქეოლოგიის და ეთნოგრაფიის ინსტიტუტი, რომელიც ამ საქმეს ხელმძღვანელობს, დიდი ხანია, 1944 წლიდანვე დაინტერესებულია რუსთავის ნაქალაქარით.

მეცნიერულმა ალლომ და გულმოდგინეობამ თავისი გაიტანა.

ჩვენს წინ დაიხატა ჩვენი სამშობლოს სისხლიანი წარსულის ერთი საინტერესო მონაკვეთი; აღმოჩნდა ჩვენი ისტორიის მრავალი დიდი მოვლენის მეტად საინტერესო, მეტყველი ძეგლები.

რუსთავის პატარა, მაგრამ შინაარსიან მუზეუმს ვათვალიერებთ. ამ მუზეუმის დაარსება-გაძლიერებაში დიდი ღვაწლი მიუძღვის რუსთავის ექსპედიციის ერთ-ერთ უძველეს წევრს თამარ პაატაშვილს, რომელიც ამ მუზეუმისა და ქალაქის სიყვარულით იქვე დარჩენილა, დასახლებულა კიდევც.

გოგი ლომთათიძეს ყოველ ნივთზე და ნატეხზე თავისი აზრი აქვს შემუშავებული. იგი დინჯად, მეცნიერულად გვიხსნის ყოველი მათგანის „ბიოგრაფიას“, გვიამბობს, თუ სად ელაგნენ ისინი; რას წარმოადგენდნენ თავის დროზე და ყოველ მათგანს რა მნიშვნელობა აქვს ამჟამად. მის საუბარში ნელ-ნელა იხსნება და იფურცლება მონღოლთა შემოსევის ველური, კაცთა უნახავი უბედურების მომტანი ამბები... შემდეგ ყველანი ციხისკენ მივდივართ.

რუსთავის ციხე ამდღებულ გორაზეა, ქალაქის პარკის ბოლოში. გარშემო მას ქვითკირის საკმაოდ მძლავრი და მაღალი, ქვის პერანგით შემოსილი გალავანი არტყია, ციხის შიგა ფართობი დაახლოებით ოთხი-ხუთი ჰექტარი იქნება. ეტყობა, ეს იყო სიმაგრე, რომელსაც მტრის შემოსევის დროს ქალაქის მცხოვრებლებიც შეეხიზნებოდნენ ხოლმე, იქ მათ შეეძლოთ თვეობით ეცხოვრათ შედარებით უშიშრად, აგურიით მშვენივრად ამოშენებული ღრმა ჭის წყლის იმედით, მაგრამ მეცამე-

ტე საუკუნის მეორე ნახევარში ქალაქზე, მონღოლების სახით, ისეთ გრიგალს გადაუვლია, რომ ციხესაც ვერ გაუძლია, იგი გატეხილა და დაუნგრევიათ კიდევაც.

გოგი ლომთათიძეს გული სწყდება, რომ საქართველოში გავრცელებულია მეცნიერულად უაზრო წარმოდგენა, თითქოს რუსთავის ოთხთაგან ერთი სახელი — „ბოსტანქალაქი“ აქაურ მეურნეობაში მებოსტნეობის გაბატონებას ნიშნავდეს. ბოსტანი საქართველოში აილამას წვერზეც კი შეიძლება მოიყვანო, ქართლსა და კახეთში ბოსტანი, აბა, რა საამაყო საქმეა, როცა ყურძნის ლერწი. ცას ეტოტებოდანო, — ხუმრობს გოგი, — სინამდვილეში ჩვენ საქმე გვაქვს არა სიტყვა „ბოსტანთან“, არამედ „ვოსტანთან“. სპარსულად „ვოსტანი“ ნიშნავს საუფლისწულოს, ე. ი. სამეფო გვარეულობის კუთვნილს. რუსთავიც, როგორც ქალაქი, საუფლისწულო, „ვოსტან“-ქალაქი ყოფილა.

ციხის შიდა ნაგებობანი ადგილ-ადგილ რიყის სიპი ქვით არის ნაშენი, ადგილ-ადგილ გამომწვარი აგურით და ხან ნათალი ქვის ფილებითაც. ციხის კედლები აქა-იქ ისევ მაღალია. თუმცა ბუნებრივი სიმაღლისა მაინც აღარ არის, მტრის ხელს ჩაუნგრევია და ჩამოუქცევია.

ციხის დასავლეთის მხარე მტკვრის კალაპოტს გადასცქერის. ჭერ კიდევ მირიან მეფის შვილიშვილს თრდატ მეფეს (IV საუკუნე) ამ ადგილას მტკვრიდან დიდი სარწყავი არხი — რუ გაუყვანია. მისი დასაწყისი სწორედ ციხის ჩრდილოეთის კედელთან ყოფილა. სწორედ აქედან მომდინარეობს ქალაქის მთავარი სახელწოდება „რუს თავი“. საინტერესო ის არის, რომ ჩვენმა ხალხმა თითქმის იქვე საუკუნეთა მანძილზე რამდენჯერმე მოშლილ ნაარხალთან დაიწყო ახალი არხის აგება და მტკვრის მძლავრი ნაკადი ვაუკაცურად მოაქცია შიგ. დიახ, ძველისძველ სადინარში ისევ ჩადგა ცხოველმყოფელი წყალი. ძველი რუ მიყვებოდა ციხის ჭერ ჩრდილო და შემდეგ აღმოსავლეთ კედელს, ვიდრე გარდაბნის ქალებისაქენ გაემართებოდა. მისი ტალღები ძირს ულოკავდნენ ციხის კედლებს და ამის ნაკვალევი ახლაც ნათლად ემჩნევა გალავნის ფესვ-ბალავარს. სწორედ ამ ციხის გვერდით, მტკვარსა და რუს გასწვრივ არის გაკიმული ცნობილი ქალა-ტყე. ოდესღაც, არც ისე დიდი ხნის

წინ, ეს ტყე სავსე იყო ფრინველებით და ნადირით, ხოლო იქვე ჩამდინარე მტკვრისა და რუს წყალი — ათასნაირი თევზეულით.

გოგი ლომთათიძის ექსპედიციას ვეება ტერიტორია გაუთხრია. ციხის ყოველ კედელთან ჩაღრმავებულან წერაქვითა და ნიჩბით, ჩაკირკიტებულან, მიწის კოლბოხები სათითაოდ უფშვნით და წვრილი მძივის მარცვლები კი არ დაუყარგავთ, გამოუტრიათ. როდესაც არქეოლოგებს რამდენიმე ადგილას ჩაუჭრიათ მეტრობით მიწის დანაფენი, მათ სხვადასხვა დონეზე გამოუკვლევიათ და ჩვენც გვაჩვენეს დიდი ხანძრის ორი ნაშთი — ნახშიროვანი ფენა, შავ ზოლად რომ მიჰყვება თითქმის ყველა თხრილს. ფიქრობენ, რომ პირველი ნახანძრალი თურქ-სელჯუკთა ბატონობას მიეკუთვნება: ისინი 1115 წელს გარეკა აქედან დავით აღმაშენებლის ჯარმა, თბილისის განთავისუფლებამდე 7 წლით ადრე. მეორე ნახანძრალი კი მონღოლთა მიერ ქალაქის განადგურებას უნდა გვანიშნებდეს. ახლაც შეამჩნევს ადამიანი მუხის ძელთა ნახშირს.

— ციხის ზღუდის შემორჩენილი უდიდესი ნაწილი, — გვეუბნება გოგი, — რუსთაველის ხანაშია ნაგები — ადრინდელი, ჯერ კიდევ IV—V საუკუნეთა ციხის ნანგრევის ძლიერ განახლების სახით. ამდროინდელი ზღუდე-ბურჯების პერანგში ხშირად არის ჩატანებული ისეთი ქვათლილები, რომლებიც არ შეიძლებოდა ციხის კედლებში ყოფილიყო და უნდა ეკუთვნოდეს ადრინდელ საეკლესიო (ან ეგებ სასახლის?) ნაგებობათ, რომლებიც, როგორც ჩანს, მტერს დაურღვევია და შემდეგ ეს ქვები ციხის კედლების აღდგენა-შეკეთებისათვის გამოუყენებიათ.

რუსთავის ციხე, „შვიდ მთეულეთთან“ ერთად ერთ დროს ეკუთვნოდა თამარის დროის განთქმულ დიდკაცს აბულ-ასანს, რომელიც შემდეგ შეთქმულებაში მონაწილეობისათვის შერისხულ იქნა. „შვიდი მთეულეთი“ კი შეადგენს იმ ძველ ქართულ თემს — კუხეთს, რომელიც ქართლსა და კახეთს შორის მდებარეობდა და რომლის ცენტრსაც წარმოადგენდა რუსთავი.

ციხის შიგნით ახლაბან აღმოჩნდა აგურით ამოყვანილა ღრმა ჭა, რომლის პირი XI საუკუნის ფენაში მდებარეობს. ჭის მნიშვნელობა თავშესაფარი ციხისათვის ხომ ცხადია, მასზე საგანგებო შენობაც კი ყოფილა დადგმული.

შორიახლოს გაითხარა ორი პატარა ქურა, რომლებიც ძალიან მოგვაგონებენ საოქრომჭედლო ქურებს და ეგებ აქ ასეთი სახელოსნოც ყოფილიყო?!

ციხის შიგნით გათხრილ შენობათა ნაშთების დიდი უმეტესობა ეკუთვნის XII—XIII საუკუნეებს. შედარებით ნაკლებია XI საუკუნისა და უფრო ცოტა აღრინდელი. რუსთაველის ხანა ამ ქალაქის მქაჩიმაღური აყვავება-აღორძინების დროა. ასეთი სურათი ჩანდა ციხის გარეთ მდებარე ნაქალაქარის ხანგრძლივი თხრის დროსაც (იქ, სადაც ახლა ქალაქის საავადმყოფოა).

ეტყობა, მტრებს არამცთუ მოუსრავთ ციხის მცხოვრებნი, შენობებიც დაუწვავთ და ამას კი მათი ნგრევა მოჰყოლია. მარცვლელის ორმოებში ხშირად პოულობენ დაფერფლილ ფეტვის მარცვლებს, ქერისა თუ ხორბლის ნარჩენებს, ზოგჯერ შიგ ჩაყრილ-ჩაცვენილ თიხისა თუ მინის ჭურჭელს, ლითონის საგნებს და აგრეთვე ლითონის ფულს. ერთი ისეთი კარგი თითბრის სანაყი ეგდო, რომ ახლაც გული შეგივარდება ზედ. მტკვრის მხარეზე, ე. ი. დასავლეთით გალავანი სულ სხვანაირად არის ნაგები. მოგვიანებით იქ ახალი კედელი „ჯავშანი“ ამოუყვანიათ რიყის ქვითა და კირით. საოცრად ლამაზი, ტერასებად ნაშენი კედელი მიყვება ამ მხარეზე ციხეს — რიყის ქვა, აგური, თარაზოში ნათალი კუთხედი ქვები, ისევ რიყის ქვები... ეს ყველაფერი ისე ვაქცატურად და ლამაზად არის „ნაქსოვი“, რომ მოგინდება ერთ წუთს ჩამოჯდე და მშენებლის მარჯვენის სადღეგრძელო დალიო.

სამხრეთ-აღმოსავლეთ კუთხეში კოშკია ამოყვანილი: იქიდან კიბით, სწორკუთხოვანად მიხრილ-მოხრილი გზით შემოვიდოდნენ ციხეში, ვისაც შემოუშვებდნენ. გზაზე რამდენიმე კარი ყოფილა, ისე რომ მტერს გაუჭირდებოდა ციხეში შემოღწევა. ეს კოშკიანი კარიბჭე რუსთაველის ხანაშია აგებული. უწინ იქ მხოლოდ ბურჯი ყოფილა — ერთი მრავალთაგანი. კოშკის პერანგში ჩართული აღმოჩნდა ჯვრიანი ქვა. ეს უძველესი ქვა უნდა მიეკუთვნოს ბოლნისის ცნობილი წარწერიანი ტაძრის დროს (V საუკუნე). კოშკიდან შემოსული ფართე კარით უცებ ქვაფენილზე გამოდიხართ. აქეთ-იქით ძველი ქვის სვეტების ნარჩენებია. ეტყობა, სათანადო დროს აქ იყო ციხის მთა-

ვარი კარი. სწორედ აქედან (გაიხსენეთ გელათის მთავარი შე-  
სასვლელიდან ეზოში შემოჭრილი ქვაფენილი) იყო ქვით მო-  
ფენილი საზეიმო შესასვლელი შიდა ეზოში. შორიახლოს გა-  
უთხრიათ მარნები, მოჩანს ვეება. ქვევრები, რომლებიც ოდეს-  
ღაც უსათუოდ სავეე იქნებოდა ქართული ღვინით. ამ კარიბჭის  
მახლობლად კარგა მანძილზე გაშიშვლდა ციხის უძველესი  
(IV—V საუკ.) ზღუდის ნაშთი, რომელიც მერმინდელთაგან ძა-  
ლიან განსხვავდება და ანტიკურს უფრო ჰგავს. იქვე ახლომახ-  
ლო თონეები და კერები ყოფილა მრავლად. ციხის შიგნით, სა-  
ერთოდ, მძლავრად ყოფილა წარმოდგენილი სამეურნეო ნაგე-  
ბობა-მოწყობილობა.

გ. ლომთათიძის ექსპედიციამ აქა-იქ ადამიანთა ცალკეული  
ძვლები და მთელი ჩონჩხებიც კი მიაკვლია. ეტყობა, დიდი გა-  
ნადგურების შემდეგ ახლომახლო არავინ გადარჩენილა, რომ  
მოსულიყო და გავერანებული ადგილები გაესუფთავებინა, ჩა-  
მონგრეული სახლები მიელაგებინა, მკვდრები დაემარხა. რო-  
გორც დატოვეს გამხეცებულმა მონღოლებმა, ისევე დახვდათ  
არქეოლოგებს.

აღრე, ნაქალაქარის თხრისას ერთ ნანგრევში დაღეწილ ჯამ-  
ჭურჭელს შორის აღმოჩენილა წითლად შეღებილი კვერცხების  
ნაჭუჭიცი: მონღოლებმა რუსთავი სწორედ გაზაფხულის წყალ-  
დიდობის დროს, ე. ი. ალბათ აღდგომის დღეებში გაანადგურე-  
სო — მაშინვე გაახსენდათ არქეოლოგებს და ასე ახსნეს ეს თა-  
ვისებური მონაპოვარი.

ამ ნანგრევთა თხრის დროს უამრავი ჭურჭელი აღმოჩენილა  
და სწორედ ისაა, რომ შეადგენს მუზეუმის მთავარ ფონდს. სა-  
ინტერესოა, რამდენი ძვირფასი ჯამ-ჭურჭელი ჰქონიათ რუსთა-  
ვის მცხოვრებლებს. რა გინდა, რომ იქ არ ნახოს თვალმა? თი-  
ხის სანათურები, მინის სანელსაცხებლები, ჭურჭლეული, ფაიან-  
სის და უბრალო თიხის მოჭიქული სამარიალეები, ხელადები, ვა-  
ზები, სამელნეებიც კი. და სრულიად მოუჭიქავი დერგები  
თუ სხვა სამეურნეო ჭურჭელი. ეტყობა, მოჭიქული ჭურჭლი-  
სა და, კერძოდ, ფაიანსის წარმოება საქართველოში უმაღლეს  
დონეზე ყოფილა ასული. აქ ნაპოვნია არაერთი ფაიანსის ჯამი  
და სხვა ჭურჭელი, რომლის მოხატვა თუ მოხაზვა აშკარად ქარ-  
თული სტილისაა. მათი დიდი ნაწილი მოსურათებულია ულა-

მახესი ფრინველებით და ცხოველებით, გეომეტრიული და მცენარეული ორნამენტით. არც ერთი ცხოველი და ფრინველი უშუალოდ ბუნებიდან არ არის გადაღებული, ყოველი ნახატი საოცრად სტილიზებულია: გვანან და არც გვანან ხობხებს თუ მტრედებს, კაკბებსა თუ ჯიხვებს, მონადირეებისაგან გაალმასებულ გარეულ ტახებს თუ ყელმოღერებულ შვლის ნუჯრებს. ხანდახან, როცა დააკვირდებით, თითქოს ცხოველის ფაჩუნსა და ფოთლის შრიალსაც კი გაიგონებთ, ისეა დახატული ცხოველი თუ ფრინველი. ნახატები აუცილებლად ჩასმულია რტო-ყლორტოვან ორნამენტში, ხოლო ორნამენტი მეტად მდიდარია და ადვილად გამოსაცნობი ეროვნული მოტივების შემცველი. ფერთა ლივლივი და საღებავების სიუხვე თვალს იტაცებს. ზოგი უბრალოდ არის მოხატულ-მოჭიქული, მაგრამ სილამაზეს როდი კარგავს ნახატი.

რამდენიმე ჯამ-ჭურჭელი ვეფხის ტყავის ფერებით არის შემკული. ფერები ისე მოელვარედ თამაშობენ, რომ გუშინდელი ნაკეთები გეგონებათ, მართალი გითხრათ, როცა მაჩვენეს, დავეკვდი მათ სიძველეში! წარმოგიდგენიათ, როგორ დონეზე ყოფილა მაშინდელ საქართველოში თუნდაც საღებავების დამზადება? (ჩვენი დროის ენაზე ეს ქიმიას!). სხვათა შორის, ჩვენმა სამხატვრო აკადემიამ დიდ საქმეს მოჰკიდა ხელი და საამაყოდ უნდა ითქვას, მრავალი ბრწყინვალე კერამიკული ნაწარმოები წარმოუდგინა ხალხს. მაგრამ მაინც მინდა, რომ მათ ნახონ რუსთავის ჯამ-ჭურჭლის საღებავები, ბევრი რამ შეიძლება ვისწავლოთ აქედან! შესანიშნავია ნიჟარისებური მოყვანილობის ჭრაქები, სხვადასხვა ფორმისა და სიდიდის სამელნეები. ნაქალაქარის თხრისას უპოვნიათ ქართულწარწერიანი თიხის ჭურჭელი, კრამიტი, ქვევრი და სხვა საგნები—სრულიად ჩვეულებრივ მოქალაქეთა, ხელოსანთა და სხვათა ნაქონი. აქვე უნდა ითქვას, რომ თუ მოუჭიქავია თიხის რომელიმე ჭურჭელი, მაშინ იგი უფრო ხშირად ამოტვიფრულია. თქვენ ნახავთ ისეთ დერგებს, რომლებზედაც ჯეირნები, ირმები თუ ყურძნის მტევნებია შესანიშნავი ხაზებით ამოტვიფრული. ერთი სიტყვით, ქართველი კაცის დიდი მხატვრული ბუნება მთელი თავისი სიდიადით არის წარმოსახული აქ ნანახ ნივთებში. ოსტატს ყველაფერზე ლამაზი ხაზი გაუკეთებია,

ყოველი ნიეთის ფორმა მშვენიერებამდე აუყვანია, საოცარი ფერებით მოუხატავს! არის ცეცხლგამძლე თიხის თავისებური ჭურჭლებიც.

თხრის შედეგად ჩვენ წინ დალაგდა მეტად საინტერესო, ქალთა პირსაფარეშო და სამკაული საგნების შესანიშნავი მარაგი. თქვენ ნახავთ ათასნაირ მძივებს, ძვლისა თუ ქიქისა, ფერადი ქვებისა, თუ მოქიქული თიხისა. ისინი თვალისმომკრელად ლამაზნი არიან. ზოგიერთი მათგანი საოცრად ჰგავს ჩვენი „მესტილე“ გოგონების ყელის მძივებს. ასე რომ, როგორც ეტყობა, ასეთი გოგონები მარტო ჩვენი საუკუნის საკუთრება არ ყოფილა. აქ არის იშვიათი ნაკეთობის მინის სამაჯურები. მათი მოყვანილობა, ფერები და ზოგჯერ ფაქიზი ორნამენტი გაოცებთ და გაფიქრებთ კიდევ. ახლა ქალთათვის სუნამოთა და ნელსაცხებელთა მინის ჭურჭლები უნდა ნახოთ! ეს ჭურჭლეული ბევრ რამეს აგვიხსნის და მიგვანიშნებს. როგორც მისი სიმრავლე და ფორმათა სხვადასხვაობა გვიჩვენებს, ქალთა სახის სილამაზის ხელოვნურად კიდევ მეტად გამშვენიერებას, ნელსაცხებელთა და სუნამოთა ხმარებას რუსთაველის დროსაც დიდი მნიშვნელობა ჰქონია. არც ქალთა თმების საკინძეებია მკირერიცხოვნად წარმოდგენილი. არქეოლოგთა ყოველისმიმწვდომ ხელებს მეტად ლამაზი ბრინჯაოს საჯიბე სარკეც კი აღმოუჩენია! მაგრამ ესენი უფრო ადრინდელი სამარხებიდან არის. არ შეიძლება არ შენიშნოთ მოქიქული თიხის სააკენე ჭურჭელი — კოტოშები, ბავშვის ჰიგიენის მომასწავებელი მოწყობილობა.

ჩვენს არქეოლოგებს სხვა მასალებთან ერთად მრავლად აღმოუჩენიათ ლითონის ფულიც, რომელთაგან ზოგი გარკვეულ სიახლესაც წარმოადგენს ნუმიზმატიკაში და უსათუოდ ამდიდრებს ამ ფონდს. დიდი უმეტესობა ქარტული ფულია, XII—XIII საუკუნეებისა (გიორგი III, თამარი, ლაშა, რუსუდანი) უძველესია — ბიზანტიური, იუსტინე პირველის მიერ მოჭრილი (518—527 წწ.). თავისებურად ყურადსაღებია ქართული ფული, რომელსაც გელალედინის დამლა აქვს დაკრული (1226—1231). ეს იმას ნიშნავს, რომ, შემოესია რა საქართველოს და დაისაკუთრა ის, თავისი სისხლიანი ხელი ფულის მეურნეობასაც დაადო ახალმა, თავადაც მონღოლთაგან ლტოლვილმა ტი-

ჩანმა. ასევე საინტერესოა თამარის ფული, რომელზედაც თამარის და დავით სოსლანის დამლაა. როგორც ჩანს, თამარს საჭიროდ მიუჩნევია, თავისი მეფური სახელის გვერდით ფულზე ღირსეული მეუღლის სახელიც აღებეჭდა. ამასაც ცოტა მნიშვნელობა როდი აქვს იმ დროის სახელმწიფოებრივი ვითარების გასარკვევად და შესასწავლად.

ჩვენს თვალწინ თანდათან იშლება და იხატება ქართველი ერის საამაყო შვილის შოთა რუსთაველის ეპოქისათვის დამახასიათებელი ბევრი ისეთი რამ, რაც ამდენხანს არ იყო ცნობილი.

ყოველ ერს თავისი სათაყვანებელი ადამიანები, თავისი გმირები ჰყავს. მათი სახელები ალაფრთოვანებს ხალხს, აყვარებს ადამიანებს თავიანთ წარსულს, სიამაყის მაღალ გრძობებს ამკვიდრებს ერში და იმედით მოსავს მის მომავალს. მაგრამ როცა ამა თუ იმ ერს ისეთი შვილი დაებადება, რომელიც არა მარტო თავისი ხალხისათვის ხდება საამაყო, არამედ კაცობრიობის ოქროს ფონდის შარავანდედში შეაბიჯებს, მისი ნააზრევი და ნამოქმედარი ყველა ხალხების ღიღებად იქცევა, მაშინ ასეთ ადამიანებს ტიტანებში გადარიცხავენ, ღმერთკაცებად აღიარებენ. ქეშმარიტად, შოთა რუსთაველი ადამიანის გონიერების გასაოცარი ტიტანია. აზროვნების უფაქიზესი და უმძაფრესი შემოქმედების თვალმიუწვდენელი სიმღაღღების შემქმნელია. ამასთანავე იგი ჩვენი ხალხის, მისი ეროვნული ენერჯიის განუმეორებელი გენიაა. ამიტომ ყოველი ქართველი კაცის სახელი, როგორც თვით სიცოცხლესთან, ისეა დაკავშირებული შოთას სახელთან. ამიტომ შოთას სახელთან დაკავშირებული ყოველი ახალი აღმოჩენა ქართველი კაცს ბედნიერება და სიამაყეა. გოგი ლომთათიძის ექსპედიციის მიერ მრავალი წლის მანძილზე წარმოებული არქეოლოგიური გათხრებით გამომზეურებული ძეგლებიც, რომელთა უმეტესობა სწორედ რუსთაველის ხანას გვისურათებს ხელახალი მეტყველი სიძლიერით, შესანიშნავი საჩუქარია ჩვენი რესპუბლიკისათვის...

ყოველ დილას ავდიოდი რუსთავის ციხის ნანგრევებზე, საიდანაც უმშვენიერესი სანახაობა იშლება თვალწინ. ჩავიმუხლებდი ნანგრევებს შორის, თონებთან, ქურებთან, ციხის ზღუდის ქვათლილებთან და ვფიქრობდი ჩემთვის, მარტოდმარტო.



უცებ თვალწინ დამიდგებოდნენ აბჯარგადაცმული ვაჟკაცები, ხმლით და სატყვერით ხელში რომ იცავდნენ ჩვენს ძვირფას მამულს, ძვირფას სახლ-კარს, ძვირფას სამშობლოს.

ერთ დილით ციხის თავზე აველ და იქიდან ნაწისქვილარისკენ გადმოვიხედე. სწორედ იმ მიდამოებში ორი საკმაოდ დიდი დოლაბი იპოვნეს ჩვენმა მკვლევარებმა. ისინი „დედალ-მამალი“ არიან (ასე ეძახიან იმერეთში ზედა და ქვედა დოლაბის ქვებს) და ოც-ოცდამათხ ფუტს მაინც ჩამოფქვავდნენ დღე-ღამეში. ეტყობა, ძველთაძველ რუს თავისი საწისქვილე განტოტება ჰქონია, ან შეიძლება, თითონ ამ რუხე ყო გაშენებული წისქვილი. აი, აქედან დავუურებდი ამ მიდამოს, როცა ნანგრევებისკენ მომავალი სამი ახალგაზრდა კაცი შევნიშნე, თურმე ისინი მე მეძებდნენ. ესენი იყვნენ: მწერალი კარპე მუმლაძე და მისი მეგობრები — ინჟინერი ჟანი ლეჟავა და მეფოლადე ალექსი რევაზიშვილი.

ამ ძველმა რუსთაველებმა ამ ოციოდე წლის წინანდელი ამბავი შემახსენეს. ეს იყო რუსთავის დაბადების დღეები. მძიმე სატვირთო მანქანების მიერ გათელილ გზებზე თავი იჩინა ძველისძველმა, ფილაქვით ნაშენმა სამარტებმა და შიგ—სამუკულმა თუ სხვა ნივთებმა. პარტიის საქალაქო კომიტეტმა ეს ამბავი დაუყოვნებლივ აცნობა ცენტრალურ კომიტეტს, მათვე დააყენეს საკითხი აკადემიის წინაშე, მაშინ დაისახა იდეა დაეწყოთ მეცნიერული, საკვლევი არქეოლოგიური გათხრების წარმოება. იმ ხანებშივე დაიწყო გათხრებიც. უფრო დაწვრილებით ეს ამბები იმავე გ. ლომთათიძის მიერ ადრევე გამოქვეყნებული ანგარიშიდან ვიცოდი. ვიცოდი, რომ საქართველოს სსრ მეცნიერებათა აკადემიის ივ. ჯავახიშვილის სახელობის ისტორიის ინსტიტუტმა თავდაპირველად მეცნიერთა შორის ამ საქმის სამეთაუროდ გამოცდილი, კეთილსინდისიერი არქეოლოგი მიხეილ ივაშჩენკო გამოყო. მან დაიწყო ეს დიდი საქმე და საგულისხმო შედეგებსაც მიაღწია.

გამაოცა მეფოლადეების ასეთმა დაინტერესებამ არქეოლოგიისა და ისტორიის საკითხებით. ინჟინერი ჟანი ლეჟავა ლიტერატურის მკოდნე და მოყვარული ადამიანია. იგი მარტენის საამქროს ცვლის უფროსად მუშაობს და ფოლადის დნობის ბევრი საიდუმლო იცის. ბევრი მეფოლადეა ამ ქვეყნად, ბევრი,

მაგრამ აქარელი ალექსი რევაზიშვილი ტოლს არავის დაუდებს. სხვა რომ არა, ენების ცოდნით გააოცებს არაერთ ინტელიგენტს. მან კარგად იცის თურქული, ბერძნული, რუსული, ესმის და ლაპარაკობს კიდევ არაბულად და ესპანურად.

ამ რუსთაველებთან ერთად შემდეგაც რამდენჯერმე მომიხდა რუსთავის ციხეზე ასვლა. მართალი გითხრათ, ეს ახალი აღამიანები — ჩვენი მეფოლადეები ნამდვილად მოწინავე აზროვნების ვაჟკაცები არიან. მათ ძალზე უყვართ თავიანთი ქალაქი და მისი ყოველი მოქალაქე. უყვართ მისი დიდი წარსული, კარგად გრძნობენ მის უდიდეს. მომავალს და სიღიადესაც. ერთი სიტყვით, თავიანთი ქალაქის დიდი პატრიოტები არიან. ამ ქალაქის მცხოვრებზე აუგს ვინ გაუბედავთ? ისინი კეთილშობილურად ეპყრობიან ყველას სახელს. ახალგაზრდები არიან, ქალაქიც ახალგაზრდაა. სხვათა შორის, ქალაქის ხელმძღვანელიც ახალგაზრდა ქართველი ვაჟკაცია, რომელსაც რესპუბლიკის ახალგაზრდობაში მუშაობის დიდი ცოდნა და გამოცდილება მოჰყვა თან. ეს კი, ეტყობა, ბევრს ნიშნავს.

ისევ გ. ლომთათიძის ანგარიშს ვუბრუნდები. მტკვრის მარჯვენა და მარცხენა ნაპირს, ეტყობა, ოდესღაც ხიდი აკავშირებდა. ჯერ კიდევ 1948 წელს ყოფილა აღმოჩენილი მისი ნარჩენები. აქედანვე ჩანს, რომ ქალაქი საკმაოდ დიდი უნდა ყოფილიყო. მიხეილ ივანეშინკოს აზრით, ადრეულ საშუალო საუკუნეებში ამ ქალაქის მცხოვრებთა რიცხვი 20.000 მაინც აღწევდა. ეს კი ცოტა როდია.

მტკვრის მარჯვენა ნაპირზე თხრისას აღმოჩენილ ქვიშაქვის მრგვალ საბეჭდავზე გამოხატულ ჯვრის ირგვლივ არის ბერძნული წარწერა „საფარველი მწერვალისა“. ფიქრობენ, რომ ეს წარწერა VI—IX საუკუნეებისაა. გარდა ბერძნულისა, იკითხება ქართული ასომთავრული საპი ასოც, რაც მას მეტად საინტერესოდ ხდის.

მნიშვნელოვანი ყოფილა ისიც, რომ საფლავის ქვებზე თუ სხვა საგნებზე ამოჭრილი ასომთავრული წარწერების სიმრავლე მიგვითითებს ამ ანბანის ფართო გავრცელებას. ცნობილი აზრი იმის შესახებ, რომ ასომთავრული მხოლოდ და მხოლოდ გარკვეული, გაბატონებული წრის საკუთრება და საზეიმო დამწერლობა იყო, არ მართლდება. პირიქით, როგორც ჩანს, ეს ან-

ბანი სახალხოდ სახმარი ყოფილა და რუსთავის მოქალაქენი ასედაც იყენებდნენ მას.

ნაქალაქარის თხრისას აღმოჩენილ ნივთებს შორის საინტერესოა ოქროს საყურე და გულსაკიდი. ორივე ოქრომჭედლობის იშვიათი ნიმუშია. საქართველოს აქვს უნიკალური საეკლესიო ოქრომჭედლობა. ესენი კი სამოქალაქო ოქრომჭედლობის მცირე, მაგრამ ხელოვნების თვალსაზრისით დიდად მნიშვნელოვანი ნიმუშებია. ასევე საინტერესოა ბრინჯაოს ორკეცი, მინით მოთვალული გულსაკიდი ჯვარი, რომელზედაც წმინდანის გამოსახულებასთან ერთად მცენარეები და ორნამენტია ამოკაწრული.

რუსთავის არქეოლოგიური განათხარის სიმდიდრეზე რამდენადმე სრული წარმოდგენა თუ გვინდა გვექონდეს, არ შეიძლება არ აღინიშნოს მსხვილფეხა და წვრილფეხა საქონლის ძვალთა სიჭარბე. ძროხების და ხარების ძვლები (მეტად მდიდარი მასალაა) თავისი აღნაგობით უახლოვდება ხევსურულ ჯიშებს. ცხვარი კი ე. წ. „იმერული ცხვრის“ ტიპისაა. აქ საკმაოდ მრავლად ირმის ძვლებიც, ნაპოვნი აქლემისა და კამეჩისაც. არც თუ ცოტაა ღორისა. ყველაფერი ეს მოწმობს მესაქონლეობის დიდ განვითარებას. მის სიმდიდრეს, მის პროდუქტიულობას, მის მრავალფეროვნებას.

რასაკვირველია, ჩვენი არქეოლოგები მთელი ამ მდიდარი ფაქტიური მასალის დაგროვების შემდეგ ისტორიის ახალ-ახალ ფურცლებს გადაუხსნიან ჩვენს ერს, ჩვენს სამშობლოს.

და ბოლოს, რუსთავის არქეოლოგიური თხრის დროს აღმოჩენილ იქნა ორი საოცრად ამაღლელებელი ამბავი. არქეოლოგები ადრე, ნაქალაქარის თხრის დროს ორ ძალზე დრამატულ ამბავს წაწყდომიან.

ერთ ორმოში, რომელშიაც, ალბათ, მარცვლეულს ინახავდნენ, ეგდო ოცდაათიოდე წლის უბღვარეხილი ვაჟკაცის ჩონჩხი. შეიძლება ბევრი მოსულიც დაჭრა ან მოკლა კიდევ, მაგრამ მომხდურთა სიმრავლეს თავისი გაუტანია და მისთვის თავი გაუპიათ. მერე სახლიც დაუწვიათ, თავზე დაუნგრევიათ და წასულან. მეორე: ერთ-ერთი კედლის მახლობლად გამოჩნდა ახალგაზრდა, 16—18 წლის ქალის ჩონჩხი. მისი ხელის ძვლების მახლობლად პატარა წალღუნა ეგდო. ეს საოცარი, გულის-

მომკვლელი სურათი უფრო ძლიერდება, როცა ხედავ, რომ ჩონჩხს თავის ქალა აღარა აქვს. უნდა ვიფიქროთ, რომ ამ რუსთაველ გოგონას უბრძოლია წალდით ხელში და მტერს ცოცხალი არ ჩაეარდნია. ვინ იცის, რა ნაწი ქალიშვილი იყო და მოძალადეთა წინაშე კი ვეფხვად იქცა? ბოლოს, ცხადია, მაინც დაძალეს მტრებმა. მშვენიერი თავი წარკვეთეს და „ნადავლი“ ხმლის წვერზე წამოაცვეს!

ჰაი დედასა, რა დრო არ გამოუვლია ჩვენს ხალხს?!

გულისტკივილს ვიოკებ. რუსთავის ერთ უმშვენიერეს მოედანზე ვდგავარ, შვეცქერი ქართული ფოლადის ულამაზეს და უმდიდრეს ქალაქს და სიამაყე მიპყრობს. დიახ, მეამაყება და მიხარია, რომ ჩემი თაობა ამ ქალაქის ფუძემდებელია, მისი ბალავრის გამჭრელია, მისი თავანის გადამხურავია, რომ რუსთავის „ფოლადის მკვნეტელი“— ვაჟკაცები ფოლადის საიდუმლოთა ცოდნით სამყაროს ყველა ფოლადის ჩამომსხმელებს პირდაპირ, თამამად უსწორებენ თვალს.

ქემმარიტად, გმირულ წარსულს გმირული მომავალი მოსდევს!

## დურგალი და პროფესორი

უძლენი ჩემს მეგობრებს, შოამაგე ექიმებს —  
მარიამ იოსელიანს და ანდრო აბაშიძეს.

სოფელს ვერაფრით გააკვირვებ. ავიც ბევრი უნახავს და კარგიც, ბედნიერებაც და უბედურებაც. დაბადება უთვლელი ახსოვს და სიკვდილსაც ბევრს მოსწრებია. ამ უბედურებამ კი სოფელი მაინც გააოცა. სიკვდილიც არის და სიკვდილიც. სიკვდილის მეტი რა ენახა სოფელს. ამნაირი სიკვდილი კი ჯერ არავის გაეგონა ამ არემარეში. სულ ორიოდვე კვირის წინ სოფელში დიდი მორებისათვის მრგვალი ხერხი დადგეს. სახერხის მეთაურად დურგალი ლევან გოგნაძე დანიშნეს. დამხმარე მუშას ხელიდან ნაგვერდული აუცურდა, ხერხმა ასხლიტა და ფიცრის ნაპობი ლევანს ზედ ყელ-კისერში ეცა. იმ დაწყველილმა სულ დაუფლთა ხორხი. ფიცრის ერთი ნახსლეტი შიგ გაეჩხირა და ვაჟკაცი კაცი მთელი სოფლის თვალის წინ მიწაზე დაკლული ქათამივით ფართხალეზდა. სისხლი ღვართქათვით, ბუშტა-ბუშტად გადმოსდიოდა ყელიდან, სულს ლაფავდა.

— ვაი შენს მშობლებს! — ქვითინებდნენ ქალები.

— რაღა ეშველება შენს უბედურ ოჯახს! — ბანს აძლევდნენ მოხუცები.

ლევან გოგნაძეს მშობლებიც ჰყავდა და ცოლ-შვილიც. მშობლები მოხუცები იყვნენ. როგორც სოფელში იტყვიან „ერთმანეთს ძლივს აყენებდნენ“. მცირეწლოვანი ბავშვები კი ახლა იყვნენ საპატრონო. უფროსი ბოთხმეტი წლისა გახლდათ, უმცროსი ჯერ კიდევ დედის ძუძუს ეკიდა. მისი მეუღლე ბაბო ბუხრაშვილის ქალი დაწყებით სკოლაში მასწავლებლობდა.

შართალია, ღონიერი ქალი იყო, ტოლს აზრის დაუდებდა, მაგრამ მისი მოხუცი დედაც მის კისერზე იყო და, აბა, ამდენის გაძლება ვაჟკაცსაც გაუჭირდება. ქალისთვის ძნელი ცხოვრება იწყებოდა. გამწარებული ბაბო ყველას შველას სთხოვდა. საზანოში ყელ-ყურის ექიმი არ იყო, ამიტომ თერჯოლიდან ექიმი ბუცხრიკიძე დაუყოვნებლივ ჩამოვიდა.

— ამას რთული ოპერაცია სჭირდება, ახლავე ქუთაისში უნდა წავიყვანოთ! — გამოთქვა თავისი აზრი ექიმმა. ბუცხრიკიძემ არ დაიზარა და თვითონ გაპყვა კოლმეურნეს. უიმისობაც არ შეიძლებოდა. მოსალოდნელი იყო გზაზე სისხლს დაეხრჩო ყელდაფლეთილი ლევანი. სისხლის დენა კი მას ქუთაისამდე არ შეწყვეტია.

მთელ იმერეთში განთქმულია ყელ-ყურის ექიმი აკაკი გაბუნია. ლევანი მას მიუყვანეს. მანაც სასწრაფოდ, თავისი ცოდნის და დიდი გამოცდილების მიხედვით, რაც შეეძლო, ყველაფერი გააკეთა.

კოლმეურნე ლევან გოგნაძე სიკვდილს გადარჩა. ამიერიდან მის სიცოცხლეს საფრთხე არ ელოდა. გაბუნიამ მას, სადაც ნავერდულის ნაპობმა ხორხი გაუხლიჩა, სწორედ იქ ჩაუდგა რკინის მილი. ექიმი ფიქრობდა, ჭრილობა ასე შეიზრდება და ყველაფერი კარგად დასრულდება.

სიცოცხლე გადარჩა, მაგრამ ლევან გოგნაძემ ხმა დაკარგა. იგი დამუნჯდა, უტყვი გახდა. მის ხმას აწი ვერავინ გაიგონებდა, ვერავინ მოისმენდა. წინათ, ამ უბედურებამდე, კი ლევანს სასიამოვნო, გულიდან ამოსული და ზარივით ჟღერიალა ხმა ჰქონდა. სოფელში სიმღერას რომ დაიწყებდნენ, მისი ბანი გუგუნით ეფინებოდა გარემოს.

თორმეტი წელი იმუშავა სოფლის სკოლაში დურგლად ლევანმა. მოსწავლეები მიჩვეულნი იყვნენ მის ხმას. -

— აბა, ონავრებო, მაგიდები არ დაფხაჭნოთ, დანით არ დასეროთ, — შეუძახებდა იგი პატარებს.

ახლა სკოლის ახლოს რომ მოუხდეს გავლა და დაინახოს ცელქი ბიჭი რასმეც აშაგებდეს, სიტყვას ვერ ეტყვის, ხმასაც ვერ ამოიხაველებს. სკოლას სამი წელია დაანება თავი ლევანმა. ისევ კოლმეურნეობას დაუბრუნდა.

სამი წელი მიწაზე იმუშავა, მერე თავმჯდომარემ მოისაზრა სოფელში სახერხი დაედგათ.

— სოფელს სჭირდება, სიმდიდრესაც შეგვეძენს, ღარიბები ვართ და იქნებ ცოტა სული მოვითქვათო.

ღურგალმა ლევან გოგნაძემ სოფელში ხერხი სხვაზე უკეთ იცოდა. თავმჯდომარეც იგი დანიშნა სახერხის მეთაურად.

— ხის ოსტატი შენა ხარ და ხერხისაც გესმის. შენზე უკეთესს სოფელში ვის ვიშოვით, დადექი და უხელმძღვანელო.

რასაკვირველია, ლევან გოგნაძეს ერჩია ერთი კარგი საღურგლო სახელოსნო გაეხსნა. კარადებსაც გააკეთებდა, სკამებსაც მეფურს გამოთლიდა. თავმჯდომარემ თქვა:

— ჯერ ეს იყოს, სახელოსნოზე შემდეგ ვიფიქროთ!

თავმჯდომარე არ ტყუოდა. მართლაც, ყოველდღიურად სახერხს 30—40 მანეთის შემოტანა შეეძლო.

ვაი, რომ არ დასცალდათ! ყველაფერი ყველაფერი, მაგრამ საჭირო კაცი არ მისცეს თანაშემწედ ლევანს. ხომ იცით, კოლმეურნეობაში მუშახელს უფრთხილდებიან. იმას, ვინც სახერხისთვის გაიმეტეს, ხერხისა არაფერი გაეგებოდა. ლევანმა მაშინვე უთხრა თავმჯდომარეს:

— ეს კაცი ან მე დამლუპავს, ან თავს დაისახიჩრებსო.

არ დაუჯერეს.

მოხდა ის, რისიც ეშინოდა გოგნაძეს. თანაშემწეს ხის ნაგვერდული გაექცა, ვერ დააკავა. თვითონ გადარჩა, მაგრამ ლევანი დაღუპა. გულდასაწყვეტი ის იყო, რომ ყველანი შემოეცალნენ ლევანს. თანაშემწეს არც კი უნახავს მის შემდეგ ლევანი. ის კი არა, თავმჯდომარეს ისიც კი უხუმრია — მომღერლად ეგ არ ვარგოდა, შალაშინს და ჭობოსანს ხმის დაყოლება რად უნდა, ლევანი ისეთი კარგი ოსტატია, მაგის ხელში ისედაც მღერიან იარაღებითო.

მართლაც, კარგი ხელოსანი გახლდათ ლევანი. იგი, მარტო საღურგლო საქმეს კი არა, საწერ მაგიდებსაც აკეთებდა, ტანსაცმლის კარადებს და განჯინებს ისე აკობიტებდა, რომ სამ ზითვოდ გამზადებულ ქალიშვილებს თვალი რჩებოდათ ოსტატის ნახელავზე.

პატარა ბიჭმა შეიყვარა ხელობა და ყოველთვის ღიღინით აკეთებდა თავის საქმეს. უბრალო სკამის ფეხიც არ გაუთლი-

ჩაუღიღინებლად. თითქოს ეს დაბალი სიმღერა, მარტო მას რომ ესმოდა, ნამუშევარს სილამაზეს და ეშხს აძლევდა. ეს არ ესმის კოლმეურნეობის თავმჯდომარეს. იმიტომ ხუმრობს ასე მწარედ, ცილგავობს, დასციინის.

თუმცა, ღმერთო შენით და, მართალი რომ თქვას კაცმა, თავმჯდომარეებს ის უყვართ, ვინც სოფლის ცხოვრების შუაგულში ტრიალებს. ლევანი კი არასოდეს არ ყოფილა სოფლის დუღილის შუა ადგილას. პატარაობისას ზესტაფონში მიაბარეს ხელოსან ბიძას შეგირდად, სანამ იგი დახელოვნდებოდა, წამოიზარდა კიდეც. ულვაში ჯერ არც კი შერუჯოდა, როცა ომმა იგრიალა. იგრიალა და დედამიწა დოლაბივით დაატრიალა. სწორედ ამ ტრიალმა თერჯოლის რაიონის სოფელ მუჯირეთის გლეხიკაცი ლევანა ზოგნაძე ნორვეგიაში მოახვედრა.

მის გვარსა და ჯილაგს ფეხი არ დაედგა იმ ქვეყანაში, არც უფიქრიათ იმ ქვეყნის ნახვა. არც სჭირდებოდათ. მდინარე ძუხა, მის სოფელს რომ ჩამოუღის, კარგა ხანს ეგონა ერთადერთი მდინარე ამ ქვეყანაზე. მერე შეგირდობის უამს ყვირილა შეიყვარა და, უცებ, არც აცხელეს, არც აცივეს, ცხრა ზღვისა და ოკეანის გადაცურვა მოუხდა.

„ხმელეთი მარტო ჩვენში ყოფილა, აქეთ სულ წყლით არის დედამიწა შემორაგულიო“, — ფიქრობდა მაშინ ლევანი. ბუნებით გლეხიკაცი ყველაფერს უკვირდებოდა, ყველაფერს დიღინში ჩააყოლებდა გონს. მისი ხელობის კაცს მაინც ხის საოსტატო საქმე სტაცებდა თვალს. ნორვეგიელი მუშაკაცი მოეწონა. მათაც ისევე სძულდათ ფაშისტები, როგორც ჩვენებს. ფაქიზი მუშაობა სცოდნიათ ნორვეგიაში. ხის მასალისგან იუველერის ოსტატობით ძერწავდნენ ნივთებს. მათს შემხედვარე ლევან გოგნაძეს ხელი უკანკალებდა. დილის ხუთი საათიდან დიდვახშობამდე არაქათგამოლეული ტყვეები კლდეს გლეჯდნენ, დამცირებულნი და გაძვალტყავებულნი დარაკრაცებდნენ. საკმარისი იყო ლევან გოგნაძეს ეთქვა: „მე ხის ოსტატი ვარო“, იმ წუთს სახელოსნოში გადაიყვანდნენ, ულუფას მოუმატებდნენ, პატივშიაც ეყოლებოდათ. გერმანელი ოფიცრები სიამოვნებით შეუკვეთდნენ წიგნების კარადებს, განჯინებს, სკამებს. არა ქნა ლევანმა ეს „სამშობლოში რა პირით დაგბრუნდე, გერმანელებს რომ ჩემი მარჯვენით ვასარგებლო, ჩემი



ხელიდან მათთვის მხოლოდ სამტრო ტყვია თუ გამოდნობა. სხვა მათ ჩემგან არა ეკუთვნით რაო", — თქვა ლევან გოგნაძე და შეასრულა კიდევ. სხვებთან ერთად შიმშილობდა და სხვებთან ერთად იზიარებდა ტყვეთა უღიმღამო, უბედურ ბედს. ერთი რამ ახარებდათ ტყვეებს: ცაზე ვარსკვლავებს და მთვარეს ისეთივე ფერი და სხივი ჰქონდა, როგორც მათ სამშობლოში. ამიტომ იყო, რომ ღამით გაწვებოდნენ პირალმა და თვალი არ ეღლებოდათ ცის გუმბათის მზერით. არც ერთ ტყვეს ხმა არ შეეცვლია. ისევ ისე ესაუბრებოდნენ ერთმანეთს, როგორც ბრძოლების დროს. ამ ხმით სცნობდნენ ერთიმეორის გულის ვარაშს, რომლის გამხელა ახლა ძნელი იყო. ამ ხმებით სწონილდნენ და სინჯავდნენ ურთიერთის სულიერ სიმდიდრეს, ერთმანეთისადმი დამოკიდებულებას, სამშობლოს, მამულის დიდ სიყვარულს. ამ ხმებით ითენებდნენ დილას და ხედებოდნენ დაღამებას. ამ ერთმანეთის ხმის იღუმალებაში სცნობდნენ ისინი იმ ადამიანურ სიკეთეს, რომლითაც ერთმანეთისკენ ილტვოდნენ და ნდობას იმსახურებდნენ. საკმარისი იყო ვისმეაოდნავ შესცვლოდა ხმა, რომ მთელი ბანაკი სულ სხვანაირი ხდებოდა. მართალია, ამას გარეგნულად არ იმჩნევდნენ, მაგრამ აფორიაქებულნი კი ძალზე იყვნენ. მაშინვე ხედებოდნენ, რომ ეს ხმის შეცვლა ახლა კარგს არ ნიშნავდა, რომ მისი პატრონის სულიერ სამყაროში რაღაც დიდი ძვრა მოხდა—ავად გახდა, სულში რაღაც ჭია ჩაუძვრა. ლევან გოგნაძეს კარგად ახსოვს, რომ ერთხელ ბანაკში გერმანელების აგიტატორები მოვიდნენ. ისინი მოუწოდებდნენ მათ: „ომში წამოდიოთ, მონაწილეობა მიიღეთ, სამშობლოს უღალატეთო“. ყველანი გაინაბნენ, გაჩუმდნენ, ერთმანეთს მხოლოდ თვალებით შეხედეს. მაშინ რამდენიმე კაცს სიტყვის თქმა დააძალეს. თავიანთი აზრი უნდა გამოეთქვათ ამის შესახებ, თხუთმეტი კაციდან ორ კაცს შეეცვალა ხმა. ეს ბიჭები, რომელთა ხმები აქამდე ასე ნაცნობი და სასიამოვნო იყო, უცებ სულ სხვანაირი გახდა. ბგერები რაღაცნაირად უსიამოვნო ხრინწით აევსოთ, ხმა მთლიანად უცხო გაუხდათ. იმ საღამოს ისინი ბანაკს გარეთ გაიყვანეს, გერმანული ტანსაცმელი ჩააცვეს, ორი დღის შემდეგ, თითქოს გამოსამშვიდობებლად, უკან შემოუშვეს. საოცარი რამე მოხდა. ორ დღეში იმდენი ექმიათ, ფერ-ხორცი მო-

მატებოდათ, ლოყები შესწითლებოდათ კიდევ. ტანსაცმელიც კარგი ეცვათ, სუფთა და ლამაზი. მხოლოდ ხმა არ ჰქონდათ ომახიანი, ნათელი, ვაჟკაცური ხმა დაჰკარგოლათ. თითქოს თავისი ძლიერი ხმა სადღაც გაპარვოდათ. იმ სიბინძურეს, რომელიც მათ ჩაიდინეს, მარტო ხმაში ჩაებუდებინა. ყველაფერი თავისი ჰქონდათ. მიხვრა-მოხვრა, სიარული, მაგრამ ხმა სულ შესცვლოდათ. როგორც კი დაილაპარაკეს, ბიჭებს ტანში გააზრიალათ პირველი სიტყვებიც კი არ ჰქონდათ ნათქვამი, რომ მთელი ბანაკი გაილურსა, თითქოს ზღვაში ჩაიყვინთენ, ისე გაჩუმდა ყველა. ამ ორი კაცის ხმაში იგრძნობოდა ის, რაც კაცს კაცობას აკარგვინებს. დიახ, იცოდა ლევან გოგნაძემ ხმის ფასი. ყველას და ყველაფერს თავისი ხმა აქვს ამქვეყნად. ამ ხმით ესაუბრება იგი სამყაროს, ტოლ-მეგობრებს, ცოლ-შვილს, მეზობელსა და მოყვარეს. ეს ხმაა, რომ განასხვავებს ერთ კაცს მეორე კაცისაგან, მტერს—მოყვარისაგან. ეს ხმა თუ დაკარგე, მაშინ რა ხარ, რაღად ღირს სიცოცხლე, რა ფასი აქვს შენს არსებობას? შენ მთელი სამყაროს ხმები გესმის, შენ კი დამუნჯებულხარ და ერთ ბგერასაც ვერ ამოიხაელებ. არა, ლევან გოგნაძეს სიცოცხლე უხმოდ, დაულაპარაკებლად, დაუმღერებლად კაპიკადაც არ უღირს.

რაღაც უნდა იღონოს, მიწის კიდემდე იაროს და იეჭიმოს. არა სჯერა ლევანს, ჩვენმა ეჭიმებმა ხმა რომ ვერ დაუბრუნონ.

— ხეჩინაშვილზე ამბობენ, სასწაულებს ახდენსო, — ჩააწვეთა მეზობელმა ყურში.

— კი, ნამდვილად მასეა, ბოშო! სიმონ ხეჩინოვის შვილი-შვილი ყოფილა, ქუთაისში რომ იყო დიდი ეჭიმი.

— ბაბუას სახელი დაურქმევიათ, ამბობენ, ყრუებს და მუნჯებს არჩენსო.

— რა ვიცი, ქუთაისში მირჩიეს, მოსკოვში თუ წახვალ, იქნებ მაშინ გეშველოს რამეო, — ბატისფეხა ასოებით გამოუყვანა ქაღალდზე ეს სიტყვები ცოლს ლევანმა.

— მოსკოვის თავი სადა გვაქვს, კაცო! ამბობენ, სიმონ ხეჩინაშვილი ყრუებს დანის ერთი გასმით არჩენსო, იქნებ შენც მოგიხერხოს რაიმე?

ლევანმა გადაწყვიტა წასულიყო პროფესორთან. ცოლი თან წაიყვანა და წავიდა კიდევ.

ლევანი ზესტაფონში გაზრდილი კაცი იყო. თბილისში ორჯერ არ ყოფილა. მაინც საოცარი სიყვარული ჰქონდა თავისი მამულისა, სატახტო ქალაქისა. ღმერთო შენით, ეშინოდა კიდევ. საქართველოში ამდენი ხალხი თუ ცხოვრობდა, ვერ წარმოედგინა. ლევანს ეგონა, ამდენი ადამიანის თავის შეყრა მხოლოდ ჯარში შეიძლებოდა.

აქ კი ქუჩები გატენილი იყო. ულამაზესი ვაყები და ქაღები მომღიმარე სახეებით დიდ ეშხს უმატებდნენ ისედაც მშვენიერ გარემოს.

ფეხი რომ რამეს წამოჰკრას და კაცს დაეტაკოს, გუნება შეეცვლება. ცოდვა არ იქნება, ასეთ ქალაქში ადამიანებს ხასიათი გაუფუჭო? ასეთ ქალაქში ცუდ ხასიათზე კაცისშვილი არ იქნება. ალბათ, ამიტომ იყო, ლევანი სადგურიდან ფრთხილი ნაბიჯით გაუყვა პირველი საავადმყოფოს გზას.

ლევანი კიდევ უფრო გაოცდა, პროფესორი რომ დაანახვეს. იმას ეგონა, წვერიანი დარბაისელი მოხუცი დახვდებოდა. ეს კი, მხარბეჭიანი ვაჟკაცი, ბოკვერივით ბუხუნებდა ლაპარაკის დროს.

არ დაიჭერა და ახლა მეორეს ჰკითხა: ისევ იმ კაცზე მიუთითებს. რა უნდა ელონა ცოლი წინ გაიძლო და მოკრძალებით მივიდა ახლოს. შეველო თუ არა უცხო ადამიანებს თვალი, ის დალოცვილიც მათკენ შემობრუნდა.

— თქვენ რისთვის გარჯილხართ, ბატონებო? — მოესმა ლევანს ღიმილი და წყნარი ხმა.

გაიგონა ეს ხმა თუ არა, ლევანს ჯრუანტელმა დაუარა.

„კი, თუ მომარჩენს, ეს კაცი მომარჩენს. მაგ ხმის პატრონს ყველაფერი დაეჯერება“, — უცებ გაიფიქრა ლევანმა.

ლევანის ცოლმა ფათერაკის ამბავი უამბო პროფესორს, სათხოვარი სთხოვა. ხეჩინაშვილს თვალები გაუფართოვდა.

— შესახვევში შეიყვანეთ, უნდა გავსინჯო, — ეს ისე იყო ნათქვამი, რომ ეჭიმები მიხვდნენ, ჩვეულებრივი პაციენტი არ იყო ახლადმოსული.

კარგა ხანს ათვალიერა სიმონ ხეჩინაშვილმა ლევან გოგნაძის ყელ-კისერი. ნაოპერაციევი გულდასმით გასინჯა და ნაკერებს დაუკვირდა. პროფესორი მიხვდა, შეიძლებოდა, დურგალს ხმა დაბრუნებოდა, შეიძლებოდა, მაგრამ ამისთვის დიდი ხნის

შრომა და ექიმობა იყო საჭირო. შეიძლება რამდენიმე ოპერაციაც დასჭირებოდა. მაგრამ ღირდა კი ამდენ წვალებად! კაცმა რომ თქვას, რა მოხდა ისეთი?! კაცობრიობამ ამხელა ომი გადაიტანა, ათეული მილიონი ხალხი დაიხოცა, ორი იმდენი დასახიჩრდა. რა დიდი ამბავია ახლა, ლევან გოგნაძემ რომ ხმა დაკარგოს? რომელი კარუზო და ვანო სარაჯიშვილი ის გვყავს, ხალხმა რომ მისი ხმის დაკარგვა ასე განიცადოს?!

შალაშინს და ჭობოსანს უხმოდაც კარგად იხმარს. მაშ რატომ დაინტერესდა პროფესორი სიმონ ხეჩინაშვილი ასე ძლიერ ლევანის ხმის დაბრუნებით?

სახელს და დიდებას ღურგლის ხმის დაბრუნება ვერ მოუმატებდა პროფესორს. ის უკვე განთქმული მეცნიერი გახლდათ. სწორედ იმ წელს, რა წელსაც ლევანი მივიდა მასთან, პროფესორმა საქვეყნოდ საპატიო ჯილდო—ლენინური პრემია მიიღო, მისი სახელი გასცდა საბჭოთა კავშირის დიდ საზღვრებს, გასცდა და დიდი მეცნიერის სახელი განიმტკიცა.

მართლაც, ასეული და ათასეული ადამიანები დადიოდნენ ამ ქვეყნად დაყრუებულნი. ოტოსკლეროზით დაავადება მოურჩენელი რამ იყო დღემდე. ვინ იცის, რამდენ დიდ მეცნიერს თუ მოაზროვნეს საფლავში ჩაჰყოლია ეს ავადმყოფობა და მთელი სიცოცხლე მოუწამლავს მისთვის. აბა, წარმოიდგინეთ, დადიხარ ქვეყნად, ადამიანი გქვია და არავის ხმა არ გესმის. შშობლის ხმა არ გესმის, შვილის ხმა არ გესმის, მეუღლის ხმა არ იცი როგორია. დილით დგები და ჩიტების ელურტული შენს ყურს არ ეკარება, მერცხლის კიკიკი არ გესმის. ქორწილში თუ ნათლობაში თქმულ სიმღერებს ვერ გაიგონებ, მუსიკის ხმები შენთვის უცხო გამხდარა, ფოთოლთა შრიალს ვერ მოისმენ და ზღვის ბუზუნს ყურს ვერ დაუგდებ. დიახ, ასეთი დაავადებაა ოტოსკლეროზი. სიმონ ხეჩინაშვილმა რამდენიმე საბჭოთა მეცნიერთან ერთად პირველმა მონახა ამ უკურნებელი სენის საიდუმლო გასაღები, მონახა და დაჯაბნა კიდევ ეს ავადმყოფობა. აბა, ჰკითხეთ თქვენ კონსერვატორიის პროფესორ-პიანისტს, რომელსაც ეს სენი ნელ-ნელა შეეპარა და სმენა თანდათან დაუქვეითდა. იგი ხეჩინაშვილთან იმედდაკარგული მოვიდა. სმენა მუსიკოსისათვის ხომ სიცოცხლეა. პროფესორმა მას ოპერაცია გაუკეთა. ახლა ჯანდონით სავსე მოზარდი

ბავშვივით ესმის ყველაფერი, როგორც იტყვიან, ჭიანჭველის დამთქნარებასაც ვერ გამოაპარებ, არამც თუ კლავიშების ხმას! ან კიდევ, ექიმი, რომელმაც ერთი ყურის სმენა ომში დაკარგა, მეორე კი ოტოსკლეროზით დაუყრუვდა. იგი გაუბედავად მივიდა პროფესორთან. ვინ არ იღლევენ ასეთ დროს? ერთი ყური სამუდამოდ დახურული გაქვს, მეორეს კი საოპერაციოდ ანდობ ექიმის ხელს. აქაც გაიმარჯვა ხეჩინაშვილის ხელმა. დღეს ეს ექიმი ბედნიერი თვალით უყურებს და უსმენს ქვეყანას.

ჩვენი მოძმე და მოსაზღვრე აზერბაიჯანის რესპუბლიკის ქალაქ კიროვობადის მცხოვრებს ალა ალაევს მეუღლე დაუყრუვდა. ლამაზი და ამაყი ქალი გახლავთ მეხფარა ალაევა. რასაკვირველია, ძნელი იყო ასეთი ქალის სიყრუის მოთმენა. ლამაზი ვაჟკაცია მისი ქმარიც. ცოლის სიყრუის დარდი რამდენჯერცის ტატნობზე აპყოლია ვაჟკაცს. ამას დაერთო თავბრუსხმა და მუღმივი გულისრევა.

პირველად იგი კიევში პროფესორ კოლომიჩენკოსთან ჩავიდა. იქაურმა ოპერაციამ შედეგი ვერ გამოიღო. იმედგატეხილი ცოლ-ქმარი თბილისში ჩამოვიდა. მოწმობაც კი ჩამოიტანეს, ამ სენს არაფერი ეშველებო.

ორი ოპერაცია გაუკეთა პროფესორმა ხეჩინაშვილმა მას და დღეს ეს ქალი ამ სენისაგან განკურნებულა. თითქოს მეორედ დაბადებულიყოს მეხფარა, ისე გაფრინდა თავის ქალაქში.

მრავალი ღამე გაათენა სიმონ ხეჩინაშვილმა, ამ სენის მორჩენის წამალი რომ მოენახა. სიჭაბუქის ჟამს ერთი დღით დაყრუვდა სიმონი და ახლაც გრძნობს იმდღევანდელ შიშს.



ხეჩინაშვილები ქუთაისში მწვანე ბაზრის გვერდით, თითქმის ზედ რიონის პირზე ცხოვრობენ.

სიმონმა კარგი ცურვა იცოდა. ერთ დღეს ბანაობის დროს ორივე ყურში წყალი ჩაეპარა და მის გარშემო ყველაფერი დაღუმდა, თითქოს დაბნელდა კიდევ. აღარც რიონის ხმაური,

აღარც ბაზრის ქრიაშული! ის კი არა, — გაკვეთილებს ყოველთვის ხმამაღლა კითხულობდა და სწავლობდა სიმონი. ახლა თავისი ხმა რომ ვერ გაიგონა, ვერც ერთი სიტყვა ვერ დაიხსომა. იმ ღამეს არავის არაფერი გაუშხილა. დილით ყოველთვის რიონის ტალღების ხმაური ნანასავით ესმოდა ძილმღვიძარეს. იმ დილით კი ვერაფერი გაიგონა. ისევ რიონის პირზე ჩაირბინა. ბრტყელი და მრგვალი ქვა მონახა, ბრტყელი ყურზე მიიღო, მრგვალი ნელ-ნელა მიუკაკუნა და ცოტა ხნის შემდეგ წყლის წვეთებმა ბრტყელი ქვა დაასველა, ყურებიდან წყალმა გადმოჟონა. შვებით ამოისუნთქა სიმონმა მაშინ. უცებ ქვის ხმა გაიგონა, ყურები სამყაროს წარმტაცი ხმებით აეესო, ქვეყანას სხვა ფერი და ლაზათი მიეცა. ჰო, როგორ უყვარდა ეს ხმები ქაბუქს! სწორედ ამიტომ შეშინდა იმ დღეს იგი. შეიძლება ამან მისცა ბიძგი შემდეგში სრულიად ახალგაზრდა ნიჭიერ ქირურგს ამ სენის მორჩენის გასაღები ეპოვნა. წლების მანძილზე თავს არ იზოგავდა ახალგაზრდა კაცი, რომ ბევრი ესწავლა, სხვა ენები დედაენასავით შეითვისა, დიდ ქირურგ-მოაზროვნეების ნაფიქრალი მოიხილა, აწონ-დაწონა, სასარგებლო შეისწავლა და გამოიყენა, სხვადასხვა ქვეყანაში იმოგზაურა, მათს შრომას და კულტურას ყური მიუგდო, ისიც ღრუბელივით შეიწოვა და სამშობლოში ისევ უბრალო კაცი დაბრუნდა.

მოგზაურობამ და ცოდნამ დაარწმუნა — ნამდვილი მეცნიერები უბრალო ადამიანები არიან. ამ ქვეყნიდან ისევე მიდიან, როგორც მოვიდნენ, მხოლოდ შენს ხალხს, შენს მამულს უნდა გაუკეთო რამე. შენი ნაშრომი მის სიმდიდრეს უნდა შეემატოს, უნდა რაიმე შესძინო მას. აი, ეს არის კაცური კაცის სიცოცხლის საზღაური და მიზანი.

კაი კაცი მხოლოდ ის არის, ვინც თავის ხალხს ჭირს შეუნელებს, ლხინს გაუმრავლებს. სიმონს ერთხელ ერთმა მეცნიერმა უთხრა: „ეს ქვეყანა ფერებისა და ბგერების ჰარმონიული დალაგებაა, თუ ისინი აირია, ქვეყანაც აირევალ“. ნამდვილად ასეა. ფერების და ბგერების დაკარგვა, დაყუჩება, დაღუძება, გაქრობა, სამყაროს სიკვდილია. სიმონიც ამიტომ ებრძვის ადამიანის სიყრუეს, მის დამუხწყებას.

ადამიანმა ქვეყნის ხმაც უნდა გაიგონოს და თავისიც გაავგო-

ნოს მას. ადამიანის ხმა რომ არ იყოს, სამყარო ღარიბი გამოჩნდება, დაჩიავდება, უფერული იქნება. ადამიანი თავისი ხმით სამყაროს აზრს აძლევს, ომახს და ლაზათს მატებს, ამდიდრებს და ამშვენიერებს. მისი ხმა სამყაროს მეფური ხმაა, ღმერთებთან სალაპარაკო ბგერებია. ადამიანი, როცა ბუნების ხმებს ისმენს, ქვეყნის სილამაზე და სიკეთე თავის ბუნებაში გადააქვს, გონიერებას იმდიდრებს, სიცოცხლის მიზანს იმაღლებს, თავი აცხოვრებას უფრო ძვირფასს ხდის..

მეცნიერმა ეს უნდა იცოდეს. მიხედვს და დააფასოს ადამიანის სმენა და ადამიანის ხმა.

მეცნიერი ის არის, ვინც აგუზგუზებულ ცეცხლში ნამის ნატამალს შენიშნავს, აბობოქრებულ წყლის ოკეანეში კი ცეცხლის ნაპერწკალს ამოხილავს. მე კი ყელ-ყურის ჭან-ღონის საქმეს ვემსახურები და ვალდებული ვარ, რაღაც ვიღონო, ადამიანებს ჭირი შევუნელო, ლხინი გავუშრავლო. განა შეიძლება უფრო ჭირძლიერი კაცი, ვინემ ყრუა?! თუკი შეძელი და ყრუს სმენა დაუბრუნე, ეს ხომ უსაზღვრო ბედნიერების მინიჭებაა, სიცოცხლის გალამაზეება, ცხოვრების გამდიდრებაა.

აბა, წაეიკითხოთ რას წერენ ის ადამიანები, რომელთაც სმენა დაკარგული ჰქონდათ და ს. ხეჩინაშვილის ხელმა განკურნა.

თბილისის 55-ე სკოლის მე-8 კლასის მოსწავლე მაყვალა ხვიჩია ჭერ კიდევ ორი წლისა იყო, როცა ყვიანახველამ ყურის ჩირქოვანი დაავადება დაუტოვა, დროის მანძილზე ბავშვს თანდათან სმენა დააკლდა. მშობლებმა, ვინ იცის, სად არ ატარეს, მოსკოვის ყველა გამოჩენილ პროფესორს აჩვენეს, რა წამალი არ უშოვნეს, გოგონას მაინც არაფერი ეშველა. ბოლოს იგი სიმონ ხეჩინაშვილის ხელში მოხვდა. ოპერაციის შემდეგ ბავშვს სმენა დაუბრუნდა და გოგონამ წერილი მოსწერა პროფესორს, მის თანამშრომლებს. იგი ბედნიერია და გახარებული მადლობას უძღვნის ყველას. მან ოთხსტრიქონიანი ლექსიც კი მიუძღვნა თავის მხსნელს. შეიძლება ის პოეტური ხელოვნების მიხედვით დიდი მოვლენა არ იყოს, მაგრამ შიგ უშუალობა და სიკეთე იგრძნობა. აი, ეს სტრიქონები:

რა ბედნიერი გამხადეთ,  
ამიტომ გლოცავთ დღე და ღამ,

ქალაქ ოჩამჩირეში მცხოვრებ ქვრივ ქალს, ლუბა ჩიჭელავას, რომლის ქმარი სამამულო ომში გმირულად დაეცა, დიდხანია სმენა დაკარგული ჰქონდა. მანაც ბევრი იარა, ბევრ მკურნალ ექიმს და პროფესორს მიაკითხა. არაფერი ეშველა. მერე ხეჩინაშვილის ნახვა ურჩიეს. ოპერაციამ ბრწყინვალე შედეგი გამოიღო. სიხარულით აღფრთოვანებული ქალი წერილში წერს: „ჩვენი სამშობლოს საამაყო შვილის სიმონ ხეჩინაშვილის და მისი თანაშემწის ექ. ტოგო უორდანიას მეშვეობით მე ისევ ის ადამიანი შევიქენი, რომელიც პირველად დავებადე დედაჩემს (წერილი შეუსწორებლად მომყავს — მ. ა.), შემძლია თამამად ვიამაყო ხალხში ამ ჩვენი საამაყო შვილების თავმდაბლური შრომით და მიღწევებით. უღრმეს მადლობას ვუძღვნი მათ. მე თუ ვერ გადავუხდი პატივისცემას, ჩემს ერთადერთ შვილს, რომელიც, შევეცდები, კარგად გავზარდო, დავუბარებ მათს კვალზე იაროს. იგი ახლა სტუდენტია და მჯერა არ შემარცხვენს“. რა მშვენიერი სიტყვებია! ომში გმირულად დაცემული ვაჟკაცის ჯოტო ჩიჭელავას მეუღლე სიმონ ხეჩინაშვილის დიდმა კეთილშობილებამ და მეცნიერულმა სიძლიერემ ბუნებრივად იმ აზრამდე მიიყვანა, რომ მისი შვილი გივი ჩიჭელავა ასეთი კაცის კვალზე უნდა წავიდეს, მას უნდა დაემგვანოს, რომ სამშობლო, ჩვენი მამული, სწორედ ასეთი ვაჟკაცების აღზრდას მოითხოვს. აი, ჭეშმარიტად უკეთილშობილესი ფიქრი და აზრი ქართველი ქალისა. მე ნაკლებად მინახავს მეცნიერის შრომის უკეთესი შეფასება. როცა ადამიანებს, შენს ხალხს უნდა მათმა შვილებმა შენს ნაკვალევზე იარონ, მაშასადამე, ნამდვილად ბედნიერი კაცი ხარ, უფრო მეტი სიმდიდრე და სიკეთე ამ ქვეყნად არ არსებობს. სიმონ ხეჩინაშვილის სახელი მთელს კავშირშია განთქმული. სმენადაქვეითებული ადამიანები ჩვენი ქვეყნის სხვადასხვა კუთხიდან—შუა აზიიდან თუ შორეული აღმოსავლეთიდან, ციმბირიდან თუ ბალტიის მხრედან, ურალიდან თუ ბელორუსიის ტრამალებიდან თბილისისაკენ დაიძრნენ.

ქ. რიგის ენგელსის ქუჩის № 67-ში ცხოვრობს მასწავლებელი ნადეჟდა ანტონის ასული ლიცისი. ნადეჟდას თანდათან



სმენა დააკლდა და ბოლოს მისი სკოლაში მუშაობა უკვე შეუძლებელი შეიქნა. მასწავლებლისათვის, რომელიც ამ საქმისათვის არის დაბადებული, ნაადრევად სკოლის მიტოვება უდიდესი ტრაგედიაა და, აი, ეს ქალი საქართველოში ჩამოდის. სიმონ ხეჩინაშვილი მას ოპერაციას უკეთებს. ავადმყოფს ნორმალური სმენა უბრუნდება, მის სიცოცხლეს აზრი მიეცა. შთაბეჭდილების წიგნში იგი წერს, რომ მას სიცოცხლე დაუბრუნდა, რომ ახლა ნამდვილად ბედნიერი ქალი შეიქნა, ოპერაციამდე კი მისი ცხოვრება დათალხული, დაბნელებული იყო.

ასევე ბედნიერები არიან ახლა ქ. დონეცკის „პრავდის“ სახელობის შახტსამმართველოს მუშაკი რაისა იგნატენკო-ჩერნიაევა, შორეული პერმელი ლიდა ჩიკოვა, ნოვოსიბირსკელი ნინო ზილდერმანი, ერევნელი ბაქტერიოლოგი ბოლოიანი, ირკუტსკელი მიხეილ ბეზნოსოვი. ყველა ესენი დაყრუებული იყვნენ, ახლა კი ნორმალურად ისმენენ ბულბულის გალობას და შოშიების ჭახჭახსაც.

ქალაქ ყარაგანდიდან მეტად უიმედოდ ჩამოვიდა თბილისში იქაური ეკონომისტი ქალი ლუბოვ ლომაჩენკო. მართალია, ჩამოვიდა, მაგრამ გული მეტად გატეხილი ჰქონდა. თბილისში ჩამოსვლამდე ვის არ მიმართა, მაგრამ ვერაფერ ვერ უშველა. ვერაფერ წამალს ვერ მიაკვლია, ბოლოს უთხრეს, თბილისში ერთი კაცია, სიბრძნის პერანგი აცვია, წადი და მოგარჩენსო. ორი საათი იწვა სიმონ ხეჩინაშვილის საოპერაციო მაგიდაზე ეს ქალი. სიმონს ეხმარებოდა მეცნიერების კანდიდატი, მეტად ნიჭიერი ექიმი გიორგი ბეგიშვილი. იგი დიდი ხანია ხეჩინაშვილის ხელმძღვანელობით მუშაობს თბილისის პირველ საავადმყოფოში. ოპერაციამ შესანიშნავად ჩაიარა. ეს ქალი ორი კვირის შემდეგ თავის ქალაქში უბედნიერეს ადამიანად წავიდა. როგორც იტყვიან, მეშვიდე ცაზე ფრინავდა, მაგრამ ვინ იტყვის, რომ თვითონ სიმონი ნაკლებ ბედნიერებას გრძნობს, როცა მისი ავადმყოფი იკურნება? სიმონ ხეჩინაშვილს დიდ პატივს სცემენ ექიმთა სამყაროში. სხვანაირად არც შეიძლება ეს დაავადება, რომელიც მოუტრჩენელ სენად ითვლებოდა, დღეს დედამიწაზე დაჯაბნებულია. დიახ, დაჯაბნებულია და მის დაძლევაში ჩვენი თანამემამულე პროფესორი სიმონ ხეჩინაშვილი ერთი პირველთაგანია. იგი ამჟამად ჯერ კიდევ ახალგაზრ-

და. მაგრამ მედიცინის მეცნიერებათა საკავშირო აკადემიის წევრ-კორესპონდენტია.

მაშ რატომ სჭირდება კოლმეურნე ლევან გოგნაძის ხმის აღდგენა პროფესორ სიმონ ხეჩინაშვილს? ამ კითხვაზე შეიძლება უცებ გვეპასუხნა, მაგრამ მე კიდევ მომესურვილა რამდენიმე სხვა მაგალითის მოყვანა. ქ. ტყვარჩელში ცხოვრობს და მუშაობს ერთი სახემშვენიერი ქალი ალა კარბა. მას ბედნიერი ოჯახი აქვს. ჰყავს ქმარი, ჰყავს ბავშვი. როგორც ყველა ქალს, მასაც სიკოხტავე და სილამაზე უყვარს. თვალის უპის კიდებზე რალაც ქინძისკაკლისოდენა სიმსივნე გაუჩნდა. სიმსივნემ ზრდა დაიწყო. აბა, წარმოიდგინეთ ახალგაზრდა კეკლუცი ქალის მდგომარეობა! ხეჩინაშვილმა ნახა და გადაწყვიტა ოპერაცია გაეკეთებინა. საჭირო იყო თვალის ღვალის გაქრა და ამ ფაქიზ ორგანოში დანის ფათური. ქალს ჭრილობა უსათუოდ სამუდამოდ დააჩნდებოდა. ყველას მოეხსენება, თუ რა შესახებდავია დანით სახე დასერილი ქალი? ალა საავადმყოფოში დაწვა. მაგრამ როცა უთხრეს, ნაჭრილობევი დაგაჩნდებაო, შეკრთა, შეშინდა. მისი მეუღლე ახალგაზრდა მეცნიერია, ნოვოსიბირსკში მუშაობს; ჩამოვა და ძნელია ნაჭრილობევი ქალის შეხვედრა ქმართან. ყოველ შემთხვევაში, ასე ფიქრობდა ალა, ალბათ, როცა ოპერაციის დღეებს გაუბოდა. პროფესორი მიხვდა ქალის ფიქრს. თვითონაც დაფიქრდა: შეიძლება თუ არა ისე გაკეთდეს ოპერაცია, რომ გარედან ტყავს არ შეეხოს დანა? თუ ეს მოხერხდება, ქალს სახე ჩვეულებრივად ლამაზი, უჭრილობო დარჩება. ცოტა როდი იფიქრა ხეჩინაშვილმა ტყვარჩელელი ქალის სახის სილამაზის შენარჩუნებაზე და კვალიც მოძებნა, გზას მიაგნო, ზედა ტუჩიდან თვალამდე ისე გახვრელა, დანის ბილიკი ტყავს არ შეეხო. ბედზე სიმსივნე ავთვისებიანი არ აღმოჩნდა. ქალი განიკურნა კიდევ და თავის მშვენიერი სახეც შეინარჩუნა.

შორაპნის ელექტროქარხანას მეტად კარგი კოლექტივი ჰყავს... ამ ქარხანაში მუშაობს ახალგაზრდა ეკონომისტი ქალი ეთერ კიკნაძე. ლამაზი ქალია ეთერი. ასეთი ტანმშვენიერი და სახემშყაზარი ქალიშვილები არაერთ ვაჟკაცს აუტოკებენ გულს. მაგრამ მოხდა უბედურება, ეთერის ცხვირი ასტკივდა, შეუსივდა კიდევ. თბილისში ჩამოვიდა,

ოპერაცია აუცილებელი შეიქნა. ჯანდაბას, ოპერაციას გაუძლებს კაცი, მაგრამ ცხვირი უნდა გაიკვეთოს, ნაკრილობევი დააჩნდეს. ასეთი ლამაზი ქალიშვილისათვის ეს მეტად მძიმედ გადასატანი ამბავია.

პროფესორ ხეჩინაშვილს არ გამოეპარა ქალიშვილის სევდიანი თვალები. აქაც მიაგნო სიმონმა გზასა და კვალს. ათი დღის შემდეგ ეთერ კიქნაძე თავისი მშვენიერი სახით საავადმყოფოდან ბედნიერი წავიდა. კაცმა რომ თქვას, რა თავი სტკიოდა ყელ-ყურის პროფესორს, საკავშირო აკადემიის წევრ-კორესპონდენტს, ლენინური პრემიის ლაურეატს, იმაზე ეფიქრა, გაეჭრება თუ არა ვისმეს კანი ოპერაციის დროს? მისი საექიმო მოვალეობაა ადამიანის სნებისაგან განკურნება, მისი მორჩენა.

ღიახ, ეს ასეა. მაგრამ სიმონ ხეჩინაშვილი ადამიანია, მას ხომ ახალგაზრდა, ლამაზი მეუღლე და ორი ბოკვერივით ბიჭი ჰყავს, ვის უხარია ახლობელი ადამიანი სახედასახიჩრებული ჰყავდეს. რასაკვირველია, არავის. სიმონმა ამ ქალიშვილის სევდა, მისი ოჯახის დარდი თავისად მიიღო; იფიქრა და წამალიც მონახა. ასეთ ქცევას ადამიანური ქცევა ჰქვია. ასე იქცევა ამ ქვეყნად კაცური კაცი, ნამდვილი ადამიანი, ასე მოიქცევა ყოველთვის ნამდვილი საბჭოთა მეცნიერი, ჩვენი მეცნიერი ნამდვილი სახალხო მეცნიერია, ხალხის მსახურია, მისი ცხოვრების უახლოესი ადამიანია. იგი იმით კი არ ამაყობს, რომ მან ესა თუ ის დიდი აღმოჩენა მოახდინა და ამიტომ ხალხისაგან ის შორს დგას, რაღაც საფეხურებით უფრო მაღლა ავიდა. არა, პირიქით, იგი უფრო დაუახლოვდა ხალხს, მისი ყოველდღიური ცხოვრების მონაწილე გახდა, მისი დარდის და სიხარულის თანაზიარი შეიქნა. სწორედ ასეთია პროფესორი სიმონ ხეჩინაშვილი. ამიტომ იყო, რომ კოლმეურნე ლევან გოგნაძის ხმის დაკარგვა გულთან ასე ახლოს მიიტანა სიმონ ხეჩინაშვილმა. მან გოგნაძეს მტკიცე მეთვალყურეობა დაუნიშნა. ახალგაზრდა ექიმს დათო ყიფიანს დიდ პატივსა სცემს პროფესორი. ყელის რთულ სამკურნალო საჭმეებს ანდობს. იგი ყელის ოპერაციების განუყრელი მონაწილეა, მისი თანაზიარია. რასაკვირველია, ლევან გოგნაძეც მას ჩააბარა პროფესორმა. დათო ყიფიანი ძმასავით უვლიდა და ელოლიავებოდა ლევანის დაგლეჯილ

ყელ-კისერს, მის ჯანსა და ღონეს. დღეები დღეებს მისდევდა და გოგნაძეს ყელი არ უსწორდებოდა, სასუნთქავი მილი გამრუდებული ჩანდა. ნაკერავეებში ნაწიბურები ცუდად წამოიზარდა. ჰაერი სუნთქვისთვის არ კმაროდა. რა არ იღონა სიმონ ხეჩინაშვილმა და გამოიგონა. რეზინის მომსხო მილი ჩაუდგა. ყელი გაუსწორდებო, შემდეგ ამოიღო და ნაწიბურები შეასწორა-შემოასწორა. სასუნთქავის ქვედა ნაწილი დანით ჩასერა და მერმე ნემსით ამოკეცა. მაინც ჯინზე იდგა ლევანის ყელ-კისერი. მართალია ხმა ჰქონდა, მაგრამ ლაპარაკი არ შეეძლო, სიტყვებს ადამიანის გასაგონად ვერ მარცვლავდა. ყოველდღე შეხვევის დროს დათო ყიფიანი გულდასმით ჩასციცინებდა ლევანს ყელის სიღრმეში და თუ რაიმე ცვლილებას შენიშნავდა იმ წუთშივე პროფესორს მოახსენებდა. არა ერთი და ორი საათი უფიქრიათ და უმსჯელიათ ორივეს ლევანის მდგომარეობის შესახებ. ეტყობა, პროფესიული თავმოყვარეობა ძლიერად იღვიძებს ასეთ დროს ადამიანებში.

— ხმა უსათუოდ დაუბრუნდება, ლაპარაკს უსათუოდ დაიწყებს, მხოლოდ ჩვენ აუცილებლად უნდა წესრიგში მოვიყვანოთ მისი ყელ-კისერი. ეს კი დროს ითხოვს, მკურნალობას საჭიროებს, — დაეინებით, ამბობდა სიმონი.

პროფესორი და ექიმი დათო ყიფიანი ძალღონეს არ იშურებდნენ ლევანისათვის. დრო კი გადიოდა. ლევან გოგნაძე გლეხური ჟინით და მოთმინებით ელოდა სასწაულს. მას ნამდვილად სჯეროდა, რომ ხმას ამოიღებდა და დაილაპარაკებდა. ეს კი, მისი აზრით, სასწაული იქნებოდა. სჯეროდა, რომ ამ სასწაულის ავტორი აუცილებლად სიმონ ხეჩინაშვილი იქნებოდა. ისიც ღრმად სწამდა, რომ დღეს თუ არა, ხვალ მაინც ეს აუცილებლად მოხდებოდა. ამ რწმენას მას ვერც ერთი ღმერთი ვერ შეუტყვლიდა.

დრო კი მიდიოდა. ბუნების მიერ შექმნილი ადამიანის ხორხი და სასუნთქავი მილი, რომელიც უბედურმა შემთხვევამ დაასახიჩრა, ახლა ექიმების ხელს ძნელად ემორჩილებოდა. დიდი ხნის შემდეგ ბოლოსდაბოლოს იმას მიაღწიეს, რომ ლევანი დაბალი ხმით უკვე სიტყვებს მარცვლავდა.

ეს კი დიდი ამბავი იყო.

ამ გარემოებამ გაუათქვეცა ენერგია პაციენტსაც და სიმონ ხეჩინაშვილსაც.

— რას გადაყევი ამ კაცს, ადამიანო?! — შეეკითხა გაკვირვებით ერთი ნაცნობი. — დაბალ ხმაზე რომ ილაპარაკოს, ვითომ ქვეყანას რაიმე დააკლდება.

სიმონი შეიჭმუხნა.

— ჯერ ერთი, მე მეცნიერი ვარ და ავადმყოფობასთან ჰიდილში მინდა გავიმარჯვო. ეს გამარჯვება უნდა იყოს სრულყოფილი, ნამდვილად ყოველმხრივი. მეორეც, ლევანი მეტად საინტერესო კაცია. მას, სანამ ცოცხლობს, არ უნდა რაიმე სიმახინჯე ჰქონდეს. მეც უნდა დავეხმარო, ეს მისი უკეთილშობილესი სურვილი შევეუსრულო. მე მწამს, ამას შეეძლება.

შემკითხველი, რასაკვირველია, გაჩუმდა და უცებ გაშორდა პროფესორს.

### თქმულება სიტყვის ბაჰარზე

წინათ, სულ წინათ ორი მეზობელი სოფელი, რომლებიც აქამდე კეთილად და მეზობლურად ცხოვრობდნენ, მოულოდნელად სამტროდ აიშალა. აშლის მიზეზი თითქოს სულ უბრალო იყო. ორივე სოფელი მთის კალთაზე იყო გაშენებული. შუაზე მდინარე ჩამოუდიოდათ. მხატვარიც კი ვერ იტყოდა სილამაზით რომელი რომელსა ხჯობდა! ორივეს ბალ-მინდვრები და ვენახები სავსე იყო ყურძნის მტევნებით და პურის ხვავრიელი თავთავეებით. მდინარეებში იმდენი თევზი მრავლობდა, ორივე სოფელს ყოფნიდა, ბალში ხეხილთა ტოტები იზნიჭებოდა. ველზე ყვავილთა სიმრავლე თვალს იტაცებდა. ხალხი მეტად შრომისმოყვარე და მზიარული იყო. ნამდვილად ბედნიერად ცხოვრობდნენ, ნამდვილად. როგორც სჩვევიათ ბედნიერ ადამიანებს, ორივე სოფელს მუსიკა და სიმღერა უყვარდა. საოცარი ის არის: ამ სოფელში დაბადებულთ თითქმის ყველას სიმღერის ნიჭი დაჰყოლოდა, იშვიათი ხმა ჰქონდათ, გუნებაზე კი ყოველთვის კარგად იყვნენ და ისეთ სიმღერებს მოგასმენინებდნენ, რომ გულს გაგიხარებდნენ. დღესასწაულიც კი ჰქონდათ დაწესებული. როდესაც ხორბალსაც და ყურძნისაც დააბინავებდნენ, ყველა ჰირნახულს მიაღაგ-მოალაგებდნენ, ეს დღეც სწორედ მაშინ იყო დათქმული.

ამ დღეს ორივე სოფელში „სიმღერის დღეს“ ექაზდნენ. გაღმა მდინარის ერთ ნაპირზე ერთი სოფელი იკრიბებოდა, მეორეზე — მეორე სოფელი.

იწყებოდა სიმღერებით დაჭიდება.

სიმღერები, მაგრამ რა სიმღერების მათი ხმებისგან ცას თაფლი სცვიოდა და მიწას რძე მოჟონავდა, ვნებისგან ყვავილებსაც კი სურნელება ემატებოდათ. ჭერ ძველებურს იტყოდნენ, მამა-პაპის შეთხზულს და ხანით დამწიფებულს, მერე ახალი სიმღერებით შეეჭიდებოდნენ ერთმანეთს. ერთი დღე და ერთი ღამე ცას შეჰლაღადებდნენ, საგალობლებით გულს გაიხარებდნენ, სულს მოიოხებდნენ, მერე ბედნიერებით აღსავსენი დაიშლებოდნენ. ორივე სოფელს ერთი მშვენიერი წესიც ჰქონდა: ყველაზე კარგ მომღერალს, მდინარის შუა რომ უღამაზესი ყვავილებით სავსე ბორცვია, ნავით იქ შეატურებდნენ. იქ ამღერებდნენ და ამის შემდეგ ზეიმით დაიშლებოდნენ. ყოველ წელს თითქმის მამაკაცები ხვდებოდნენ ამ რჩეულთა შორის, იმ წელს კი ერთი სოფლიდან რომ ვაჟი მოხვდა, მეორედან ყვავილებით შემკული ნავით ქალწული მოატურეს. გამოღმა სოფლელები ამას არ ელოდნენ. იმღერეს, მაგრამ რა იმღერეს! გაღმა-გამოღმა ორივე სოფელი გალურსული, გულისკანკალით უსმენდა მათ. ქალ-ვაჟი უნახავი სილამაზისანი იყვნენ. ორივე სოფლის უსაყვარლესი ახალგაზრდები გახლდათ. ქალმა რომ ვაჟის ხმა გაიგონა, გულმა და სხეულმა ქრიალი დაუწყა, ვაჟმა კი თვალებში ჩახედა თუ არა, იმ წუთშივე გაიფიქრა:

— თუ ვინმე ჩემი ცოლი უნდა გახდეს, ეს მხოლოდ შენ უნდა იქნეო.

აი, სწორედ ამაზე აიშალა ეს სოფელი.

ქალის სოფელმა მოისურვა ქალწული თავისივე სოფელში გათხოვილიყო.

— კარგი სიმღერის მოქმელს ხშირად შვილიც კარგი მომღერალი გამოუდის. ამიტომ ამ ქალიშვილს სხვაგან ვერ გავათხოვებთ, თავის სოფელში მონახოს საქმრო ვაჟიო.

ვაჟის სოფელმა ეს იუკადრისა.

— ასეთი ქაბუკი სოფელს არა ჰყავს, მას უარი როგორ გაუბედესო.

იქამდის მივიდნენ, ტრფიალი ქალ-ვაჟი ერთმანეთს ვერ ხვდებოდნენ. გაბრაზებულმა ქალის სოფლის ახალგაზრდებმა ღამით მდინარეზე გადებული ერთადერთი ხიდი ჩააქციეს. ეს კი მეტისმეტი მოუვიდათ. სოფლის დარბაისლები ასეთ გამწვავებას არ მოელოდნენ. ჩაფიქრდნენ, გონს მოვიდნენ.

მაშინ ორივე სოფლის მოხუცები შეიკრიბნენ, იმსჯელეს და გადაწყვიტეს: თუ ვაჟი დაებადათ, მან უსათუოდ ქალის სოფლიდან უნდა აირჩიოს საცოლე, თუ ქალი — იმავე სოფელში უნდა გათხოვდესო. ამ პირობით შეუღლდა ქალ-ვაჟი. მათი ცოლქმრობა მართლაც ბედნიერება იყო. ყოველ საღამოს მუშაობის შემდეგ დასხდებოდნენ ორივე და ისეთ სიმღერას წამოიწყებდნენ, ხეს და ქვას სულს ჩაუდგამდნენ, წარბს გაუხსნიდნენ, ღიმილს მოჰკვირდნენ. ორივე სოფელი შეჰხაროდა ამ ნეტარებით სავსე ცოლ-ქმარს. ხშირად მოდიოდნენ მათთან სოფლის ახალგაზრდები და მოხუცები სიმღერის მოსასმენად. შემოიკრიბებოდნენ ერდოზე და მათი საამუხრი საგალობლებით ყურთა სმენას დაიტკობდნენ.

მალე სოფელში ხმა გავარდა ქალის ორსულობის შესახებ. მართლაც, ქალი თანდათან სისრულეში შედიოდა. კიდევ უფრო დამშვენდა იგი, უფრო მომხიბლავი გახდა.

ერთ დამეს სოფელი ქალის კივილმა გაადვიდა. ყველანი მიხვდნენ, მშობიარობის დღეს მოელწია დილით, მზის ამოსვლასთან ერთად, ორივე სოფელმა მეტად სასიხარულო ამბავი გაიგო: ქალს ტყუპი ქალ-ვაჟი დაბადებოდა დიდი სიყვარული იცის სოფელმა და ამიტომ ყოველ ოჯახში ტყუპების სადიდებლად ღზინი გაიმართა. ქალის სოფელში ხომ სიხარულს საზღვარი არ ჰქონდა. დათქმის თანახმად, გაიზრდებოდნენ თუ არა ახლადდაბადებულნი, ვაჟსაც დედის სოფლიდან უნდა მოეყვანა ქალი და გოგონასათვის სიძეც იმ სოფელში უნდა გამოენახათ.

მთელი წელი ორივე სოფელში ღზინი არ გაციებულა, ყოველ საღამოს გაღმა და გამოღმა ნანას მღეროდნენ, ბალღებს ტკბილად დაეძინებათ, სიზმრებიც კარგი ჩაჰყვებათო. ბავშვება თანდათან იზრდებოდნენ და მშვენდებოდნენ, გოგოს მთვარისფერი სხეული დაჰყვა, მნათი და ელვარე, ვაჟს ხორბლისფერი სქარბობდა. მარილიანი ბიჭიც ჩანდა. მალე ფეხი აიდგეს, ის

კი არა, სირბილიც დაიწყეს, მხოლოდ სიტყვის თქმას ჯერ ვერც ერთი ვერ ახერხებდა.

პირველად დედამ შენიშნა ეს უბედურება და შიშით თვითონ კინალამ დამუნჯდა. დიდხანს უმალავდა ქმარს თავის ექვს. ერთ ღამეს მაინც ვერ მოითმინა და შეუღლეს გაანდო თავისი ნაფიქრალი. ქმარი სიცილით მოკვდა, ჩვენი შვილები უენოდ როგორ შეიძლება დარჩნენო.

ღრო გადიოდა, ბავშვებს ყელიდან მხოლოდ ხავილი ამოსდიოდათ, სიტყვას კი ვერ მარცვლავდნენ.

დედას არც ის გამოეპარა, რომ ბავშვებს სმენაც არ ჰქონდათ. სოფელი გაოცდა, დალონდა. ჯერ არავის ახსოვდა ამ სოფელში ყრუ-მუნჯი გაჩენილიყოს. ის კი არა, ამ სოფლის შვილს რომ არ ემღეროს, არავის გაეგონა. ახლა კი უცებ ტყუპი ქალ-ვაჟი ყრუ-მუნჯი გაჩნდა. მერე ვისი შვილები იყვნენ? მათი დედ-მამა სოფლის ბულბულებად ითვლებოდნენ. რა უნდა ელონათ, სად უნდა წასულიყვნენ, ვისთვის უნდა მიემართათ, არ იცოდნენ.

ბავშვების მამას სახეზე ღრუბელი დაედო, მისი ღიმილი გაქრა, ადამიანებთან შეხვედრას ერიდებოდა, გაველურდა. დედას ცრემლი განუწყვეტილად სდიოდა თვალთაგან. ჩაკვდა სოფელიც, დამუნჯდა, არც გაღმა და არც გამოღმა ადამიანის სიმღერა აღარავის გაუგონია. მზიანი დღე იყო თუ ავდარი, სოფელი მაინც უსიხარულოდ აღამებდა და ათენებდა. მეტის მოთმენა აღარ შეიძლებოდა. ისევ მოიყარეს თავი სოფლის დარბაისელმა მოხუცებმა, იფიქრეს და იმსჯელეს. ბოლოს გადაწყვიტეს მსტოვრები გაეგზავნათ ქვეყნის ყოველ კიდეგანზე, იქნებ ექიმი მიეკვლიათ სადმე ან მათი ჭირის მოსარჩენად წამალი რაიმე ეშოვნათ. ხუთი ჰკვიანი ვაჟკაცი შეარჩიეს, დასაგზლეს და გაუშვეს. ქვეყნის ოთხ კიდეზე ოთხი ვაჟი გაამგზავრეს, ერთსაც ქვეყნის შუაგულში წასვლა უბრძანეს.

ყველგან იარეთ. ქვეყანა მოაფათურეთ და მოფოთნეთ, გაიკითხეთ, გასაგები გაიგეთო.

ორი წელი იარეს მსტოვრებმა და ვერაფერი გაიგეს, არსად არავინ არაფერი იცოდა ყრუ-მუნჯის ენის და სმენის ასახსნელი წამლისა. ჯერ ერთი დაბრუნდა, მერე—მეორე, შემდეგ—მესამე და ბოლოს მეოთხეც დაღვრემილი შემოვიდა სოფლის ბოლო-



ზე. მეხუთე ჯერ არ ჩანდა. სწორედ ის ვაჟი იყო, ქვეყნის შუაგულში წასვლა რომ უბრძანეს. დაბრუნებულნი ჰყვებოდნენ, ბევრი ექიმი ვნახეთ, კუტებს ფეხს უდგამენ, ბრძებს თვალს უხელებენ, მაგრამ მუნჯებისათვის ენის ამოდგმა და ყრუებისათვის სმენის დაბრუნება არავის არ შეუძლიაო.

ერთ საღამოს მეხუთემაც შემოაქენა ცხენი სოფელში. როგორც კი სახეზე დალანდეს, ყველა მიხვდა, რომ მსტოვარს ცუდი ამბავი არ მოჰქონდა.

მოხუცები მეხუთე წარგზავნილის მოსასმენად შეიკრიბნენ. ვაჟმა მკერდზე ხელი დაიწყო და დაიწყო:

— ქვეყნის შუაგულში ქალაქი ქალაქება გაშენებული. იქ ექიმიც ბევრი ცხოვრობს და მშენებელიც. ყურის ექიმებიც ცოტანი როდი არიან, მაგრამ ყრუსა და მუნჯს ვერავინ ვერ არჩენს, ვერავინ ვერ სწამლობს. მარტო ინდოეთის ერთ ქალაქში ერთი ბრძენი კაცი ყოფილა. მიხვალ, გაგსინჯავს, თუ შეატყობს, რომ მორჩები, მაშინვე გეტყვის, თუ არა, უარით გამოგისტუმრებს. გასამრჯელოს კი მეტად ძვირს ითხოვს თურმე.

ორივე სოფელმა არაფერი დაიშურა, თუკი რაიმე ჰქონდათ, შეაგროვეს, მეორე დღესვე გაამზადდეს სამგზავროდ ბავშვები. მშობლებთან ერთად სამი რჩეული ვაჟკაციც თან გააყოლეს.

იარეს, იარეს და დათქმულ ქალაქში ჩავიდნენ. მოიკითხეს, ვისაც ეძებდნენ. მოიკითხეს და გაიგეს: ბრძენი ექიმი მეფის სასახლეში ცხოვრობდა თურმე. იქ შესვლა არავის შეეძლო, მხოლოდ ყოველ საღამოს ბრძენი ექიმი თვითონ გამოდიოდა ხალხში მალულად. გლახის ტანსაცმელს იცვამდა, გლახაკებშივე გაერეოდა და ისე დადიოდა.

რა უნდა ექნათ მოსულებს, ისხდნენ და იცდიდნენ.

ხომ იცით, ხალხს არაფერი გამოეპარება. ამ უცნაური ბავშვების და მშობლების შესახებ მთელს ქალაქში გაიბნა ამბავი. ყველას შეეცოდა, ყველას გული მოეწვა, ყველამ მოისურვლა მათი ნახვა. ერთ დღეს გულისხმეირმა მშობლებმა ერთი უცნაური გლახაკი შენიშნეს.

— ღმერთი გწყალობდეთ, მართლა შორიდან მოსულხართ? — იკითხა მან.

მოსულებმა აუხსნეს, საიდანაც იყვნენ. გლახაკმა გაიკვირვა,

სადამდი გავარდნილა ბრძენი ექიმის სახელით. მოსულები მო-  
უყვნენ გლახაკს თავიანთი სოფლების ამბავს.

— ნუთუ ყველა მღერის თქვენს სოფელში?! — გაიოცა და  
არ დაიჯერა გლახაკმა.

იმ საღამოს მეფის გამოგზავნილმა კაცებმა მოსულები სა-  
სახლეში წაიყვანეს.

რა მარმარილოს სასახლეები არ ნახეს მოსულებმა, რა  
თვალწარმტაცი ბალები არ იხილეს, რა ულამაზესი ტბები არ  
შეათვალაიერეს. ერთ ოქროს ბოგირზე გავიდნენ და ვარდის-  
ფერ მარმარილოს სასახლეში ამოყვეს თავი.

უზარმაზარ დარბაზში, რომელიც ფასდაუდებელი ნახე-  
ბით იყო მოფენილი, თვით მეფე და მოხუცი კაცი დახვდათ.  
ბავშვების დედა გუმანით მიხვდა მოხუცის და მათთან დილით  
მისული გლახაკის მსგავსებას.

— ის არის, ის! — ჩურჩულებდა დედა.

მეფემ ყველაფერი დაწვრილებით გამოჰკითხათ.

— ნუთუ თქვენს სოფელში ამ ორი ყრუ-მუნჯი ბავშვის  
გარდა ყველა მღერის?! — ეს მერამდენედ ეკითხება მეფე მო-  
სულ სტუმრებს. — მაშინ იმღერეთ რამე, ჩვენ ყურს დაგიგ-  
დებთ.

— რა გვემღერება, მეფეო! — ამოიღო ხმა ბედკრულმა მა-  
მამ. — რაც ჩვენი ბავშვების ყრუ-მუნჯობა შევიცანით, მის  
შემდეგ ორივე სოფელში არც ერთ ადამიანს არ ამოუღიღინე-  
ბია. სანამ ბავშვები ამ დღეში არიან, მე და დედამისს რა გვამ-  
ღერებს!

— ჩვენი ხათრით იმღერეთ, მერმე ბავშვების ექიმობაზე  
იფიქრებს ჩვენი ბრძენი ექიმი, — გაიხედა მოხუცისკენ მეფემ.

მოხუცი ჩაფიქრებული ჩანდა. იგი თვალდაუხამხამებლად  
მისჩერებოდა ჩამოსულებს. სახეზე ჰქონდა დასტყობოდა, თვა-  
ლებში ცეცხლი უგიზგიზებდა.

— საოცარი ხალხი ყოფილა იმ სოფლებში, კარგი გულის  
ხალხი ყოფილა. როგორც ჩანს, ამ ბავშვების დაბადებამდე  
ბედნიერებაც მათს სოფლებში ყოფილა შებუღებული. იმღე-  
რეთ! — მიუბრუნდა მოსულებს. — მეფე გთხოვთ და იმღერეთ.  
ბავშვებზე ჩვენ ვიფიქრებთ.

მოსულებმა ბავშვებს შეხედეს. ბავშვები აინუნწიაც არ იყ-

ვხეხ, თუ რა ზღებოდა მათ გარშემო. მოეწონათ მეფის ძვირფასი, ბრჭყვიალა ტანსაცმელი, მას უღიმოდნენ. მშობლებს იმედი ჩაესახათ გულში და თავის მხლებლებს ანიშნეს. იმათაც წინ წამოიწიეს.

უცებ მეფის და ბრძენი ექიმის ყურები საოცრად საამო ხმებმა და სიმღერამ აავსო. ბევრი რამ ენახა მეფეს და მის ბრძენ ექიმს, ბევრი სიმღერა გაეგონათ, მაგრამ ასეთი ჭერ არ სმენოდათ. ეს არ იყო ადამიანთა სიმღერა, ღმერთების საგალობლად ეჩვენათ მეფეს და ბრძენს ეს სიმღერები. დიდი ხანია არ ემღერათ ცოლსა, ქმარსა და მათს მეზობლებს. იპლდეს თითქოს ერთხმად ამოიმღერეს დიდი ხნის საგალობელი. სადაც კი მათმა ხმამ მიადწია, ყველა მსმენელი გაცეცხებით გაირინდა მოსასმენად. ქალაქში მოძრაობა შეწყდა, ყველამ მეფის სასახლისაკენ დაიწყო ყურება. დამთავრდა თუ არა სიმღერა, მეფემ ბრძანა:

— მე მეფე ვარ, ეს ბრძენი ექიმი კი ჩემი მასწავლებელია. პატარობიდანვე მის ხელში გავიზარდე. მე უიმისოდ არ ვვარგვივარ, ის კი უჩემოდ ვერა სძლებს. ერთმანეთისა გვჭერა, ერთმანეთი გვიყვარს, მხოლოდ ერთ რამეში ვერ შევეთანხმებულვართ: ის ამბობს შეიძლება ქვეყნად ისეთი სახელმწიფოს შექმნა, სადაც ყველა ბედნიერი იქნებაო, მე კი ეს არა მჭერა. მე მწამს, რომ ერთ ოჯახშიაც არ შეიძლება ყველა ბედნიერი იყოს. ბედნიერი სოფელი ხომ ამქვეყნად არ შეიძლება იყოს. თქვენ კი სულ სხვა ამბავს გვიყვებით. ჩვენ უნდა წამოვიდეთ თქვენს სოფლებში, ვნახოთ და დავრწმუნდეთ ნათქვამის სისწორეში.

— მეფეო, ახლა, როცა ეს ბავშვები დაიბადნენ, ჩვენს სოფლებში ბედნიერად თავს აღარავინ გრძნობს! — თქვა ერთმა მეზობელმა.

— სანამ ეს უბედურება გვეწვეოდა, ბედნიერები ვიყავით და მისი ფასი კი არ ვიცოდით. გვეგონა, ყველანი ასე იყვნენ. ყოველი კაცი, ყოველი სოფელი ბედნიერი გვეგონა! — თქვა მეორე მეზობელმა.

— ვიდრე ბავშვები ყრუ-მუნჯები არიან, ჩვენს სოფელში არავინ არ იგრძნობს თავს ბედნიერად! — თქვა მესამე ვაჟკაცმა.

ბრძენმა ექიმმა მეფეს შეხედა.

— საოცრებაა! — თქვა მეფემ. — ადამიანებს როდი სჩვე-  
ვიათ ერთმანეთის ბედი და უბედობა ასე უშუალოდ გაიზი-  
არონ. არა მჭერა! — ისევ მტკიცედ თქვა მან.

— მე ბავშვებს ვუაქიმებ. თუკი ბედმა გაგვილიმა და ჩვენმა  
წამალმა და ხელმა არგოთ, მაშინ წავიდეთ მათთან ერთად! —  
გადაწყვიტა ბრძენმა ექიმმა.

არც ქვეყნის კიდე და არც ცის თავანი ჯერ არავის უნახავს.  
ადამიანის გონებაც უსაზღვროა, კიდეგანი არა აქვს, მის სილ-  
რმეს ვერ ჩასწვდები, სიმაღლეს ვერ ასწვდები. ორმოც დღეს  
დატოვეს თავის სასახლეში მეფემ და ბრძენმა ექიმმა მოსუ-  
ლები. ორმოც დღეს უაქიმა ყრუ-მუნჯებს მოხუცმა და ორმოც-  
დამეერთე დღეს ბავშვები ღარბაზში შემოიყვანეს. შეხედე,  
თუ არა მშობლებს, — დედა, დედიკო! — დაიყვირეს ბავშვებ-  
მა და პირველად დედას მოეხვიენენ, მერე მამას ჩამოეკიდნენ  
კისერზე, მერე მეზობლები გაიხსენეს და გადაკოცნეს.

განა შეიძლება ქვეყნად უფრო ბედნიერი იყოს ვინმე, ვიდ-  
რე იმ დროს იმ ბავშვების მშობლები და მეზობლები? რასაყ-  
ვირველია, არა.

ერთ კვირას დარჩნენ ისინი სტუმრად და შემდეგ მეფის და  
ბრძენი ექიმის თანხლებით თავიანთი მხარისაკენ გამოემგზავრ-  
ნენ. გზაზე მეფემ გააფრთხილა მასპინძლები:

— იცოდეთ, ჩვენი ვინაობა არ გაამხილოთ. თუ ეს შეგა-  
ტყუთ, იმ წუთს გულნაკლულნი და ნაწყენები უკან გამოვბრუნ-  
დებითო.

მართლაც, ჩვეულებრივ ტანსაცმელში გამოწყობილი მოსუ-  
ლები სოფელმა უბრალო სტუმრებად მიიღო. გაიგო თუ არა  
ხალხმა ბავშვები მორჩენილნი ჩამოუყვანიათო, ვალმა-გამოლმა  
სიხარულით ცას შესწვდნენ, დიდი და პატარა სახეგაბადრუ-  
ლი, ღიმილითა და აბრიალებული თვალებით გამოვბოდა მო-  
სულების შესახვედრად.

— ეს უცხო ხალხი ჩვენ შორიდან მოგვყვება, გზად მიმა-  
ვალნი არიან. რადგან ასეთი ბედნიერება გველირსა, ცოტა ხნით  
სოფელში მოვიწვიეთ, ჩვენი სიხარული გაიზიარონო.

ორივე სოფელი გულგახსნით შეხვდა მოსულებს, ყოველი  
ოჯახი სიამოვნებით პატიუებდა სტუმრებს, სუფრას უშლიდა,  
ლხინს უმართავდა.

— ჩვენი ერთადერთი ჭირი ამ ბავშვების ყრუ-მუნჯობა იყო, — ამბობდნენ ისინი, — რახან ეს ჭირი მოგვეშორდა, აწი რაღა გვიჭირსო.

შეიქნა სახალხო ლხინი, სიმღერები ცის გუმბათს უფრო წაღლა სწევდა. დიდი და პატარა გალობდა, ცეკვავდა, თამაშობდა. ერთმანეთს ულოცავდნენ დიდი ჭირის მოშორებას, სოფლის გახარებას აღდევრქვებდნენ, ბავშვებს და სტუმრებს ვარდ-ყვავილებით ამკობდნენ. მეფე და ბრძენი გაოცებულნი აკვირდებოდნენ ხალხის მართლაც რომ ჭეშმარიტ სიხარულს.

„ნუთუ ამ სოფელში ავად არავინ არის, ხომ ეყოლებათ კუტი და უსინათლო? მაშ რატომ მაინცდამაინც ეს ყრუ-მუნჯობა მიაჩნია ხალხს. ყველაზე დიდ უბედურებად!“ — ფიქრობდნენ ისინი და ვერ გაეგოთ ამის მიზეზი.

— კუტი კაციც გვყავს და უსინათლო ადამიანიც. პირველი დაბადებით გამოვიდა ძვალსუსტი, მეორე ხანძრის დროა ცეცხლმა დაგვიბრმავა. უბედურებაა, მაგრამ ორივე ლაპარაკობს და მღერის. ისეთი სიმღერები იციან, თქვენგან მოწონებულიო! — მოახსენეს სტუმრებს.

ჩაფიქრდა ბრძენი ექიმი, თავი ჩაჰკიდა მეფემაც. ბოლოს ბრძენმა თქვა:

— ხალხი არ შეცდება, უნდა გამოვიკითხოთ, რატომ მიაჩნიათ ყრუმუნჯობა ასეთ დიდ უბედურებად, რით არის ის სიბრმავეზე ან უფეხოებაზე უარესიო.

სთხოვეს და სოფლის დარბაისელი მოხუცი შეკრიბეს.

— როგორ თუ რატომ?! — გაკვირდნენ მოხუცები. — ადამიანის ენა სულიერთა შორის სულ სხვა რამეა, ენით განსხვავდება ადამიანი ცოცხალ სამყაროში სხვებისაგან. მართალია, ამბობენ ენა სხვა სულიერ არსებებსაც კი აქვთო, მაგრამ ადამიანის ენა სხვაა. ადამიანთა მოღგმა თავისი ენის, თავისი სიტყვის საშუალებით ესაუბრება ერთმანეთს. ენა თუ დაკარგე, ამაზე დიდი უბედურება რა იქნება! ენის დაკარგვა თითქოს ადამიანობის დაკარგვაც არის. სიბრმავე სხვაა, კუტობა სხვაა, ყრუმუნჯობა მათთან არ ითქმებისო.

ბრძენი და მეფე გაჩუმდნენ, სიტყვა არა თქვეს, კიდევ ათ დღეს დარჩნენ და შემდეგ თავიანთ ქვეყანაში გამოემგზავრ-

ნენ. ორივენი მთელი გზა ჩუმად იყვნენ, ერთმანეთსაც კი ხმას არ სცემდნენ, თავისთვის იყვნენ ჩაფიქრებულნი.

— არა, — თქვა ტახტზე მჯდარმა მეფემ, — სიბრმავე ყველაზე უფრო სავალალოა ადამიანისათვის, თვალებილული ქვეყნის დაბნელება უბედურებათა შორის უსაშინელესი უბედურებაა. იმ სოფლის მცხოვრებლები ცდებიან. ყრუ-მუნჯს შეუძლია ქვეყნის ფერებით დატკბეს, ყვავილთა ელვარებას შეეტკბოს, მზის ამოსვლას უყუროს, მთიარის სხივების სინაზზე განიცადოს, ბუნების ზვიად მოვლენებს თვალი გაუსწოროს და ისიამოვნოს, ცის გუმბათის სიღიადეც განიცადოს და ოკეანეთა უფსკრულის სიღრმეს ჩახედოს. ყრუ-მუნჯს მთესველიც შეუძლია გახედეს და მშენებელიც. უსინათლო კაცს, აბა, რა ძალა აქვს?! ის მოკლებულია სამყაროს ხილვას. იგი მის მშვენიერებასა და დიდებას თავის დღეში ვერ ჩასწვდება. ისე წავა ამ ქვეყნიდან, რომ მის გონებას მხოლოდ ერთი ფერი, ბნელი ფერი წაჰყვება. სამყარო კი, ბოლოსდაბოლოს, ფერთა ჰარმონიული დალაგებაა და მეტი არაფერი. ბრმა კაცი იმთავითვე მკვდარია, ცოცხლად არც კი ჩაითვლება.

— მართალი ხარ და სტყუიხარ კიდეც. — დაიწყა სათქმელის თქმა ბრძენმა ექიმმა. — ამდენი ხანი შენსავით მეც ფიქრად ვიყავი გადაქცეული. დიდი დაკვირვების და განსჯის შემდეგ მივხვდი, რომ იმ სოფლის ხალხი მართალნი არიან, დიახ, ჭეშმარიტად ცამდე მართალნი არიან. მართლაც, ყრუ-მუნჯს შეუძლია ქვეყნის ყველა ფერით დატკბეს, გასაოცარი ტაძარი ააშენოს და ბალ-ვენახს სხვაზე უკეთ მოუაროს. მის გონებას არასდროს არ მოედება სიბნელის შიში, ერთი ფერის, შავი, მრუმე ფერის შიში. მაგრამ, აბა, კარგად დაუკვირდი, მეფეო. ქვეყნის ვერც ერთ ბგერას შენი ყური ვერ გაიგონებს და ვერც შენს ხმას მიაწვდი ვინმეს. ეს სამყარო უხმო, ჩუმი და მუნჯია შენი სმენისათვის. შენც უტყვი და უენო ხარ ამ მშვენიერი მუსიკით ავსებულ ქვეყანაზე. ვერც შენ მოისმენ მის ჩამიჩუმს, არც შენ გაქვს უნარი ერთი შეწყობილი ბგერა მაინც დაუმატო მის უმდიდრეს საგალობლებს. მაშასადამე, ხარ თუ არა ადამიანი შენ?! ახლა სიტყვის ამბავს არ იკითხავთ? ადამიანი ხომ, მართლაც, სიტყვით განსხვავდება ცოცხალთა სამყაროში სხვა არსებთაგან? ყველაფერი აქვთ სხვა არსებებს, სიტყვა კი არა

აქვთ. სიტყვა მხოლოდ ადამიანის საკუთრებაა, ამიტომ მისი დაკარგვა ყველაზე დიდ ადამიანურ უბედურებად უნდა ჩავთვალოთ. აი, რა უშუალოდ, უბრალოდ და ბრძნულად განიცდიან ამ ამბავს იმ ორი სოფლის მცხოვრებლები. რა სიმღერები აქვთ. რა ბედნიერები არიან! მათ თავიანთი შრომით და დოვლათით სიმღერის ემზხე მოიყვანეს შთამომავლობა. ბუნებამ ყური დაუგდო მათს დიდ სურვილს და ყოველი კაცი სიმღერის ნიჭით დააჯილდოვა. ხომ ნახე, მეფეო, ყველა რომ მღერის იმ სოფელში. ჩვენ ისიც ვნახეთ, თუ როგორ იუყადრისა სოფელმა ორი ყრუ-მუნჯის დაბადება. სოფლის საერთო გლოვად გამოაცხადეს ამ ოჯახის უბედურება. ცამდე მართალნიც არიან. მუსიკით ჭეშმარიტად დატკობის უნარი მხოლოდ ადამიანსა აქვს. სიტყვა და მუსიკა ადამიანის ადამიანური თვისებაა. მუსიკა რომ უფრო ადამიანური ყოფილიყო, ხალხმა ის სიტყვის მსგავსი გახადა, მუსიკას თავისი სიტყვები, თავისი ასოები გამოუგონა. ამით კიდევ უფრო მიისაკუთრა ის. მუსიკა ბუღბუღსაცა აქვს და ესმის, მუსიკალური სიტყვა კი არა აქვს. აზროვნება ადამიანის უმაღლესობის და უდიდებულესობის უტყუარი ბეჭედია, სიტყვა მისი გამოხატვის და გადაცემის საშუალებაა. მუსიკას კი თავისი სიტყვა აქვს, თავისი ასო-ბევრები. ხომ ხედავ, მეფეო, რით გვაჯობეს იმ სოფლის მცხოვრებლებმა. ემღერებათ და მღერიან. თუ არ იმღერეს, ეს უკვე უბედურებად, სიცოცხლის გამწარებად მიაჩნიათ. მათ მაშინ სწამთ ამ ქვეყნის არსებობა, თუ ადამიანს სიმღერის უნარი და უფლება აქვს. ხედავთ იმ პატარა სოფლის მცხოვრებლებს რა დიდი აზრი ჩაუდვიათ სიცოცხლის არსებობაში? ჭეშმარიტად ბრძენია ხალხის გონება!

— მე მაინც სიბრძავე მიმაჩნია მეტ უბედურებად, — ისევ წყნარად თქვა მეფემ.

— ყოველ კაცს უფლება აქვს თავისი აზრი ჰქონდეს და მტკიცედ სწამდეს კიდევ. ხალხი კი, ეტყობა, უფრო ღრმა ფიქრით ცხოვრობს. უსინათლოს შეუძლია დიდი მუსიკოსი გახდეს. თავისი ტკივილები დიდი მალამოთი მოიშუშოს, სიმღერით განიქარვოს, თვალთა სინათლის უქონლობა მუსიკით შეიმსუბუქოს. ყრუ-მუნჯი ისე მოკვდება, ერთ ტკბილ ჰანგსაც კი ვერ გაიგონებს. — დაასრულა ბრძენმა ექიმმა.

იმ სოფელში მაშინ გაიგეს სტუმართა ვინაობა, როცა ისინი უკვე თავიანთ ქვეყანაში იყვნენ: ფიცით ნათქვამი სიტყვა ვერ გადათქვეს ვერც განკურნებულმა ქალ-ვაჟმა და ვერც მათმა მხლებლებმა. სოფლის დარბაისლებს გული დასწყდათ. ჩაფიქრებით კი ძლიერ ჩაფიქრდნენ.

— ვაითუ მართალი არა ვართ და იმ უცხო ბრძენმა ადამიანებმა სოფელი უქკუოდ მიიჩნიონო. — იფიქრეს, იფიქრეს და დაასკვნეს: მოდი, ქალ-ვაჟის ცხოვრებას დაუვკვირდეთ და ერთხელ კიდევ შევამოწმოთ ჩვენი აზრიო. მართლაც, დაუვკვირდნენ ახალგაზრდა ქალ-ვაჟის ცხოვრებას. დარწმუნდნენ, რომ მათზე ბედნიერი ადამიანი არ იყო ამ ცისქვეშეთში. ერთმანეთს ექლურტულებოდნენ, სიძლერებით ანებივრებდნენ. მათს თვალში ყვავილებსაც სხვა ეშხი მიეცა და მზის ნათელ შუქსაც. მშობლების ბედნიერებას კი ნუ იტყვით! მათზე ბედნიერი ვინ იყო ამ მიწის პირზე?!

უხუცესთა შორის ერთმა უხუცესმა ეჭვით თქვა:

— აბა, ერთი განკურნებულ კუტს ჰკითხეთ სიხარული, ან თვალახილულ ბრმას გაუზომეთ ბედნიერებაო?

ყველანი გაჩუმდნენ. დიდხანს იყვნენ ისევ ჩაფიქრებულნი. ბოლოს ერთმა თქვა: ჩვენ ამას ვერ გადავწყვეტთ. ქვეყნის დასალიერში ერთი ბრძენი მოხუცი ცხოვრობს, მასთან გავგზავნოთ ვინმე, ის გვეტყვის სიმართლესო.

სამი მოხუცი შეარჩიეს და გაუშვეს. ორი წელი გავიდა და სამი მოხუციდან მხოლოდ ერთი დაბრუნდა, ორი გზაში გარდაცვლილიყო. შეიკრიბნენ სოფლის თავკაცი. მოხუცი მოჰყვა ნახულს და დაბარებულს.

— შვიდი მთის იქით, ქვეყნის დასასრულს ვნახეთ ის ბრძენი, — დაიწყო მან, — როცა ჩვენი წუხილი მოვახსენეთ, მოხუცი გაოცდა. დიდხანს იყო ჩაფიქრებული. ბოლოს თავი ასწია, მზეს შეხედა და გვითხრა:

— ერთ შეკითხვაზე უნდა მიპასუხოთო.

მოხუცებმა ყური მიუგდეს.

— თუ იცით, ყველაზე მახვილი ყური და ყველაზე მუსიკალური ყელი რომელ არსებას აქვსო, — იკითხა ბრძენთა ბრძენმა.

მოხუცებმა ერთხმად ბუღბული დაასახელეს.



— მაშინ ისიც გეცოდინებათ, — დაუდასტურა ნათქვამი ბრძენმა და განაგრძო, — რომ ბულბული მხოლოდ მაშინ მღერის, როცა ბუნება აყვავდება, მრავალფეროვანი ხდება, ასი ათასი სხივით და ელვარებით მდიდრდება. ზამთარში, როცა სამყარო ერთფეროვანი ხდება, ბულბულს ერთი ჰანგიც კი არ წამოსცდება, გაზაფხულზე კი ამ ფერთა საოცარ ქღერაში იწყებს თავის საგალობელს. თქვენ ისიც გეცოდინებათ, რომ მათი სიმღერა ყოველი დამღერების ჟამს სხვადასხვანაირია. იმას, რაც გუშინ იმღერა, დღეს არ გაიმეორებს. იმას, რაც წუღან ცას შეუგალობა, ახლა არ დაიმღერებს. რატომ? ბუნების ეს ფერთა თამაში, ბულბულს თავის სიმღერებში გადმოაქვს. ერთი ფერი მეორეს არ ჰგავს, მათი ციმციმი და შეერთება თუ გათიშვა სხვა ელვარებას და სხვა ფერსა ბადებს. ბულბულის ყელი ასეა მოწყობილი. მას სწორედ ბუნების ეს ფერთა თამაში გადააქვს თავის საოცარ საგალობლებში. უნდა გითხრათ, ადამიანის ენა და ყელი კი მაინც სხვა მოვლენაა: სიტყვის თქმა ბულბულს არ შეუძლია, მისი გონება და სხეული ამ დიდ საოცრებას ვერ სწვდება. როგორც ჩანს, ყველაზე დიდი სიმღერა მაინც სიტყვაა. ამიტომ ადამიანებისთვის ყრუმუნჯობა დასტურ დიდი უბედურებაა. თქვენი სოფელი მართალია, იმ ექიმს, ვინც ის ქალ-ვაჟი მოარჩინა, ტაძარი უნდა აუგოთო, არ დაივიწყოთ და შთამომავლობას მისი სახე თუ სიკეთე არ დაუკარგოთ.

მოხუცი დაღუმდა.

ჩაფიქრდნენ დარბაისლებიც.

იფიქრეს, იფიქრეს და გადაწყვიტეს, სწორედ მდინარის იმ ბორცვზე, სადაც ისინი ყველაზე უკეთეს მომღერლებს ახვედრებდნენ, აეგოთ ტაძარი ბრძენი ექიმის პატივსაცემად. მეფეს ხუროთმოძღვრები სთხოვეს, მას ძალზე ეამა ეს და თავისი უკეთესი მშენებლები გამოუგზავნა სოფელს. დიდხანს აშენეს ეს ტაძარი, მაგრამ როცა დაამთავრეს, ქვეყანა გააკვირვეს. ტაძარში რომ შეხვიდოდით, ასი ბულბულის პატარა და ლამაზი ქანდაკებები ზეცას შეჰგალობდნენ თავისი ენის საგალობლებს. ეს სიმღერები მართლაც წარმტაცად ჟღერდა ტაძრის შესასვლელში. ტაძრის შუა ადგილზე ქვისგან ნათალი ადამიანთა სახეები ცის სიმღერებს შეჰლაღებდნენ ტაძრის გუმბათს. რო-

ცა ამ სიმღერებს ისმენდით, გეჩვენებოდათ, თითქოს გუმბათი-  
დან მართლაც ზეცისკენ მიიკვლევდა გზას. მიიკვლევდა და  
მიდიოდა იქ, რათა აღამიანთა ბედნიერება ქვეყნისთვის გადა-  
ეფრქვია. საკურთხეველთან კი, ზედა აღსავლის კარებთან,  
კლდისგან გამოძერწილ ადამიანს — ტიტანს შვიდ-შვიდი  
მტრედი ასხდა მხრებზე. მტრედები ადამიანური ენით ლულუ-  
ნებდნენ: „ამქვეყნად მაინც მთავარი ადამიანური სიტყვაა, ამ-  
ქვეყნად მაინც მთავარი ადამიანური სიტყვაა“.

როცა ტაძარი გაიხსნა, სწორედ იმ დღეს იქორწინეს თურმე  
განკურნებულმა ქალ-ვაჟმა. სოფლის პირობა არ და-  
ურღვევიათ. სიძეც და რძალიც ორივე გაღმა სოფლიდან და-  
წინდეს და შეარჩიეს.

არ ვიცი, მართალია თუ არა ეს ლეგენდა, მაგრამ ხანის-  
წყლის სათავეებთან, სოფელ ხანის ახლო, წყალთა შუა ახ-  
ლაც არის ნანგრევთა ნარჩენები. მოხუცები ახლაც მას „სიტყ-  
ვის ნატაძრალს“ უწოდებენ.

ვინ იცის, შეიძლება მართლაც იყო აქ ასეთი ტაძარი. მარ-  
თალი რომ თქვას კაცმა, ულამაზესი მთები ისეა ორი მდინარის  
ჩანჩქერებზე შემოჯრილი, ერთი რომ დაბალი ხმით დაილაპარა-  
კო, გუგუნს დაიწყებენ. თუ ხმამაღლა სიტყვა ამოთქვი, მეხი-  
ვით გასკდება ხოლმე ნათქვამი. ასეა თუ ისე, ეს ლეგენდა პრო-  
ფესორ სიმონ ხეჩინაშვილის შრომებს ესიტყვება და მეც ამი-  
ტომ დავწერე. ძალიან მომეწონა „სიტყვის ნატაძრალი“, მარ-  
თლაც, ბუნებამ სიტყვა ადამიანის მიკერძოებულ საკუთრებად  
ჰქმნა, ვინც მის თქმასა და გაგონებას ადამიანს არ დაუკარგავს,  
ის დიდი პატივისცემის ღირსია. ეს თქმულებაც ხომ ამას მოგ-  
ვითხრობს!



მეცხრამეტე საუკუნის მეორე ნახევარსა და მეოცე საუკუ-  
ნის დასაწყისში ქუთაისის ინტელიგენცია განათლებითა და  
კულტურით ძლიერი იყო, შეიარაღებული იყო კაცობრიობის  
მოწინავე აზრით და ფიქრით, მისი მეცნიერული მო-  
ნაპოვარით, მისი პროგრესული იდეებით. მსოფლი-  
ოს ყველა ქვეყანას, რაგინდ დიდიც არ უნდა ყოფილიყო ის,

შეშურდებოდა აკაკის, კიტა აბაშიძის, გიორგი ზდანოვიჩის, კირილე ლორთქიფანიძის, იოსებ ოცხელის, სილოვან ხუნდაძის და მესხების მთელი ოჯახის განათლება. ქუთაისში იყვნენ შესანიშნავი ექიმები, რომელთაც უსაზღვროდ უყვარდათ სამშობლო, ხალხი, მზად იყვნენ მათთვის თავი გაეწირათ. ისინი იცნობდნენ ევროპის სამედიცინო მეცნიერებას, მის უახლეს მიღწევებს, ხალხს აცნობდნენ ამ ახალ აღმოჩენებსა თუ მიღწევებს, ცოდნის დიდი მარაგით აღჭურვილნი. გულწრფელი თავდადებით ემსახურებოდნენ მამულს.

ამ ექიმთა შორის სიმონ ხეჩინაშვილი (როგორც მაშინ ამბობდნენ „ხეჩინოვი“) ერთი პირველთაგანი იყო. მან სამოციან წლებში წარმატებით დაამთავრა ქუთაისის კლასიკური გიმნაზია და მოსკოვის უნივერსიტეტის დამთავრების შემდეგ ცნობილი პროფესორის ზახარინის კლინიკაში დატოვეს. სიმონი ღარიბი კაცის შვილი იყო და ამიტომ იძულებული გახდა მალე წამოსულიყო სამშობლოში, შეშველებოდა ხელმოკლე ოჯახს.

იოსებ ოცხელმა, ამ საოცარმა პედაგოგმა და მოღვაწემ, ახალგაზრდა ნიჭიერი ექიმი თავის გიმნაზიაში მიიწვია.

სიმონ ხეჩინაშვილმა მიწვევა სიამოვნებით მიიღო, მაგრამ ხელფასზე უარი თქვა. იმ დღიდან იგი მთელი სიცოცხლის მანძილზე უფასოდ ემსახურებოდა ქართული გიმნაზიის მოსწავლეებს და მასწავლებლებს. მისი სახელი კი მთელს დასავლეთ საქართველოში უკვე გავარდა. მისი ავტორიტეტი ზღაპრულად გაიზარდა. „ექიმი ხეჩინოვი, ექიმი ხეჩინოვი“ — ყველას ასე ეკერა ენაზე.

ქუთაისის გუბერნიის სამედიცინო საზოგადოებამ სიმონ ხეჩინაშვილი თავის თავმჯდომარედ აირჩია. მას ყველგან ეძახიან და სთხოვენ. ისიც დაუზარებლად, დღეა თუ ღამე, წვიმაში თუ ღარში, პირველი დაძახებისთანავე მიიჩქარის ავადმყოფებისაკენ. არ ყოფილა შემთხვევა, რომ სიმონ ხეჩინაშვილს ვისმესთვის უარი ეთქვას და ავადმყოფი არ გაესინჯოს. ღარიბ მოსახლეობას უფასოდ მკურნალობდა.

ქუთაისის თეატრის მსახიობებს და თანამშრომლებს თავისი სიცოცხლის არც თუ ისე ხანმოკლე მანძილზე უფასოდ, უკაპიკოდ ემსახურებოდა. ვინ გაუბედავდა, ჰონორარი აიღეო! ცოტა როდი ყოფილა ისეთი შემთხვევა, როცა ღარიბისა და გა-

კირვებულის ბავშვს თვითონვე ჩაუდებდა ვერცხლის მანეთი-  
ანს ჩუმად ხელში. შემდეგ ამ მანეთიანით ეს ოჯახი ორი-სამი  
დღე პურითა და ტარანით გამოკვებავდა მთელ ჯალაბს.

როგორც ვთქვით, ხეჩინაშვილები ახლოს ცხოვრობდნენ  
ჯაჭვის ხიდთან, ზედ მწვანე ბაზრის უკან ორსართულიანი სახლი  
ჰქონდათ. ცნობილი „ფილიმონას სახაშეც“ იქვე, ჯაჭვის ხიდ-  
თან იყო.

ერთ დღეს ქუთაისის დასის მსახიობებს უქეიფნიათ, ღამე  
გაუთევიათ და დილით ფილიმონასთან ხაშზე შესულან. რო-  
გორც ჩანს, ბევრნი ყოფილან, ფული კი არ ჰქონიათ. გრიგოლ  
ჩარკვიანისთვის დაუვალეზიათ, „სიმონთან შედი, უთხარი  
ავად ვარ-თქო. თუ კარგ გუნებაზე იყოს, წაეხუმრე და ერთი  
ოქროს თუმნიანი იქნებ შენსკენ გადმოაგდებინო“. იმ დღეს  
სიმონი ცუდ ხასიათზე ყოფილა, თანაც გრიგოლის ხუმრობა  
ვერ გაუგია, ცუდლუტობად ჩაუთვლია და გაჯავრებულა.

— თვალით არ დამენახო! — უყვირნია თურმე. გრიგოლიც  
ცივად გამოძუნძულებულა გარეთ.

შემდეგ სიმონი დაფიქრებულა. მიმხვდარა, ალბათ, მსახი-  
ობებმა გამოგზავნეს, ფული დასკირდათ, გაჭირვებაში ჩავარდ-  
ნილან. ტანზე ჩაუცვამს, ფილიმონასთან შესულა, ნახარჯიც  
გადაუხდია და მეორე დილის ხაშის საფასურიც წინასწარ და-  
უტოვებია.

— შენთვის კი, გრიგოლ, — მიუბრუნდა თურმე ჩარკვი-  
ანს, — არც ხუმრობის ნიჭი მოუცია ღმერთს და არც ტირილისა,  
შე ვიფიქრე, ცუდლუტობით გამაღვიძე კაცი ამ ალიონზე.

სიმონ ხეჩინაშვილი ფარიბ სტუდენტთა დამხმარე საზოგა-  
დოების თავმჯდომარის ამხანაგადაც მუშაობდა წლების მან-  
ძილზე. მრავალ ქართველ სტუდენტს უგრძენია მისი მამობრი-  
ვი დამხმარე ხელი, ბევრ გაჭირვებულ ახალგაზრდას მიშვე-  
ლებია მისი გროშები. სიმონი მოწოდებით იყო ექიმი. ეს სპე-  
ცილობა მის სულიერ მოთხოვნას არწყულებდა, ხალხის სამ-  
სახურის საშუალებას აძლევდა. სიმონის შვილი — ნიკოლოზი  
ექიმი გახლდათ. ისიც მამასავით შესანიშნავი მკურნალი დად-  
გა და დიდხანს ემსახურებოდა ქუთაისის მშრომელებს. სიმო-  
ნისვე ჩაგონებით სამივე შვილიშვილებიც ექიმებად დაიზარდ-  
ნენ. რეზო თბილისში მუშაობს, ხოლო ნიკოლოზი (მამის სახე-

ლი მეორდება) ქუთაისში დარჩა, რომ თავისი მამა-პაპის ძველი ფუძე, ბაბუა სიმონის კერა არ გაეციებინა. საერთოდ, ქართველ კათოლიკეთა ისტორია მამულისთვის დიდი სიყვარულის და თავდადების ისტორიაა. არა მარტო ფალიაშვილები და თამარაშვილები, ოცხელები და ხეჩინაშვილები, ახლაც არიან ოჯახები, რომლებიც თითქოს მემკვიდრეობით გადასცემენ შთამომავლობას მამულის უზადო სიყვარულს. აკაკი არაზაშვილის ოჯახმა (იგი ფარმაცევტი იყო) მოდგმით გადასცა თავისი საყვარელი ხელობა შთამომავლობას, მისი მეუღლე ნინო ფარმაცევტი გახლდათ, შვილი სოსო ახლა ცნობილი ფარმაცევტია, მისი მეუღლე ლუბაც ფარმაცევტი გახლავთ, და შვილი აკაკიც სწორედ მამა-პაპის კვალზე წავიდა. ასეთივე იყო კოკონაშვილების გვარის შესანიშნავი ოჯახები. ახლა მარტო ყაუხჩიშვილები! მარტო ისინი რად ღირან! მარიამ ყაუხჩიშვილის ქალმა არაერთი და ორი ქართველი ქალი აღუზარდა მამულს, საქართველოს.

ჩემი ბავშვობის დროს კათოლიკეთა ეკლესიაში მღვდელი დონ-დამიანე სააკაშვილი ქალაქის ყოველ ბავშვს უყვარდა. ახლა რომ ვუკვირდები, მაოცებს ის დამოკიდებულება, რომელიც მაშინ კათოლიკე პატრს ჰქონდა ხალხთან. ჩვენ მესხეთის ქუჩის (ახლა ნინოშვილის ქუჩა) ბოლოში ვცხოვრობდით. იქიდან კათოლიკეთა ეკლესიამდე ოთხი-ხუთი კილომეტრი მაინც იქნება. იმდენ შესანიშნავ ამბებს გვიყვებოდა ეს „ფრანგების მღვდელი“, რომ ჩვენ ამ სიშორიდან მაინც დავიარებოდით მასთან. სხვათაშორის, იგი ნაკლებად ეხებოდა რელიგიის საკითხებს. მისი თემა იყო საქართველოს ისტორია, კერძოდ, ცნობილი ისტორიკოსის თამარაშვილის ნაწერების მიხედვით ამბების მოყოლა. ჰო, როგორ გვიყვებოდა პატრი დონ-დამიანე ამ ამბებს! ახლაც თვალწინ მიდგას კათოლიკეთა ეკლესიის ულამაზესად ცად აწვდილი ნაძვის ხე, მის სამხრეთით იყო იოსებ ოცხელის საფლავი (იგი ჩემი ნათლია იყო, რაც, რასაკვირველია, მეტად საამაყოდ მიმაჩნია). იქვე დადგებოდა დონ-დამიანე და დაუღლელად გვიყვებოდა ჩვენი სამშობლოს ავბედითს ისტორიას. განსაკუთრებით მღელვარედ იცოდა სამხრეთ საქართველოს ისტორიული ამბების მოყოლა. ჩვენც, წარმოშობით მართლმადიდებელი ბავშვები, რომლებიც მეტად ათე-

ისტორიად ვიყავით განწყობილი, სულგანაბული ვუსმენდით პატრს; მაშინაც კი, როცა წამოვიზარდეთ, დონ-დამიანე საინტერესო მოსაუბრედ დარჩა. (მან ხუთამდე უცხო ენა იცოდა). მახსოვს კოკოჩაშვილების ოჯახში მდგმურებად იყვნენ: უშანგი ჩხეიძე, ალექსანდრე მიქელაძე, სერგო ზაქარიაძე, მერი დავითაშვილი, ალექსანდრე გომელაური. ეს სახლი სწორედ კათოლიკეთა ეკლესიის ეზოს წინ მდებარეობს. ეზოში კი ცხოვრობდა მსახიობი კაპიტონ აბესაძე. ჩვენ ყველანი ხშირად გადავდიოდით კაპიტონთან. ხან საზამთროს გავაქრევივინებდით კაპიას, ხან პელო გაბუნიას (კაპიტონის მეუღლე მსახიობი ქალი) ზაქაპურს გამოვაცხოვინებდით. დონ-დამიანე ყოველთვის შეგვაჩერებდა ეკლესიის ეზოში გავლის დროს. უშანგი ყოველთვის მოკრძალებით უსმენდა მის ნაამბობს. სერგო ზაქარიაძე, რომელიც სიჭაბუკის ეპოს, ნიჭიერებასთან ერთად მეტად დაუდევარი იყო, დიდი გულისყურით უსმენდა მღვდელს. თვით კოტე მარჯანიშვილიც არაერთხელ მინახავს დონ-დამიანესთან საუბარში ჩართული. ამ ეკლესიის ეზოში კათოლიკე ბავშვთათვის სკოლა იყო გამართული. აქ ასწავლიდნენ მუსიკას და ფრანგულ ენას. ყველა იქ აღზრდილმა კარგად იცოდა ფრანგული ენა. სიმონის შვილიშვილებიც ამ დაწყებით სკოლაში იზრდებოდნენ. მათ მუსიკასთან ერთად შესანიშნავად ისწავლეს ფრანგულიც. ბაბუა სიმონის დაყინებით ოჯახში გერმანული და რუსული ენის გაკვეთილებსაც იღებდნენ ბავშვები. ამიტომ სიმონ ხეჩინაშვილმა (შვილიშვილმა) უზადოდ იცის სამივე ეს ენა. მან თბილისში გადმოსვლის შემდეგ თავისი სურვილით ხელი მოჰკიდა ინგლისურს და ახლა, სხვა უცხო ენებთან ერთად, ეს ენაც საფუძვლიანად შეისწავლა.

ჩვენი საუკუნის ოცდაათიან წლებში ქუთაისის მუსიკალური ტექნიკუმის დირექტორად (თავისი სურვილით) ჩვენი სამაყო კომპოზიტორი მელიტონ ბალანჩივაძე იყო. სიმონი სწორედ ამ სასწავლებელში სწავლობდა. როდესაც ერთ-ერთი გამოცდის დროს მელიტონმა, რომელსაც, ეტყობა, თვალში მოუვიდა ლამაზი ყმაწვილი, ჰკითხა: „შენ რა გინდა, ბიჭო, გამოხვიდეო“. სიმონმა ამაყად, თავაწიულმა უპასუხა:

— ბატონო მელიტონ, შე უსათუოდ ექაში გავხდებიო.

მელიტონი გააკვირვა ამ პასუხმა.

— ბიკოს! აბა, ამ სკოლაში რა გინდოდა, აქ ექიმი როგორ გამოხვალო.

— მამაჩემის ხათრით ვსწავლობ მუსიკას, ბატონო მელიტონ, დამიყინა და ვსწავლობ, ისე კი აუცილებლად ექიმი უნდა გავხდეთ, — არ დაუმალა და გულწრფელად უთხრა დიდ მელიტონ ბალანჩივაძეს მოსწავლე სიმონ ხეჩინაშვილმა. როგორც ხედავთ, მუსიკალური განათლებაც აქვს მიღებული სიმონ ხეჩინაშვილს. შეიძლება ესეც იყოს ერთი მიზეზი იმიტომ, რომ სიმონი ადამიანთა სმენის ორგანოს ასე დიდი ინტერესით ეკიდება. მართლაც, ყურის საქიროება ისე ვინ იცის, როგორც მუსიკოსმა. რასაკვირველია, სიმონი არ იყო მუსიკისთვის დაბადებული. მაგრამ არ შეიძლება ქუთაისის კათოლიკური ეკლესიის დაწყებითი სკოლის მოსწავლე იყო (დიდი ხნის მანძილზე ამ სკოლას სურმავას ქალი ხელმძღვანელობდა), ფალიაშვილების საბუღალროში გაიზარდო, მელიტონ ბალანჩივაძის მოწაფეობა იგემო და მუსიკის ავანჩაიანი მთელი სიგრძისიგანით არ იცოდე. აბა, რა გასაკვირია, რომ საექიმო მეცნიერების შესწავლის დროს სიმონ ხეჩინაშვილი სწორედ იმ ორგანოს ღრმა შესწავლას შეუდგა. სმენა ხომ მუსიკასთან სამკვდრო-სასიცოცხლოდ არის დაკავშირებული. ფალიაშვილის ჯადოქრული მუსიკა სმენადაქარგული ადამიანებისათვის გაუგებარი რომ არ დარჩენილიყო, აქ თითქოს ბუნების რაღაც იღუმალების ძალით სიმონ ხეჩინაშვილი მოველინა ადამიანებმა მხსნელად. თითქოს ჩვენგან წასულ ზაქარიას სიმონ ხეჩინაშვილისთვის (პაპისთვის) ეთქვას:

— აჰა, მეც იქ ვსწავლობდი და ვუკრავდი, სადაც შენი შვილიშვილები იზრდებიან. მე მუსიკა ყველასათვის დავწერე. შენ ექიმი ხარ და სმენადაზიანებულ ქართველ კაცს რომელიმე შენმა შთამომავალმა უმკურნალოს, ჩემი ჰანგების სიტკბო გააცნოს, მისი გემო არ დაუკარგოსო, განა შეიძლება ქართველი კაცი ისე წავიდეს ამ ქვეყნიდან, რომ მუსიკა არ მოისმინოს?

ღიას, ჭეშმარიტად სიმონ ხეჩინაშვილის შვილიშვილმა, იგივე სიმონ ხეჩინაშვილმა, ნამდვილად დიდი მეცნიერული ალლოთი ხელი მოჰკიდა ამ დიდ საქმეს და გაიმარჯვა კიდევც.

სხვანაირი კაცია ახალგაზრდა სიმონ ხეჩინაშვილი, როგორც

იტყვიან, კბილიანი კაცია. რასაც ამოიჩემებს, ხელს ვერ გააშე-  
ვებინებ. სიყმაწვილიდანვე ესმოდა დიდი მეცნიერის ივანე ბე-  
რიტაშვილის სახელი. სტუდენტობაშივე ფიქრი და აზრი ბე-  
რიტაშვილის მეცნიერული ნექტარით გაემსჭვალა. დაამთავრა  
ინსტიტუტი და ამ საქვეყნოდ სახელგანთქმულ ადამიანს მი-  
ეკედლა. სხვანაირად არც შეიძლებოდა მომხდარიყო. ვინც რას  
ეძებს, უსათუოდ მას იპოვნის. სიმონმა ათი წელი იმუშავა სმე-  
ნის ფიზიოლოგიაზე. მთელი ამ ათი წლის მანძილზე იგი უდი-  
დესი სიყვარულითა და მთელი თავისი ახალგაზრდული ენერ-  
გიის დაძაბვით ილტვოდა ახალი რაიმე ეთქვა ამ დარგში. რა-  
საკვირველია, ამ საქმეში მას თავისი განათლება — ენების  
ცოდნა დიდად უწყობდა ხელს. რაც კი რაიმე ლიტერატურა  
არსებობდა რუსულად თუ გერმანულად, ფრანგულად თუ ინგ-  
ლისურად, ხეჩინაშვილს არ გამოპარვია. ახალგაზრდა მეცნიერს  
თვით დიდი მოაზროვნე ბერიტაშვილი ყოველმხრივ ეხმარე-  
ბოდა. ბუნებრივია, სიმონ ხეჩინაშვილი მის მოწაფედ თვლის  
თავს და ამით ამაყოფს კიდევ. ნიჭიერებამ და ენერჯიულმა  
შრომამ თავისი გააქეთა. მან შესანიშნავად დაიცვა სადოქტო-  
რო დისერტაცია. მისი შრომა „Вестibuлярная функция“  
ამ დარგში მეტად საინტერესო მეცნიერულ ნაშრომად ითვლე-  
ბა. აქვე არ შეიძლება გვერდი აუუაროთ იმას, რომ კოსმონავ-  
ტიკის შესწავლის საქმეში ამ ნაშრომს საკმაო მნიშვნელობა  
ენიჭება. ამიტომ ყოველი კოსმონავტი სიამოვნებით ეცნობა  
მას, ყოველმა მათგანმა თითქმის ზეპირად იცის ამ ნაშრომის  
ბევრი ადგილი.

მომავალი მაინც წინ იყო გასავლელი. სიმონი როდი ეკუთვ-  
ნოდა ახალგაზრდების იმ წყებას, ერთხელ მოპოვებული მიღწე-  
ვით რომ კმაყოფილდებოდა. არა, მას წინ ედო დიდი გზა, გზა ვაჟ-  
კაცობისა, გზა ბრძოლისა და გამარჯვებისა. ხეჩინაშვილმა  
კარგად იცოდა, რომ დიდ მეცნიერულ აღმოჩენებს თავგანწი-  
რული შრომა და გამჭვალავი გონება სჭირდება. უამისოდ მეც-  
ნიერებაში, იმერულად რომ ვთქვათ, „ერთ ფიორსაც ვერაფერს  
გააქეთებ“. ამიტომ იგი დღესა და ღამეს ასწორებდა, რათა გან-  
ზრახული ბოლომდე შეესრულებინა. მან საფუძვლიანად შეის-  
წავლა ყურის ლაბირინთის გაღიზიანებისას ელექტრული ეფექ-  
ტები, რომელიც ამ დროს თავის ტვინის სხვადასხვა უბნებში



აღმოცენდება. არ შეიძლება აქვე არ აღინიშნოს, რომ, როდესაც სიმონ ხეჩინაშვილმა ამ საკითხზე მუშაობა დაიწყო, ჯერ კიდევ არ იყო საბოლოოდ გამორკვეული დიდი ტვინის ქერქის მონაწილეობა ვესტიბულური ფუნქციების განხორციელებაში, ე. ი. მეცნიერები ჯერ კიდევ ორკოფობდნენ ამ საკითხში. ამასთან ერთად ახალგაზრდა მეცნიერმა პირობითი რეფლექსების მეთოდით გამოიყენა. მართალია, მანამდე არაერთ ავტორს ჰქონდა შემუშავებული პირობითი რეფლექსების როლი ცხოველთა პასიურ მოძრაობაში, მაგრამ სრულებით გაურკვეველი იყო ვესტიბულური და მოძრაობითი ანალიზატორების როლი ამ რეაქციების მექანიზმებში. ამის გარკვევა და გამოკვლევა მეტად საჭირო და საინტერესო იყო სამედიცინო მეცნიერებისათვის. აკადემიკოს ივანე ბერიტაშვილთან ერთად მან დიდხანს იმუშავა ადამიანის მიერ სივრცეში ორიენტაციის საკითხში ლაბირინთის როლზე. გამოიკვია და დადგინდა, რომ ყრუ-მუნჯები, რომელთა ლაბირინთები არ აღიგზნება, ე. ი. მათი გაღიზიანება გარე სამყაროს მოვლენებით არ ხდება, გაცილებით უარესად ერკვევიან სივრცეში, ვინემ ნორმალური ვესტიბულური ფუნქციების მქონე ადამიანები. ეს საკითხები დაამუშავა სიმონ ხეჩინაშვილმა. მის მიერ დასტამბული წიგნი „ვესტიბულური ფუნქცია“ გამოვიდა 1958 წელს. ამ ნაშრომს ბრწყინვალე შეფასება მისცეს საბჭოთა კავშირის გამოჩენილმა მეცნიერმა ექიმებმა და ფიზიოლოგებმა. საინტერესოა პროფესორ მინკოვსკის რეცენზია ამ ნაშრომზე, რომელიც 1959 წელს ჟურნალ „ვესტნიკ ოტორინოლარინგოლოგიის“ მეექვსე ნომერში დაიბეჭდა. იგი ამ ნაშრომს საუკეთესო შეფასებას აძლევს.

სიმონ ხეჩინაშვილს არაერთი გამოკვლევა აქვს აგრეთვე სმენის მეთოდების გაუმჯობესების შესახებ. მან ბევრი სიახლე შეიტანა ხახის ლიმფა ენოიდური ქსოვილების ფიზიოლოგიის საკითხში და სხვ. ახალგაზრდა მეცნიერის ცხოვრება ჯერ კიდევ წინ არის.

პროფესორი ხეჩინაშვილი იცნობს ინგლისის და გერმანიის მეცნიერთა მიღწევებს. იგი კარგა ხნით იყო მივლინებული ამ სახელმწიფოებში და აკვირდებოდა ყველაფერს, რაც ესოდენ საჭიროა დღევანდელი მონაწილისათვის. საინტერესოა კი ბევრი რამ

არის უცხოეთში. აღსანიშნავია, რომ ზოგიერთი ჩვენთვის უცნობი აპარატი ხეჩინაშვილმა თავისი ხელით ჩაიხაზა, ჩაიხატა და ჩვენს ქარხნებს შეუყვება, გაუმჯობესებული კონსტრუქციით გააკეთებინა ეს აპარატები.

1961 წელს მსოფლიო ოტორინოლარინგოლოგების პარიზის კონგრესზე პროფესორ სიმონ ხეჩინაშვილის მოხსენებამ დიდი ინტერესი გამოიწვია. მის მიერ ჩატარებული ცდები და სამეცნიერო-საკვლევო გამოცდილება კონგრესის აქტიური მსჯელობის საგანი გახდა. ჩვენთვის, საბჭოთა ქართველი ადამიანებისთვის, უსათუოდ საამაყო ასეთი ადამიანების ღვაწლი, არც ერთ ქართველ კაცს, თუ, მართლაც, მას გულით უყვარს თანამედროვე საქართველო, ეკვი არ შეეპარება, რომ ჩვენ სწორედ დიდი აზროვნების ადამიანები ვკვირდებ. მართალია, ჩვენი წინაპრები ბრწყინვალეთა შორის უბრწყინვალესი სპორტსმენები იყვნენ, მართალია, ლელო ბურთი თუ ჩოგბურთი, ცეკვა, ჭიდაობა თუ ისრის ტყორცნა ქართველ კაცს არ უჭირდა, მაგრამ საქართველო, უპირველეს ყოვლისა, მაინც იოანე პეტრიწონელის, არსენ იყალთოელისა და საბა ორბელიანის სამშობლოა, ჩვენი მამული დიდთა შორის უდიდესი მოაზროვნის შოთას მშობელი ქვეყანაა. სწორედ ამიტომ არის სასიამოვნო, როცა ქართველი კაცი მსოფლიო მოაზროვნეთა და მეცნიერთა ფორუმებზე თავის სიტყვას იტყვის და მის სიტყვას წონა და მნიშვნელობა აქვს.

მოსკოვის ოტორინოლარინგოლოგების სამეცნიერო საზოგადოების პლენარულ სხდომაზე, რომელიც 1963 წელს გაიმართა, სიმონ ხეჩინაშვილის გამოსვლა ღირსშესანიშნავ მოვლენად იქნა მიჩნეული. მთელი ჩვენი მოწინავე მეცნიერები პატივისცემით და დარბაისლური გულისყურით ეპყრობიან მის ყოველ სიტყვას. სხვანაირად არც შეიძლება, სიმონ ხეჩინაშვილს აქვს გონების ის თვალი, რომელიც ყოველ მეცნიერს როდი აქვს. ეს კარგად იციან უცხოეთის დიდმა თანამედროვე მეცნიერებმა, რომელთანაც ახლო სამეცნიერო ურთიერთობა და მიმოწერა აქვს საკავშირო აკადემიის წევრ-კორესპონდენტს პროფესორ სიმონ ხეჩინაშვილს. ისინი ყოველთვის ცდილობენ ახლო დაუკავშირდნენ სიმონის საკვლევ მუშაობას. ასეთი სურვილები ყოველთვის ბუნებრივია მეცნიერთა შორის. ნამდვილი

მეცნიერები მეტად დიდი ვნებების ადამიანები არიან და ძალზე დაინტერესებულნი არიან თავიანთი კოლეგების სამეცნიერო ცხოვრებით. მით უმეტეს, თუ ესა თუ ის მეცნიერი რაიმე ახალსა ჰქმნის. შეიძლება ლევან გოგნაძის ყელი, რომელიც მეტად უცნაური შემთხვევის გამო მეტად თავისებურად დაზიანდა, სიმონისათვის, როგორც მეცნიერისათვის, საინტერესო და მიშზიდველიც იყო. რასაკვირველია, ეს გამორიცხული როდია. პირიქით, ეს პროფესიული ინტერესი აუცილებელიც არის, მაგრამ ლევანისადმი პროფესორის დამოკიდებულება, ისე როგორც სხვა პაციენტებთან მისი ურთიერთობა, მხოლოდ და მხოლოდ ადამიანის სიყვარულით იყო გამოწვეული. ეს სიყვარული მას მემკვიდრეობითაც მოსდევს. ბაბუა სიმონი ყოველთვის ამის საუკეთესო მაგალითს იძლეოდა.

ერთი ასეთი შემთხვევაც ყოფილა:

სწორედ რომ მშვენიერია სოფელი საყულია. მდინარე რიონი სამხრეთით მთელ მის ჭალებს გაუვლის ხოლმე. რიონი მის მიდამოებში წყალუხვია, დიდი და ფართო კალაპოტიც აქვს. ამ სოფელში კეცზე პურის მეტად კარგი გამოცხოზა იციან. იქაური ხაჭაპური, და ე. წ. გომიჯი-პური მთელს ქვემო იმერეთში იყო განთქმული. რასაკვირველია, პურის ყანებიც როდი ჰქონდათ საყულიელებს გასაკიცხი. ამ სოფელში მესხების მხოლოდ ერთი ოჯახი ცხოვრობდა — დიმიტრი მესხის ოჯახი. მისი ერთი ძმა — პროკოფი მესხი სიმონს მეგობრობდა. სულ სამნი ძმანი იყვნენ ეს მესხები, მესამე ძმა დათა, თავზებულაღებული მოქეიფე კაცი, უცოლშვილოდ და ძმებთან დაუბრებელი მომკვდარა. სამივე ძმა მეტად ლამაზი ყოფილა. ერთ დღეს დიმიტრის რომელიღაც ოჯახის წევრი ავად გამხდარა. პროკოფის სიმონისთვის უთხოვნია და თავისი ეტლით საყულიაში წაუყვანია. სიმონს ავადმყოფი გაუსინჯავს, წამლები გამოუწერია. იმ ღამეს იქ დარჩენილან. ეტყობა. ავადმყოფი იმ ღამით მოკეთებულა. მესხებს ვახშამიც კარგი გაუმართავთ. იმ წელს ამ სოფელში ბლომად ყოფილან ავადმყოფები. დილით, როცა სოფელელებმა გაიგეს სიმონ ხეჩინოვი აქ არისო, დიმიტრი მესხის კარებს მოასკდნენ.

გაიხედა სიმონმა და გაოცდა. ასი კაცი მაინც იდგა თურმე კარებთან.

—ხოლერობა ხომ არ არის, ნეტავ რა სჭირს ამ ხალხსო?!— დაინტერესებულა სიმონი. ამიტომ იგი გულდასმით შედგო-  
მია ავადმყოფების შესწავლას და მოვლას. როცა შეატყო იმ  
ღამითაც ვერ წამოვიდოდა, სიმონმა პროკოფი მესხის მეეტ-  
ლეს წერილი გამოატანა მეუღლესთან — არ შეშინდე, თუ და-  
მიგვიანდესო. ავადმყოფები კი ბევრზე ბევრი აღმოჩნდა. იქი-  
დან მეზობელ სოფელში ბაშში ცხენით მიიპატიჟეს თურმე  
სიმონი. უარი ვერ უთქვამს, მათაც წაჰყოლია, ერთი კვირა იქაც  
ღარჩენილა. ამ ხნის მანძილზე არც საცვალი გამოუცვლია და  
არც უბანავნია. აბანო ბაშში და საყულიაში მაშინ ვის ჰქონდა?!  
დაიღალა კაცი, თვითონაც ავადმყოფივით ჩამოხმა, დაავადყო-  
ფებული სოფელი კი მაინც არ მიატოვა, ბოლოს, როცა ყველა-  
ფერი მოათავა, ქუთაისისკენ გამოემგზავრა. სოფელ მესხეთ-  
თან (გზაზე) ნახევარი სოფელი დახვდა. ეს „ჩამომრები“, რო-  
გორც მაშინ ქვემო იმერეთში ასეთ ავადმყოფობას ეძახდნენ,  
იმ სოფელსაც ღარეოდა. ამ სოფელში ტორაძეები და შალამბე-  
რიძეები ცხოვრობდნენ. ისინი მაშინ თურმე მეტად ღარიბი  
გლეხები იყვნენ. ძირს დადგმულ ფიცრულ სახლებში ორი თუ  
სამი სიცხიანი ავადმყოფი ხის სკამლოგინებზე იყო მიგდებუ-  
ლი. კვირიკობისთვის ბოლო დღეები იყო. ამ დროს იმერელ ღა-  
რიბ გლეხს მის დღეში არ ჰქონია სასიმიინდეში სიმიინდი ცალ-  
კე ავადმყოფობა და ცალკე შიმშილი სტანჯავდა ხალხს. სიმონს,  
როგორც ეტყობა, ჯიბეში ფული არ ჰქონია. სოფელ ბაკისუბან-  
ში ერთი კარგად შეძლებული ამირეჯიბის ოჯახი ყოფილა. იქ  
გაუგზავნია კაცი და ორასი მანეთი უსესხნია: სადაც შევიდო-  
და, თურმე მანეთს ან ორ მანეთს დაუტოვებდა ხოლმე. ისინიც,  
წამალთან ერთად, თურმე სიმიინდის ფქვილს და ლობიოსაც ყი-  
დულობდნენ, ოჯახს ამით სულს უბრუნებდნენ.

პროკოფი მესხს ეტლი საყულიაში გაუგზავნა. იქ უთქვამთ,  
რამდენი ხანია წამოვიდაო. შეშინებულა მესხი. სიმონის მეუღ-  
ლისთვის ვერ გაუბედავს თქმა: ქალი გაგიყდებოა. სამი დღის  
შემდეგ ამირეჯიბის ოჯახის საშუალებით ტორაძეებში ძლივს  
მიუკვლევია მისთვის.

— ნამეტანი გამიჭირდა, ტანდაუბანელობა! ღამე გავიპა-  
რე, უკანეთის წისქვილების არხში დავიბანე, — უყვებოდა სი-  
მონი პროკოფის, — საცვლები ჩემი ხელით გავრეცხე, იმერულ-

მა სიცხემ დილამდე ყველაფერი გააშრო. დილით ისევ ავადმყოფების მოვლას შევუდექიო.

— ამირეჯიბებს ფული რათ დაესესხეო? — გოცებით უკითხავს პროკოფის.

— კაცო, მიდით ერთი და ნახეთ როგორი გაჭირვებით ცხოვრობენ, წამალზე უფრო სიმინდი სჭირდება ჩვენს გლებს, მეც ცოტა-ცოტას პურის ფულს ვურიგებდი დამშეულ ბავშვებსო.

ღიახ, ასეთი ყოფილა ბაბუა სიმონი და სწორედ ასეთივე დიდი სიყვარულით პროფესორი სიმონ ხეჩინაშვილი (შვილიშვილი) რვა თვის მანძილზე ძმასავით უვლიდა კოლმეურნეობის დურგალს ლევან გოგნაძეს.

იგი ახლა სიტყვებს კარგად მარცვლავს. ხმაც საკმაოდ მაღალი და ბგეროვანი აქვს. ცოტა ხანი კიდევ და ლევანის ყელი ჩვეულებრივად იმოქმედებს. კაცმა არ იცის, ვინ უფრო გაიხარებს ამით, დურგალი ლევან გოგნაძე, თუ პროფესორი სიმონ ხეჩინაშვილი.

ზოგიერთს ექიმობა ადვილი ხელობა ჰგონია, ექიმებს ბევრი დრო და საშუალება აქვთო. ზოგს ჰგონია, რომ ექიმობა მეტად სარფიანი რამ არის — სადაც გინდა, იქ ივლი, ხალხიც დიდ პატივსა გცემს. გულში დარდი არაფრისა გაქვს! ეს მეტად მსუბუქი ადამიანების აზრია ექიმებსა და საერთოდ საექიმო ხელოვნებაზე. ჩვენს სამყაროში ადამიანი მეფეც არის და ღმერთიც. ვინც მის ჯანსა და ღონეს უვლის, მას მკურნალობს, ის უსათუოდ მეტად პატივსაცემია, მაგრამ ექიმი თავშეწირული კაცი უნდა იყოს. მას არ შეუძლია, უფლებაც არ აქვს როცა მძიმე ავადმყოფი ჰყავს, თავის თავს ადამიანურად მიხედოს. სიმონ ხეჩინაშვილის გარშემო პირველ საავადმყოფოში შესანიშნავი კოლექტივი მუშაობს. აქაური ახალგაზრდა ექიმები ნოდარ გვეტაძე, ონანოვი-ვახტანგოვისა, დათო და ბორის ყიფიანები, ჭარმაგი, დამსახურებული ექიმები პ. ასპისოვი, ნაცვლიშვილი და სხვები — მეტად ნიჭიერნი და განათლებული ექიმებია. ახალგაზრდა ექიმი ნანული ძაძამიძე თვალცრემლიანი შესჩიოდა ამხანაგებს: «ექიმობაზე უფრო უბედური ხელობა არ არის ამ ქვეყნად, თუ ჩემი ავადმყოფი მძიმედ არის, არც მეძინება, ვერც საჭმელს ვჭამ ხეირიანად და იმ დღეებში გაცივებულს ვინ მნახავს, არაფერი არ მახარებს. ერთი კვირაა ჩემი ერთი

ფადმყოფი ძალზე ცუდად არის და ადგილი ვერ მინახავს. ისე ვბორგავ. არ ვიცი, სად წავიდეო!”

ახალგაზრდა ექთანი ნათელა ჩიხლაძე, რომელიც სახემშვენიერი და ლამაზი ქალია, კარგა ხანია საოპერაციო დად მუშაობს ხეჩინაშვილთან. ნათელა ახლად დაოჯახებულია. უკვე ერთი ბავშვიც ჰყავს. წელს საექიმოზე შესვლას აპირებს. ნათელა და მისი კოლეგები დილიდან საღამომდე მუშაობენ, რომ საოპერაციო აპარატურა, ინსტრუმენტები და სხვა საშუალებები მზად იყოს. ნათელამ ნანულის უთხრა:

— ექიმი არ ვარ და ამიტომ პასუხისმგებლობაც ცოტა მაქვს, მაგრამ, როცა სიმონი რთულ ოპერაციას აკეთებს, იმ ღამეს არ მეძინება. რატომღაც მთელი ღამე ბავშვს ვუყურებ, მეშინია, ოდესმე მას არ დასჭირდეს ასეთი რამეო.

ღიახ, ნამდვილი ექიმი, ნამდვილი ადამიანი ასე განიცდის სხვა ადამიანების ტკივილებს და ავადმყოფობას. ამიტომ, ცდებიან ზოგიერთი მშობლები, როცა, მის შვილს სურს თუ არა სამედიცინო ინსტიტუტში შესვლა, მაინც იქ მიაბრენინებენ საბუთებს. ასეთ მშობლებს ტყუილად ჰგონიათ, რომ ადვილად ნაშოენი პურით უზრუნველყოფენ თავის მემკვიდრეებს! ექიმობა საშოვარი ადგილი როდია! ექიმი ხალხის სიყვარულით აღსავსე უნდა იყოს, მისთვის უნდა ფიქრობდეს და ზრუნავდეს, ხალხის პატივისცემით უნდა ღვიოდეს მისი გული, ხალხის ჭირი ჭირად მიაჩნდეს და ლხინი — ლხინად. მუდამ ასეთნი იყვნენ ჩვენი ექიმები და ასეთნი უნდა იყვნენ დღესაც!

ჩვენ დღეს ექიმების უბრწყინვალესი თაობა გვყავს. ისინი დიდი, ნათელი სიყვარულით ემსახურებიან ხალხს. პროფესორი სიმონ ხეჩინაშვილი ერთი მათგანი გახლავთ.

ამიტომ იყო, რომ ქუთაისმა შეხვედრა მოუწყო თავის უბეში დაბადებულსა და დავაჟკაცებულ სიმონს. ქალაქის ინტელიგენცია დიდი სიყვარულით და სიამაყით შეხვდა მას. მათი სიამაყე ყველასთვის გასაგებია. ყოველ სოფელს თუ ქალაქს ყოველთვის წმინდა სიყვარულით უყვარს თავისი კარგი შვილი. ასე იყო ყოველთვის და ასე იქნება! მახსოვს და არასდროს დამავიწყდება ერთი ამბავი. ჩვენი საყვარელი მწერალი და მოღვაწე, აწ განსვენებული აკაკი ბელიაშვილი დაღუპვამდე სულ ორი-ოღვე კვირით ადრე პარიზში იყო. როცა ჩამოვიდა, თავის შთა-

ბექდილებებს გვიყვებოდა. იგი ძალიან კმაყოფილი ჩანდა. მან იქ თითქმის ერთი თვე დაჰყო, ასე თუ ისე, ბევრი რამ ნახა და პარიზის სიმშვენიერით გაოცებული და მოხიბლული იყო. ბოლოს ისეთი რამე თქვა, რომ ყველანი გაგვაკვირვა, მართალი გითხრათ, არამც თუ გაგვაოცა, ბევრ ჩვენგანს გულწრფელად სიცილიც წასკდა. ბევრმა ჩვენგანმა მისი ნალაპარაკევი დაცინვად ჩათვალა.

თბილისში კალათბურთელთა ევროპის ჩემპიონატის დასრულებისას ჩვენმა გაზეთებმა სხვადასხვა სახელმწიფოს მწვრთნელებს ინტერვიუ გამოართვეს. ფრანგი კალათბურთელების მწვრთნელი შენატროდა თბილისის სპორტის სასახლეს და გულდაწყვეტით ჩიოდა, ასეთი სასახლე რომ პარიზში იყოს, რა გვიჭირსო.

ეს რომ ჩვეულებრივ საბჭოთა მოქალაქეს პირიდან დასცდენოდა, ჩვენი უცხოეთის მოტრფიალენი მასხარად აიგდებნენ.

განსვენებულმა აკაკიმ მაშინ თქვა:

— გინდა გიჟი დამიძახეთ, გინდა მომკალით, ქუთაისის მსგავსი სილამაზე მაინც ვერ ვპოვე იქო.

მართალი გითხრათ, ყველანი ძალზე გავვოცდით, მით უმეტეს, როცა დავრწმუნდით, რომ აკაკი ამას დაჭერებით ამბობდა.

აკაკი ბელიაშვილს მე ამ უკანასკნელი ათი წლის მანძილზე დავუახლოვდი. მანამდე მას შორიდან, მხოლოდ ნაწარმოებებით ვიცნობდი. ბოლო წლებში მე ყურს ახლოს ვუგდებდი მის ცხოვრებას და მეტად მომწონდა. განათლებული, პირდაპირი, გულწრფელი და მეტად ხალისიანი კაცი იყო. ვერ იტანდა ეშმაკ და გაქნილ ადამიანებს. მას ყველა უყვარდა და ადამიანზე ცუდს ვერ ათქმევინებდი. მხოლოდ ერთხელ მოვისმინე, რომ ის ერთ კაცს ძალზე აუგად იხსენიებდა. გულწრფელად რომ თქვას კაცმა, ის კაცი თითქმის არავის არ უყვარდა. აკაკის თუ არ სჯეროდა, დარწმუნებული თუ არ იყო ვინმეს ავკაცობასა თუ კარგ კაცობაში, არავის არც აძაგებდა და არც აქებდა. ვერასდროს მას სხვის აზრს ვერ მოახვევდით თავზე, ყოველთვის

თავისი აზრი ჰქონდა ამა თუ იმ მოვლენაზე. ამჩატება არ იცოდა. ყოველთვის დაკვირვებით ლაპარაკობდა და წერდა. როცა მისგან პარიზის და ქუთაისის ასეთი შედარება გავიგონე, მეწყინა, დაცინვად მივიღე, ძალზე ავლელდი.

— რა არის, აკაკი, ქუთაისს შენგან დაცინვა არ ეკუთვნის, ბოლოსდაბოლოს იქ გაიზარდე-მეთქი.

სხვათაშორის, აკაკი ბელიაშვილი მოწაფეობის დროს ქუთაისში სწორედ იმ ქუჩაზე (მესხეთის ქუჩაზე) ცხოვრობდა, სადაც მე დავიბადე და გავიზარდე. აკაკიმ იმ წუთშივე შემატყუო წყენა და თვითონაც ჩემზე უფრო მეტად გაბრაზდა.

— რატომ გგონია, რომ ვხუმრობ, ქუთაისი მე არავიზე ნაკლებ არ მიყვარს და მასზე დაცინვას ჩემს შვილსაც არ ვაპატიებ! მე სხვაზე ცუდად არც პარიზის ისტორია ვიცი. მისი არქიტექტურული სიმდიდრის და სილამაზის ფასიც სხვაზე ნაკლებ როდი გამეგება. მე ისიც ვიცი, რომ ეს ქალაქი პარიზის კომუნის მშობელია, ნაპოლეონის, ბალზაკის და სტენდალის ქალაქია, ვიქტორ ჰიუგოს ქალაქია. მარტო ლუვრი თავისი მატერიალური ღირებულებით სამ რესპუბლიკას იყიდის. არა, პარიზსა და ქუთაისს მე ამით კი არ ვადარებ. აბა, მიბრძანდით თქვენ და პარიზში ეძიეთ ისეთი კონინდარით ამწვანებული ეზოები თავისი მშვენიერი ერთსართულიანი სახლებით, როგორიც ქუთაისშია! პარიზში მტერი ბევრჯერ შესულა, მაგრამ ერთი ღობეც კი არ მოუნგრევია. ჩვენთან ყოველი შემოსევის დროს სწვავენ და ანადგურებდნენ ყველაფერს. ეს რომ ასე არ ყოფილიყო, შეიძლება ბაგრატის ტაძარი ბევრად ნაკლებად არ გამოჩენილიყო უმშვენიერეს პარიზის ღვთისმშობლის ტაძართან შედარებით. იმ ქალაქს, რომელსაც ერთი ოქროს წნელით ნაქსოვი ხახულის ღვთისმშობლის ხატი სახატეზე ესვენა, სხვა ქალაქებზე ნაკლებად ვერ ჩავთვლითო, — დაასრულა სახეგაწითლებულმა აკაკიმ.

აი, როგორ უყვარდა აკაკი ბელიაშვილს ქუთაისი და როგორ მოსწონდა კიდეც.

ეს ამბავი იმიტომ გავიხსენე, რომ მეც ქუთაისელი კაცი ვარ. ვინც გულმართლად ფიქრობს და წერს, დამეთანხმება ერთ რამეში: პატარაობიდან ყოველი ადამიანი ფიქრობს დედ-მამას უყვარდეს, და-ძმებს უყვარდეს, თავის სოფელს თუ ქალაქს



არ ეჯავრებოდეს. ადამიანი, რომელიც ფიქრობს თავისი ცხოვრება ხალხის სასარგებლოდ წარმართოს, ყოველთვის ელოლიავენ და ეტრფის თავისი ხალხის აზრს, უფროთხილდება მის სიყვარულს.

როცა პირველი სტრიქონები დავსტამბე, იმ დამეს არ მიძინია. დავიარებოდი, ყველას სახეზე ვაჩერდებოდი, მინდოდა გამეგო, კმაყოფილნი იყვნენ თუ არა ჩემი მეზობლები, ქალაქის მცხოვრებლები.

ბედნიერია სიმონ ხეჩინაშვილი. ქუთაისს ნამდვილად უხარია, რომ მის მიწაზე დაბადებულმა და გაზრდილმა ახალგაზრდა კაცმა ამდენის გაკეთება შეძლო, რომ პროფესორი სიმონ ხეჩინაშვილი, რომელიც ამჟამად საკავშირო აკადემიის წევრ-კორესპონდენტია და ლენინური პრემიის ლაურეატი, მომავალში კიდევ მეტს გაუკეთებს თავის ქვეყანას, თავის მამულს, თავის ქალაქს. ამის თავდებია მისი ასაკი და დიდი მეცნიერული აღლო.

ლევან გოგნაძე სულ ერთი კვირის წინ წავიდა თავის სოფელ საზანოში. ახლა ის დაბალ ხმაზე ლაპარაკობს, სიტყვას გასაგებად მარცვლავს. სოფელში რომ ჩასულა, თავისი ბიჭი ამრეზილი შეხვედრია. ლევანს ხომ ეს მარცხი ორი წლის წინ მოუვიდა, მაშინ მისი ბიჭი ძუძუს ეკიდა. ახლა იგი უკვე ოთხი წლისაა, ლაპარაკიც იცის და ყვირილიც. როგორც ჩანს, ბავშვს შინ და გარეთ სულ ესმოდა, — მამა ავად არის, ხმა აღარა აქვს. ვეღარ ლაპარაკობს, დამუნჯებულაო. მისი ჩვილი გონება, ეტყობა, მამის ასეთი მდგომარეობით ჩაფიქრებული და შეწუხებული იყო. როცა სოფელში ჩავიდა, ბავშვმა ნახა, რომ იგი მშვენიერად ლაპარაკობს. ერთი ცივად აკოცა და აღრიალდა კიდევ:

— რატომ მომატყუეთ მამა მუნჯიაო, დედამაც მომატყუა, ბებიაშაც, ყველამ რატომ მომატყუეთო!

ცხელ-ცხელი, ბავშვური ცრემლები ფართქალით სცვიოდა ბავშვს.

ჰე, რა იცის პატარა ბიჭუნამ, რომ ის დედამ და ბებიაშ კი არა, პროფესორმა სიმონ ხეჩინაშვილმა „მოატყუა“.

ის ჯერ კიდევ პატარაა, მაგრამ როცა გაიზრდება, ისიც იტყვის: — შვილი ისე უნდა გავზარდო, რომ სიმონ ხეჩინაშვილის კვალზე იაროს, დე, მასავით ემსახუროს ჩვენს ხალხსო.

მე ვფიქრობ, თუ შთამომავლობა ასე იტყვის თქვენზე, პატივცემულო სიმონ, მაშინ ნადვილად ბედნიერი კაცი ყოფილხარტ.

დიახ, ნამდვილად!

## თბილისის ბალავერი და გუმბათი

თვითონ სძინავთ, ჩვენ კი გავლავიკავებ

თბილისის ბალავერი ვახტანგ გორგასალს კლდეზე გაუქრია. მის დიდ ხელმწიფურ თვალს და ბრძნულ გონებას წინასწარ მიხვედრით გადმოუხედავს საუკუნეთა გადმოღმა, თავისი მამულის ბედის წყაროს თვალში მისი ხალხის უპირველესი სურვილი — ფეხქვეშ მტკიცე ნიადაგის მოპოვება ამოუკითხავს და ქალაქის ფეხები ისე ჩაუშენებია. მართლაც, ქართველი კაცი ძველთაგან ცდილობდა მის სახლ-კარს, მის სოფელს, მის ქალაქს საფუძვლად მტკიცე ნიადაგი ჰქონოდა. ქართველი კაცის სულიერ გაშლილ ფრთებს ყოველთვის სიმტკიცე, სიმყარე და ფუძეურყვევი ბალავერი სჭირდებოდა. ამიტომ შეჩერებულა ჩვენი მამა-პაპის თვალი კავკასიონის კლდოვან კალთებზე დასასახლებლად. დარუბანდიდან ვიდრე ნაკოპსიამდე მთელი ჩვენი მამული კლდის ძარღვიან ნიადაგზეა დაქვიტვიტებული.

თბილისი ძალიან ჰგავს მთელს ჩვენ სამყოფელ-სამშობლოს. თუმცა ამ სამყაროზე ყველგან ასეა. ყოველი სატახტო ქალაქი თითქმის და უთუოდ გამოხატავს მისი მამულის გეოგრაფიულ თუ სხვა თვისებებს.

რასაკვირველია, თბილისიც ასეა. სხვა ჩვენი ქართული ქალაქებიც განა ასე კლდეზე არ არის დაშენებული?! ქუთაისი თუ მცხეთა, თელავი თუ ჭიათურა, სიღნაღი თუ ზუგდიდი, მახარაძე თუ ცხაკაია. ახლახან გათხრილი ვანის ნაქალაქარიც, რომლის დაბადების თარიღი, საერთოდ, ჩვენი წელთაღრიცხვის სათვლელ მიჯნას ძალზე შორეულად სცილდება, კავკასიონის სამხრეთის კალთის მუხლისთავზე ყოფილა დაბალავრებული.

ჩვენი ზღვისპირა ბოლახ-ქალაქებიც ხომ კავკასიონის კლდოვან ტოტებზე არიან გაშენებულნი? გონიოს, ბათუმის თუ ფოთის ციხე-სიმაგრეთა ბალავართან თავდება კავკასიონის მწვერვალთა ფესვი. ის კი არა, კოლხეთის ოდესღაც გაუვალ ქაობიან დაბლობსაც კი, რომლის ფართობი ერთი ბელურას გადაფრენის ოდენი თუ იქნება, შლამისაგან თუ გადაფხიკავთ. ქვევით უთუოდ კლდის ძარღვს იპოვნით. ასე რომ, კლდე და ქართველი კაცი ქვეყნის დასაბამიდან თანშეზრდილნი არიან. ამ ურყევი ნიადაგის გარეშე ცხოვრება ჩვენი ქვეყნის შვილს ვერ წარმოუდგენია.

ქართველი კაცი კლდეზე სახლობდა, კლდის წყალს სვამდა (მტკვარი, რიონი, ალაზანი, თერგი, ცხენისწყალი, ენგური, ტუხური, სულორი, განა კლდის კაეოვან ძარღვზე არ არიან გათხრილი?) და შეიძლება ამიტომაც თითონაც კლდესავით მაგარი და მტკიცე იყო. ამიტომ იყო ვახტანგ გორგასალი მართალი, რომ თბილისი სწორედ ამ ადგილზე დააფუძნა.

იმიტომ უყვარს ქართველ კაცს თბილისი, რომ ის ასე ჰგავს მთლიან ჩვენს ქვეყანას. ეს ქალაქი ქართველი კაცისათვის პურიც არის და ღვინოც. იგი მისი ჯანღონის საზომია, მისი სულიერი ცხოვრების გუმბათის თავანია.

ქრისტიანულმა სარწმუნოებამ პურის და ღვინის შეღობით თითქოს ადამიანის განწმენდის წამალი მონახა.

მთაწმინდის კალთაზე გატეხილი შოთი პური და ტუჩდახრილი დოქიდან ჭიქაში გადმოღვრილი ყურძნის ნამე ყოველთვის ძალღონეს მატებდა ქართველ კაცს და სიწმინდის შარავანდელით მოსავდა მის სულიერ ცხოვრებას.

ასე იყო და ასე იქნება.

თბილისში ჩამოსული ქართველი კაცი დაადგამს თუ არა ფეხს მის მიწას, თითქოს მზეს სინათლე ემატება, თითქოს ბედნიერების ფერები მრავლდება, რალაცნაირი ძალა ჩაუდგება ძარღვებში, ღონე გაუასკეცდება, ძვალი გაუმაგრდება, სისხლი უფრო გაუთბება და, ღმერთო შენით, გონებაც თითქოს უფრო გაუნათლდება. ერთი სიტყვით, ახლად იბადება. ქვეყნის თვალის გახელას ვინც გათენების უამს ოქროყანასთან ან

მტკვარში ჩატეხილ მეტეხის შაბისფერ კლდის თავთან დახვედ-  
რია, მან იცის თბილისის ვალვიძების ბედნიერება.

არსად ისე არ თენდება, როგორც თბილისში.

ნაშუალამეგს მთელი ქალაქი დაღლილი ისვენებს, ყრუ  
ლამე წევს ნარიყალას კალთებიდან ვიდრე მცხეთის სანახებამ-  
დე, მერმე, ცისკრის ჟამს, სადღაც შუქის ერთი შულო ჯერ ხოხ-  
ბის ფრთასავით თითქოს შიშით და სიჩუმით გაირხევა ქვეყნის  
გუმბათზე, მერე ძალას მოიკრებს სინათლე, ტანზე ხოხბისავე  
ყულ-კისერის ფერებს გაიმრავლებს და ცას შეაფეთქდება; თან-  
დათან ათასი ფერებით გაცისკროვნებული აინთება, ფარშე-  
ვანგის კუდივით გაიშლება და გეგონებათ მისი ცის მაღალ  
ლურჯ გუმბათზე ათი ათასი სალამური დაუკრესო ცის გახს-  
ნისას მტკვარს ზემოდან მეორე მდინარესავით თეთრი ნისლი  
ადგია. თუ კარგად არ დაუკვირდით, მტკვარი ორსართულიანი  
გეგონებათ: ქვედა მდინარე მიდის, ზემოთ მყოფი კი ოზობას  
ქსელივით ერთ ადგილას ირხევა. ამ დროს თბილისის იისფე-  
რით გაგრილებული დილის ნიავი ირემივით მოგაწყურებს  
სუნთქვას.

ღიახ, მეტად კარგია ასეთ დროს თბილისი.

მთელი ღამე დევის გახელილი ცალი თვალვით შენათებუ-  
ლი ნარიყალა გათენებისას დახუჭავს წამწამებს. აი, ამ თხელ  
და გრილ ნისლში თანდათან მალდება მთაწმინდა, შეიშმუშ-  
ნება, ცის მტრედისფერ მაღალ სივრცეში შეცურდება, მერმე  
ნელა დაიწმინდება და მზის თვალწარმტაც შუქთა უთვლელ  
ფერებით სავსე ლივლივა ფარდებში ეხვევა. ამიერიდან უკვე  
იშლება ზღვარი მზიურობასა და თბილისს შორის. მთაწმინდა  
კი მაინც საოცრებაა. ციდან გადმოკიდებულ ღმერთთა საგალო-  
ბელ წალკოტსა ჰგავს.

ამ უწმინდესი მიწის ნაფხვენი დღითა და ღამით მოუშორე-  
ბელ ფიქრად იგრძნობა ყოველი ქართველი კაცის მკერდზე.  
ამიტომ, მართალია, ჩვენი ახალგაზრდობა, როცა საშუალო  
სკოლის დამთავრებისას დიდი შოთას ძეგლთან გავლით მთაწ-  
მინდაზე ადის: იქ ჩვენი მიწის საამაყო აღამიანების საფლა-  
ვებთან ჩაიმუხლებენ და ამით თითქოს ფიცს სდებენ — თქვე-  
ნი ნათელი გზით ვივლით ამქვეყნადო. ღიახ, იციან ჩვენმა ახალ-  
გაზრდებმა, რომ მთაწმინდის საოცნებო მწვანე წალკოტის

კლდოვან ფლატეებზე ჩვენი ერის ტიტანები ჩამუხლებულან, ამ ცისკენ ამალლებულ ბაღნარში წყნარად მიწოლილან და მშვიდად სძინავთ, სძინავთ უშფოთველად, უკვდავთა მარადი; ნათელი ძილით. მათი შრომით და სიბრძნით დამძიმებული ძვლები მხოლოდ მაშინ გაირხვეიან თურმე ქვეყნის შეუმჩნეველად, მამულის ცაზე თუ რაიმე ხიფათი იგრძნეს! მაშინ ისინი შეიღვიძებენ და შეირხვეიან. გააჯრკოლებს მდინარეებს და სოფლებს, ქალაქებსა და მწვერვალებს. გააჯრკოლებს ხესა და მიწას და ქართლის სამყოფელიც შეზრიალდება. ასეთ დროს, ალბათ, მიწის გულშიაც შეკანკალდება ჩვენი მამულის ფესვი.

მათი გარხევა იღუმალ გადაეცემა ერის სუნთქვას და მის სასიცოცხლო ნატამალს.

და მაშინ მთელი ერი უკლებლივ და ერთგულად მიდის მათ ნაჩვენებ გზაზე.

ჩვენი ქვეყანა კლდეზე დაშენებული იმიტომაც არის, რომ დიდი მიწიერი შერყევების დროს ქვეყანას ბალავერი მტკიცე უნდა ჰქონდეს, იგი არ უნდა გაიბზაროს, გაუტეხლად შეინახოს; ყოველ ქვეყნის აღრევის უამს მტკიცე და კლდის ძარღვივით მაგარი დარჩეს. ამიტომ სძინავთ მთაწმინდაზე ამ დიდ გოლიათებს უკვდავების მუღმივ შუქის ქვეშ მშვიდად.

მათ სძინავთ და ჩვენ კი გვალვიძებენ. გვალვიძებენ მამულის სიყვარულისათვის, გონიერებისათვის, სიბრძნისა და გმირობისათვის.

ისინი თვალმოუშორებლივ გადმოგვყურებენ უკვდავების საზღვარგადაღმიდან. ერს თვალის შუქს უმატებენ, მის სიწმინდეს, მის ჭანსა და დიდებას დარაჯობენ. მის მომავალს ჩაუქრობელი ლამპარით გზას უკვლევენ.

მათ მშვიდად სძინავთ მთაწმინდის კლდოვან ფლატეზე და წყნარად გაჰყურებენ კავკასიონის მაღალ მწვერვალებს. მუდამ ყინულით მოსილ, ცად ასულ ამ მწვერვალთა ფესვი ქართლის ფესვს შეჰკირვია, შედუღებია, შესისხლხორცებია. მათი თეთრი, მაღალი მწვერვალები კი ცის უსაზღვრო ლურჯ გუმბათს შეტოტებია. მის მაღალ თავანს, სამყაროს თავანს, ტიტანურ სვეტებივით შებჯენია. ამბობენ, კოსმიური შერყევების დროს ისინი ცას ამაგრებენ, ებჯინებიან. ამით ისინი ქართლის მიწა-წყალს უბედურ ფათერაკისგან იცავენ.

ამიტომ სძინავთ ჩვენი მამულის ტიტანებს უკვდავების შუქ-  
მფინარ ნისლებში თურმე მშვიდად.

მათ იციან, საქართველოს ბალავერი კლდის ძარღვზეა დაქ-  
ვიტკირებული, ამიტომ იგი მტკიცეა და ურყევე. ცის გუმბა-  
თიც კავკასიონის უმტკიცეს კლდოვან მაღალ მწვერვალებზეა  
გადახურული. იგი არასდროს არც შეიბღალება და არც გა-  
იბზარება. როგორც ამბობენ, ისეთი ლაყვარდოვანი და წმინდაა,  
არასდროს ჭუჭყი არ მიეკარება. აი, რატომ ყოფილან კავკასი-  
ონის მწვერვალები ასე მაღალნი და ცის თავანზე ასე მტკიცედ  
მიბჯენილნი, რატომ ყოფილან ასეთი მტკიცე და შეურყეველნი,  
ძარღვდაუფხვნილი და გამძლე!

სწორედ ამიტომ სძინავთ მთაწმინდაზე ქართველის გოლი-  
ათებს მშვიდად და უშფოთველად.

მათ კარგად იციან თავისი ქვეყნის ბალავრის სიმტკიცე და  
ცის უბზარობა, მათი გაუტეხელობა და სიმტკიცე, სისუფთა-  
ვე და სიწმინდე. ამიტომ წყნარად ჩამუხლებულან და უკვდავე-  
ბის მუდმივ სინათლეში სძინავთ.

თვითონ სძინავთ, ჩვენ კი გვალვიძებენ!

### ლომს ბრძვალნი არ დაუცვამება

ღიახ, ჩვენი ერის ამ ტიტანებს თვითონ სძინავთ და ჩვენ  
გვალვიძებენ. ჯერ კიდევ თავის სიცოცხლეში ამ დალოცვილებს  
თითქოს ხელისგულზე ეწერათ ჩვენი მამულის ბედი და მომავ-  
ალი. ახლაც გვაოცებს ვაჟას წინასწარმეტყველური, მეტად  
ბასრად თქმული სტრიქონები. ვის დაავიწყდება მისი დიდი  
შოთასადმი მიძღვნილი ბჭკარები:

„მართლდება შენი ნათქვამი  
ათასზე, ვანა ერთზედა?!  
თავისუფლდება მონები,  
შენ გულს რომ გვირდა წყლულადა,  
ნებეთა და ვარდთაც ლამის რომ  
მზე მოფინოს სწორადა“.

ამას რევოლუციის წინა წლებში წინასწარმეტყველებდა  
ჩვენი კლდეძარღვიანი მიწის პოეტი. მისმა გონებამ და დიდმა

ინტუიციამ რევოლუციის მოახლოება იგრძნო და ეს ხალხთა დიდი მომავალი თავის მამას, ჩვენი ერის დიდი და ნათელი აზრების შეუცვლელ ტიტანს შოთას, როგორც მხედრები იტყვიან, უპატაკა.

აბა, ვინ იყო შოთას შემცვლელი, ვისთვისაც ვაჟა-ფშაველას თავისი სიხარული უნდა გაენდო?! რასაკვირველია, არავინ. იგრძნო რა ეს დიდი მომავალი მან, დიდ შოთას გაუმხილა თავისი დიდი სიხარული. ვაჟა თვითონვე ჩვენი მიწის ნიადაგისგან, მისი კლდე-ძარღვისაგან ქსოვდა სტრიქონებს. და, როცა მთაწმინდის უკვდავთა სავანეში თვითონაც კლდეზე მიწოლილა და თავსასთუმლად კლდის ნაპობი უდევს, იგი ისევ გვახსენებს თავის თავს და თვითონ მშვიდად მიძინებული ისევ გვაღვიძებს:

„რა ტურფა სანახავია  
ქვეყანა ჰკვათა მყოფელი,  
ერთის ფიქრით და გრძნობითა  
გამტკიცებული სოფელი“.

თითქოს დღევანდელ დღეს მთელი ძალღონით ესიტყვება ვაჟას ეს სტრიქონები! ვაჟას პოეზია არის კავკასიონის მწვერვალების შეუდარებელი ჰიმნი. მისი ლექსის ბალავერი ქართული ნიადაგისაგან, მისი მიწის წებოსგან, მისი კლდის კაჟისგან არის ნაქსოვი. როცა ვაჟას ვკითხულობ, მგონია კავკასიონის მაღალი, თეთრად შენათებული მწვერვალები მზის ახლოს ღმერთებთან საგალობლად თუ სამწირველოდ აბრიალებული კერასხებიან. ვაჟას ლექსი კი სწორედ ის საგალობელია, რომელიც, ლილესი არ იყოს, მხოლოდ და მხოლოდ ამ მწვერვალების კალთებზე თუ დაიწერებოდა! და განა მარტო ვაჟა აღვიძებდა თავის მამულს?

სიცოცხლეშივე მიგვიძლოდა დიდი ილია თავისი ტიტანური გმირული სულისკვეთებით გამარჯვებისკენ.

რვა საუკუნის მანძილზე დაღლილი, დათენთილი და მიძინებული მამული გაარხია და გააღვიძა მისმა კალამმა და სიბრძნემ. მისი ნაბიჯი ლომის ნაბიჯი იყო, მისი ფიქრი და აზრი არწივთა ფრთების სიღონივრით მოქნეული ერის გასაფრენი ძალა გახლდათ.

მან, მხოლოდ მან შეძლო თითქმის ნახევარი საუკუნის მან-



ძილზე შემოეკრიბა მთელი ჩვენი ერი თავისი მაღალი და ჰემ-  
მარიტად ბრძნული აზრების გარშემო. მის გვერდით დადგა  
ქართული ლექსის უდიდესი ჯადოქარი და ლმერთკაცი დიდი  
აკაკი. აკაკიმ, ისე როგორც ილიამ, თავისი სიცოცხლის მზედ  
და მთვარედ თავისი მამულის ბედის შემობრუნება გაიხადა.  
ამ ორმა ადამიანმა უხმლოდ, მაგრამ ხმალზე უფრო  
ძლიერად დარაზმა ქართველი ხალხი თავისი სამშობლოს დი-  
დი სიყვარულის გარშემო. მათ ისევ აანთეს ის დიდი ნაპერ-  
წკალი თავისი ერის გულში, რომელიც ერთ დროს ადამიანთა  
შორის ამირანის მიერ მოტანილმა ცეცხლმა ააგიზგიზა.

მათ დააარსეს გაზეთი, დაბეჭდეს წიგნი, შექმნეს მომავლის  
ძლიერი ფილოსოფია, შემოიკრიბეს მაშინდელი ინტელიგენ-  
ცია, განამტკიცეს ჩვენს ხალხში მამულის მტკიცე და შე-  
ურყვენელი სიყვარული, აღამაღლეს თავისუფლების დიადი  
რწმენა.

მთაწმინდაზე წვანან მათი თანამოკალმენი და თანამებრ-  
ძოლნი. მათი შუბლი დიდი სინათლით არის განათებული.

მათ სძინავთ უკვდავთა მშვიდი ძილით. მათ სძინავთ და  
ჩვენ კი გვალვიძებენ.

აბა, ვის არ ააფორიაქებს და არ მოიხმობს გალაკტიონის  
ლექსები? „დროშები ჩქარა, დროშები ჩქარა“-ო დაიგრგვინა  
მისმა დიდმა ხმამ ოქტომბრის დღეებში რევოლუციისავე მშო-  
ბელ ქალაქში. დაიგრგვინა და მაღალთა შორის ერთმა უპირ-  
ველესმა შეჰლალადა მსოფლიოს ახალი სამყაროს დაბადება:

„დავდგეთ იქ, სადაც ქარიშხალია  
და სისხლიანი დგას ანგელოსი,  
ახალ ცხოვრებას ვწირავთ სიცოცხლეს  
ჩვენ პოეტები საქართველოსი“.

ამის თქმის უფლება ორ კაცს ჰქონდა იმ დროს — ამერი-  
კელ ჯონ რიდს და თბილისიდან ჩასულ ჯერ კიდევ თითქმის  
უწვერულვამო ქართველ ვაჟკაცს გალაკტიონ ტაბიძეს.

სწორედ მთაწმინდის მულამ მღვიძარე სიბრძნემ ათქმევინა  
გალაკტიონს ეს სათქმელი. მის დღევანდელ დღეს წინ მიუძღო-  
და ვაჟა, აკაკი, ილია, ბარათაშვილი და ბრძენთა შორის უბრძნე-  
სი შოთას შუბლის სინათლე, რომლის საფლავი დვითეული

ქართველის გულია, თვითეული ქართველის შუბლია. მისი ფიქრი და დიდი ხელოვნებით ნათქვამი ლექსი ყოველმა ქართველმა ზეპირად იცის.

### რუსთაველის ქუჩა

თბილისის რუსთაველის ქუჩა ქართველი ერის ქუჩაა. არსად ისე ქართველ კაცს არ უხარია გავლა და გახედ-გამოხედვა, როგორც ამ ქუჩაზე. მშვენიერად ნაგები სახლები და სასახლეები, თეატრები და კინოდარბაზები, მწვანე ფოთლოვანი ბაღები, მუდამ გრილი, სულის ამოსათქმელი ხეივნები, თუ დასასვენებლად ჩასამუხლებელი სკვერები, დიდებული ტროტუარები და ეუუუნა წვიმით ოდნავ შენამული, ქუჩაზე უმშვენიერესად გაფენილი, თითქოს შავი ყაითნით ნაქსოვი ნოხი — ასფალტი. აი, რა აჯადოებს და ხიბლავს ამ ქუჩაზე ყველა ერის კაცს. ამ ბოლო წლებში ხომ იგი კიდევ მეტად გამდიდრდა და დამშვენდა. საოპერო თეატრის ეზოს მეტად გემოვნებით გალამაზებამ, ქაშვეთის წინ ჩასამუხლებელმა, ძეწნის ქოლგის ქვეშ შეფარებულმა, უმშვენიერესმა ხეივანმა, მის ვადმოღმა მდგარმა ილიამ და აკაკიმ დიდებულება შემატა მთელ თბილისს. და მაინც, რასაკვირველია, „იმელი“-ს შენობა უსათუოდ რუსთაველის ქუჩის სიამაყეა. ეს შენობა რევოლუციის მონაპოვარია. მე ვიტყვოდი, ამ შენობის კედლების ცად ამალღებული სვეტებით და შუბლით საოცრად იგრძნობა რევოლუციის მკერდგაშლილი სუნთქვა და დიდებულება. არქიტექტორი შჩუსევი და თამარ აბაკელია — აი, ამ შენობის ორი შემქმნელი. თამარ აბაკელია უდიდესი და უნიჭიერესი მოვლენაა ქართველ ქალთა შორის. და განა მარტო ქართველ ქალთა შორის? მისი საოცრად სიცოცხლით სავსე ხორცსავსე ქანდაკებანი, დავით სასუნცის ილუსტრირება თუ იმელის შუბლზე ქვით ნაქარგი ჩვენი ხალხის ისტორია თაობიდან თაობას გადაეცემა.

თამარ აბაკელია, როგორც მხატვარი და მოქანდაკე, ჩვენი მამულის სასიქადულო ქალია. მისი ფერები თალხში დაბუდრებული ვაჟკაცური დიდებულება! მისი ხაზები გმირული და თანაც სულის ამალღებული ჰიმნია. მისი შემოქმედება პირმშოა

რევოლუციისაგან განთავისუფლებული და ამაღლებული ქალისა.

მეტად ლამაზია ეს ქუჩა, როცა ჭადრების ტოტებს შუა მზის სხივები ჩამოიპარება. მაშინ ასფალტზე ჩრდილები და მზის ოქროსფერი ნაფლეთები ერთმანეთს წაეპაექრებიან. იქით-აქეთ სასახლეთა ფიქალი კედლების სხვადასხვა ფერები ზემოდან გადმოერევათ და ამ დროს რუსთაველის ქუჩა გადასახტომად გამზადებულ ვეფხვის ზურგსა ჰგავს. ჭეშმარიტად, რომ რუსთაველის პროსპექტია!

თუ კეცხოველის ქუჩიდან ამოსულხარტ და ვეფხისფერ ქვით ნაშენებ მთავრობის სასახლის ცად ატყორცნილ სვეტებს შუა მთაწმინდისკენ გაგიხედიათ, განა არ გიფიქრიათ, რომ ეს კიბეები ცისკენ მიმავალ კიბეებს გვანან?

დიახ, მეტად კარგი გამოვიდა ეს მართლაც მშვენიერი სასახლე. მისმა კედლებმა ნამდვილად დაამშვენეს და დიდებულება შემატეს რუსთაველის ულამაზეს პროსპექტს.

რუსთაველის პროსპექტი ჩრდილოეთიდან ლენინის ქუჩით იწყება და სამხრეთით ლენინისვე დიდი მოედნით მთავრდება. ეს მოედანი ჩვენი სატახტო ქალაქის მთავარი მოედანია.

ამ მოედანზე აღმართულია ლენინის დიდი მონუმენტი. მალე, სულ მალე, ცეკავშირის ყოფილი შენობის ნაცვლად, არქიტექტორ გივი მელქაძის პროექტით, მოედნის ჩრდილო-აღმოსავლეთით ააშენებენ მაღალ მრავალსართულიან შენობას, ეს უსათოდ კიდევ მეტად გაამდიდრებს ამ მოედანს. აქვე, არქიტექტორ რეზო ბარათაშვილის პროექტით, აშენდება დიდი უნივერსალური სავაჭრო სახლი. ამ სახლის მშენებლობის უფროსი და დირექტორი გიორგი ხვინგია მეტად მდიდრულად გვიხატავს ამ მომავალ სავაჭრო შენობას. მისი აზრით. ამიერკავკასიაში ეს სახლი იქნება ერთ-ერთი მეტად დიდი და თანამედროვე სავაჭრო საქმის ტექნიკური მიღწევებით გაამდიდრებული შენობა. სავაჭრო სახლის ქვემოთ იქნება მეტროს სადგური. რუსთაველის პროსპექტზევე, ვერის დაღმართის დასაწყისში აღიმართა თბილისის პირველი ცათამბხევკი, სასტუმრო „ივერიის“ ოცსართულიანი შენობა. იგი დააპროექტა არქიტექტორმა კალანდარაშვილმა. გარედან მისი კედლების ფერი შაბიამნის ფერისაა და

ყარგად ესიტყვება მტ.ვარზე შემონათებულ დილას. ასეთი ნი-  
მალის შენობები ჯერ ჩვენს ქალაქში არ ყოფილა. ჩვენს დრო-  
ში კი ქალაქის კულტურას და გემოვნებას ხშირად ასეთი ცა-  
თამხვეკების სიმრავლითა და დამკვიდრებით განსაზღვრავენ.  
უახლოეს დროში ასეთი მაღალი ოცსართულიანი შენობები  
გათვალისწინებულია ერთი ჯორჯიაშვილის ქუჩის და საინ-  
ჟინერო ქუჩის შესაყარზე, მეორე კი სპორტის სასახლის წინ-  
ორივე ეს ცათამხვეკი სასტუმროებად არის გათვალისწინებუ-  
ლი და თავისი არქიტექტურული გადაწყვეტით უსათუოდ გა-  
ამდიდრებენ და გაამრავალფეროვნებენ თბილისის მიწას.

ჩვენი ქალაქის მთავარმა და მეტად ნიჭიერმა არქიტექ-  
ტორმა ივანე ჩხენკელმა დააპროექტა მელიქიშვილის  
და ლენინის ქუჩის შესაყარზე კინო-საკონცერტო დარ-  
ბაზი. ეს შენობა სადაცაა დამთავრდება და ახლავე მეტად  
კარგ შთაბეჭდილებას სტოვებს ყოველ თბილისელ მოქალაქე-  
ზე. რასაკვირველია, წინასწარ თქმა არც ისე ადვილია, მაგრამ  
მისი გარეთა ხედი უთუოდ საინტერესოდ მოჩანს. დაინტერე-  
სებული თბილისელები გულის ფანცქალით მოელიან ამ შენო-  
ბის დასრულებას. ასე რომ, რუსთაველის პროსპექტი კიდევ  
უფრო გალამაზდება და დამშვენდება, კიდევ მეტად გამდიდრ-  
დება და სასიამოვნო გახდება.

საღამო ხანს რუსთაველის პროსპექტი ხალხით ივსება.  
დღესავით განათებული ქუჩა მაღალი გემოვნებით ჩაცმული  
ადამიანებით ივსება. მათი სახეები ბედნიერია, მათი ყოფაქ-  
ცევა დახვეწილია და გონიერი. ისინი მიიჩქარიან თეატრებში,  
მუზეუმებში, ბიბლიოთეკებში, კინოებში. ამ ქუჩით მიდიან  
ისინი ბაღებში, სპორტულ დარბაზებში და მტკვრის სანაპირო  
ხეივანებში.

ეს ქუჩა თითქოს საქართველოს გულის მთავარი არტერიაა,  
მისი მთავარი ქუჩაა.

ამიტომ უყვარს იგი ყოველ ქართველს.

თბილისში მზიანი დღე ბიბლიურ სამოთხის დღესა ჰგავს.  
ასეთ დროს ქვაც და მიწაც შემოგზარის, ყველაფერი გალობს,  
ცას შეჰღალადებს. გაზაფხული უცებ შემოვარდება ქალაქში,  
თან მოიტანს ყოჩივარდს და ენძელას, სურნელებით გამაბრუ-  
ებელ .ის პაწაწა კონებს, ციდან ვადმოკიდებულ მთაწმინდის

ფერდობზე ერთბაშად აბრიალდებიან და ჭიაკოკონებივით აინ-  
თებიან ტყემლის, ატმის და ნუშის ხეები. ისინი ინთებიან თბი-  
ლისელების სულშიც. მზით ივსება ჩვენი სახლკარი, ქუჩები, მო-  
ედნები. მიწა ისე უცებ თბება, თითქოს მეორე მზე ქვესკნე-  
ლიდან ათბობდეს მას. თბილისის ცა იწმინდება, ლურჯი გუმ-  
ბათი უფრო მაღალი და ლაქევარდოვანი ხდება. შიგდაშიგ ასეთ  
ლაქევარდებში თითქოს მუსიკის საოცარი ჟრუანტელმომგვრე-  
ლი აკორდები გადაიგრიალებენ ხოლმე. ასეთ დროს მთაწმინ-  
დაზე ასვლა და გადმოხედვა ლაქევარდებში გაფრენას ჰგავს. ახ-  
ლად ნაწვიმარი ჩვენი ქალაქი ახლად დაბადებულევით უცოდ-  
ველად და უმანკოდ იყურება.

თბილისის ზაფხულის დღე ცხელია, ძვალისა და რბილის  
გამთბობია. ამ ბოლო წლებში თითქოს ცოტა უფრო აგრილდა.  
წინათ უფრო ცხელოდა. ზაფხულში მსხვილწვეთებიანი წვიმა  
წამოუშენს შავი ღრუბლებიდან. ისინი კალმახთა ლიფსიტები-  
ვით მოქშუიან ჰაერში და თავპირზე დაშხაპუნების დროს თით-  
ქოს ფართქალებენ კიდევც.

ასეთ დროს მიყვარს ვაკის თავში ყოფნა, სწორედ იქ, სა-  
დაც ახლად დატევრებულ ვაკის ბალის აშვებული შადრევნები  
ცას შეფრქვეულნი ჰაერშივე თეთრად სდულან და კელაბტ-  
რობენ. ციდანაც წყალი მოდის შხაპუნით და მიწიდან ღრუბ-  
ლებამდე თითქოს წყლის სვეტები ამალღებულან. ყველაფერი  
სველია გარშემო, ყველაფერი წყლიანია. დასველებული წყნე-  
თელი თუ კიკეთელი გლეხი ავტობუსიდან ცალყბად იყურე-  
ბა და ილიმება. მას ქვეყნის სინედლე ახარება.

არცთუ იშვიათად ხოშაკაკალი თუ სეტყვა აგრიალდება ქა-  
ლაქში. ასეთ დროს მეჩვენება, კავკასიონზე დაჯახებულ ჭიხვე-  
ბის რქების ცივი ნაპერწკალი აქეთ სცვივა-მეთქი.

მეტად საყვარელი პარკია ვაკის პარკი. იგი სულ ახლახანს  
აშენდა, მაგრამ ხეები მაღლა აიყარნენ, ტყედ იქცნენ, ალაგ-  
-ალაგ გაუვალი ტევრებით ჩადამებულან. მისი ბილიკები კუს  
ტბისკენ მალღდებიან და მთაწმინდის კალთებს უერთდებიან,  
აქედან კი ნარიყალას გადმოსახედებთან ბოტანიკური ბალის  
ფართე და ლამაზი ხეივნები უხვევენ. ასე რომ, თბილისი დასაფ-  
ლეთ-სამხრეთის კედლიდან თვალსანეტარო მწვანე ტყე-ბაღე-  
ბით არის შემორაგული.

თბილისში ქარი ნაკლებად იცის, მაგრამ როცა შემოვარდება იგი, ძუ მგელივით ღრენით ეცემა ადამიანების ძვალ-რბილსაც და სულსაც. ყველაზე ძლიერად საბურთალოს ახალგაშენებულ ქუჩებსა და სახლებს უტევს ქარი. თან მიაქვს კირის, ცემენტისა და ცხელი ასფალტის სუნი. ჯერ კიდევ აგურგაუმშრალი რვასართულიანი ბინების შუა ქშილით დათარეშობს იგი და სარგებლობს იმით, რომ იმ მხარეზე ნარგავების სიმცირეა. საბურთალოს ქარი და ახალი ბინები ღვიძლებივით გვანან ერთმანეთს. როგორც ერთი ქუჩის ქარს ვერ გაარჩევ მეორისაგან, ისე ერთი ქუჩის ბინას ვერ განასხვავებ მეორისაგან. ქარი აზროვნებას ართმევს ადამიანს. ამიტომ არ მიყვარს იგი.

თბილისში სამაგიეროდ კარგია შემოდგომა. იგი, როგორც იტყვიან, ნეტარების დროა ჩვენს ქალაქში. მზე უფრო ოქროსფერი და ალერსიანი ხდება, დილა ცინცხალია და ხალისით სავსე, საღამო შუბლგახსნილია და გრილი. თონეებთან ახალი პურის სუნი დაგზაფრავთ. სავაჭროებიდან ყურძნის და ატმის სურნელება გაგაბრუებთ.

ადამიანები უფრო ჯანღონით სავსენი იყურებიან. ბაღებსა და სანაპირო ხეივანებში ხეთა მწიფე ფოთლები ღვივის.

სპორტის სასახლესთან მოედანი დიდია. ერთი მხრით თითონ სასახლე დგას, რომლის გუმბათი და შიგა საჯღომები უთუოდ უნიკალურია და სახარბიელოდ გაკეთებული. როცა იქ ზიხარ, გეჩვენება საღლაც კავკასიონის მწვეანე კლდეფერდზე ხარ ჩამომჯდარი. მოედნის გადმოღმა ბრწყინვალე სრა-სასახლეებია — პოლიტექნიკური ინსტიტუტის შენობები, აკადემიის საცხოვრებელი სახლი.

საერთოდ, ეს მოედანი უთუოდ ულამაზესი და სისხლსავსე მოედანია.

მე მეტად მომწონს საბურთალოდან ვაკის გასასვლელთან კლდეზე გაჭრილი გზა. აი ქუჩა, რომელიც სამაგალითოა ყველა ქუჩის მშენებლისათვის. როდესაც საბურთალოდან ვაკისკენ ამოვდივარ, მგონია ცისკენ ამართულ გზას მივყვები. შუაში მშვენიერი ხეივანები, აქეთ-იქით ვეფხისფერი კლდის ჩამოკვეთილი ბუნებრივი კედლები.

მითხრეს, აქ გათვალისწინებულია იმავე კლდეშივე გამოიკვეთოს ვაჟასა და ყაზბეგის პორტრეტებიო.

მართლაც, რომ მშვენიერი და ორიგინალური იქნება ამ ჩანაფიქრის განხორციელება. ქალაქი თანდათან მშვენიერდება. ესეც ერთი ულამაზესი კუთხეა ჩვენი ახალი თბილისის.

ყოველი თბილისელის თვალს ახარებს და აამაყებს ბარათაშვილის ხიდის მიდამოების ესოდენ გემოვნებით გადაკეთება. გადაკეთება კი არა, ახლად აშენება. მეტად ორიგინალური ხიდის გადასასვლელებს უხდება ფართოდ გაშლილი, თითქოს თეატრალურ-დეკორატიული სილამაზით დახატული, ერთმანეთში გეგმიანად გადახლართული გზები და ტროტუარები.

ბარათაშვილის აღმართზე მუდამ სველი კლდის ნაყური წყალი ჩაღურღლავს მტკვარს. ხიდიც და გზის კიდეებიც კლდისფერი ქვით არის მოპირკეთებული, ამიტომ მთელი ეს ნიღამო ერთ მთლიან ქვაში ამოკვეთილსა ჰგავს.

ახლა მთავარია ლენინის მოედანთან მისასვლელების სრული რეკონსტრუქცია.

მეტეხის ქვემოთ მიდამო უკანასკნელ ორ-სამ წელში სრულიად გამოიცვალა. მარჯვენა სანაპირო ქუჩის გაშლამ და გამოძერწვამ, ბალნეოლოგიური სამკურნალო ქალაქის გაშენებამ, მტკვრის დაწმენდილ მოციმციმე სილურჯეში თუ ცის ლაქვარდებში გადმოკიდებულ სამასი არაგველის კლდე-ძეგლის აღმართვამ, ქალაქის ამ ნაწილს სულ სხვა იერი და სილამაზე მისცა.

სულ ახლო ხანში აქვე აღიმართა მაჩაბლის კედელი. ეს ის პირველი ქართველი ხელოვანი — მსახიობია, რომელიც, გადმოცემით, ერეკლეს სასახლის თეატრს ხელმძღვანელობდა და ბრძოლებში გასამხნეველად მიუძღოდა ალა მაჰმად ხანის წინააღმდეგ ქართველთა ლაშქარს. იგი თითქოს სწორედ ამ ადგილებში დაეცა ბრძოლის ველზე: ახლა მადლიერი ხალხი დიდი რევოლუციის 50 წლისთავზე უკვდავების კედელს უგებს მას. დე, გაიგონ ჩვენმა შვილებმა და შვილიშვილებმა, როგორი წინაპარი ჰყავდა ლადო მესხიშვილს, რომელიც თითონაც ბარიკადებზე, თოფით ხელში ებრძოდა შავრაზმელთა ზროვას.

აი საიდან მოდის კოტე მარჯანიშვილის, ალექსანდრე ახმეტელის, ალექსანდრე იმედაშვილის, უშანგი ჩხეიძის, შალვა ღამბაშიძისა და გიორგი შავგულიძის მემკვიდრეობის სინათლე. ეს სწორედ პირველი თბილისელი მსახიობია, რომლის სი-

ცოცხლე ასე წმინდა კელაპტარივით აინთო კრწანისის მისას-  
ვლელებთან.

ფირუზისფრად შებოლილ მეტეხის კლდეფერდსა და მთელ  
თბილისს გადმოსცქერის მისი ბალავერის გამკრელი, ვახტანგ  
მგელ-ლომ მუზარადიანი გორგასალი. ეს ბრძენი მეფე, ელგუ-  
ჯა ამაშუყელის ხელით ქვაში ჩათქმული და ქვის ცხენზევე შე-  
მართული, უკვდავებიდან გადმოვიდა და ჩვენ თვალგასახარად  
აქ დაბრძანდა. დიახ, დიდე ოქტომბრის რევოლუცია უდიდეს  
პატივსა სცემს ყოველ შემოქმედს. იგი არ ანსხვავებს არავის  
და, მზის არ იყოს, ყველას ერთნაირად ათბობს, მხოლოდ იგი  
ადამიანი იყოს, შემოქმედი იყოს, შუბლი ადამიანთა სიკეთეზე  
ნაფიქრალი ღარებით ჰქონდეს დანაოქებული და ხელიც სუფ-  
თა ჰქონდეს. სწორედ ამიტომ დადგა ჩვენი ხელისუფლებამ  
ორი მეფის ძეგლი: მოსკოვში — იური დოლგორუკისა, თბი-  
ლისში — მეტეხის გადმოსახედზე — ვახტანგ გორგასალისა.  
რევოლუცია ებრძოდა მეფის ტახტს, რომელიც მილიონების  
კისერზე იყო შედგმული და არა დიდ შემოქმედებას და ადა-  
მიანთა სიყვარულს. რევოლუცია, უპირველეს ყოვლისა, ადა-  
მიანთა სიყვარულსა თუ ძმობას ნიშნავს და კიდევ, ღვაწლმო-  
სილ ადამიანთა ამაღლებას...

დღევანდელ თბილისს საჰაერო გზებიც ამშვენებს და მი-  
წისქვეშა ულამაზესი მეტროც.

ჰაერში დაკიდებული ვაგონები, ერთი წყვილი მთაწმინდის  
მალლობისკენ და მეორე კუს ტბისკენ, ფერადი ბუშტებივით  
მიფრინავენ. ჩვენი ქალაქის მთავარ შემოქმედს, თბი-  
ლისელ მშრომელ კაცს საშუალება აქვს თავისი ოჯახი სიცხიან  
დღეს გრილ ადგილებში აიყვანოს და ისიამოვნოს, მას უფლება  
აქვს დაისვენოს და სწორედ ამ მიზნით დაფრინავენ ეს ფერადი  
ვაგონებიც.

ქართველი ხალხის სიამაყე კი მაინც მეტროა. მიწისქვეშა  
რკინიგზა, მეტროის ქვეშ მასზე გაფრენილი ელვა-ვაგონები,  
მისი უმშვენიერესი სადგურები თუ მოედნები, მათი ფერადი  
მარმარილოთი ნაქსოვი კედლები, ერის დიდ სიყვარულს ამტკი-  
ცებს და მის სულიერ გუმბათს სწევს მაღლა.

ამ მიწის პირზე უდიდესი ქვეყნების უმთავრეს ქალაქებ-  
საც კი ვერ შეუქმნია მიწისქვეშა ასეთი ტრანსპორტი. პირვე-



ლად თბილისელმა კაცმა თითქოს არც კი დაიჯერა ეს. წინათ სულ მცირე საქმეზეც კი ისეთი ხმაური ატყდებოდა, რომ კვამლის კორიანტელი დგებოდა. ახლა კი ასეთი დიდი და ძვირფასი საქმე უხმაუროდ, მოკრძალებით და მართლაც რომ კომუნისტური სინდისითა და გემოვნებით გაკეთდა.

ჩვენი მამულის გაოცებული მშრომელები ჩამოდიოდნენ სოფლებიდან, ქალაქებიდან, საკურორტო დასახლებებიდან და მიწისქვეშა მოედნები ივსებოდა ადამიანებით, იქმნებოდა უსაშველო რიგები. ადამიანებს უნდოდათ ენახათ ეს ფერადი ზღაპარივით ნაქსოვი მტკვრისქვეშა გვირაბები. ნახეს და დიდად გაიხარეს კიდევ, ნამდვილად დიდად შეიყვარეს. მართლაც, არ შეიძლება რუსთაველის თუ მარჯანიშვილის მეტროს სადგურებზე თვალშეველებულმა კაცმა სიყვარულით არ გაიხსენოს ვინც ასე მდიდრულად, სიმშვენიერით და ერის დიდი სიყვარულით გამოძეწა თბილისის მეტროპოლიტენი, ვინც ის ჩაიფიქრა და ასე ლამაზად განახორციელა. ადამიანები ილტვიან სილამაზისა და სიმშვენიერის შესაქმნელად. ცხოვრება დღეს კატეგორიულად მოითხოვს მის გარშემო ყველა ნივთი თუ მოვლენა, რომელიც ადამიანის ხელითა და ადამიანისათვის კეთდება, იყოს გონიერი და მშვენიერი.

ამიტომ ერთნაირად ფასდებიან და საზოგადოების თვალში პატივისცემით მალდებიან გვირაბგამყვანი ობოლაძეები თუ სკულპტორული ნიჭით დაჯილდოებული ამაშუკელები. ამიტომ ანიჭებს ჩვენი ხალხი ერთს სოციალისტური გმირის სახელს და მეორეს — დიდი შოთას პრემიის ლაურეატობას.

შემოქმედება, უპირველეს ყოვლისა — აი, ჩვენი ხალხის და დროის უპირველესი ღირებულებაა.

ჩვეოლუციამ ადამიანთა ნიჭსა და შემოქმედებას ფართოდ გაშლილი გზა გაუხსნა.

სწორედ ამ გარემოებამ გაამდიდრა და დიდებული სახე მისცა ჩვენს დროს, ჩვენს ცხოვრებას. რომ ეს არა, აბა, საქართველოს ელექტროფიკაცია ვით დაეწეოდა საფრანგეთის ელექტროფიკაციას, ან ქართველი კაცის სასკოლო-საერთო განათლება ასეთი ნაბიჯებით წინ რით გაუხსრებდა ევროპის ბევრ მოწინავე სახელმწიფოთა დონეს?!

რევოლუციამ და მხოლოდ რევოლუციამ შეძლო ჩვენი ერის შემობრუნება, წელში გამართვა, აღდგენა და ამაღლება.

აი, რა არ უნდა დაივიწყოს ქართველმა კაცმა.

მიწის პირზე ამ უკანასკნელ ათეულ წლებში ყველაზე შესანიშნავი მაინც ის ხდება, რომ მეცნიერება იპყრობს სოფლებს, ქალაქებს, სახელმწიფოებს. მეცნიერება და მხოლოდ მეცნიერება არის ადამიანთა წინსვლის უტყუარი და აუცილებელი მეგზური. იგია ყველგან, ყველა დარგში, ყველა გზაჯვარედინთა გადასასვლელებზე. ფიზიკა და ქიმია, კიბერნეტიკა და ავტომატიკა, ტელეხედვა და რადიოტექნიკა, ბიოლოგიის ურთულესი ხვრელების დაპყრობა და ადამიანის ტვინის სტრუქტურის თუ მოქმედებების მექანიზმებში გადატანა, კოსმიურ სამყაროს უჩვეულო ტემპით დაპყრობა და სრულიად ახალი მეცნიერული აღმოჩენები.

კაცობრიობას არ ახსოვს აქამდე მეცნიერების დაპყრობისა და გამოყენების ესოდენ დიდი ლტოლვა.

ადამიანები, ქალაქები, სახელმწიფოები დიდი უნით, მონდომებით და მტკიცე სურვილით მიიჩქარიან ახალახალი მეცნიერული სიმაღლეებისკენ. სულ ორ-სამ ათეულ წლებში იმდენი გაკეთდა ამ მხრივ, რომ მანამდე ამისი მსგავსი საუკუნეებს არ შეუქმნია.

ყველაზე ძლიერ სახელმწიფოდ თუ რესპუბლიკად ის ითვლება, ვინც მეცნიერების მაღალი მწვერვალები დაიპყრო და გამოიყენა იგი თავისი ერის საკეთილდღეოდ. შენდება მეცნიერების უდიდესი საკვლევი ინსტიტუტები, შენდება მეცნიერების დიდი ქალაქები.

სოციალიზმმა კი უფრო დააჩქარა ხალხის ნებასურვილისამებრ მეცნიერების გამოყენება. თბილისიც ამ მხრივ დიდი ნაბიჯებით მიდის წინ. საქართველოს მეცნიერებათა აკადემია, რომლის პრეზიდიუმის შენობა სოლოლაკში მდებარეობს, ქართული მიწის ყველა კუთხეში შლის და აფართოებს თავის ქსელს.

ჩვენი სოფლის მეურნეობის, ქალაქის მრეწველობის თუ ცალკე მეცნიერებათა მიღწევები ჩვენი საქვეყნოდ სახელგანთქმული მეცნიერების თვალთახედვის ქვეშ ვითარდება.

თბილისური სამეცნიერო სკოლის არაერთი დარგი არის

მთელ მიწის პირზე ცნობილი და სახელგანთქმული, ქართველი მეცნიერების საერთაშორისო ავტორიტეტი და დიდება უფრო მალღდება და მტკიცდება მსოფლიოს დიდ და გამოჩენილ მოაზროვნეთა თვალში. ამას ყველაფერს, რასაკვირველია, მტკიცე და ძლიერი მეცნიერული ბაზა სჭირდება.

ჩვენი საკვლევი-სამეცნიერო ინსტიტუტები და სამეცნიერო ლაბორატორიები უთუოდ მეცნიერების დიდი აღმავლობის გამომხატველია. კიბერნეტიკის თუ ავტომატიკის ინსტიტუტები, მათემატიკის თბილისური სკოლის საქვეყნოდ აღიარება, ბიოლოგიის ქართველ მეცნიერთა უდიდესი მიღწევები, ჩვენი ენათმეცნიერების, ჩვენი ფსიქოლოგების, ფიზიკოსებისა და ქიმიაში მოღვაწე მეცნიერების მონაპოვარნი უთუოდ ამაღლებს და აამაყებს ქართველ ხალხს. მთავარი და საცნაური ისაა, რომ ყველაფერი ეს შედეგია იმ ნახევარი საუკუნისა, რომლის თარიღი სწორედ რევოლუციიდან დაიწყო.

მტკერის მარჯვენა ნაპირზე, ჩელუსკინელთა ხიდის ხელმარჯვნივ საკმაოდ დიდი და ვრცელი გორაკი ე. წ. „მეცნიერების ქალაქს“ ეკუთვნის. უზარმაზარ, ნათელ და მაღალი გემოვნებით აშენებულ სასახლეებში მოთავსებულია ჩვენი მეცნიერების სხვადასხვა ინსტიტუტები, საკვლევი ლაბორატორიები, სამეცნიერო დაწესებულებები. საბედნიეროდ, აღარც ეს გორაკი ეყო ამ ქალაქს! მან ფართოდ, მთელ ქართულ მიწაზე გაშალა ფრთები. იგი გადავიდა ველზე და ბაღებში, მინდვრებში და საბალახოებზე. იგი გადავიდა ქარხნებში და მრეწველობის სხვა დარგებში. მთელი ჩვენი ცხოვრება თითქმის სავსებით მოექცა მეცნიერების ყოვლისშემძლე და მაღალი თაღების თვალყურის ქვეშ. ქართულ მიწას ახლა ნიადაგიც მეცნიერული აქვს და ცაც მისი სინათლით განათებული ახურავს. სხვანაირად არც შეიძლება. სხვაგვარად ერი წინ ვერ წაიწევს. ამიტომაა, რომ ნიკო მუსხელიშვილის წლებით დატვირთული გონება და შუბლი არ იღლება და არ ბერდება, რომ მისი ესოდენ ნაყოფიერი მეცნიერულ-შემოქმედებითი ცეცხლი ისევ ძლიერად გიზგიზებს და მედგრად, ახალგაზრდული სიჩაუქით მიუძღვის ქართველ მეცნიერთა მოაზროვნე-მებრძოლ ვაჟაკებს. ამიტომაა, რომ ივანე ბერიტაშვილის დიდი და ნათელი გონების შუქი ისევ ძლიერად მოჩანს მსოფლიოს მეცნიერთა ნათელ სამ-

ყაროში. ასეა, მამულის დიდი სიყვარული უსათუოდ ახან-გრძლივებს სიციოცხლეს, ამრავლებს მეცნიერულ ენერგიას, ჭან-ლონეს უორკეცებს სამშობლოსათვის თავდადებულ ამ უანგა-რო მოღვაწევებს. სწორედ ასეთ მეცნიერთა მეთაურობით იზრდებიან დღევანდელი ქართველი ნიჭიერი ახალგაზრდა მეცნიერები.

თითქმის ნახევარი საუკუნეა თბილისის უნივერსიტეტის მა-ღალი, თეთრი და წმინდა კედლები ათასობით უნიჭიერეს ახალ-გაზრდას უზრდის საბჭოთა საქართველოს. თბილისის უნივერ-სიტეტის მეცნიერები და სტუდენტები უსათუოდ ის ფეხვია, რომლითაც საზრდოობს და ძალას იკრებს ჩვენი მამული. ჩვენს უნივერსიტეტს გვერდით უდგანან და სიკეთით ეპაექრებიან ჩვენი ინსტიტუტები, რომლებშიც ათასობით ქართველი ახალ-გაზრდა იზრდება და იკვლევს ცხოვრებაში გზას.

უნივერსიტეტს და ინსტიტუტებს ხელმძღვანელობენ გა-მოცდილი, საქვეყნოდ განთქმული მეცნიერები და ორგანიზა-ტორები. ზოგიერთი მათგანი უკვე ათეული წლების მანძილზე, როგორც მქედელი ამირანი ღვთიურ ცეცხლზე, სქედს და კვე-რავს ჩვენი მამულის ხვალისდელ დღეს. ისინი სიყვარულით და კეთილშობილებით იღვწიან ჩვენი ახალგაზრდობის აღზრ-დისათვის. ჩვენი უნივერსიტეტის თუ ინსტიტუტთა მეცნიერები და ხელმძღვანელები უთუოდ ჩვენი სამშობლოს უდიდესი მოლ-ვაწენი არიან. მათი შუბლის სიწმინდესა და სინათლეზეა დამო-კიდებული ჩვენი მამულის მომავალი. თბილისის მეცნიერები თუ პედაგოგები არავის ტოლს არ უგდებენ და, მართლაც, ამის საუკეთესო მაგალითი მოგვცა ჩვენი ქვეყნის ერთ-ერთმა უნი-ჭიერესმა მათემატიკოსმა, ნათელმა ვაჟეაცმა ილია ვეკუამ. იგი ხომ წლების მანძილზე ასე სასახლოდ ხელმძღვანელობდა რუსეთის მეცნიერების ერთ-ერთ უდიდეს კერას?! და ახლა თბილისის უნივერსიტეტს უდგას სათავეში. ვის არ ეამაყება ის ამბავი, რომ პროფესორი იოსებ ბუაჩიძე ამდენი ხანი ასე უზა-დოდ, დიდი ნიჭითა და მამულიშვილური სისპეტაკით უძღვება ჩვენი ქვეყნის ერთ-ერთ ურთულეს და უდიდეს ინსტიტუტს. ჩვენ გვყვანან უმაღლესი სკოლების მეტად გამოცდილი და მეცნიერულ-ორგანიზატორული ნიჭით დაჭილდობული ადა-

მიანები, რომელთა სახელები თბილისის სიამაყეა და მისი ინტელიგენციის ავტორიტეტს ამაღლებს და ალამაზებს.

ეს უხარია ჩვენს სამშობლოს, ეს ეამაყება ჩვენს ხალხს.

რასაკვირველია, ამას საფუძველს აძლევს ჩვენი საშუალო სკოლა, რომელთა დიდი სიკეთეების თავდები ჩვენი შესანიშნავი მასწავლებლებია. საქვეყნოდ ცნობილია მასწავლებლის როლი სახელმწიფოში. თბილისის მასწავლებლები უთუოდ მეტად განათლებულ, ნიჭიერ და მამულისათვის თავდადებულ ადამიანთა აღმზრდელები არიან. ამ მხრივ აღსანიშნავია ერთი მეტად შესანიშნავი მაგალითი.

როგორც ცნობილია, თბილისელმა ჰაბტუკმა თეიმურაზ ვეფხვაძემ ბრწყინვალედ ამოხსნა უდიდესი ფრანგი მათემატიკოსის ლიუვილის განზრახ სხვებისთვის ამოხსნენლად დატოვებული ფორმულები. ამ დიდმა მეცნიერმა შექმნა რა ეს მეტად რთული, მეცნიერულად საინტერესო მათემატიკური ფორმულები, რომელნიც მეცნიერებაში „ლიუვილის გამოცანით“ არის ცნობილი, დაიბარა „ვისაც სურს, დაე თავად სცადოს გამოყვანაო“. ასი წელი ვერაფერს შეძლო ამ გამოცანის ამოხსნა. ათასობით მათემატიკოსების ხელი და გონება შეეხო ამ ასი წლის მანძილზე ლიუვილის ამ ფორმულებს და მინც ვერ მოხერხდა მისი ამოხსნა. და აი, თბილისელმა საშუალო სკოლის მოსწავლემ შეძლო ეს. როცა თეიმურაზ ვეფხვაძეს ჰკითხეს, თუ რატომ დაინტერესდა ის ასე ღრმად მათემატიკით, მან უპასუხა, რომ მათემატიკისადმი ესოდენ დიდი სიყვარული შთაუენერგა მისმა მასწავლებელმა შოთა იაშვილმა.

„მე ძალიან გატაცებული ვიყავი ფეხბურთით, სიმართლე უნდა ითქვას, უკვე საკმაო მიღწევებიც მქონდა სპორტის ამ დარგში, მაგრამ შოთა იაშვილს სწამდა, რომ ამ ქვეყნად არ არსებობს მათემატიკაზე მშვენიერი მეცნიერება, თვითონ მას ღრმად სჯეროდა ეს და ჩვენც ამაში ძლიერად და ღრმად დაგვაჩუქუნა. ჩვენ თანდათან ჩაგვითრია სხვადასხვა მათემატიკურ უცნობ ამოცანების ამოხსნებში, შეგვაყვარა ეს საგანი და ბოლოსდაბოლოს გვაზიარა ამ მეცნიერებას, მართლაც, დიდი ძალღონითა და სიმშვენიერით. ჩვენც ყველაფერს მათემატიკა ვამჯობინეთ, ყველაზე უფრო ის შევიყვარეთ“.

თეიმურაზ ვეფხვაძემ, მართლაც, დიდებულად ახსნა აქ

მასწავლებლის ძალღონე და სიყვარული. აი, როგორი სასწავლებლები შეუძლიათ მასწავლებლებს. მართლაც, შოთა იაშვილის მათემატიკის სახელმძღვანელოები ორი ათეული წელი შეუცვლელად ემსახურება ჩვენს სკოლას. ამ ნათელმა მოღვაწემ ჭეშმარიტად დიდი სიყვარულით შეაყვარა ხალხისთვის ესოდენ უძვირფასესი მეცნიერება თავის აღსაზრდელებს. სწორედ ამის შესახებ წერდნენ რუსეთის ცნობილი ჟურნალისტები და ქვეყანას ამცნობდნენ შოთა იაშვილის პედაგოგიურ ძალაზე და ნიჭიერებაზე. იმაზე, რომ თბილისის სკოლებს ჰყავს ისეთი მასწავლებლები, რომელთაც შეუძლიათ ახალგაზრდა ადამიანებს ძლიერად, ვიმეორებ, ძალიან ღრმად და ძლიერად შეაყვარონ ის, რაც თვითონ ასე სწამთ და უყვართ. მე მწამს, რომ შოთა იაშვილი ნამდვილად მართალია. იმ საგნებიდან, რომელნიც ხელოვნებას თითქოს დღემდე არ მიეკუთვნებოდნენ, მათემატიკა ყველაზე მეტად ემსახურება მშვენიერებას. ამას ამტკიცებდა დიდი ლეონარდო, რომ მათემატიკური გამოანგარიშებებით აღწევდა ამა თუ იმ უმაღლეს სიმშვენიერეთა გამოძერწვას. ეს დაამტკიცა თანამედროვე მათემატიკამ, რომელთა გამოთვლებმა ისეთი ულამაზესი მშვენიერებანი შექმნეს, რომლის შესახებ უდიდეს ესთეტიკსაც კი წარმოდგენა არ ჰქონდათ დღემდე.

ღიახ, თბილისის სკოლებს ჰყავს შესანიშნავი მასწავლებლები და თბილისის აკადემიას ჰყავს საქვეყნოდ ცნობილი მეცნიერები. ყოველი ქვეყანა, როგორი დიდიც არ უნდა იყოს, უსათუოდ იამაყებდა ჩვენი მეცნიერების არა ერთი და ორი ნაშრომით. იამაყებდა ჩვენი მასიური სკოლის მასწავლებლებით, მათი დიდი მამულიშვილური სიყვარულით.

### სანაპიროს მწვანე სინათლეები

ჩვენი საუკუნის ოცდაათიან წლებში ლენინგრადში პირველად მოვხვდი. პირველად ვნახე გრანიტით ამოქობილი უზარმაზარი ნევის კალაპოტი. ლამპიონებით განათებულმა მისმა ქვით ნაძერწმა არხებმა, ნევის ნაპირზე ჩასასვლელმა გრანიტისავე კიბეებმა მომხიბლა და გამახარა. მის ნახვამდე ჩემთვის

წარმოუდგენელი გახლდათ მდინარის სანაპიროს ასეთი სილა-  
მაზე. მაშინ მტკვრისა და რიონის ნაპირებზე მუდამ აშშორე-  
ბული გაუვალი ტალახი იყო. მეთულუხეები, მეეტლეები, მედ-  
როგეები ყოველთვის ირეოდნენ სანაპიროზე და ზამთარ-  
ზაფხულს, წვიმაში თუ დარში მდინარეების ახლომახლო ყვე-  
ლაფერი ყარდა. ამის მნახველი, რასაკვირველია, ლენინგრადას  
და მისმა მეფურმა ნევის სანაპირომ გამოაცა.

ამასთან ნევის ნაპირები მაშინ ჩვენთვის სხვა რომანტიკა  
იყო. აქედან ხომ „ავრორამ“ პირველად ამცნო ადამიანებს  
სამყაროს წალმართად დაბრუნების წუთები. სწორედ მის ნა-  
პირებთან მოინახა დედამიწის საყრდნობი წერტილი!.. ლენინ-  
გრადაში პირველად ჩასულებს ჯერ კიდევ ყურებში ამ გასროლას  
ეხო გვესმოდა და გუგუნებდა. რატომღაც, როცა მტკვრის  
დღევანდელ სანაპიროზე პირველად გავიარე და მისი სილამა-  
ზე შევიგრძენ, მომეჩვენა, რომ ავრორაზე გასროლის ხმამ  
მტკვარს ახლა აგრძნობინა მისი სიძლიერე და სილამაზე. ღმერ-  
თო შენით და მაშინაც ნევის ნაპირზე ერთი რამე ვიფიქრე: ნუ-  
თუ მტკვარსა და რიონს ოდესმე ასე ქვით ტანჩაცმულს ვი-  
ხილავ-მეთქი?!

მე, რასაკვირველია, ვიცოდი, რომ პეტრე პირველმა ჩა-  
აცვა ეს გრანიტის პერანგი ნევას, მაგრამ მე რატომღაც ეს  
სიმშვენიერე რევოლუციას მივაკუთვნე. გაგიტყდებით და იმა-  
საც გაგიმხელთ, რომ გასულ წელს მტკვრის კალაპოტში პი-  
ონერებით სავსე პატარა გემი დავინახე, და მომეჩვენა, თითქოს  
მტკვრის ტალღებზე ავრორას ლანდი ქანაობდა. შეიძლება  
იმიტომ, რომ მაშინ ეს გემი ზამთრის სასახლის ახლოს იდგა და,  
როგორც რევოლუციის ცოცხალ მოწმეს, პიონერების ასეულე-  
ბი ეხვეოდნენ.

მაშინ გული დამწყდა და მეტკინა კიდევ, რომ მტკვრისა და  
რიონის ნაპირები ასე უპატრონოდ მიტოვებული და უღმობე-  
ლი სანახავი გახლდათ. ახლა კი დილითაც დაჯნედა მოლუდუ-  
ნე მტკვარს და სადამოსაც მის ნაპირზე ვსეირნობ. პატარაობი-  
დან წყალი მიყვარდა, მისი გიჟი ვიყავი. ახლაც მისი ნახვა  
თვალს ახარებს, ფიქრს მიაძებს! და როცა ღამით დღესავით  
განათებულ მტკვარსა და მის თვალწარმტაც სანაპიროს დავც-  
ქერი, ჯანი და ღონე მემატება, მისი კლდისფერით ამოქვიტკი-

რებული ნაპირები, ჭადრების ხეივნები და მდინარეში ჩადგმული ხიდების ვეფხვის ბრწყალივით მოხუჭული უთოები სიამაყეს მმატებს. მიყვარს და მიხარია!

დიღუბის ახალი ხიდიდან ვიდრე ორთაჭალის ბაღამდე სანაპირო მიყვება მტკვრის ნაპირს.

მიჰქრიან საბარგო ავტოები თუ ავტობუსები, მსუბუქი მანქანები თუ მოტოროლები, მიჰქრიან და კიდევ მეტ ტემპერამენტს უმატებენ ქალაქს. სანაპირო უსათუოდ ერთ-ერთი ულამაზესი და უმშვენიერესი ადგილია თბილისის მიდამოებისა.

თბილისს საოცრად ლამაზი სანახები აქვს. ვინც დაკვირვებია ისანის თუ სვანეთის უბნების ცხოვრებას, ვაკისა თუ სოლოლაკის გამშვენიერებულ ქუჩებს, ბაღებს და ეზოებს, ვინც ფეხით აყოლია შავნაბადას გორაკს და იქიდან გადმოუხედავს თბილისისათვის, ვისაც დიღმისკენ გაუვლია და თბილისის ჩრდილოეთის კარებთან ზვრებსა და ბაღებს დაკვირვებია, ვინც თბილისის ზღვაზე ერთხელ მაინც საბანაოდ ასულა და ახლად გამლილ ულამაზეს ფართო გზიდან ატევერებულ ბალ-ვენახებისთვის თვალი შეუვლია, მან იცის ამ სანახების სილამაზე, სიმშვენიერე და დიდებულება. ვის არ მონდომებია ამ ადგილებში გადმოხტომა, მუხლზე დაცემა და ცისა და მიწისთვის შეღალადება, რომ თბილისის ნიადაგი და სამყარო თავისი კიდევანითა და გუმბათით ასე აბიბინებულია, ასე თვალწარმტაცია და ლამაზი.

და ყველაფერი ეს ქართველი კაცის შრომითა და ოფლით არის შექმნილი. ყველაფერი ეს რევოლუციის იმ დიდი და ნათელი დღის შედეგია, თორემ რვა საუკუნე ქართველმა კაცმა ყვავილი ვერ გაახსნევინა მის მიწაზე ვერც ერთ ნერგს, ჩეხდნენ და სწვადნენ ზვრებსა და ვენახებს, სჭრიდნენ და ჰყიდნენ ძელქვასა და კაკალს, იმონებდნენ და ჟღერდნენ ქართველ მოსახლეობას, რუსეთთან შეერთების წინა დღეებში ნახევარ მილიონზე დავიდა ერთ დროს მიწის პირზე სახელგანთქმული ქართველი ერი. ამიტომ და სწორედ ამიტომ იყო ის, რომ მეცხრამეტე საუკუნის დასაწყისიდან ქართველი კაცი დღე და ღამე ილტოდა ყოველივე რევოლუციონერობისადმი, ყოველივე პროგრესულობისადმი, ყოველივე სიახლისადმი, იბრძოდა ადამიანთა ყოველი მტრობისა და მტარვალობის წინააღ-



მდეგ. დიდი რუსეთის ისტორიაში არ ყოფილა არც ერთი კეთილშობილური ფაქტი, რომ ქართველ კაცს მონაწილეობა არ მიეღოს, თავისი ვაჟკაცური სიტყვა არ ეთქვას, ნათელ საქმეში მარჯვენა არ მოექნოს.

### ლომსა და არჩივს ზქალი არ დაუხვდება

გურიის ჯანყიდან ვიდრე ოქტომბრის დიდ დღეებამდე ქართველი კაცი რუსეთის მოწინავე და ნათელ ინტელიგენციასთან ერთად იბრძოდა ადამიანთა დიდი სინათლისათვის, მისი დიდი მომავლისათვის. საოცარია, ამ პატარა ერმა რამდენი გმირი მისცა ქვეყანას, რამდენი ლეგენდარული ვაჟკაცი აღუზარდა მამულს. უთუოდ ესეც იყო ერთი მიზეზი, რომ ჭერ კიდევ ადრე რუსეთის დიდი მოაზროვნეების თვალი საქართველოსკენ, თბილისისკენ იყო მიპყრობილი, მათი მახვილი ყური ჩვენკენ იყო მოყურადებული. პუშკინი თუ ლერმონტოვი, ტოლსტოი თუ ჩაიკოვსკი ქართულ მიწაზე ჰპოვებდნენ ხშირად მას, რასაც სხვაგან ვერ პოულობდნენ. მათ, რასაკვირველია, არა მარტო ქართული მიწის სილამაზე იზიდავდა აქეთკენ. მათ იცოდნენ და სწამდათ, რომ ქართველი კაცის გული ვაჟკაცურია და პატიოსნებით აღსავსეა. იცოდნენ და სწამდათ, რომ ქართველი ვაჟკაცი გონიერი და სულით მდიდარია, მკლავმაგარია, გამტანია, უღალატოა. მათ ღრმად სწამდათ, რომ ქართველ ნათელ ვაჟკაცებს გულწრფელად უყვარდათ რუსი გმირი ხალხის სისხლით მორწყული დიდი რუსეთის მიწაწყალი, რომ არაერთ ქართველ ვაჟკაცს თავისი ნათელი სულით და გულით მტკიცედ დაუტაცეს ვაჟკაცთაგან დასაცავი რუსული მიწაწყალი. დაუცავთ და სიციცხლეც უანგაროდ შეუწირავთ. ბაგრატიონები თუ ფანჩულიძეები, კალანდარიშვილები და კიკვიძეები ყოველთვის გულწრფელი სიყვარულით და მამულიშვილური პატიოსნებით ეცემოდნენ რუსეთის მტრებთან ბრძოლებში, რადგან მათ გულწრფელად სწამდათ ამ ხალხის დიდი მომავალი.

რუსეთის რომანოვების სამასწლიანი ტახტის ფუძე და საყრდენი მეოცე საუკუნის დასაწყისში შეირყა. თითქოს ზედიზედ

წაეწყო ისტორიული ამბები. იაპონიის ომი, ცხრაას ხუთის უდიდესი არეულობანი, ლენის სისხლიანი დღეები, მსოფლიოს პირველი ომი და ბოლოს რომანოვების ტახტის მომსპობი თებერვლის რევოლუცია. ამ ისტორიულ გადასასვლელებზე და გზაჯვარედინებზე ქართველი კაცი ყოველთვის რუსეთის ნათელგონებიან ადამიანებთან იდგა, მისი მოწინავე ინტელიგენციის მხარდამხარ მიდიოდა.

გულწრფელად უნდა ითქვას, რომ კაცობრიობის ისტორიას ნაკლებად ახსოვს ისეთი დიდი და გონებამაღალი პარტია, როგორც რუსეთის სოციალ-დემოკრატიული პარტია იყო. ამ პარტიაში და განსაკუთრებით მის საქვეყნოდ განთქმულ ბოლშევიკურ ნაწილში საქართველოს წარგზავნილები დიდი ლენინის ფიქრთან და აზრთან განუშორებლად და მხარდამხარ იდგნენ. მისი სიტყვის კვალზე რაზმავდნენ თავის ხალხსა და ყველა ადამიანს მოუწოდებდნენ დიდი საქმის გასაკვალავად. თბილისის პროლეტარიატი და მისი მეთაური პარტია ყოველ წამსა და ყოველ წუთს მზად იყო დაეცვა ლენინის აზრი და ფიქრი. რევოლუციის 50 წლისთავზე თბილისის მოსახლეობა და მისი ხელმძღვანელი პარტიული ორგანიზაცია ამაყად და დიდებით წარსდგა. მისი წითელი დროშა წმინდაა, მისი შუბლი ნათელია და მაღალი. დაუთვლელი ფაქტებიზალადებენ ამ უტყუარ ქეშმარიტებას. მე მხოლოდ ორიოდ მინდა გავიხსენო.

პირველი: თებერვლის რევოლუცია მოხდა. დამკვიდრდა ბურჟუაზიული ხელისუფლება. ლენინი შვეიცარიიდან ამხანაგების თანხლებით, რომელთა შორის საქვეყნოდ ცნობილი ჩენი პარტიის მესამე ყრილობის გამხსნელი და თავმჯდომარე მიხა ცხაკაიაც იყო, რუსეთში ჩამოდის. რასაკვირველია, ლენინი კერენსკის და მილიუტოვის დასახმარებლად არ ჩამოსულა. ეს იცოდნენ ბურჟუაზიული მთავრობის წევრებმა, ეს იცოდა რუსეთის პროლეტარიატმა და მისმა მეთაურმა ბოლშევიკურმა პარტიამ.

დროებითი მთავრობა ყოველგვარ ბინძურ ხერხებს მიმართავს, რათა ვლადიმერ ლენინის უწმინდესი სახელი შეურაცხყოს, ტალახში ამოსვაროს, რუსეთის მოღალატედ გამოაცხადოს, ყველა აუკრძალავ თუ აკრძალულ მეთოდს ხმარობს და აი, მოითხოვეს სასამართლო. იცოდნენ რა ლენინის უმწიკვლო

პატიოსნებისა და უშიშარი ხასიათის შესახებ, იფიქრეს, ლენინი სასამართლოზე გამოცხადდება.

მართლაც, ზოგიერთებმა მოითხოვეს კიდევ ვლადიმერ ილიას ძის დანებება და სასამართლოზე გამოცხადება. რასაკვირველია, ეს უდიდესი შეცდომა იქნებოდა. ბურჟუაზიას და მის მეთაურებს უთუოდ გადაწყვეტილი ჰქონდათ მათთვის ამ ყველაზე საშინო კაცთან გასწორება. უნდა ვიფიქროთ, რომ მათ უკვე ხელის გულები ექაეებოდათ ჩახმახის გამოსაკრავად.

მაშინ ქართველმა კომუნისტებმა ლენინის თანამოაზრეებთან ერთად ცენტრალურ კომიტეტში ერთხმად და დაჟინებით მოითხოვეს ლენინის გადამაღვა, მისი პეტროგრადიდან დროებით გარიდება. დღეს ყველამ იცის, თუ რას ნიშნავდა ეს ჩვენნი პარტიისათვის! ერთი მცდარი ნაბიჯი და შეიძლება პარტიას ლენინი დაეკარგა.

მეორე: თბილისელი კომუნისტების მიერ ვ. ლენინის ასე დაჟინებით დაცვა შემთხვევითი და რომელიმე ცალკე ქართველი კომუნისტის ინდივიდუალური სურვილი როდი იყო?! იგი იყო თბილისის ორგანიზაციის საერთო სურვილი და ინტერესი. ეს იყო თბილისის მუშათა კლასის ნათელი გონების ნაყოფი. მე ვიტყვოდი, ეს იყო რევოლუციონური ხილვის საოცარი დაუვიწყარი ისტორიული აქტი.

გავიხსენოთ ფაქტები: 1917 წლის 7 ივლისს კერენსკის მთავრობამ ბრძანა ლენინის დაპატიმრება (სხვათაშორის დიდძალი თანხა აღუთქვეს ლენინის გამცემებსაც).

არ დაგვავიწყდეს, რომ მაშინ საქართველოში მენშევიკური მთავრობაა. რუსეთიდან ცნობები ძნელად და ძუნწად მოდის. მით უმეტეს ლენინის შესახებ. და მაინც, ცხრა ივლისს, თბილისის მუშათა კლასი (შვიდიდან ცხრამდე ხომ ერთი დღეა) ალექსანდროვის ბაღში აწყობს გრანდიოზულ მიტინგს. ამ მიტინგზე გამოდიან მუშათა კლასის საუკეთესო წარმომადგენლები და გამოაქვთ რეზოლუცია, სადაც ნათქვამია შემდეგი:

„კონტრრევოლუცია დგამს გაზომილ ნაბიჯს. ამ დატუსაღებას მოყვება სხვაც, რათა მიაღწიონ თავიანთ მიზანს, უმეთაუროდ დატოვონ პროლეტარიატი.“

ეს რეზოლუცია იმავე წლის თერთმეტ ივლისს დაისტამბა „კავკაზსკი რაბოჩი“-ში. ერთი თვის წინ კი ამავე გაზეთმა გა-

მოაქვეყნა ლენინის ვრცელი ბიოგრაფია. ეს იმ დროს, როცა რუსეთის ბურჟუაზიული პრესა ათასნაირი პროვოკაციული ცილისწამებით ხვდებოდა ლენინის ხსენებას.

თერთმეტ ივლისს ცენტრალური კომიტეტის დავალებით ვლ. ილიას ძე ლენინი ჩუმად გადაყვანილ იქნა ნ. ა. ემელიანოვის ბინაში რაზლივზე, პეტროგრადიდან ოცდაათი კილომეტრის დაშორებით, ფინეთის რკინიგზის ხაზზე.

ისტორიამ ისიც იცის, თუ რა როლი ითამაშეს რაზლივზე ლენინის გადაყვანაში თბილისელმა კომუნისტებმა.

იმავე წლის ოქტომბრის დასაწყისში თბილისში იხსნება კავკასიის ბოლშევიკების სამხარეო ყრილობა. ყრილობამ გასათვარი წინასწარმეტყველური პოლიტიკური ალლოთი აღნიშნა ოქტომბრის დიდი დღეების მოახლოების თარიღი და გამოთქვა მტკიცე რწმენა, „რომ უახლოეს მომავალში რუსეთის მუშათა კლასი და რევოლუციონური გლეხობა თავიანთი ახალი რევოლუციით დაამხოვენ მილიუკოვებისა და მათი ლაქიების, კერენსკების ბატონობას და შექმნიან შესაძლებლობას აძხ: ლენინისათვის, გამოვიდეს იატაკქვეშეთიდან და აშკარად დაიკავოს თავისი პოსტი ჩვენი პარტიის ბელადისა, რუსეთის რევოლუციის ბელადისა“.

თამამად შეიძლება ითქვას ეს უპრეცედენტო ფაქტი.

აქ არა მარტო მოახლოებული რევოლუციის თავდადებული სიყვარული ჩანს, აქ აშკარად და განუზომელი სიმალლით ჩანს რევოლუციის ბელადისადმი თავდადება და ერთგულება. ეს იმ დროს, როცა ჩვენი პარტიის ბევრი მანამდე გამოჩენილი ადამიანი დაიბნა, გაშტრეიკებრებერდა, პარტიის გენერალური ხაზიდან გადავიდა. ერთი სიტყვით, პარტიის მოღალატე გახდა. თბილისის ორგანიზაცია და მისი დაზარდილი არწივები კი ბრწყალგაუცვეთლად იცავდნენ რევოლუციას და მის ბრძენ ბელადს, ლომების საბრძოლო ყიჟინით ესხმოდნენ თავს პროლეტარიატის საერთაშორისო მტრებს და რევოლუციის ბალავერის ჩაყრის საქმეში საპატიო როლს ასრულებდნენ.

• • •

თბილისის მუშათა კლასს ყოველთვის გვერდით ედგა მისი მშრომელი ინტელიგენცია და ხელოვნების მოღვაწენი. მათ

ღრმად სწამდათ რა რევოლუციის დიდი მომავალი, სწამდათ მისი დიდი სიკეთეების, თბილისელ მუშათა კლასთან ერთად ებმებოდნენ ამ დიდ მოძრაობაში. სწორედ ეს იყო იმის მიზეზი, რომ რევოლუციის პირველ დღესვე, ავრორას პირველი გასროლისთანავე, გალაკტიონი მოითხოვდა „დროშები ჩქარაო“. ეს იყო მიზეზი, რომ კოტე მარჯანიშვილი სამოქალაქო ომში მიმავალ წითელარმიელებს „ფუენტე ოვეხუნა“-ს აჩვენებდა და რევოლუციურ ცეცხლს კიდევ უფრო მეტად უღვრებდა მათ. ეს იყო ის, რასაც „სულთქო“-ს დიდი ავტორი ეძებდა ერთ დროს და იროდიონ ევლოშვილის „მეგობრებო, წინ, წინ გასწით“ მოითხოვდა. ქართველი ინტელიგენციის უკეთესი ნაწილი დადგა იქ, სადაც ქარიშხალი მძვინვარებდა და სისხლიანი ანგელოსი იდგა.

საბჭოთა მთავრობამაც პირველ დღეებშივე ხელი გაუწოდა ქართველ ინტელიგენციას. მან სრული ნდობითა და სიყვარულით გადასცა მაჩაბლის ბრწყინვალე სასახლე მათ გამგებლობაში.

ეს იყო იმის ნიშანი, რომ საქართველოში დაიწყო სრულიად ახალი ხანა, ხელოვნება და ხალხი დაძმობილდა, ღვიძლი გახდა. ამიტომ იყო, რომ პოეზია, რომელიც წინათ ბევრს მხოლოდ რჩეულთა კუთვნილებად მიაჩნდა, დინჯად და მოუბრუნებლად შემოტრიალდა ხალხისკენ. ეს იყო ინტელიგენციის მზისკენ მობრუნება, საყრდნობი წერტილის მინიშნება. მართლაც, მაჩაბლის ქუჩის ამ სახლში საოცარი ენერჯით და ვნებით გაჩაღდა ხელოვნების სამკვდრო-სასიცოცხლო პრობლემებზე მსჯელობანი და პაექრობანი. სწორედ ამ სასახლეში ჩაეყარა საფუძველი ქართული ხელოვნების დიად ერთიანობას, მის მონოლითობას. იგი წარიმართა მხოლოდ და მხოლოდ ერთი მიზნით: უანგარო სამსახური გაეწია თავისი მამულისათვის, დიდი ნიჭით და სიყვარულით შეექმნათ დიდი სახალხო ხელოვნება. აი, რა დასახა მიზნად მაშინ ქართულმა ხელოვნებამ. და მართლაც, ქართულმა მწერლობამ უდიდესი როლი შეასრულა ამ საამაყო და მამულიშვილურ საქმეში. გ. ტაბიძე და მიხეილ ჭავჭავაძე, პაოლო იაშვილი და ტიციანი, ნიკოლორთქიფანიძე თუ გერონტი ქიქოძე, გ. ლეონიძე და სიმონ ჩიქოვანი, გ. ქუჩიშვილი და ალ. აბაშელი, მართალია, სხვადა-

სხვა უნარითა და ნიჭით, მაგრამ თავისი ხალხისადმი უზადო სიყვარულით შეუდგნენ ამ საშვილიშვილო, საამაყო საქმეს. ბევრი რამ შეძლეს მათ, ბევრი გააკეთეს, ბევრი ახალი ნაწარმოებით გაამდიდრეს ქართული ხელოვნების საგანძური, არა ერთი და ორი შედეგრი დაუტოვეს თავის ხალხს.

რევოლუციის პირველი წლებიდანვე განსაკუთრებული როლი დაეკისრა თეატრს, რომელსაც სათავეში დიდი რეჟისორი კოტე მარჯანიშვილი ჩაუდგა. საინტერესო ის არის, რომ მარჯანიშვილმა ხელი მოჰკიდა ამ საქმეს ახალგაზრდობასთან ერთად. მან დიდი შერჩევითა და სიყვარულით შემოიკრიბა ეს ახალგაზრდობა და ჭეშმარიტად ქართული თეატრის ისტორიის ბრწყინვალე ფურცლები ცნობილი „სცხვრის წყარო“-თი გახსნა.

დაიწყო ქართული თეატრის დიდი აღმავლობა. შეიქმნა ქართული ძლიერი დრამატურგია. თეატრი ნამდვილად გადაიქცა დიდი მხატვრული აზროვნების სახალხო ტრიბუნად.

კოტე მარჯანიშვილის და ალ. ახმეტელის მხატვრული აზროვნების სიდიდემ მთელი ქართველი ხალხი თეატრისკენ შემოაბრუნა და თითქმის უკლებლივ მის გარშემო შემოკრიბა.

კოტე მარჯანიშვილი იყო ისეთი კაცი, რომელსაც შეეძლო თეატრი სამყაროს ყოველ კუნჭულში გაემართა და დიდი სპექტაკლები შეექმნა. მას ჰქონდა უნარი და საოცრად აღზევებული ნიჭი სცენაზე ნამდვილი თეატრალური, უდიდესი სანახაობანი შეექმნა. შეექმნა დიდი გემოვნებით, დიდი კულტურით, გასაოცარი მაღალი ნიჭიერებით. მისთვის თითქმის სულ ერთი იყო სად ხდებოდა ეს. მისთვის გეოგრაფიას არავითარი მნიშვნელობა არ ჰქონდა. მას შეეძლო მარსზეც კი დაედგა სპექტაკლი, ოღონდ თეატრი მიგეცათ მისთვის.

ალ. ახმეტელს კი, პირიქით, არ შეეძლო ქართული მიწის გარეშე მხატვრულად ეაზროვნა. იგი სისხლით და ხორციით დაკავშირებული იყო თავის ერთან, ხალხთან, მამულთან. მას აღაფრთოვანებდა და ძალას აძლევდა ნაციონალური ელემენტები, მისი გეოგრაფია და ეროვნული სული, იგი ყველგან და ყველგან სწორედ ამას ეძებდა და ნახულობდა კიდეც. ორივენი მუდამ მღვიძარე რევოლუციის უნიჭიერესი დიდი თეატრალური მოღვაწეები გახდნენ.

დღესაც ჩვენი თეატრები პატიოსნად და სინდისიერად ემსახურებიან ჩვენს მამულს; რუსთაველის თუ მარჯანიშვილის თეატრების ახალმა დადგმებმა ცოტა ნიჭი და უნარი როდი აჩვენა თბილისის მეტად მაღალი გემოვნების მაცურებელს. ჩვენი ახალგაზრდობა მოდის ძლიერად და შეუპოვრად. მისი ნიჭი, გემოვნება და მაღალი კულტურა უთუოდ ამის თავდებია.

ჩვენს თეატრებს ჰყვანან მეტად ნიჭიერი ქალ-ვაჟნი, რომელთაც უნდა ვენდოთ და დავინახოთ მათი სიკეთეები. ჩვენს ქართულ სამყაროს დღეს ჰყავს ისეთი ახალგაზრდები, რომლითაც უსათუოდ იამაყებს ჩვენი ხალხი, რომლებიც კიდევ უფრო მაღლა ასწევენ მამულის ესოდენ წმინდა გუმბათს.

ქართულ მწერლობას თუ თეატრს ხალხი მეტი სიყვარულით, მაგრამ მეტი კრიტიკული თვალთაც უყურებს.

ჩვენი მამულის ახალგაზრდა მოღვაწეებს, ქართული პოეტური სიტყვის თუ თეატრალური კულტურის ოსტატებს ეს უნდა ახსოვდეთ ყოველთვის.



უკვე კარგა ხანია, რაც ქართული მუსიკალური კომედიის თეატრს ახალი შენობა აუგეს. თბილისისათვის ამ თეატრის შენობა უსათუოდ ერთ-ერთი შენაძენია. იგი აშენებულია თანამედროვე სტილით და გემოვნებით, მისი ფოიეები და საყურებელი დარბაზი მშვენიერია და აკუსტიკურადაც დამაკმაყოფილებელია. ახალი შენობის აგებამ ბუნებრივად გამოიწვია თეატრის შემადგენლობის შემოქმედებითი დონის დიდად ამაღლება.

ქართველმა ნიჭიერმა კომპოზიტორებმა თუ ღირიყორებმა თავი მოიყარეს ამ თეატრის გარშემო და ჩაებნენ მის მუშაობაში.

განსაკუთრებით სასიამოვნოა ახალგაზრდა ნიჭიერი მსახიობების გამოჩენა. თბილისის მუსიკომედიის თეატრმა არა ერთი შესანიშნავი სპექტაკლი უჩვენა თბილისის მაცურებელს.

თანდათან მდიდრდება ქართული სახვითი ხელოვნების თუ ქანდაკების მოღვაწეთა არმია. დღეს საქართველოს ჰყავს უარესად საინტერესო ახალგაზრდები. ჩვენი ფერწერა, ქანდაკება, ლითონთა ქედვა და გრაფიკა საამაყოფად წავიდა წინ, ამაღლ-

და, ფრთები გაშალა. დღეს ათეულობით უბრწყინვალეს ოსტატებს ითვლის ხელოვნების ეს დარგები. ხანდახან ძნელი ხდება მათი დიდი სიკეთეების შეფასებაც კი. თბილისისათვის და თბილისელებისათვის ეს მეტად საამაყო და გასახარო.

### თბილისის ფალაქნაზი

ორი სტადიონი აშენდა თბილისიში, ერთი ე. წ. „დინამოს“ სტადიონი, მეორე ვაკეში. მართლაც ლამაზი სტადიონებია. ჩვენი ახალგაზრდობის ჯანღონის და სიჩაუქის გამოსაძერწი მშვენიერი ადგილებია.

სპორტი ადამიანთა ცხოვრების განუყოფელ ნაწილად არის გადაქცეული. იგი მისი ჯანღონეც არის და მშვენიერებაც.

ბერძნების თუ რომის სახელმწიფოთა სიმძლავრე უსათუოდ მათი ახალგაზრდობის სპორტულ წრთვნაზე იყო დამოკიდებული. ამიტომ სცემდნენ ესოდენ დიდ პატივს ისინი სპორტსა და სპორტსმენებს. მათი სტადიონების ნანგრევებმა შემოგვინახეს ის გრანდიოზულობა, რომელიც მაშინდელ სპორტულ სამყაროში სუფევდა. ოლიმპიელების პატივისცემა და სიყვარული თითქმის გაღმერთებამდე მიდიოდა. და განა რომელ ხელოვანზე, მწერალზე ან ფილოსოფოსზე ნაკლებ პატივსა სცემდნენ ბერძნები თეზეოსსა და ჰერკულესს, რომელთა მითიური სახეები პირველყოვლისა მათ სპორტულ ცხოვრებაზე დაღაღებენ.

ან რატომ აუგეს რომაელებმა ძეგლი კარგი ცენოსნობისათვის კოლხთა მეფეს თავის პირველი მოედნის საპატიო ადგილას?

რევოლუციამ სპორტი სახალხო საკუთრებად აქცია. ჩვენი სპორტდარბაზები, მოედნები და ბრწყინვალე სასახლეები ამ დიდ სიყვარულზე დაღაღებს, რომლითაც სპორტი სარგებლობს ჩვენს ქვეყანაში.

საქართველოს უბრწყინვალესი სპორტსმენები ჰყავს. ჭადრაკის მსოფლიო დედოფალი ნონა გაფრინდაშვილი უთუოდ ჩვენი ხალხის სიამაყეა. მისი საზრიანობა, მისი სპორტული სიჩაუქე და ნათელი გონება მთელი ქვეყნის პირზე არის განთქმული. აბა, განა გასახარელი არ არის, როცა მისმა უმცროსმა ამხანაგმა მეტად ნიჭიერმა ქალიშვილმა ნანა ალექსანდრიამ



ქალთა შორის საბჭოთა კავშირის ჩემპიონობა მოიპოვა?! ხოლო პატარა გოგონამ ციური კობაიძემ ჩვენი დიდი ქვეყნის, საბჭოთა კავშირის გოგონათა შორის უძლეველობის თასი აიღო. ეს უსათუოდ სპორტის თბილისური სკოლაა.

სპორტის თბილისური სკოლის ბრწყინვალე ვაჟკაცები არიან თორნიკე სანებლიძე და ნიკოლოზ თაყაიშვილი, რომელთა დიდმა ნიჭმა და ვაჟკაცობამ ინდოეთის ხალხთა სპორტული ტანვარჯიშის გუმბათი აღამაღლა.

ქართული სპორტის ისტორიაში უსათუოდ საამაყოა ის მოვლენა, რომ ინდოეთის ქალთა ტანვარჯიშის პირველი უძლეველი ქალიშვილი ნანა თაყაიშვილი გახლავთ. მანვე უმეთაურა და გამოზარდა პირველი ინდოელი ტანმოვარჯიშე ქალიშვილები, რომლებიც დიდი სიყვარულით იხსენიებენ ამ სამი ადამიანის სახელს.

მთელ მსოფლიოში სახელი გაითქვა ქართულმა ჭიდაობამ. ბტომამ, კალათბურთმა თუ ფეხბურთმა.

ჩვენი გოლიათებია: ა. მეკოკიშვილი, გ. კარტოზია, ვ. ბალავაძე, დ. ციმაკურიძე, რ. აბაშიძე, გ. სალარაძე და სხვები. რომლებიც წლების მანძილზე მთელი ჩვენი სამყაროს საჭიდაო ხალიჩაზე შერკინების უძლეველ და მრისხანე გმირებს წარმოადგენენ.

ვინ დაივიწყებს კალათბურთის მსოფლიო ვაჟკაცის ოთარ ქორჭიას სპორტულ სიჩაუქეს?! ახლაც ჯანღონით სავსეა, თავისი მოღვაწეობით ისევ გვახარებს ორი ვაჟკაცის მამა და ოთხი შვილიშვილის პაპა, კაცი — ლეგენდა ბორის პაიჭაძე. მიუხედავად იმისა, რომ ის უშუალოდ ფეხბურთისათვის უკვე შექარმაგდა, მისი უსაყვარლესი საქმისთვის მაინც მოუღლელად, პატიოსნად და შუბლნათლად იღვწის.

დიდია მათი ღვაწლი ქართული სპორტის ამაღლების საქმეში და დიდია მათი სიყვარულიც ქართველ ახალგაზრდობაში.

დიახ, ეს სპორტის თბილისური სკოლაა.

მთელ ქართველ ახალგაზრდობას ახარებს და აამაყებს ა. მეტრეველის ვაჟკაცური გამარჯვებები მსოფლიოს ჩოგბურთის უცხო ქვეყნების მოედნებზე. ახარებს და აამაყებს იმიტომ, რომ მდიდრდება თბილისის სასპორტო საერთაშორისო სახელი და სკოლის ავტორიტეტი.

საბჭოთა ალპინიზმის ისტორიაში მთამსვლელებს დიდი და მაღალი ადგილი მიეკუთვნება. ჩვენი ქართველი მთამსვლელები, როგორც მათ უწოდებენ „მთის ვეფხები“, მსოფლიოს ყველა კუთხეში არიან ცნობილნი. კავკასიონის მწვერვალთა დამპყრობნი, რომელთა აკვანი გიორგი ნიკოლაძის ვაჟკაცური მკლავით დაირწა, პამირის დაუპყრობ მწვერვალთა ბინადარნიც შეიქმნენ. თბილისურ ალპინისტურ სკოლას დღეს ყველა სხვა ეროვნებების მთამსვლელები სცემენ პატივს. ეს ცოტა როდია. მარტო ალექსანდრა ჯაფარიძის სახელი რადა ღირს?! ამ შესანიშნავმა ქართველმა ქალმა თავისი წმინდა თეთრი მანდილი უშბას თუ კავკასიონის სხვა თეთრსავე მწვერვალებს შემოახვია. მანამდე რომ თეთრი არ ყოფილიყო ეს მწვერვალები, ალბათ, ლეგენდა შეითხზებოდა — ალექსანდრას თეთრმა წმინდა მანდილმა ამ მწვერვალთა წვერებიც შეათეთრაო.

ამ ქალის ოჯახმა ხომ ყველაზე დიდი შესაწირი შესწირა საბჭოთა ალპინიზმს. ალიოშა ჯაფარიძის საფლავი თხუთმეტი წელი ხომ ყინულებით ცივსა და მდუმარე სამყაროში იყო ჩაჩეხილი. დღეს კი მისი საფლავი მტკვრის მაღალი ბექობიდან გადაპყურებს თბილისს. მისი სხეული და სული მუდამ მაღალი მწვერვალებისკენ ილტვოდა. იგი იქ ჩაიჩეხა უფსკრულებში და შემდეგ თბილისის მიწაზე უკვდავების მწვერვალზე ამაღლდა. ასეა, სამშობლოს უყვარს მწვერვალებზე მოსიარულენი!



თბილისის ახალგაზრდობა დღეს არა მარტო ჯანით და ღონით სავსეა, იგი მეტად ლამაზია, მშვენიერია, რაც მთავარია, მეტად განათლებულია და კულტურული. ეს გასაგებია. რევოლუციამ ყველაფერი გააკეთა ახალი თაობის აღზრდის კულტურის ასამაღლებლად. არც ერთ ქვეყანაში არ იხარჯება იმდენი ძალღონე და მატერი-ალური დოვლათი ახალგაზრდობის აღზრდისათვის, როგორც ჩვენთან. და მართლაც, ვისაც ჩვენს დღესასწაულებზე საზეიმოდ გამოსული ჩვენი ახალგაზრდობა უნახავს, მან იცის, როგორები არიან ჩვენი ქალიშვილები და ჭაბუკები. იშვიათად ნახავთ ისეთი გემოვნებით ჩაცმულს, ვაჟკაცურსა და სახემშვე-

ნიერ ახალგაზრდობას, როგორც თბილისშია. საამაყო და გასა-  
ხარელი ისაა, რომ ჩვენი ახალგაზრდობა დაწაფებულია მეცნი-  
ერებას, დიდი ვნებით ილტვის მისკენ და საოცარი ჟინით იპყ-  
რობს მის მაღალ მწვერვალებს. ამის მაგალითები, ჩვენი ქვეყ-  
ნის სასიხარულოდ და საამაყოდ, ერთი და ორი როდია, მაგრამ  
აქ მე მხოლოდ ორიოდეს გაგახსენებთ.

ამას წინათ საკავშირო აკადემიის წევრთა ასარჩევ სიაში  
რუსეთიდან წარდგენილი გახლდათ გ. ნ. თავხელიძე. მე ძალიან  
დავიინტერესდი. მით უმეტეს, მის მამას, ოცდაათიანი წლების  
ახალგაზრდა კომუნისტს, კარგად ვიცნობდით ქართველი მწერ-  
ლები, რადგან იგი იმ ხანებში ბალდადის აღმასკომის თავმჯდო-  
მარე გახლდათ. ვლ. მაიაკოვსკის დღეებთან დაკავშირებით  
ჩვენ იქ ყოველ წელს ჩავდიოდით და მასპინძელიც ნიკიფორე  
თავხელიძე გახლდათ. იგი იყო მეტად წმინდა, პატიოსნებით აღ-  
სავსე ვაჟკაცი. და, აი, მისი ვაჟი, ახალგაზრდა მეცნიერი ასე-  
თი სიმალეების დამპყრობი გამხდარა.

ან კიდევ რევაზ გამყრელიძის შესანიშნავი მაგალითი, რო-  
ცა ჯერ კიდევ ახალგაზრდა მეცნიერი არაერთხელ იქნა ამერი-  
კის ინსტიტუტებში და სამეცნიერო წრეებში თავისი მეცნი-  
ერული ავტორიტეტისათვის მიწვეული.

ვინ არ გაახარა ახალგაზრდა მეცნიერების თამაზ გამყრელი-  
ძის და გივი მაჭავარიანის უსათუოდ დიდმა მეცნიერულმა  
შრომამ ენათმეცნიერებაში. ჩვენი გამოჩენილი მეცნიერი და  
მოღვაწე გიორგი წერეთელი ამ წიგნის წინასიტყვაობაში დიდ  
მეცნიერულ შეფასებას აძლევს ამ ახალგაზრდა ვაჟკაცების  
ნაშრომს.

შებრძანდით თბილისის საჯარო ბიბლიოთეკაში და თქვენ იქ  
ნახავთ ახალგაზრდების უდიდეს რიგებს, რომლებიც ასეთივე  
ვნებით ილტვიან მეცნიერების დასაპყრობად. და მართო საჯა-  
რო ბიბლიოთეკაშია ასეთი რიგები?! სახელმწიფო უნივერსიტე-  
ტის ბიბლიოთეკაში, ხელთნაწერების ინსტიტუტის ბიბლიოთე-  
კაში, ჩვენი უამრავი ინსტიტუტების ბიბლიოთეკებში  
ათასობით ნახავთ ჯერ კიდევ ახლად უღვაშაბიბინებულ  
ვაჟკაცებს და ახლად დაქალებულ უმშვენიერეს ქალწულებს.

ვინ იცის, რამდენი ასეთი ბიბლიოთეკა გვაქვს ახლა ჩვენ?!  
უნებლიეთ გახსენდება ალა მაჰმად ხანის ველური ურდოების

ვანდალიზმი, რომლებმაც 1795 წელს, გადასწვეს რა თბილისი, მიწასთან გაასწორეს თბილელი მიტროპოლიტის იოსებ სააკაძის მიერ მეთექვსმეტე საუკუნეში აშენებული შესანიშნავი წიგნთსაცავი. ვინ იცის, რაოდენი განძი წარიტაცა ველურთა ამ ხანძარმა. ხომ შეიძლება მათ შორის შოთას „ვეფხისტყაოსანიც“ ყოფილიყო? ცნობილია, რომ მეცხრამეტე საუკუნის დამდეგს ქართველმა მოაზროვნემ და მოღვაწემ სოლომონ დოდაშვილმა თავისი ხელით ძლივს დააგროვა ექვსასამდე წიგნი და გადასცა ახლად დაარსებულ ბიბლიოთეკას.

ახლა კი ჩვენი ხელთნაწერების საცავეები, ბიბლიოთეკები და წიგნთსაცავეები სავსეა ქართულ, რუსულ, უკრაინულ, სომხურ და სხვა მოძმე ერთა წიგნებით, სავსეა უცხო ენებზე დაწერილი მეცნიერული და მხატვრული ლიტერატურული შრომებით.

ჩვენი გონიერი ახალგაზრდებიც სხედან და ცოდნას იმდიდრებენ. ნურავის ნუ ჰგონია, რომ ჩვენი ახალგაზრდობა მამა-პაპათა ნათელ კვალს ასცდეს, ისინი დიდი სიყვარულითა და მამა-პაპათა ჩვეული ვაჟკაცობით, მაგრამ, მე ვიტყვოდი, უფრო მალლა აწეული ცის გუმბათით და ფართო ჰორიზონტით მიაბიჯებენ მეცნიერების დიდ რევოლუციურ გზაზე. მათ იციან, რომ სოციალური რევოლუციები მჭიდროდაა დაკავშირებული მეცნიერულ რევოლუციებთან, რომ ახლა საბჭოთა ახალგაზრდობამ კიდევ უფრო მალლა უნდა ასწიოს მეცნიერების გამარჯვების დროშა.

ისინი ამას დიდი ინტერესით ასრულებენ.

მე გავიცანი ერთი ახალგაზრდა ასპირანტი, ნუგზარ ნოზაძე. იგი ტექნოლოგია და კრასნოდარის თამბაქოს საკვლევ ინსტიტუტში მუშაობს.

მისი გაცნობით დავინტერესდი შემდეგი გარემოების გამო: ერთი წიგნი წავიკითხე ყირიმის ქართველ პარტიზანებზე. მათი ავტორები ლადო გოძიშვილი და სანდრო ჩაჩხიანი სამამულო ომის გმირი ვაჟკაცები არიან. მათ არა ერთი და ორი საგმირო-საბრძოლო საქმეებით ისახელეს თავი და ასახელეს თავისი მამული, იმ წიგნში, რომელსაც სათაურად „ყირიმის მთებში“ აწერია, ნათქვამია, რომ იქ, ყირიმში, სახელგანთქმული მხედართმთავრის ა. კულიკოვსკის მეთაურობით ას ორ-

მოცდაათი ქართველი იბრძოდა. ამათში ერია კომუნისტი ირაკლი ნოზაძეც. მან ისე, როგორც მისმა მეგობრებმა, წლების მანძილზე არაერთი სამაგალითო საქმე ჩაიდინა.

ახლა ირაკლი ნოზაძე თბილისში მუშაობს. ნუგზარი მისი ერთადერთი ვაჟია. იგი ბრწყინვალედ სწავლობდა საშუალო სკოლაში და უმაღლეს სასწავლებელში. მასზე გაზეთებში არაერთხელ დაწერილა, როგორც მეტად ნიჭიერ და ენერგიულ ყმაწვილ კაცზე. იგი ყოველთვის გამოირჩეოდა სიღინჯით და გონიერებით. მამის თანამებრძოლებმა, გმირული წლების მეომრებმა დააპირეს თავისი პარტიზანული სამყაროს ისევ დათვალიერება, გახსენება იმ მწარე, მაგრამ ვაჟკაცური და ნათელი დღეებისა, რომლებიც მათ იქ გაატარეს. ირაკლი ნოზაძე მაშინ შეუძლოდ გახლდათ, მაშინ მისმა ვაჟმა — ნუგზარ ნოზაძემ სთხოვა მამას, მის მეგობრებს წაეყვანათ მათ გმირულ ნაკვალევზე. და აი, ახალგაზრდა ინჟინერი და მომავალი მეცნიერი მამის მეგობრებთან ერთად მიემგზავრება იმ ადგილებში, სადაც მისი საყვარელი მამა იბრძოდა. იგი ახლო ეცნობა იმ ადგილებს, სადაც მამამისი შეუდრეკლად და ვაჟკაცურად ებრძოდა ფაშისტ ვერაგებს, ეცნობა მამის მეგობრებს, მათი სულიერი ცხოვრების მაღალ აზრს და მისთვის თანდათან ნათელი და ახლობელი ხდება სახელოვანი მამის და მისი მეგობრების საამაყო გზა.

ახლა ნუგზარი მალე დაამთავრებს ასპირანტურას. იგი ერთ-ერთი საუკეთესო ახალგაზრდაა თავის მეგობრებს შორის. მას ასე კარგად და ნათლად ეცოდინება მამის გმირული და ვაჟკაცური გზა, რომელიც უთუოდ ჩვენი მამულის საამაყო გზაა. ასე რომ, ჩვენი ახალგაზრდობა არა მარტო ძალღონით სავსეა, ლამაზი და გონიერია, იგი აღსავსეა რევოლუციური ნათელი სულით.

ეს უთუოდ თბილისური სულია.

იხავას ვალდა ვიფრინავს არწივი მქლავრი ფრთავითა

1966 წლის 25 ნოემბერს რუსთაველის თეატრის მცირე დარბაზში უმშვენიერესმა, შესანიშნავმა ქართველმა მოღვაწე ქალმა ვიქტორია სირაძემ საბჭოთა ქვეყნის ორ უდიდეს, გამო-

ჩენილ მწერალს და მოღვაწეს ნიკოლოზ ტიხონოვსა და მიკო-  
ლა ბაჟანს გადასცა რუსთაველის პრემია. საზოგადოებათა  
და ერთა ბიოგრაფიაში არის ისეთი განსაკუთრებული დღეები,  
როცა ეს დღე დაუვიწყარი, ისტორიაში საზეიმოდ ჩასაწერია.  
და მართლაც, სულ ახლახანს დაარსებული ჩვენი დიდი პოეტის  
და მოაზროვნის შოთას პრემია, რომელიც ჯერჯერობით ქართ-  
ველ მოღვაწეთაგან მხოლოდ ოთხ პიროვნებას ხვდა ბედნი-  
ერ წილად, მეორედ ნ. ტიხონოვსა და მ. ბაჟანს ერგო.

რატომ მოხდა ასე, რა დაიმსახურეს ამ თავის რესპუბლიკა-  
ში გამოჩენილმა მოაზროვნებმა ისეთი ჩვენი ხალხის წინაშე?  
ახალგაზრდობის მთაზე აღმართულ ძეგლს, ქართველ დედას  
ერთ ხელში სასტუმრო-სამეგობრო თასი უჭირავს, მეორეში —  
სამტრო მახვილი. მტერი ხარ — მახვილით უნდა დაგხვდეთ,  
მოყვარე ხარ — ქართლის მიწის ნაქურთხი ნაქური შესვიო —  
ამბობს ეს ქანდაკება.

ამ ორმა ნათელმა მოღვაწემ დიდი და ნათელი საქმეები გა-  
უკეთა ჩვენს მამულს. ნიკოლოზ ტიხონოვი საქვეყნოდ  
სახელმძღვანელო დიდი მოღვაწე კაცია. მას იცნო-  
ბენ სამყაროს ყველა კუთხეში, მისი ვაჟკაცური, გონიერი და  
მეტად ნიჭიერი ნაწარმოებები გზას იკვლევს ყველა ერის კა-  
ციის სულსა და გულში. იგი საბჭოთა დიდი რუსეთის უნიჭი-  
ერესი და უკულტურესი დესპანია ყველგან. მისი მშვიდობის-  
მოყვარული გული და აზრი, მისი ადამიანთა ბედნიერებისთ-  
ვის მუდამ სიკეთეების მთესველი შემოქმედება ახლობელია და  
სასიყვარულოა ყოველი მშრომელი კაცისათვის.

მისმა ჰუმანიტარმა გონიერმა რუსულმა ვაჟკაცურმა გულმა  
ნამდვილად შეიყვარა საქართველოს მიწაწყალი. მისი მალა-  
მხატვრული ბრწყინვალე ლექსები კახეთზე უთუოდ ამის დიდი  
დასტურია.

მისი თავგამოდებული და ძმური ნათელი დახმარება და  
დიდზე დიდი ღვაწლი შოთას საქვეყნოდ ცნობის საქმეში მარ-  
თლაც რომ დაუფასებელი გახლდათ.

მიკოლა ბაჟანი კი, ეს უკრაინის დიდი ხალხის გონებითა  
და ნიჭიერებით აღსავსე შვილი, წლობით შრომობდა შოთას  
თარგმნისათვის თავის მშობლიურ ენაზე. უნდა ვიცოდეთ,  
რომ, ლინგვისტა აზრით, უკრაინული ენა ევროპულ ენათა

შორის ერთი ულამაზესი და უმშვენიერესი ენაა და აი ამ ენაზე მან ბრწყინვალედ თარგმნა ჩვენი რესპუბლიკის სიამაყე, დიდი შოთა.

ამიტომ, სწორედ ამ კეთილი ძმობისათვის, ძმობისათვის და სიყვარულისათვის მათ მიენიჭათ ეს დიდი ჯილდო.

ქართველ კაცს არასოდეს არ დაავიწყდება ის სიტბო და სიყვარული, რომელიც ჩვენმა მოძმე ერებმა რუსეთის საბჭოთა სახელმწიფოს გამოჩენილი მოღვაწეების მეთაურობით ჩვენი რესპუბლიკისადმი გამოიჩინეს, როდესაც მოსკოვში, რევოლუციის დიდ დედაქალაქში დიდი პოეტის და მოაზროვნის ძეგლი გახსნეს. ამით ერთხელ კიდევ თავისი ლენინური სიტყვა უთხრეს ჩვენს ერს და მთელს ქვეყანას. მსოფლიოს ვინც დღეს ყურადღებით უსმენს და ხალხის სიყვარული თან ახლავს, მან იცის, რომ მოსკოვი დღეს არა მარტო რევოლუციური აზრისა და ფიქრის ცენტრია, იგი ჰუმანურობის, ადამიანთა კაცთმოყვარეობის, ქვეყნის დიდი ფიქრის და აზრის ცენტრიც არის.

შოთა რუსთაველიც ხომ კაცთმოყვარეობის, სიბრძნის და სილამაზის ბრწყინვალე გენია გახლდათ!

მისი სახელი თანდათან გადის მსოფლიოს დიდ გზებზე. ამიტომ იყო, რომ ჯერ კიდევ რამდენიმე წლის წინ საქართველოს ცენტრალური კომიტეტის დიდი მონდომებით და თხოვნით საკავშირო მთავრობამ იერუსალიმში წარგზავნა ჩვენი ქვეყნის გამოჩენილი მოღვაწეები, მეცნიერები — აკაკი შანიძე, გიორგი წერეთელი, პოეტი-აკადემიკოსი ირაკლი აბაშიძე. მათ ჩვენმა ხალხმა პატივისცემით „იერუსალიმელებიც“ კი შეარქვა. ამ ადამიანებმა ისევე აღმოაჩინეს დაკარგული შოთას სურათი და ამით უაღრესად გამოაცოცხლეს ჩვენი ერის ცხოვრება. ყოველ ერს ჰყავს თავისი უსაყვარლესი ადამიანები. ეს ადამიანები იბრძოდნენ თავიანთი ხალხის დიდი სიკეთებისათვის. შოთას დიდი ღვაწლი იმაშია, რომ მან ასეული წლებით ადრე იქადაგა და აღამალა ადამიანის თავისუფლების და კაცთმოყვარეობის მეტად საპატიო იდეალები. მან დიდი სიბრძნე დიდ მუსიკალურ ფორმებში ჩაატია.

მან იმღერა ისე, რომ ასე ძლიერად და ლამაზად მხოლოდ ცოტას უმღერია ამ სამყაროში.

დღეს ქართველი ხალხი სწრაფად მიდის წინ, მისი აზროვნება და გონება მალღდება, მისი მატერიალური დოვლათი ყოველდღიურად მდიდრდება. ჩვენ რესპუბლიკას აქვს შესანიშნავი გაზეთები, ჟურნალები, სამეცნიერო გამომცემლობები.

დაარსდა ჩვენი ერისათვის მეტად საჭირო და საამაყო ორგანო ქართული ენციკლოპედია, რომლის გარშემო თავი მოიყარა ჩვენმა ქართულმა შემოქმედმა ინტელიგენციამ.

ეს დიდი სახელმწიფოებრივი საქმეა.

ყოველი ქართველი კაცი გულისფანქვალთ ელის მის პირველ ტომს.

ყოველ თბილისელს სჯერა, რომ ეს დიდი საქმეც კეთილად დაგვირგვინდება.

სხვანაირად არც შეიძლება.

თბილისის ბალავერი ხომ კლდეზეა გაჭრილი?!

მისი ნიადაგი მთელი ჩვენი მამულის ნიადაგივით მტკიცეა და ურყევი.

მისი ცის გუმბათი მაღალია და ურღვევი. მის სიმტკიცეს და სიმაგრეს კავკასიონის ალმასივით დაუფხვნელი თეთრი მწვერვალები შებჯენია. ამიტომ მისი ცაც გაუბზარავია, გაუტეხელია, წმინდაა და შეურყეველი.

ამიტომაც თბილისის ბალავერიც და ცის გუმბათიც მტკიცე და წმინდა, მაგარი და გაუბზარავი. ამიტომ უთქვამს ხალხს:

„ისევაც მაღლა მიფრინავს  
ორწივი მძლავრი ფრთებითა“.



## შეხვედრები გალაკტიონთან

ჩვენი საუკუნის ოცდაათიანი წლების ქუთაისი მეტად თავისებურ და საინტერესო ცხოვრებას ეწეოდა. სწორედ ამ წლებში დაიწყო და აშენდა რიონჰესი, დასრულდა ბარიტის ქარხანა, აბრეშუმის კომბინატი, ლიტოპონის ქარხანა, გუმბრინის და ბარიტის უხვად ამოღებასა თუ გამოზიდვასაც სწორედ ამ წლებში ჩაეყარა საფუძველი. ოცდაათიან წლებშივე აშენდა ქუთაისის სამკერვალო ფაბრიკა და საკონსერვო ქარხანა. ასე რომ, სულ მოკლე ხნის მანძილზე ქუთაისი გადაიქცა ჩვენი რესპუბლიკის ინდუსტრიის ერთ-ერთ მნიშვნელოვან ცენტრად. გამრავლდა მუშათა კლასი, გაიზარდა შრომისადმი პატივისცემა, სახე შეიცვალა ადამიანთა ურთიერთობამ. არ შეიძლება არ გავიხსენოთ ის ისტორიული ფაქტიც, რომელმაც დიდი როლი ითამაშა ქუთაისისა და, საერთოდ, საქართველოს მრეწველობის ისტორიაში. ეს გახლავთ ის, რომ ჯერ კიდევ ვლადიმერ ლენინის სიცოცხლეში, მისივე ინიციატივით მოსკოვის პროლეტარიატმა ქუთაისის მუშებს გამოუგზავნა საჩუქრად მაუდის საქსოვი ფაბრიკის პირველი დანგები და დანადგარები. სწორედ მაუდის საქსოვი ფაბრიკა იყო ქუთაისის ინდუსტრიის პირველი პიონერი, რომელმაც შემდეგ გამოიწვია სხვადასხვა წარმოებების მშენებლობის დაწყება. ყოველივე ამან სულ შეცვალა ამ ქალაქის სახე. გაძლიერდა მისი სამრეწველო-საქალაქო მეურნეობა. გაიზარდა მისი ქუჩები, გამშვენიერდა მისი ცხოვრება. რასაკვირველია, ქართული მწერლობა ეხმაურებოდა თავისი საყვარელი ქალაქის დიდ ცვლილებებს. თითქმის არ იყო არც ერთი დღე რომ ქუთაისში არ ჩამოსულიყვნენ ჩვენი მწერლობის გამოჩენილი

მოდგაწენი. ისინი ჩამოდიოდნენ მშენებლობებზე, ეცნობოდნენ ახალდამთავრებულ ფაბრიკა-ქარხნებს. მის ახალგაზრდა პროლეტარიატს. აწყობდნენ ლიტერატურულ სადამოებებსა და დისკუსიებს, გამოდიოდნენ მუშების წინაშე და კითხულობდნენ თავიანთ ნაწარმოებებს. აღსანიშნავია ისიც, რომ იმ წლებში ქუთაისში გამოდიოდა მეტად საინტერესო ლიტერატურული გაზეთი „სიტყვა და საქმე“, რომლის გარშემო შემოკრებილი იყო მთელი ქართული მწერლობა. ამავე დროს ქუთაისში გამოდიოდა ლიტერატურული ყურნალიც. რასაკვირველია, მაშინდელი ქუთაისის ცხოვრებაში უსათუოდ დიდ როლს თამაშობდა კოტე მარჯანიშვილის თეატრი. როგორც ცნობილია, სწორედ ამ წლებში მოუხდა ამ თეატრს იქ მუშაობა, რომლის ქარიშხლიანმა სეზონებმა დიდი როლი ითამაშა საბჭოთა საქართველოს ხელოვნების ისტორიაში. ასე რომ, მაშინდელი ქუთაისი მეტად მჩქეფარე და საინტერესო ცხოვრებას ეწეოდა. სხვათა შორის ოცდაათიან წლებში ქუთაისი იყო საოლქო ქალაქი. მის ფარგლებში მთლიანად მოქცეული იყო არა მარტო იმერეთი, მასში მთლიანად შედიოდა სამეგრელო, გურია, რაჭა-ლეჩხუმი და სვანეთი, ქუთაისს მაშინ ჰყავდა ისეთი პარტიული მუშაკები, რომლებიც წარმოდგენდნენ საქართველოს მეტად განათლებული ინტელიგენციის მოწინავე რაზმს. საოლქო კომიტეტის მდივანი იყო ახალგაზრდა, მაგრამ მეტად ნიჭიერი, განათლებული და დარბაისელი კომუნისტი ვასო დარახველიძე.

საოლქო კომიტეტის მთელი შემადგენლობა მეტად აქტიურად მონაწილეობდა ქალაქის ლიტერატურულ ცხოვრებაში. მარჯანიშვილის თეატრის სამხატვრო საბჭოს სხდომებზე მუშებთან, მწერლებთან, ინტელიგენციასთან ერთად ესწრებოდნენ არა მარტო საოლქო კომიტეტის ხელმძღვანელები, აქ ხშირად ვხვდავდით საქართველოს რესპუბლიკის პარტიულ და საბჭოთა მეთაურებს. ისინი, როგორც თითოეული სამხატვრო საბჭოს წევრი, ისე იღებდნენ მონაწილეობას სპექტაკლების წინასწარ თუ შემდგომ განხილვასა და შეფასებაში.

აღსანიშნავია ისიც, რომ ჩვენი გამოჩენილი მწერლების ხალი და თვალსაჩინო ნაწარმოებების დასტამბისთანავე ქუ-

თაისის თეატრში ეწყობოდა ლიტერატურული დისკუსიები, მათი განხილვა-შეფასებანი. ყოველ ქართველ მწერალს სურდა და მეტად აინტერესებდა ქუთაისელთა აზრი მის ნაწარმოებებზე. თითქმის ყოველ კვირას ამ მიზნით ჩამოდიოდნენ: მიხეილ ჭავჭავაძე და ნიკო ლორთქიფანიძე, შალვა დადიანი და გიორგი ქუჩიშვილი, კონსტანტინე გამსახურდია და კონსტანტინე ლორთქიფანიძე, სიმონ ჩიქოვანი და ბესო ულენტი, გალაკტიონ ტაბიძე და ირაკლი აბაშიძე, ალექსანდრე ქუთათელი, პოლიკარპე კაკაბაძე, სიმონ ხუნდაძე და ბენიტო ბუაჩიძე, სერგო ამალლობელი და შურა დუდუჩავა (კარლო-კალაძე მაშინ მარჯანიშვილის თეატრის დირექტორი და გაზეთ „სიტყვა და საქმის“ ერთ-ერთი ხელმძღვანელი იყო, ამიტომ ქუთაისშივე ცხოვრობდა). მართლაც, ყველაფერი ეს მეტად აცოცხლებდა ქალაქს და სწორად წარმართავდა ახალგაზრდობის აზრსა და გონებას; ამაღლებდა მისი კულტურის დონეს, აწვითებდა მის ლიტერატურულ გემოვნებას.

რასაკვირველია, გალაკტიონიც მეტად ხშირი სტუმარი იყო იმდროინდელი ქუთაისისა. იგი ყოველთვის დაბინადებოდა სასტუმრო „გრანდ ოტელში“, დაუჩვენებდა ნაცნობებს და პირველყოვლისა ბაგრატიის მთაზე ავიდოდა.

— აქედან, გენაცვალე, რიონპესსაც ვუყურებ და გელათსაც. ძველი ქუთაისიც აქ არის და ახალიც აქედან იხედება. ბაგრატიის მთაზე, ძმებო, მიწაც სხვანაირია და ცაც სხვაფრივ მეჩვენებაო, — იტყოდა ხოლმე.

მახსოვს, ერთხელ გიორგი ქუჩიშვილი და გალაკტიონი ჩამოვიდნენ. აწ განსვენებული ჯაჭუ ჯორჯიკია ქუთაისის სამეურნეო სკოლას ხელმძღვანელობდა. ბინაც იქვე ჰქონდა. ჯაჭუმ ორივენი სახლში მიიწვია. მათთან ერთად დია ჩიანელი (დავით ჩხეიძე), გრიშა გაბუნია, კოტე დემეტრაძე და ამ სტრიქონების ავტორი მოიპატიჟა (გრიშა გაბუნია მაშინ ქუთაისის საქალაქო კომიტეტის მდივანი იყო. კოტე დემეტრაძე კი ქალაქის კომიტეტის აგიტაცია-პროპაგანდის განყოფილებას ხელმძღვანელობდა).

სადილის შემდეგ გალაკტიონი და გიორგი ლექსებს კითხულობდნენ. როგორც ცნობილია, გალაკტიონი კითხვის

დროს ცოტა ჩქარობდა. გეგონებოდათ, ეშინია სტრიქონები არ დამავიწყდეს, ხელიდან არ გამიფრინდეს, არ დამეკარგოსო.

გიორგი კი უფრო დინჯად, ხმამაღლა და მკვეთრად ამბობდა თითოეულ სტრიქონს.

— ხომ ხედავთ, რა კარგად კითხულობს ლექსებს, — თქვა გალაკტიონმა, — იმიტომ მიყვარს მე ჩემი გიორგი. გიორგი ხომ პროზასაც წერს, მე კი მოთხრობის წერა არ მეხერხება. ეს ოხერი ყველაფერი ყელზე ბოლქვა-ბოლქვად მადგება. რასაც მოვიფიქრებ, ლექსად უცებ უნდა ვთქვა, თორემ დავიხრჩობი ან გავგიჟდები.

სადილის შემდეგ გრიშა გაბუნიაშვილის საგუბრისკენ წავიყვანა. ჯაჯუს ბინიდან საგუბარი არც ისე შორს იყო და ფეხით წავედით. ყველამ იცის, თუ როგორი ლამაზია კომა, გალაკტიონი და გიორგი ბავშვებივით გახარებულნი იყვნენ.

— გენაცვალე, ძამიკო, კომაში რამდენი ხანია არ ვყოფილვარ. ასეთი მშვენიერი ადგილი ქვეყნად მეორე არ არის! — ეუბნებოდა გალაკტიონი გიორგი ქუჩიშვილს.

კომიდან გაღმა მწვანეყვავილა მოჩანს. მისი კორტოხიდან პატარა თეთრი ეკლესია და ძველი კოშკის ნანგრევი გაღმაცურებს რიონის ტალღებს. მწვანეყვავილას რიონის კლდოვან კიდეზე ბილიკივით მიყვება ვიწრო გზა. ეს გელათის ძველი გზაა. ეს გზა კიბულის წყაროსთვალს გაუვლის და ზემოთ მიემართება. გამოღმაც ბაგრატის მთის ქვემოთ კალთაზეც ხომ წყარო გაღმორჩქეთს!

— შეხედე, ძამიკო გიორგი, გაღმა კლდე არის, გამოღმაც კლდეა. გაღმაც წყარო გაღმორჩქეთს, გამოღმაც წყარო. გაღმაც ყვავილები და მწვანე ბალები, გამოღმაც ყვავილები და მწვანედ ამოლტილი ხეები. მათ შუა-თითქოს კაცის ხელით ამოთლილ ვეება კლდის კალაპოტზე ჩვენი რიონი ქარიშხალივით ბობოქრობს. ამაზე მშვენიერს, სად ნახავ რასმეს?! ახლა ბაგრატის ნანგრევებს დაუკვირდით! ყვავ-ყორნებისაგან დაკორტნილ ამირანის გულს არა ჰგავს?! მკერდი შემოხეცია, გუმბათი ჩანქმევია, კედლები დაჰფლეთია და მაინც საკვირველებასავით დგას. ისე დგას, თითქოს ცას შეჰლაღადებდეს

ჩვენი ქვეყნის მტრების ველურობას, მათ სისხლმოყვარეობას, თავდამსხმელთა ყაჩაღობას! — გატაცებით ლაპარაკობდა ვალაკტიონი, გიორგი კი გარინდებული უსმენდა და ნელა მიიბიჯებდა ქომის გზაზე, ხანდახან ბეჭებს შეათამაშებდა, გელათისაკენ გაიხედავდა და იმედიანად ამოიოხრებდა.

კაშხალთან მუშები შემოგვესიენ. ცოტა ხანს შეეჩერდით, კაშხალზე გადავლით კიბულისკენ გავედით, ახლადგაქრილ გვირაბში შევედით და გავუყევით. მაშინ რიონქვისის სამუშაოებზე ირაკლი ობოლადის ახალგაზრდული ბრიგადა გრგვინავდა. ბიჭები კლდეებს ანგრევდნენ, ლალუმებით აფეთქებდნენ ძარღვიან ქანებს.

კარგა ხანს ვიარეთ. უკვე გოდოგნის მინდვრების გამოღმა ფერდობზე გავედით. იქვე, ქვემოთ, მდინარე წყალწითელაა თავისი ცნობილი უძველესი ხილით. გვირაბის ბოლოზე რიონქვისის მმართველი ვალოდია ჩიქია და ინჟინერი გიორგი მიქელაძე დაგვხვდნენ, თან ახალგაზრდა ინჟინრები: გ. ხერხეულიძე, გოგი ჩოგოვაძე, ბორის ლომიძე, დავით გუნია, პეტრე წულუკიძე, მიხეილ ჩაჩავა და სხვები წამოეყვანათ. ისინი მაშინ იწყებდნენ თავიანთ საინტერესო ცხოვრებას. იმ დღეებში იქ დიდი ამბავი მოხდა. პროექტის მიხედვით, გვირაბიდან გამოსვლის შემდეგ წყალი საფიჩხიის ფერდობს უნდა გაყოლოდა არხის საშუალებით და ტურბინებამდე უნდა ევლო. ამ ადგილებში. ნიადაგი მცოცავი აღმოჩნდა, როდესაც ჭაშნიკად გაშვებულმა წყალმა არხში გაირბინა, ისედაც რბილი მიწა დააღბო, დაშალა და მთელი არხი -ქვემოთ, წყალწითელასკენ, დაცურდა. რასაკვირველია, ადამიანთა მსხვერპლი არ ყოფილა, მაგრამ ზარალი კი დიდზე დიდი იყო. სწორედ ამ დღეს ეს საინჟინრო ჩგუფი წყვეტდა იმას, თუ რა ღონე უნდა ეხმარათ ამ უბედურების ასაცდენად.

ვალოდია ჩიქიას არა მარტო დიდი რევოლუციური გამოცდილება ჰქონდა, იგი საბჭოთა კავშირის ახლადდაწყობულ ჰიდრომშენებელთა იმ თაობის მოწინავე ადამიანებს ე.წ. თენოდა, რომლებმაც პირველებმა დაიწყეს ვოლჰოვის გესის და დნებარის დიდი მშენებლობა. იგი პირველი მეთაური იყო ამ საქმის. ამიტომ დიდი გამოცდილების მქონე ადამიანი გახლდათ. სწორედ მისი მეთაურობით გადაწყდა იმ აღ-

გილზე ისევ გვირაბი გაეყვანათ და პირველი გვირაბი მეორეთ გაეგრძელებინათ, რაც მიღებულ და შესრულებულ იქნა კი-  
დეც. როცა ვ. ჯიქიამ გ. ტაბიძე და გიორგი ქუჩიშვილი  
დაინახა, რომელთა გამოჩენას იმ დროს არ ელოდა, მეტად  
გაოცდა.

—აი, ძმაო, გენიოსები მოსულხართ! ალბათ, ღმერთმა გამო-  
მიგზავნა თქვენი თავი დასახმარებლად, — იხუმრა ვალოდიამ  
და განაგრძო: — ამაზე მეტი გაჭირვება არ შეიძლება, თუ  
მიშველით და რასმეს მეტყვეით, თქვენ იცით.

მაშინ გალაკტიონს წვერი არ ჰქონდა, მაგრამ ნიკაპზე  
ხელის მოკიდება და ჩაფიქრება იცოდა (შემდეგში კი ჩაფიქ-  
რების დროს წვერს დაუწყებდა ხოლმე ხელით წვალებას და  
თამაშს). მაშინაც ხელი ნიკაპზე მიიღო და ღიმილით თქვა:

—გენაცვალე, ლექსებით რომ რიონჰესის აშენება შეიძ-  
ლებოდეს, ჩვენი აკაკის ლექსები ას ჰიდროსადგურს ეყო-  
ფოდა. ეს თქვენი საქმეა, ინჟინრების საქმე. თუ რაიმეში  
თქვენ შეცდით, ჩვენ რა შუაში ვართ. ახლა, ჩემო ვალოდია,  
თქვენს ცოდვებს ჩვენ ნუ გადმოგვაბრალეობ.

კარგა ხანს გაეჩერდით იქ და მერმე ვალოდია ჯიქიასთან  
და გიორგი მიქელაძესთან ერთად გაუუყვეით რიონის სად-  
გურის მიმართულებით იმ ადგილისკენ, სადაც წყალს ტურ-  
ბინები უნდა აემუშავებინა. მუხნარის ტყესთან, იქ, სადაც  
ახლა გვირაბები თავდება და არხი იწყება, მოულოდნელად  
მსახიობებს წავაწყდით. უშანგი ჩხეიძე, შალვა ღამბაშიძე,  
ივლიტა ჯორჯაძე და მაშინ პარტიის საოლქო კომიტეტის სა-  
ორგანიზაციო განყოფილების გამგე თედო კორსაველი რი-  
ონჰესის დასათვალისწინებლად მოსულიყვნენ.

იმ ადგილებში ქარი იშვიათი როდია. ყველგან რომ სიწყ-  
ნარე იყოს, იქ ყოველთვის ჰქრის ნიავი. იმ დღესაც, გვირაბი-  
დან გამოვედით თუ არა, ქარი მოგვეძალა. შალვა ღამბაშიძე  
მიესალმა რა ყველას, გალაკტიონს მოეხვია და მისი ლექსი  
„წყალტუბოდან ქუთაისში: მიმავალო ქარო“... წაიკითხა.

გალაკტიონი გაოცდა:

— უყურეთ შალვას, ეს ლექსი მე ისე მახსოვს, მგონი,  
არც კი დამიბეჭდავს. საიდან ისწავლეთ ასე უცებ, რას ნიშ-  
ნავს ნიჭიერი მსახიობი. მარა, გენაცვალე, მართალი რომ

გითხრა, ახლა გელათიდან მოქრის ეს ქარი და არა წყალტუბოდან, ეს ზენა ქარია, წყალტუბო კი ქვემოთაა...

გიორგი ქუჩიშვილს რატომღაც არ მოეწონა გალაკტიონის ეს ხუმრობა:

— აი, ასე იცის გალაკტიონმა, თუ მისი ლექსი დაისწავლე, ნიჭიერიც ხარ და გენიოსიც, თუ არადა, ყველაფერი წყალში უნდა გადაყაროს.

შალვა ღამბაშიძემ საოცარი სიცილი იცოდა. ეს მეტად გულწრფელი, უშუალო და მაღალი ნიჭის მსახიობი სიცილს თუ აიტეხავდა, ძნელად გააჩერებდით. მაშინ, მახსოვს, ისეთი სიცილი აუტყდა, რომ სულ ცრემლები დვარა. პირველად ყველა ღიმილით უყურებდა შალვას, მერმე კი ყველას გადაედო მისი სიცილი და ყველამ ხარხარი ატეხა. არ იცინოდა მხოლოდ გალაკტიონი. ის ცოტა განზე გადგა, ნიკაპზე ხელს იფათურებდა და ისე შეჰყურებდა ყველას.

ივლიტამ იეშმაკა, ალბათ, იაზრა გალაკტიონს გული არ მოუვიდესო და მასთან ახლოს მივიდა. დაუყვავა, მოეფერა. ამან გალაკტიონი გაახარა, გაიბადრა და ბოლოს თითონაც გაიღიმა.

ვალოდია ჭიქია არ მოგვეშვა. თავისი მძლოლი გაგზავნა, ჩვენთვის მანქანები მოაყვანიხა და რიონჰესის მეოთხე უბანზე, ტურბინებთან მიგვიყვანა. იქ ყველაფერი აგვიხსნა, დეტალურად დაგვათვალთვინებინა.

არ დამავიწყდება, პირველი საბჭოთა ექსკავატორი სამუშაოზე მაშინ ვნახე პირველად.

გიორგი ქუჩიშვილი თავისი ფართო თვალებით გაოცებით შეცქეროდა ამ საოცარი მანქანის შრომას.

მანქანაზე ახალგაზრდა ქართველი მემანქანე იჯდა და საჭეს მართავდა.

გიორგი ზევით, კოშკურაში ავიდა ახალგაზრდასთან. გვარი ჰკითხა და განარებული ჩამოვიდა.

გალაკტიონი დაბლიდან უტრიალებდა ფოლადის სპილოს ვეება ხორთუმს. იმ წელს საქართველოს ახალგაზრდობამ ითავა ამ მშენებლობაზე მუშახელის გამოგზავნა. ამ უბანზე სხვებთან ერთად სამასი წალკელი ჰაბუკი თავგამოდებით შრომობდა. უნდა ითქვას რომ მაშინდელი ჩვენი ეკონომი-

კა მეტად ღარიბი იყო. სოციალისტური ინდუსტრია ახლად იდგამდა ფეხს. პურის პრობლემა მეტად მწვავედ იდგა. ახალგაზრდებს ძალზე უჭირდათ. თბილი ტანსაცმელი არც ისე ჭარბად იყო. საგებ-სახურავით მდიდრები როდი იყვნენ?!

გაციება და ფილტვების ანთება მეტად ხშირი მოვლენა გახლდათ, ციებ-ციხელება კი პირდაპირ მუსრს ავლებდა ბიჭებს. მოგეხსენებათ, მაშინ წამლებითაც არ ვიყავით განებივრებულნი. მიუხედავად ამისა, ბიჭები მთელი დღე მუშაობდნენ და საღამოობით მცირე მცოდნეთა. სკოლებში დადიოდნენ. ეს სკოლები იქვე, ბარაკებშივე, იყო მოწყობილი. არ ყოფილა შემთხვევა, რომ რომელიმე ახალგაზრდას სამუშაოდან წასვლაზე ეფიქროს. სკოლას კი აბა ვინ გააცდენდა. ეს იყო საოცრად რევოლუციურად, ვიტყვდი (და მე მგონი, არ შევცდები) ფანატიკურად განწყობილი ახალგაზრდობა, რომელსაც სწამდა ხვალინდელი დღის, თავგანწირვით უყვარდა იგი და ღიმილით ებრძოდა ყოველ გაჭირვებას. ბევრი მათგანი დღეს ინჟინერია, გამოჩენილი საბჭოთა მოქალაქეა, ჩვენი ქვეყნის მოწინავე ადამიანია.

რადგან დასვენების დღე იყო, ვალოდია ჩიქიას თაოსნობით ახალგაზრდების საერთო საცხოვრებელში შევედით. სახელდახელოდ შევირბინეთ ერთ მოზრდილ ბარაკში. ბიჭებს მწერლების მისვლა მეტად გაუხარდათ. შემოერაგვენ გარშემო გალაკტიონს, გიორგისა და ჭაჭუს. გიორგის ლექსები ბევრმა ზეპირად იცოდა. უცბად, ყოველგვარი ოფიციალური შესავალის გარეშე დაიწყო ლექსებისა და ნოველების კითხვა. პირველად დიამ დაიწყო კითხვა, მერე ჭაჭუმ, ერთი ორჯერ მეც წავიკითხე. ბოლოს გიორგი და გალაკტიონი გამოვიდნენ. ორივენი მეტად კარგ განწყობილებაზე იყვნენ. გიორგი პირდაპირ გვრგვინავდა. გალაკტიონი ქარიშხალივით ბობოქრობდა. ბევრზე ბევრი ლექსები წაიკითხეს. მკითხველები თუ მაყურებლები დაჟინებით მოითხოვდნენ მათგან ლექსების კითხვას. ისინიც არ ილღებოდნენ. გაბადრულნი და გახარებულნი კითხულობდნენ თავიანთ ხაწარმოებებს.

უკვე საღამო ხანი იყო, ქალაქისკენ რომ წამოვედით. ვალოდია ჩიქიას მეოხებით ისევ კომისკენ მოგვიხდა წასვლა.



იქ მაშინ, რიონის საგუბართან, „ალავიძის დუქანი“ იყო. სწორედ იქით წაგვიყვანა ვალოდია.

მასხოვს ერთი მეტად საინტერესო ამბავი. ყველამ იცის, ზედ ბაგრატიის მთის კალთასთან როგორი შესანიშნავი წყარო გადმოჩქეფს. იგი, როგორც ჩანს, ოდესღაც საოცრად შენიღბული გვირაბით უერთდებოდა რიონს; ალბათ, იმიტომ, რომ მეტერს არ შეენიშნა ციხეში წყლის არსებობა. დროთა მანძილზე გვირაბის ბოლო ნაწილი ჩამოენგრიათ და წყარო მეტად მოუვლელი იყო. იგი გაფანტულად მოჩქეფდა ზემოდან. თან მისი მისასვლელი მეტად დანგრეული იყო. როცა იმ წყაროს პირზე შევისვენეთ, გალაკტიონი ვალოდიას მიუბრუნდა:

— გენაცვალე, ვალოდია, შენისთანა კაცს ეს არ ეპატიება, ამ წყაროს სულ ორი ტომარა ცემენტი და ასი ცალი აგური დაჭირდება, ქართველი კაცი გაივლის, დაირწყულებს და დაგლოცავს. გააკეთე, ძამია, გააკეთე!

ვალოდია შეჰპირდა მისი სურვილის შესრულებას. მართლაც, ერთი კვირის შემდეგ მან ამოაწებებინა და ~~მოაწებებინა~~ ამ წყაროს თვალი. ახლაც ყველა გამველელი, როცა იქ წყაროს დაეწაფება, მადლობელი რჩება. მათ, რასაკვირველია, არც კი იციან, რომ მისი მოპირკეთების აზრი გალაკტიონს ეკუთვნის და მისი პატივისცემით ვ. ჭიჭიამ ეს დაპირება შეასრულა.

იმ საღამოს უშანგი ჩხეიძე თეატრში ჩენჩის როლს თამაშობდა. რასაკვირველია, მას იმ საღამოს ერთი წვეთი ღვინო არ დაუღვია. არც საჭმელი უჭამია, მაინცდამაინც სტომაქს ვერ დავიტვირთავო ამბობდა. შალვა ხუმრობდა, წარმოდგენის წინ მე კარგად მიყვარს დაპურება, მღვდლის შვილი ვარ, ეს კი სპექტაკლის წინ, თითქოს ზიარებაზე მიდიოდეს, ევლოგიასავით თუ შეცუტქნის რამესო.

საოცარი კაცი კი იყო უშანგი ჩხეიძე. ძალ-ღონით მეტად ძლიერი ვაჟკაცი, საჭიროებისას სცენაზე ქარიშხალივით ბობოქარი, ადამიანებთან მეტად მოკრძალებული და თვინიერი გახლდათ. ლექსის თუ მონოლოგის წაკითხვისას ცხრა ამირანი ჩაებუდრებოდა სხეულში. ისე კი წყნარად იჯდა და

მის ქართულ ულამაზეს სახეს მოკრძალებული ღიმილი დას-  
თამაშებდა.

მაგრამ მე მგონი, მისი უდიდესი სამსახიობო ნიჭის გვირ-  
გვინი მაინც მისი თვალები და ხმა იყო. მეტად სასიხარულოა,  
რომ მისი ხმა ფირებზე დარჩა, მაგრამ მე მეჩვენება, მიუხე-  
დავად დიდი მსგავსებისა, სამწუხაროდ, მაინც მთავარი რაღაც  
აკლია მას. შეიძლება იმიტომ მოხდა ეს, რომ ის ფირები მისი  
ავადმყოფობის დროს უნდა იყოს ჩაწერილი. რაც შეეხება  
მის თვალებს, მე პირადად არ მინახავს არავინ ქვეყანაზე,  
რომლის გამოხედვას ასე გამოეხატოს ადამიანის სათქმელი.  
უშანგის შეეძლო თავისი შეუდარებელი ნიჭით მაყურებელ-  
ში ხან წყნარი, უღრუბლო, მოწმენდილი ცის სიმშვიდე და-  
ემკვიდრებია, ხან კი ჯოჯოხეთური ქარიშხალი აღეგზნო.

იმ ღამესაც ასე მოხდა. გრიმს, მგონი, თვითონ იკეთებდა,  
ამიტომ ის ადრე წამოვიდა.

ჩვენ ცოტა დაგვაგვიანდა. გალაკტიონს და გიორგის ჯერ  
კიდევ არ ენახათ ეს წარმოდგენა. კოტე პარტერის მეექვსე  
~~რიგში დაჯდებოდა. ჩვენთვის სკამები შეენახათ.~~

მეტად მწყურალად შემოგვხვდა. თქმით კი არაფერი უთქ-  
ვამს. რასაკვირველია, გალაკტიონმა და ვ. ჯიქიამ გვიშველეს,  
თორემ ასეთ რამეს კოტე ღმერთს თუ აპატიებდა. უხეშად  
მოგვესალმა. ჩვენც ფეხაკრეფით დავსხედით. ორიოდ წამში  
ჩვენ სულ გამოვეთიშეთ დღევანდელ დღეს და სპექტაკლის  
ცხოვრებაში შევცურდით. არა, კი არ შევცურდით, სპექტაკ-  
ლის განუყოფელ ნაწილად გარდავიქმენით, მისი სუნთქვით  
დავიწყეთ სუნთქვა. მსახიობებსა და ჩვენს შორის ის გან-  
სხვავება იყო, რომ ისინი, ალბათ, მხოლოდ თავიანთ როლებს  
განიცდიდნენ, ჩვენ კი ყოველ მათგანს ისე ვგრძნობდით,  
თითქოს ჩვენ ვთამაშობდით თითოეულ მათ როლს.

კოტე მარჯანიშვილის ნიჭის ერთი თავისებურება ისიც  
იყო, რომ იგი სცენაზე ყოველ „წვრილმანს“ ხედავდა და ყო-  
ველ მსახიობს ისე გარდაქმნიდა, აღამაღლებდა, ვერც კი იტ-  
ყოდით, ვინ იყო დიდი და პატარა მსახიობი. ის იყო დადგმე-  
ბის არა-ცალკეული დეტალების ოსტატი, არამედ მთელი  
სპექტაკლის შეუდარებლად ამამაღლებელი, მთელი წარმოდ-  
გენის მწვერვალზე აყვანის ჯაღოქარი და დიდი დირიჟორი.

უშანგი იმ ღამეს შეუდარებელი იყო. მე არ ვიტყვი, რომ უშანგის ჩენჩი მისი სამსახიობო ხელოვნების მწვერვალს წარმოადგენდეს, მაგრამ ეს როლი თავისი მეფისტოფელური ქმედობით, ჯოჯოხეთური სულით, არაადამიანურად დესპოტური სიველურით მეტად ფართო გასაქანს აძლევდა დიდ მსახიობს მისი ნიჭის გამოსამჟღავნებლად. მე ხანდახან ვფიქრობ, რომ სწორედ ჩენჩზე მუშაობამ გაწყვიტა უშანგის პირველი ნერვი, რომელმაც შემდეგ მისი დაავადება გამოიწვია.

ეს ურთულესი როლი უსათუოდ ნერვებს უგლეჯდა მაყურებელს, მით უმეტეს მის შემსრულებელს.

— ეს ვინ გვყოლია, გენაცვალე, — ჩურჩულებდა გალაკტიონი, — ძამიკო, ჩვენი უშანგი დღეს ედმონდ კინს სჯობია! გიორგი კი ფერდაკარგული, ფართე თვალებით შესჩერებოდა სცენაზე უშანგის. ხოლო, როცა საწოლში მწოლი ჩენჩი მსახურებს უბრძანებს — ბეატრიჩე მომგვარეთო, გიორგიმ ვეღარ გაუძლო ამ სულგარყვნილი ადამიანის უშანგისეულ წარმოსახვას, ერთი შეიკურთხა და ფოიეში გავარდა.

იმ ღამეს გიორგი სასტუმროს არ მიჰქარებია. დილით მოსულიყო და ეთქვა: წუხელი რომ უშანგი მენახა, მოვკლავდიო. მთელი ღამე ახლო მეგობართან—ფოტოგრაფ დავით მხეიძესთან გაეტარებინა დრო და მის სახლში მოესვენებინათ კიდევ.

წარმოდგენა დასრულდა თუ არა, გალაკტიონი კოტეს მოეხვია. მერმე უშანგისთან წავიდა სცენაზე. მე არაფრის თავი არ მქონდა. არ გავყოლივარ. როცა დაბრუნდა, ხალხი თეატრში აღარ იყო. ჩვენ მას ფოიეში ვუცდიდით. იგი ისევ აღელვებული ჩანდა. აღარ გვივახშმია. ყველანი გაოგნებულნი და გაჩუმებულნი ვიყავით.

ამ სპექტაკლში უშანგისთან ერთად მეტად დიდი და განუმეორებელი შთაბეჭდილება მოახდინა თამარ ჭავჭავაძემ (ბეატრიჩე).

სასტუმროში, როდესაც გალაკტიონს გამოვემშვიდობე, იგი იუზას (ზარდალიშვილმა თეატრიდან ჩვენთან ერთად გამოაცილა გალაკტიონი) მიუბრუნდა:

— იუზა, მართალი სთქვი, ხომ მოგწონს თამარი და უშანგი. ხომ ორივენი შეუდარებელნი არიან ამ როლებში?!

იუზა ცოტა ხანს შეჩერდა, გაიღიმა და წყნარად თქვა:

— მე მგონია, მაინც მესამე ადამიანია მაგ სპექტაკლში მთავარი. ჩემს თაობას რომ ასეთი რეჟისორი ჰყოლოდა, ჩვენს ბედს ძალი არ დაჰყევდა.

მეორე საღამოს გალაკტიონი და გიორგი ზუგდიდისაკენ გაემგზავრნენ. ჩვენ რიონამდე ჩავაცილეთ ისინი.

გალაკტიონი ძალიან დაახლოებული იყო მსახიობ იუზა ზარდალიშვილთან და მეტად ნიჭიერ და განათლებულ ადამიანთან ნიკო ქუთათელაძესთან. ეს უკანასკნელი (ალ. ქუთათელაძის უფროსი ძმა) საოცარი კაცი იყო. იგი დიდი მცოდნე იყო რუსული თუ მსოფლიო კლასიკური ლიტერატურის. ამავე დროს იგი გახლდათ ბრწყინვალე მსროლელი და მონადირე. მახსოვს, ერთხელ ქუთაისში სტუმრად ჩამოვიდა ცნობილი საბჭოთა მხედართმთავარი მაშინ ა/კ ჯარების სარდალი ლევანდოვსკი. მას თან საბჭოთა ოფიცრების ჯგუფი ახლდა. დამხვდურთა შორის იყო გიორგი ქუთათელაძე. გიორგი არა მარტო მეტად ლამაზი ვაჟკაცი იყო, იგი ბრწყინვალედ იცნობდა ლიტერატურას, ფილოსოფიას და მუსიკას (მას კონსერვატორიაც ჰქონდა დამთავრებული). ეს დიდი ბუნების ქართველი საბჭოთა მხედართმთავარი, რასაკვირველია, უბადლო მსროლელიც იყო. გიორგიმ იმ დღეს სხვებთან ერთად თავისი უფროსი ძმა ნიკოც მიიპატიჟა. სადილის შემდეგ სასროლო „ტირში“ მოეწყო დახურული შეჯიბრი. ისროდნენ: ლევანდოვსკი, გიორგი ქუთათელაძე, ნიკოლოზ ბლუაშვილი, პარტიის სამაზრო კომიტეტის მდივანი, მაშინ ცნობილი ბოლშევიკი ამბერკი ურუშაძე და სხვები. რასაკვირველია, ყველა ისინი სროლის შეუდარებელი ოსტატები იყვნენ. საბოლოო ანგარიშში ნიკო ქუთათელაძემ დაჯაბნა ყველა. აი, ასეთი კაცი იყო ნიკო ქუთათელაძე. ლევანდოვსკი იცინოდა: ა/კ ჯარების სარდლობა ნიკოს უნდა გადაეცეო.

გალაკტიონი ჩამოვიდოდა თუ არა პირველად ნიკოს და იუზას მოიკითხავდა.

ეს იმიტომ გავიხსენე, რომ მინდა კიდევ ერთი ამბავი მოვიგონო გალაკტიონის ცხოვრებიდან. მე მაშინ ქუთაისში ვმუშაობდი პოლიტგანის უფროსად.

თეიმურაზ ქუმბურიძე განათლების განყოფილებას ხელმძღვანელობდა და ანტიური ისტორიის დიდი მცოდნე და საზოგადო მოღვაწე გახლდათ.

პოლიტგანის სამუშაო ორბიტში შედიოდა: თეატრები, კინოხელოვნება, რადიო, წერა-კითხვის უცოდინარობის და მცირე მცოდნეობის ლიკვიდაციის საკითხი (მაშინ ეს ძირითადი იყო ჩვენი სახალხო განათლების საქმეში) და პარტიულ-პოლიტიკურ განათლებასაც აღმასკომის ეს განყოფილება ხელმძღვანელობდა.

ერთ დღეს თეიმურაზ ქუმბურიძემ დამირეკა, რიონის სადგურზე გალაკტიონი ჩამოსულა და შენ გეძახისო. იმ წელს მეტად ცუდი მარტისთვე იდგა. თითქმის მთელი ეს თვე თოვლქყაპში გავატარეთ. იმ დილითაც ცუდი დარი იყო. მაშინ მანქანები არც ისე ბლომად გვექონდა. ქალაქში მხოლოდ სამი მანქანა თუ იყო. ერთი ვასო დარახველიძეს ჰქონდა, მეორე ერასტი ღვამიჩავას (ოლქის აღმასკომის თავმჯდომარეს) და მესამე ვალოდია ჭიქიას. სულ რამდენიმე თვის წინ ერასტი ღვამიჩავას შესანიშნავი ეტლი ჰქონდა, რომელიც პოლიტგანს — ჩვენ გადმოგვცეს. ფართო ორკუთხიან ეტლში შესანიშნავი ჭიშის შავი ცხენები იყო შებმული. მეც დავჯექი და რიონის სადგურისაკენ გავქანდი. მაშინ ჩვენი მრეწველობა ახლად იწყებდა გაფურჩქვნას. ჩვენი მაშინდელი ტანსაცმელი ვერ იყო ისეთი, რომ თვალი დაგრჩენოდათ. ისეთი სქელი და უხეში პალტოები გვეცვა („ბობორიკი“), რომ ტყვია ვერ გაატანდა. სხვა ქსოვილი მაშინ არ იყო. რასაკვირველია, როგორც ყველას, მეც ასეთი პალტო მეცვა. მეტად მძიმე იყო. თუ დასველდებოდა, მისი წონა ერთიხუთად იმატებდა და მის ჩაცმას მაშინ გაძრობა სჭოებდა.

ჩავედი რიონის სადგურზე. შევედი დარბაზში და ვხედავ გალაკტიონი მაგიდას მიჯდომია, ერთი ბოთლი ღვინო დაუდგამს, ცოტა მოუსვამს და კარებისკენ იცქირება. შემხედდა თუ არა, იმერულად მომიქცია:

— მობრძანდი, გენაცვალე, ჩემო მამია, რაფერ გელოდი, კაცო, რაფერ?! უბედურება შემემთხვა, შენს გარდა ვერავინ მიშველის!

მე გავოცდი, ცოტა შემეშინდა კიდეც. ვაკვირდები, გალაკტიონი კარგად იყურება, ჯანლონით ფეთქავს, კოსტუმში კარგი აცვია, მეტად მიმზიდველი ლამაზი სახე სუფთად აქვს გაპარსული. მხოლოდ ახოვანი ბეჭები ოდნავ მობუზული ჩანს. კიდეც უფრო დავაკვირდი და მაინც ვერაფერს ვერ მივხვდი.

— ვერ მიხვდი, გენაცვალე, ხომ?! ბიჭო, გამძარცვეს, შენს გალაკტიონს პალტო მოპარეს. წარმოგიდგენია, გალაკტიონს საქართველოში პალტო უნდა მოპარონ (ეს ეკადრება გალაკტიონს!). ალბათ, გენაცვალე, ჩემო მამია, უცხო ტომის ჯიბგირები იქნებოდნენ. აბა ქართველი კაცი ამას როგორ იზამდა?! თავის პოეტების მეფეს ახლა პალტოს მოპარავენ ამ ყინვაში და თოშში?!

მე გავოცდი. პირველად ვიფიქრე, ხუმრობს-მეთქი. მივიხედ-მოვიხედე და, მართლაც მისი პალტო ვერსად შევნიშნე. გარეთ კი ისევ თოვლქუყაპია. ხანდახან ხელისგულის სიფართის სველი თოვლის ფიფქს. გამოურევს ხოლმე ცივ წვიმის შხეფებს, დავფიქრდი და დავრწმუნდი მომხდარ ამბავში. რაღა უნდა მექნა. ჩემი პალტო მოვახურე, ორივენი გადმოხურული ეტლის სახურავის ქვეშ შევიყუყუეთ და ქუთაისისკენ გამოვწიეთ.

ვინც ქუთაისის მიდამოებს კარგად იცნობს, მას არ დავიწყდება წინაველის და ბროწეულას ქარი. ქვეყნად რომ მშვენიერი დარია, იმ ადგილებში მაინც უქიქინებს გრილი თუ ცივი ნიავი. ცუდ დარში ხომ ნაბდიანი კაცი ვერ გაივლის წაუქცევლად. ეტლში გრიგალივით შემოაბუქებდა გათოშილი ქარი და ძვალ-რბილში მატანდა. სანამ მუხნარის ტყეში შევიდოდით, კინაღამ გავიგუდე კოსტუმის ამარა. იქ კი ქარი ცოტა მიწყნარდა. მეც სული მოვითქვი. ჩემს კითხვაზე გალაკტიონმა მიპასუხა:

— ბათუმის მატარებლით ჩამოვედით, გენაცვალე, რბილ

ვაგონში პალტო დაკიდებული მქონდა. ავდექი და აღარ დამხვდა. თქმის შემრცხვა, ვერ გავამხილე. გაშეოლსაც ვერ ვუთხარი. ახლა სად უნდა წავსულიყავი, დავრეკე, შენ არ იყავი დაწესებულებაში. მერმე ჩემი თეიმურაზი გამახსენდა და მას ვთხოვე მოენახა შენი თავი. ის კი არა, კაცო, დიაც არ გამახსენდა, ჩვენი დია ჩიანელი.

მე დავაშოშმინე. თან ვფიქრობ, სად ვუშოვო ახლა ასე უცებ პალტო?! ჩემი პალტო ბეჭებზე არ წვდება. არცთუ საგალაკტიონო ქსოვილისაგან არის შეკერილი. რა ვქნა, არ ვიცი. იმ დროს ქუთაისის სამკერვალო ფაბრიკის დირექტორად მუშაობდა ჩვენი ცნობილი პოეტის კოლაუ ნადირაძის სიძე ვალოდია შენგელია. ის, როგორც მოწინავე და ნიჭიერი დირექტორი, საქართველოს უმაღლესი საბჭოს დეპუტატიც იყო. ეს გამახსენდა, იგი ჩემი სიყრმის მეგობარი გახლდათ და ჩამოსვლისთანავე დავურეკე.

— ხომ არ გადირიე, მამია, გალაკტიონის შესაფერი საპალტოვე ქსოვილი სად გვეშოვება. „ბობრიკის“ პალტოს ხომ არ ჩავაცმევ ამხელა პოეტსო — მიპასუხა ნაღვლიანად.

ცეცხლი მომეკიდა. გალაკტიონი სასტუმროში მიცდის. გზაზე მან გამაფრთხილა, დღეს თუ არა, ხვალ წყალტუბოში უნდა ჩავიდე. იქ ჩემი მეგობარი რუსი კინომსახიობი ქალი არის, იუზა უნდა წავიყვანო თან და იმერეთი ვაჩვენო.

პირდაპირ მდუღარეში მედგა ფეხი. გამოუვალ მდგომარეობაში ვიყავი. იღბლად რაღაც საქმეზე ქალაქკომის მდივანმა გრიშა გაბუნიამ დამირეკა, მეც არც ვაცხელე, არც ვაციე და ჩემი გაჭირვება ვუთხარი: ისიც შეფიქრდა. მერე მითხრა: გიორგი ქუთათელაძეს ან ნიკოლოზ ბლუაშვილს დაურეკე. მათ, როგორც ვიცი, უცხოური საპალტოვე ქსოვილები აქვთ და, თუ არ შეუქერავთ, უარს არ გეტყვიანო.

მეც ავდექი და ორივეს იმწუთშივე დავურეკე. გიორგიმ მითხრა: მე, ძმაო, უკვე სევიკერე, შენს იღბალზე კოლიას არ შეუქერია და შენ და მან იცოდეთო.

კოლიამ არამც თუ უარი არ მითხრა, იმწუთშივე ვანიონ დარასელის ხელით გამოგზავნა ძვირჯასი ქსოვილი. ვანიონმა

რომ შემომიტანა ქსოვილი, ელდა მეცა. იგი, მართალია, მეტად ძვირფასი, მაგრამ ნაცრისფერი აღმოჩნდა. ამ ფერს კი გალაკტიონი, ვიცოდი, დამიწუნებდა. ამ დროს ქუთაისში თეთრ ხილთან სამღებრო ჰქონდა ამ საქმის ბრწყინვალე ოსტატს მიხაკო ხინგავას. მასთან მივედი და ვთხოვე.

— შელებვით კარგად ვლებავ, მაგრამ მაგის გაშრობას ორი დღე მაინც უნდაო, — გამაფრთხილა, — იცი, — მირჩია მან, — მაუდის ფაბრიკაში საშრობი ცეხია, ერთ საათში გაგიშრობენ.

მართლაც, საღამომდე უკვე მშრალი ქსოვილი სამკერვალო ფაბრიკაში გამომჭრელების წინ იდო. საღამოს ვალოდია შენგელია თვითონ მოვიდა და მოხელეები მოიყვანა.

— ჰო, როგორ აათორიაქა მამიამ მთელი ქუთაისი, — ნაღვლობდა გალაკტიონი.— მაპატიეთ, გენაცვალე, სულ მამიას ბრალია. მე, აბა, თქვენ შეწუხებას როგორ გავებედავდი!

იქვე მჭდარი ნიკო ქუთათელაძე და იუზა ჩუმ-ჩუმად იღიმებოდნენ. გალაკტიონმა ეს შენიშნა და, როგორც ეტყობა, არ ესიამოვნა. იუზას უბრალო „პლაშჩი“ ეცვა. თურმე შიგნიდან შესანიშნავი ფერის წაფის თუ მელის ტყავით ყოფილა გამოფენილი (სხვათაშორის მას დიდხანს გაყვა ძველი უცხო ქსოვილების კოსტუმები და ფრაკები). მე ათასჯერ მინახავს ამ სამოსში იუზა, მაგრამ არ შემიწინაღეს ეს ძვირფასი საფენი. გალაკტიონს თურმე არ გამოპარვია ეს და იუზას მიმართა:

— იუზა, გენაცვალე, მეცოდები, თხელი „პლაშჩი“ გაცვია, თორემ მაგ ძვირფას საფენს გამოვაძრობდი და ჩემს პალტოს გამოვაფენდი!

იუზა შეკრთა, ნამდვილად შეშინდა. ელბათ, იფიქრა მართლაც არ დამიყინოს ეს თხოვნაო. ნიკოს ხარხარი აუვარდა.

ვალოდამ მთელი ღამე ამუშავა რამდენიმე მკერავი. დღით საუზმეც არ გვექონდა დამთავრებული, რომ პალტო მოიტანეს. ბრწყინვალედ იყო შეკერილი. სხვათაშორის იძალა და საუზმის ფულიც (საუზმეზე იუზას და ნიკოს გარდა



დია ჩიანელი, პეტრე ბახტურიძე და ვანიონ დარასელიც იყვნენ) ვალოდია შენგელიამ გადაიხადა.

ეტლს გამოუქდახე. ის იყო ვსხდებოდით კიდევ, განათლების განყოფილების შიკრიკმა წერილი მომწოდა. იწერებოდა რიონის საღვურის უფროსი ვასილ ჩხეიძე (იგი ძმა იყო დია ჩიანელის და მამა აწ გარდაცვალებული ნიჭიერი პედაგოგის დათუნა ჩხეიძის): „ვილაცამ პალტო გამოგზავნა წერილით. იწერება, გალაკტიონის პალტო ყოფილა. შენი ჭირიმე თბილისში გადაუგზავნეთ“.

ეტყობოდა, ვასილ ჩხეიძემ არ იცოდა გალაკტიონის ქუთაისში ყოფნა. მან, ილბათ, იფიქრა ქუთაისის მწერლებს გაუგზავნი წერილს და პალტოს წაიღებენო. იმ წუთშივე გავაგზავნე ეტლი და ერთ საათში გალაკტიონის პალტო უკვე ჩვენთან მოიტანეს. უნდა გულწრფელად ვთქვა, რომ ძვირფასი პალტო იყო, მაგრამ ახალ პალტოსთან მისი შედარება არ შეიძლებოდა.

— რაღა ვქნათ ახლა, — გაასავსავა ხელი გალაკტიონმა, — რა უყოთ, გენაცვალე, იმ ჩვენ უფროსს. სირცხვილი ხომ არ იქნება უკან მისთვის ახალი პალტოს დაბრუნება (იგი სიტყვა „უფროსში“ ნ. ბლუაშვილს გულისხმობდა).

მე, მართლაც, დავურეკე ნიკოლოზ ბლუაშვილს. მას გაეცინა:

— რას ბრძანებთი ეს პალტო ჩემი საჩუქარი იყოს. გალაკტიონზე ყველაფერი ალაღბა. გადაეცით ჩემს მაგივრად, ოღონდ მისებურად კიდევ დაგვიწეროს ლექსები და ამ დღეებში ჩრდილო კავკასიაში ვაპირებ წასვლას და იქიდან თეთრ ნაბადს ჩამოვუტანო.

დარჩა გალაკტიონი ორი პალტოთი. იმ საღამოს იქ გაათია. დილით, როცა სასტუმროში მე და იუზა მივედით, იგი უკვე ამღვარი დაგვხვდა. მაშინ ქუთაისში ჩვენი თეატრის გვერდით ე. წ. „აზიური“ სასადილო იყო. ამ სასადილოში მხოლოდ და მხოლოდ ქართული საჭმელები კეთდებოდა. ნიკოს დავურეკეთ და იქ ჩამოვიყვანეთ. ნიკოს სახლში ბადრიჯნის საცივი თავის ხელით გაეკეთებინა. მისი ბინა იქვე იყო, კლასიკური გიმნაზიის ძველ შენობაში (სასტუმროს წინ). გაზეთგადაფარებული ერთი სავსე საინი თან ჩამოიტანა.

— აბა, ვნახოთ, — თქვა მან, — ამ სასადილოს მზარეული უბადლოდ ითვლება, ახლა მას ბადრიჯანი არ ექნება, მე კი ჩემებურად შევინახე და მოგართვითო.

სხვათა შორის ნიკო ქუთათელაძე ქართული სამზარეულოს დიდი მცოდნეც იყო.

მართლაც, გალაკტიონს ძალზე გაეხარდა.

— ეს რა გაგეხარე, გენაცვალე, დედაჩემის გაკეთებულსა ჰგავს. მას შემდეგ ასეთი სიამოვნება არ მიგრძენიაო, — ამბობდა იგი და, მართლაც, მადიანად შეეჭკეოდა ბროწეულით და ნიგვზის ბაყით შეკაზმულ ბადრიჯნის საცივს. საუბრე გაგვიგრძელდა. ცოტაც დავლიეთ.

ჩვენი სუფრა პატარა აუზის ნაპირას იყო მიდგმული. აუზს ქვის გვიმი ჰქონდა შემოვლებული. აუზში თევზები ირეოდნენ. მზარეული, როცა დასჭირდებოდა, ხელს ჩაჰყოფდა, თევზებს დაიჭერდა და ჭერ კიდევ ცოცხალს გაფატრავდა, სანამ ისინი მოკვდებოდნენ, ტაფაზე შეაგდებდა. შენიშნა ეს თუ არა, უცებ გალაკტიონს თვალები გაუფართოვდა, თითქოს ფერი წაუვიდა კიდევ. სწრაფად წამოდგა და მოგვაძახა:

— აბა, წავიდეთ, აქ ველურები ყოფილან, ჩვენც არ დაგვხოცონ ამ უღვთოებმა, აქ სად მომიყვანეთო.

ფული უცებ გადავიხადეთ და გამოვედით. იგი დიდხანს იყო ჩუმად და ისე მოდიოდა. ნიკომ ინსტიტუტში ლექციები მოიმიზეზა და დაგვშორდა. ჩვენ კი დიდხანს დავყვებოდით ქუჩებში. ისევ თქორავდა. გიმნაზიის ეზოში მაინც შეგვეყვანა. ჰადარს რამდენჯერმე შემოუარა, მერე ქუჩაში გამოვიდა და ცნობილი ფოტოხელოვანის დავით მხეიძის ატელიესთან გაგვაჩერა.

— აქ, გენაცვალე, ჩემი დათიკო იქნება, ისეთ სურათებს ქვეყანაზე ვერაფერ იღებს. მოდით ერთი ჩვენ სამმა სურათი გადავიღოთ.

დავითი, მართლაც, ატელიეში დაგვხვდა. გალაკტიონი ძმასავით მოეხვია. ზევით, შუშაბანდით დახურულ სხვერზე ავედით. ღრუბლის გამო ცუდი სინათლე იყო. გალაკტიონი მე მომიბრუნდა:

— მამია გენაცვალე, პალტო გაიძვრე, შენ სურათი ისე

გადაიღე. როცა დახედავ, გაგახსენდება რიონის სადგურიდან უპალტოოდ რომ წამოგიყვანე.

ძალით გამაძრო პალტო და ისე გადავიღეთ სურათი.

იმ საღამოსვე წყალტუბოში წავიყვანეთ. იუზა ორი დღით იქ დარჩა, მერმე კი ქუთაისში ჩამოვიდა. გალაკტიონმა ათი დღის შემდეგ დამირეკა. მეც ეტლი გაუფუგზავნე. საღამოს სასტუმროში ვნახე. მეტად გახარებული იყო.

— ვალიკო იაშვილმა (წყალტუბოს დირექტორი იყო, რომელსაც გალაკტიონი დიდი მოწიწებით ჩავაბარეთ) დიდი პატივი მცა, ერთი დღე ჩემს სოფელშიაც გამიშვა მანქანით, ჩვენები მოვინახულე, დიდად გამახარა, დიდად გამახარაო. — იმეორებდა.

მაშინ სასტუმროში ცხოვრობდა პარტიის საოლქო კომიტეტის დიდი უმრავლესობა. უცებ ჩვენთან შემოვიდა სასტუმროს დირექტორი და გვითხრა გიორგი ყურულაშვილი (მაშინ, მგონი, ცუკას ერთ-ერთი მდივანი იყო და თუ არ ვცდები ეურნალ „მნათობის“ რედაქტორიც) ჩამოვიდა და გთხოვთო. შევედით. მთელი საოლქო კომიტეტის შემადგენლობაც იქ იყო. ყველანი გახარებულნი შემოეხვივნენ გალაკტიონს. პალტოს ამბავიც (ალბათ, გრიშა გაბუნიამ მოუყვათ) გაეგათ.

გრიშა გაბუნიამ გვიამბო: პალტო რკინიგზის მცველებს უნახავთ სადგურის რესტორანში მიგდებული. შეკეცილ საყელოში წერილი იდო: „პალტო პოეტი გალაკტიონ ტაბიძის აღმოჩნდა. პატრონს გაუფუგზავნეთ, მას ჩვენ აუცილებლად წერილს მივწერთო“. როცა ძებნა დაუწყიათ, გაუგიათ, გალაკტიონი ამა და ამ დღეს რიონის სადგურზე ყოფილა და ამიტომ ჩვენთვის გამოუგზავნიათ პალტო.

შემდეგში გალაკტიონს გაახსენდა, რომ პალტოს ჭიბეში რუსი მსახიობი ქალის მიერ გამოგზავნილი დეპეშა ყოფილა მისი სახელით და მისამართით. ალბათ, პალტოს ქურდებმაც აქედან გაიგეს პატრონის ვინაობა.

## დიდი რეჟისორი

კოტე მარჯანიშვილის ჩამოსვლას ქუთაისის მთელი ახალგაზრდობა გულისფანცქალით შეხვდა.

წინა წლებში ქუთაისის თეატრს ცნობილი რეჟისორი მიხეილ ქორელი ხელმძღვანელობდა. ამ შესანიშნავ რეჟისორს დიდ პატივს სცემდა ქუთაისის საზოგადოება.

დასიც ღონიერი ჰყავდა ქუთაისს. მარტო ნინო ჩხეიძე რად ღირდა?! ახლაც, როცა დიდ ქართველ ქალებზე სადმე კარგ რამეს წავიკითხავ, ან გავიგონებ, იმ წუთშივე ნინო ჩხეიძე დამიდგება თვალწინ. ჩემს გონებაში და ფიქრში ნინო ჩხეიძე არამცთუ მაშინდელი ქართველი დიდად დღაწლმოსილი ქალის სრულყოფილი განსახიერება იყო, იგი დღესაც ჩემთვის ყოველმხრივ იდეალურ ადამიანს წარმოადგენს.

როგორც ადვნიშნეთ, მიხეილ ქორელის დასი სიყვარულით სარგებლობდა ქუთაისის მაშინდელ თეატრის მაყურებლებში.

მოულოდნელად ხმა გავარდა, რომ კოტე მარჯანიშვილი თავს ანებებს რუსთაველის თეატრს და ქუთაისში გადმოდის. ამ ამბავმა მთელი ქალაქი ააფორიაქა.

მართალია, ჩვენ გვესმოდა მაშინდელ რუსთაველის სახელობის თეატრში არსებულ „ბრძოლების“ შესახებ, მაგრამ ქუთაისში კოტეს ჩამოსვლას არ ველოდით. შეიქნა ჩურჩული, მითქმა-მოთქმა, მღელვარება. გავიდა ხანი, დასიც ჩამოვიდა. ქუთაისისათვის, მისი ახალგაზრდობისათვის ეს იყო დიდი დღესასწაული.

— ვერიკო, უშანგი, შალვა, — უთითებდნენ ახალგაზრდები ქუჩაში მიმავალ მსახიობებზე.

ჩამოყალიბდა თეატრის სამხატვრო საბჭო, სტუდია. რამ-

დენიმე ახალგაზრდა შეიყვანეს სამხატვრო საბჭოს წევრად. სხვებთან ერთად (შურა მესხი, გრ. სვანიძე და სხვ.) მეც მოვხვდი.

სხვათა შორის საბჭოში ბევრი მოწინავე მუშა შეიყვანეს, უმთავრესად რიონჭესის და მაუდის საქსოვი ფაბრიკის მუშები.

დაიწყო წარმოდგენები.

ქართულ დღესასწაულებს დავსწრებივარ, ვყოფილვარ მცხეთობაზე, ალავერდობაზე. გადაუქარბებლად ვიტყვი, თითოეული ახალი წარმოდგენა არანაკლები დღესასწაული იყო. თბილისიდან უამრავი ხალხი ჩამოდიოდა დადგმებზე დასასწრებად, ბილეთები სალაროში არ იშოვებოდა, სტუმრებით ავსებული იყო მთელი ქალაქი.

პირადად გავეცანი უშანგის, შალვას, ალექსანდრე ქორქოლიანს, შაქრო გომელაურს, დოდო ანთაძეს, გრ. სულიაშვილს, ვახტანგ აბაშიძეს. გავეცანი ვერკოს და თამარ ჭავჭავაძეს, მერი დავითაშვილს. გიორგი შავგულიძე, სერგო ზაქარიაძე, აკაკი კვანტალიანი, საშა გომელაური და ჭიჭიკო ბეგალიშვილი მაშინ ახალგაზრდები იყვნენ..

სერგოს ოჯახს ბავშვობიდან ვიცნობდი. არასდროს არ მიფიქრია, თუ სერგო მსახიობი გახდებოდა. მისი ცხოვრებიდან ბევრი რამ მახსოვს, მაგრამ ყველაზე მეტად ერთი რამ ჩამრჩა ხსოვნაში: ტოლერის ცნობილი პიესის — „ჰოპლა, ჩვენ ვცოცხლობთ“ — გენერალურ რეპეტიციაზე მიგვიწვიეს. სერგო პატარა როლს, სიკვდილმისჯილი პატიმრის როლს ასრულებდა. სცენაზე საპატიმროს ოთახში რკინის ტახტზე წვანან პატიმრები. თუ არ ვცდები, სერგოს მხოლოდ ორიოდ სიტყვა ჰქონდა სათქმელი.

ციხის დარაჯი შემოდის და კითხულობს — ვინ მოითხოვა მღვდელი? მსჯავრდადებული რევოლუციონერი პატიმრები გაოცებულნი არიან — ნუთუ ჩვენს შორის ღვთისმორწმუნეა? კითხულობენ მათი სახეები და ერთმანეთს აცქერდებიან.

უცებ ტახტზე ერთი პატიმარი შეირბა, გადმობრუნდა და გვერდი ისევ იცვალა. სცენაზე ოდნავი სიბნელეა, პროექტორის მოძრავი სხივების ერთი კონა ანათებდა მის რკინის

ლოგინს. სინათლემ მხოლოდ რამდენიმე წუთით დახედა მას.

ჩემს სიცოცხლეში არ დამავიწყდება მისი ხმა, თითქოს ახლაც მესმის:

— ნუ გამკიცხავთ, ამხანაგებო, ჯერ კიდევ თექვსმეტი წლისამ უარვყავი ღმერთი. ახლა სიკვდილის წინ შიშმა შემიპყრო. ნუ გამკიცხავთ!—ეს ხმა გლოვის ფერხულივით გაისმა საპატიმრო ოთახში.

ახლა მისი სახე, მისი მარჯვენა ხელის მტევნის საოცარი თრთოლა!

ეს იყო ცივ კედლებში მომწყვდეული, განაწამები ახალგაზრდა პატიმარი მუშის ტანჯული სახე — შთამბეჭდავი, ბევრის მთქმელი და გულში ჩამწვდომი; პატიმრის, რომელსაც სიკვდილის წინ ნებისყოფამ უღალატა; ადამიანის, რომელმაც სიკვდილმისჯამდე ვაჟკაცობა გამოიჩინა, უკანასკნელად კი დასუსტდა, შეღონდა, გატყდა.

კოტე რეპეტიციების დროს ყოველთვის პარტერის მეხუთემეექვსე რიგში დაჯდებოდა ხოლმე, წინ პატარა მაგიდას დაიდგამდა და პაპიროსს პაპიროსზე სწევდა. არა, კი არ სწევდა, პირდაპირ სჯამდა. როცა მსახიობის თამაში მოეწონებოდა, ჩვენსკენ მობრუნდებოდა და თვალბრუნებით ჩაგვხედავდა — ნახეთ, როგორი კარგი მსახიობები მყავსო. თუ რაიმე არ მოეწონებოდა — წყველა-გინებით აიკლებდა იქაურობას, ღელავდა, ბოჭკობდა.

სერგოს მიერ ამ როლის შესრულება მოეწონა, სიხარული-საგან აფორიაქდა, ჩვენ შემოგვხედა. პაპიროსის ღერი ბოლომდე პირში ეკავა, სისველის გამო გადატყდა, ზედ ტუჩზე დაეცა, იგი შეწუხებული წამოვარდა. მახსოვს, სწორედ მის უკან სავარძელში ერთი ახალგაზრდა ჩვენი მეგობარი იჯდა, სერგოს მიერ ამ როლის ძლიერად შესრულებამ დაავიწყა, რომ წინ კოტე იჯდა და, როცა ამ დაჭიმული ფსიქიური მდგომარეობის დროს წინ ვილაც წამოვარდა, — დაჯექი ამხანაგო, — დაუყვირა.

აბა, წარმოგიდგენიათ, კოტეს ვინ ეტყოდა ხმამალლა სიტყვას, ისიც რეპეტიციის დროს!

კოტე შემობრუნდა; გოცვებით შეხედა. მერე მიხვდა, გა-

ილიმა და სავარძელში მორჩილად ჩაჭდა. დამწვარ ტუჩზე კი ხელს ისვამდა.

შესვენების დროს ჩვენ ამხანაგს ვუსაყვედურეთ, კოტე მოვიდა და მოეთვრა.

— ზაქარიასის ბრალია, ისე კარგად შეასრულა ეს როლი, რომ პაპიროსიცი დამავიწყდა და ისიც, რომ ჩემს უკან ადამიანები ისხდნენო, — ღიმილით ამბობდა იგი.

ამ პიესის დადგმის დროს თბილისიდან მთელი ეშელონი ჩამოვიდა. სხვებთან ერთად ქუთაისს ეწვიენ: სიმონ ჩიქოვანი, ბესარიონ ჟღენტი, კონსტანტინე ლორთქიფანიძე, დემნა შენგელაია, ბენიკო ბუაჩიძე და სხვები. კარლო კალაძე მაშინ ამ თეატრის დირექტორი იყო და ქუთაისში იმყოფებოდა. ეს ჭგუფი კოტეს დიდი პატივისცემელი იყო. ქალაქში ამ დროს ერთი ცნობილი მეეტლე „შათათა“ ცხენებს აჭირავებდა და ამით შემოსავალს იმატებდა. აი, ჩვენმა მწერლებმაც დაიჭირავეს ცხენები და შეზარხოშებულებმა ქუთაისის ქუჩებში მარულა გამართეს.

— ჰოპლა, ჩვენ ეცოცხლობთ! — გაჰყვიროდნენ ისინი ხალხით გაჭედულ ქუჩებში. ხალხიც საოცარი სიყვარულით და ენთუზიანზმით ხვდებოდა ახალგაზრდა მწერლების ასეთ ორიგინალურ მარულა-რეკლამას.

ტოლერის პიესა მეტად კარგად მიიღო მაყურებელმა. იგი რევოლუციური ხასიათისა და ტემპერამენტისანი პიესა იყო.

კარლის როლს უშანგი თამაშობდა. ერთი სცენა ელექტროსვეტის ქვეშ მიდიოდა. კარგა გრძელი მონოლოგი ჰქონდა სათქმელი. ქარიშხალი დატრიალდებოდა ხოლმე სცენაზეც და დარბაზშიც.

როგორც კომკავშირის მუშაკს, საღამოობით უჭრედებში მიხდებოდა სიარული, არაერთხელ მინახავს კრების დაწყებამდე ახალგაზრდები მონახავდნენ ელექტროსვეტს და მის ქვეშ უშანგის მიბადებით მონოლოგებს აღელვებით ამბობდნენ.

მოგესხენებათ, ქუთაისის მაშინდელი თეატრის დარბაზი მეტად ვიწრო და პატარა იყო. ზედა „ბალკონი“ თითქმის სცენამდე მოდიოდა. კოტემ ამ პიესაში (ყათეს სცენა) ცეკვა გამოიყენა. მახსოვს „ბალკონზე“ სამი თუ ხუთი წრე მიამაგრებინა და საცეკვაო მოედნები გააკეთა. კოტეს დიდ რეჟისორულ ბუ-

ნებას პატარა სცენა არ ეყო და დარბაზიც სცენად გადააქცია. ვისაც ეს დადგმა უნახავს, მან იცის. თუ რა გასაოცარი ხელოვნებით იყო გამოყენებული ამ წარმოდგენაში სინათლეთა ფერების თამაში, მუსიკა და ცეკვა.

მახსოვს, გენერალურ რეპეტიციაზე უბედურება კინალამ მოხდა. ბალკონზე მიმაგრებულ ვიწრო წრიულ საცეკვაო მოედნებზე წყვილ-წყვილად ცეკვავდნენ ახალგაზრდები. ერთ წრეზე გ. შავგულიძე იყო თავისი მოცეკვავე ქალით, მეორეზე — ჭიჭიკო ბეგალიშვილი. დიდი შავი ხუჭუჭი თმებით და ფართე თვალებით ჭიჭიკო ანტიკურ ბერძენ ვაჟაკს მოგაგონებდათ. რაც შეეხება ახალგაზრდა გიორგი შავგულიძეს, ის ნამდვილად ყრმა თეზეოსის ატლეტური განსახიერება გახლდათ. და აი, იწყება ცეკვა, კაფეში ეჩიამულია, მუსიკა, სინათლეების სადღესასწაულო ზეიმი და უცებ ჭიჭიკოს ფეხი დაუცდა, პარტერის თავზე ცალი ხელ-ფეხით დაეკიდა. წამი და მოსალოდნელი იყო დიდი უბედურება. იგი ზურგით დაეცემოდა სკამების თავებს. ვინ იცის, რა მოხდებოდა?

დარბაზი გარყინა, გაისუსა. მხოლოდ დამსწრეთა გულისცემა ისმოდა.

— ჰე, ბიჭო, ჭიჭიკო; შენი ქირიმე, დამაგრდი — ყვირის უორა შავგულიძე.

კოტე ვეფხვივით მოვარდა.

— აბა, შენ იცი, შვილო! — მუდარით დაუყვირა ბეგალიშვილს, — აბა, არ შემარცხვინო, დამაგრდი და ტანი აიტანე! — თითქოს უბრძანა კიდეც.

მართლაც, საოცარი არაადამიანური ძალით აიტანა მაშინ ტანი ჭიჭიკომ. აიტანა და ამოვისუნთქეთ კიდეც. როცა განათდა და შევხედეთ, კოტეს შუბლი კამკამა ოფლის ცვრით იყო დანამული. მეორე დღისთვის კოტემ ცოტა გააფართოებინა ეს საცეკვაო წრე-მოედნები.

კოტე ძალიან დარდობდა, რომ თეატრი პატარა იყო და მის სურვილებს ვერ იტევდა.

უშანგი ჩხეიძე, სერგო ზაქარიაძე და არჩილ ჩხარტიშვილა კათოლიკეების ყოფილ ტაძართან — კოკოჩაშვილების ოჯახში ცხოვრობდნენ. იმავე სახლში ცხოვრობდა საშა მიქელაძე, რომ-



მელიც მშინ მუშა-ახალგაზრდობის თეატრს ხელმძღვანელობდა და, თუ არ ვცდები, უშანგი იმ სახლში მდგმურად სწორედ მან მიიყვანა. მე ხშირად დავიარებოდი მათთან.

უშანგი „ურიელს“ ამზადებდა. იმავე სახლში ცხოვრობდა იმ დროს ქუთაისის ერთ-ერთი ულამაზესი გოგონა, არც ერთი გულგრილად არ ვიყავით მისადმი, ის ისეთი ლამაზი ქალიშვილი იყო, რომ ახალგაზრდობა კისერს იმტვრევდა მისთვის. ეს გოგონა მეტად ანცი, ამაყი და ნიჭიერი ქალი იყო. ხანდახან უცნაურ რამეებს გამოიგონებდა ჩვენს გასაჯავრებლად.

ეზოში ტყემლები და ალუბლები იდგა. უშანგის ოთახის ერთი ფანჯარა ეზოში გადიოდა. იმ ქალიშვილს ლამაზი ამხანაგებიც ჰყავდა. რასაკვირველია, უშანგი მათი ღმერთი იყო. საერთოდ უშანგი მეტად მოკრძალებული, თავდაქერილი და დარბაისელი კაცი იყო. ერთ დღეს, როცა იგი გამწარებული იზეპირებდა ურიელის როლს, გოგონებს კვირტიდან ახლად გამოსული ლორთქი ტყემლის კაკლები დაეგროვებინათ და ფანჯრიდან უშანგისათვის სროლა დაეწყათ. ეს იყო ახალგაზრდული ანცობა, მაგრამ უბედურება იმაში იყო, რომ უშანგის როლი დაუსწავლელი რჩებოდა. იმ დროს შევედი. უშანგი აპილპილებული დამხვდა:

— კოტე მომკლავს, როლი ვერ დავისწავლე ამ გოგონების გადამკიდე, სად დავიმალო, არ ვიცი?! — თვითონ კი ვერ გაეებდნა და გარეთ ვერ გამოსულიყო სირცხვილისაგან.

მე გავედი და გოგონებს დაუტრატანე, თან აუუხსენი, ახლა ანცობა არ გამოდგება-მეთქი. როცა გაიგეს თავიანთი ხუმრობის მოსალოდნელი შედეგი, ჩაჩუმდნენ.

როცა ურიელი დაიდგა, არ დამავიწყდება კოტეს აღფრთოვანება. იგი ხელების ფშენებით შეჰყურებდა სცენაზე ვერიკოს, უშანგის და შალვას პაექრობას. ილიმებოდა, ერთ ადგილას ვერ ჩერდებოდა.

შესვენების დროს ლოქაში განსვენებული კაპიტონ ჯანჯღავა შემოვიდა. იგი მეტად ნიჭიერი, განათლებული და საყვარელი კაცი იყო. არ უყვარდა პირფერობა და ლაქუცი. მშინ ის საოლქო კომიტეტის აგიტაცია-პროპაგანდის განყოფილებას ხელმძღვანელობდა.

— კოტე, ეს რაღაც სასწაული გამოვიდა, ვერიკო და უშან-

გი მაგიუებენ პირდაპირ, ასეთი სიამოვნება ჩემს ცხოვრებაში არ განმიცდია!

კოტე გადაეხვია, გადაკოცნა, მადლობა უთხრა. მე მაშინ ქალიშვილების, ტყემლებისა და უშანგის ამბავი მოვუყევი მათ. კოტეს ხარხარი აუტყდა.

— აი, თურმე ვის უშველია ჩემთვის, ალბათ, იმ ქალიშვილების სილამაზის ძალამ იმოქმედა უშანგიზე, თორემ მაგაზე სხვა ძალა არ მოქმედებდა, — ხუმრობდა სიცილით.

იმ წუთშივე კულისებისაკენ გაიქცა.

იკოცხლეთ მეორე დღეს მე უშანგისაგან ლოცვა-კურთხევა მივიღე.

— რატომ სთქვი, რატომ?! კოტე აწი მოსვენებას არ მომცემს, ყოველ ბანკეტზე წამომძახებსო.

ღმერთო შენით და შემდეგ არასდროს ეს ამბავი კოტეს არ გაუხსენებია. შეიძლება იმიტომ, რომ უშანგის იგი მეტად დიდ პატივს სცემდა, მის წყენას ერიდებოდა.

ერთ დღეს სამხატვრო საბჭოზე მიგვიხმეს. იდგმებოდა პანტომიმა „ხანძარი“.

საოცარი რამ მოხდა. გენერალური რეპეტიცია ყოვლად უგემურად და უღიმღამოდ წავიდა. არც ერთი დეტალი, არც ერთი მიზანსცენა არ იდგა თავის სიმადლეზე. ჩვენ გაოცებულნი ვიყავით. კოტეს მადლიანი ხელი არ ჩანდა. აშკარად იგრძნობოდა, რომ წარმოდგენა ჩავარდა.

რეპეტიციის შემდეგ სიჩუმე ჩამოვარდა. სამხატვრო საბჭოს კაპიტონ ჯანჯღავა ხელმძღვანელობდა. ვის უნდა სიტყვის თქმაო, როცა თქვა, კაცმა ხმა არ ამოიღო.

კოტე, რასაკვირველია, მიხვდა რაშიც იყო საქმე და გული მოუვიდა.

კაპიტონმა გვანიშნა, თქვენი აზრი გამოთქვითო. სხვა გზა არ იყო, ავდექი. წარმოდგენას უარყოფითი შეფასება მივეცი, როგორც შემეძლო, ჩემი აზრი დავასაბუთე. მთელმა საბჭომ მხარი დამიჭირა. ერთმა ახალგაზრდამ თავისი აზრი ზუსტად ვერ გამოთქვა და სიტყვა „ხალტურა“ უადგილოდ იხმარა.

ამან კოტე ძალიან გააბრაზა:

— თქვენ არაფერი არ იცით, თეატრში თხა და გიგოსავით ზართ და სხვისი არ გჯერათო.

კაპიტონმა ბევრი აწყნარა, მაგრამ არაფერი არ გამოვიდა. კენჭი უყარეს და წარმოდგენა არ მიიღეს. გაეცხლებული კოტე წამოვარდა.

— ხვალვე ცენტრალური კომიტეტის მდივანს ჩამოვიყვან, დე, იმან განსაჯოს ეს საქმეო.

მართლაც, მეორე დღით საოლქო კომიტეტში დამიბარეს.

— ცენტრალური კომიტეტის მდივანი ჩამოვიდა. ამაღამ რეპეტიცია უნდა ნახოს, თქვენი აზრი უნდა დაასაბუთოთ, არ შეგვარცხვინოთო.

აბა, რა ხასიათზე დავდგებოდი. თუმცა ვგრძნობდი ჩემს სიმართლეს, მაგრამ მაინც ძალიან ვღელავდი. ფაცხაფუცხით სახლში გავიქეცი, რაც კი რაიმე წიგნი მქონდა თეატრალურ ხელოვნებაზე, ყველაფერი გამოვქეპე, ჩაუჭეპი, რალაც თეორიული საფუძველი ხომ უნდა ჰქონოდა ჩემს სიტყვას?!

წიგნი არ მქონდა გაშლილი, მთელი სამხატვრო საბჭოს წევრების ჯგუფი თავზე დამადგა:

— რა ექნათ, რალა გვეშველება, რა ვთქვათო.

მე გულმოსული ვიყავი იმ ამხანაგზე, რომელმაც სიტყვა „ხალტურა“ იხმარა და კოტე ასე გააბრაზა, ამიტომ ძალიან მკაცრად ვუსაყვედურე. საწყალს ისე შეეშინდა, იმ დამეს არც მოვიდა რეპეტიციაზე. ცენტრალური კომიტეტის მდივანს ლევან ლოლობერიძეს ცენტრალური კომიტეტის პასუხისმგებელი ამხანაგებიც — კოტე გორდელაძე და ერიკა ბედია ახლდნენ თან.

რეპეტიცია დამთავრდა. კაპიტონმა პირველი სიტყვა მე მომცა.

არ მახსოვს რა და როგორ ვილაპარაკე, მაგრამ, როცა დავჭეპი, მუხლები მაშინ ამიკანკალდა. კოტეს თვალებს რომ წავაწყდი, მივხვდი, მისი თვალები აღარ მიყურებდა სიყვარულით. ადგნენ სხვებიც და მხარი დამიჭირეს, შემდეგ კაპიტონმა თქვა სიტყვა. მეტად მჭევრმეტყველი და ნათელი გონების ახალგაზრდა კომუნისტი იყო, მან საფუძველიანად და დამაჯერებლად ილაპარაკა, რასაკვირველია, სამხატვრო საბჭოს წინაღამის აზრი დაიცვა და დაასაბუთა.

ყველანი ცენტრლური კომიტეტის მდივანს შევცქერით, რან იტყვის ახლა იგი. ვაითუ მართლა ვცდებით, ხომ არ გადავაქარბეთ და ვავნეთ საქმეს?!

აი, ეს აზრი გვაწვალებდა ყველას.

ჩვენ ვიცოდით ისიც, რომ კოტეს დიდ პატივს სცემდა და შეიძლება მორიდებოდა კიდეც; მაგრამ, მიუხედავად ამისა, მან დაიცვა ჩვენი აზრი. რასაკვირველია, უფრო საბუთიანად და მტკიცე არგუმენტებით.

კოტე გაბრაზდა, მაგრამ შეუყოყმანდა. მოითხოვა — ხვალამდე მაცალეთ და ხვალ საღამოს რეპეტიციას დაესწარით. თუ არ მოგეწონებათ, მაშინ მისაყვედურეთო. ჩვენ გავვოცდით. ხვალამდე რა უნდა გაკეთდეს, რა უნდა შეიცვალოს?!— ვფიქრობდით ყველანი.

არ აწყენინეს. დათანხმდნენ და დავიშალენით. სანამ ხალხი იდგებოდა, კოტე დასს მიუბრუნდა:

— არავინ ამალამ სახლში არ წავა. მთელი ღამე უნდა ვიმუშაოთ და ჩვენი საქმე ვაკეთოთ.

მივდიოდით სახლში და ყველანი დარწმუნებული ვიყავით, ირაფრის შეცვლა ერთი ღამის მანძილზე არ შეიძლებოდა. მართალია, ჩვენ გვწამდა, რომ კოტეს სახით საქმე გვქონდა დიდ რეჟისორთან, მაგრამ, რასაკვირველია, არა სასწაულმოქმედთან.

მეორე დღეს საღამოს რვა საათზე შევიკრიბენით. ყველანი მოვიდნენ. წარმოდგენის დაწყებამდე გავიგეთ, რომ მთელი ღამე ემუშაუნათ, კაცი არ გაეშვა სახლში. რამდენიმე მოქმედი პირი ჩაემატებია კიდეც. თუ არ ვცდები, კოტე ანდრონიკაშვილი მაშინ ადმინისტრატორად მუშაობდა თეატრში და ისიც კი ათამაშა ამ წარმოდგენაში.

რეპეტიცია დაიწყო.

პატარაობის უამს ბევრი რელიგიური წიგნები წამიკითხავს სასწაულმოქმედთა შესახებ, მაგრამ ცხოვრებაში ასეთი არაფერი მინახავს. არც ერთი დეტალი, არც ერთი მიზანსცენა არ ჰგავდა წინაღამის წარმოდგენას. ყველაფერი ძირფესვიანად შეცვლილი და გადასხვაფერებული იყო. ეს უსიტყვო პიესა (როგორც ზემოთ ვთქვით, იგი პანტომიმა იყო) მეტყველ და მხატვრულად ძლიერ წარმოდგენად გადაიქცა. მედია ქორელი,

ჩომელიც მთავარ როლს ასრულებდა, არ ჰგავდა წინაღამინ მსახიობს. იგი სრულიად სხვანაირად მოჩანდა და მისი ტანის რხევაც კი სულ სხვა იყო. ერთი სიტყვით, ჩვენ ახლა ვნახეთ ის, რასაც არ ველოდით. ვნახეთ მხატვრულად გამართული, ნათელი და ძლიერი წარმოდგენა. რა გვეთქმოდა, მადლობის მეტა. კოტე ღიმილით და კმაყოფილებით გვიყურებდა ახლა. როცა ჩვენი აზრი ვუთხარით, იგი წამოდგა და თქვა:

— მართალი გითხრათ, კომკავშირელები ახლა ძალზე მომეხმარნენო.

ყველას ხელი ჩამოგვართვა და მოგვეფერა; შემდეგ გავიგეთ, რომ ამ წარმოდგენისათვის მას იმ ღამემდე ხელი არ უხლია. როცა ხელი მოჰკიდა, თავისი მადლიანი დაღი დაასვა ამ მართლაც დიდმა ადამიანმა.

ახლა რომ გავიხსენებ ამ ამბებს, დიდ სიამაყეს ვგრძნობ.

მართლაც ბედნიერებაა ასეთ ადამიანებთან ცხოვრება.

## პაოლო იაშვილი

იგი პირველად ვნახე ქუთაისში კოტე მარჯანიშვილის თეატრის სამხატვრო საბჭოს სხდომაზე. იდგებოდა ალ. ქუთათელის „შუალამემ გადაიარა“. პიესამ და დადგმამ დიდი კამათი გამოიწვია. შესანიშნავად თამაშობდნენ მსახიობები. განსაკუთრებით კარგები იყვნენ: ვერიკო ანჯაფარიძე, ცეცილია წუწუნავა, სანდრო ჟორჯოლიანი, შალვა ლამბაშიძე. ახლაც ყურებში მიბრუნავს განსვენებული დიდად ნიჭიერი ქალის ცეცილიას ნათქვამი:

„გეიწიე ბესარიონ, გეიწიე იქეთ საცხა,  
ხალხი მიდის იქეთ-აქეთ, ეგონება ვინცხას რაცხა“...

ეს იყო იმერული კილოკავის ისეთი დაღმაჭული და დაგრეხილი გამოთქმა, რომ სკოლებში მეორე დღიდან მასწავლებლები და მოსწავლეები დიდი დაკვირვებით ეკიდებოდნენ იმერულ გამოთქმებს. უფროსილდებოდნენ: ჩვენც ასე არ გავაფუჭოთ ქართული ენაო.

წარმოდგენის დროს ჩემს უკან შევნიშნე არაჩვეულებრივად ახოვანი, ლამაზი, შავგვრემანი ვაჟაკი. მისმა გულწრფელმა, ხმამაღალმა ბუხუნმა გამაოცა. მისი სიცილი არავისას არ ჰგავდა, არც არავის ერიდებოდა, თავსაც კი ვერ იჭერდა, დიდი თვალებიდან სიხარულის ცრემლები კენჭებივით სცვიოდა.

კოტემ შემოუბღვირა.

— Паоло мешает работать!

— პირიქით, ჩემო კოტე, მსახიობებს შენ უშლი, ასე რომ უბღვერ მათ. მე განვიცდი და თავს ვერ ვიმაგრებ. ჩვენები ამ გულწრფელობას გრძნობენ და, მე მგონია, ჩემს როხროხს მაპა-

ტიებენო. თქვენთანაც ბოდიშს ვიხდი, ბატონებო!—მოგვიბრუნდა ჩვენც. ეს ისე უშუალოდ, სწრაფად და გაბედულად უპასუხა, გავოცდით... გავოცდით იმიტომ, რომ კოტეს მუშაობის დროს ამდენი ლაპარაკი არ უყვარდა. მეგონა, კოტე ქვეყანას დააქვევდა, მოხდა პირიქით, კოტეს ღიმილი მოერია.

სიტყვა „პაოლომ“ მიმახვედრა, ვინც იყო იგი. გულმა რეჩხი მიყო. მისი ლექსების ტრფიალი ვიყავი, თითქმის ყველა ზეპირად ვიცოდი, თვითონ კი არ მენახა. როცა მოქმედება დასრულდა და განათდა, იგი წამოდგა. მისი ფართო ბეჭები თითქოს ქუთაისის მაშინდელი თეატრის პატარა პარტერში არ ეტეოდა, მაგრამ შესახედავად მსხვილი კაცი როდი იყო. ხმის ტემბრი ჟღერადი და მიმზიდველი ჰქონდა. იდგა ეს ახოვანი ვაჟკაცი და თითქოს ახლადდაკიდებულ დიდ ქალზე უფრო თვითონ სხივოსნობდა, თვითონ ანათებდა. ყველანი პაოლოს გარშემო შემოიკრიბნენ. ზოგი ეხვეოდა და კოცნიდა, ზოგი თვალეგაბრწყინებული ხელს ართმევდა. თვითონაც ყოველ მათგანს საოცარი სითბოთი და სიღარბაისლით ხვდებოდა, ეფერებოდა, ბეჭზე ხელს უთათუნებდა. კოტე შორიასლო იდგა და გაღიმებული შეჰყურებდა პაოლოს.

ადამიანები სხვადასხვანაირი არიან ერთმანეთთან დამოკიდებულებაში. პაოლო მეტად გულღია, საოცრად თბილი და დარბაისელი კაცი გახლდათ. მას ჰქონდა ისეთი თვისება, რომელიც მე არასდროს მინახავს სხვა ადამიანებში.

გაგეცნობოდა თუ არა, იმ წუთშივე მის მახლობლად, მის მეგობრად, მის ნათესავად იგრძნობდით თავს. ამავე დროს თქვენ მისდამი მოკრძალებით და პატივისცემით განიმსჭვალებოდით. რაც უფრო დაუახლოვდებოდით, მით უფრო ახლობელი და ძვირფასი ადამიანი ხდებოდა თქვენთვის.

შემდეგი მოქმედების დროს მოხდა რაღაც სასწაულის მსგავსი. პიესის შინაარსი ასეთი იყო: ინტელიგენტი კაცი (მსახიობი ს. ჟორჟოლიანი) შეყვარებულია ახალგაზრდა ულამაზეს ქალიშვილზე (მსახიობი ვ. ანჯაფარიძე). იგი ქალიშვილს სიყვარულს ეფიცება.

კოტემ მთელ სცენაზე პეპელას ფრთასავით ნაზი თეთრი მარლა გასჭიმა, მარლის ზემოდან კინოს საშუალებით ფერადი ყვავილების თაიგულები სცვიოდა. მარლის მიღმა, სცენის

სიღრმეში ცოცხალი ქალი—ქანდაკება იდგა, რომლის წინ სანდრო ჟორჯოლიანი დაჩოქილი ევედრებოდა და შეჭლადებდა თავის შეყვარებულს. მას თვალთაგან ფართქალით (კინო ეკრანზე) სცვიოდა ცრემლები. მარლა ამავე დროს კინოეკრანზე იყო და ცისფერ თუ ზღვისფერში გამოხატავდა ცრუ ინტელიგენტის სიყვარულის რომანტიულობას.

ჟორჯოლიანის ცრემლები ნელი-ნელ იქცეოდა შხეფებიდან მთის ნაკადულებად, მერე მდინარეებად და ბოლოს აღელვებულ, აბობოქრებულ ზღვად. ეს ისე იყო გაკეთებული, რომ სასწაულებრივ და განუმეორებელ შთაბეჭდილებას ახდენდა: მაყურებელზე. აქ საოცარი ზომიერებით იყო თავმოყრილი კინო, სინათლეები და მუსიკის შთამბეჭდავი საშუალებანი. ეს იყო არა რეჟისორული ნამუშევარი — იგი იყო გენიალური კომპოზიტორის შემოქმედებითი შედეგრი.

პაოლო ბავშვივით ტოკავდა, ბუხუნებდა, მარჯანიშვილს და აღ. ქუთათელს ეხვეოდა. სიხარულისაგან ცრემლებს ვერ იკავებდა. მსახიობებს ეალერსებოდა.

შემდეგ არაერთხელ შევხვედრივარ პაოლოს, ბევრი რამ მახსოვს, რასაც, ალბათ, ოდესმე დავწერ. ერთი რამ მაინც არ შეიძლება არ ვთქვათ. არაფერს მინახავს ქვეყნად ისეთი ადამიანი, რომელიც ლექსებით ისე ცოცხლობდეს და აზროვნებდეს, როგორც პაოლო. ამ შემთხვევაში მხოლოდ გალაკტიონი და ის ჰგავდნენ ერთმეორეს.

იმავე ქუთაისის თეატრში 1917 წლის თებერვლის დღეებში წარმოდგენის დროს პაოლოს დაუქუხებია: — ამხანაგებო, რევოლუცია მოხდა. ნიკოლოზ რომანოვი ტახტიდან ჩამოაგდეს, გაუმარჯოს მშრომელი კაცის თავისუფლებასო.

როგორც თვითონ მოგვიყვია, ქუთაისის მაშინდელი მეთაურები თურმე ხალხს უმაღავდნენ რევოლუციის მოხდენას. პაოლოს ეს გაუგია, თეატრში შესულა და რევოლუციის პირველი მაცნის როლი შეუსრულებია. შემდეგ ხალხს ქალაქისთავი ჩიქოვანი გუბერნატორთან გაუგზავნია, მასაც შეშინებია, ეს ფაქტი ვერ დაუმალავს და გახარებულ ხალხს პაოლო ხელში აუტაცნია, ბალის კიდებზე გაუყვანია და პირველი საზეიმო დემონსტრაცია გაუმართავს.

ოცდაათიან წლებში დიდმა მწერალმა მაქსიმ გორკიმ საზღ-



ვარგარეთიდან ცნობილი რუსი მწერალი—კრიტიკოსი დავით მირსკი მოიწვია. ეს ადამიანი დიდად განათლებული პიროვნება გახლდათ — კემბრიჯის უნივერსიტეტის პროფესორი და ბრიტანეთის დიდი ენციკლოპედიის უახლოესი თანამშრომელი იყო. თავისი მამის წარსულით იგი მეტად რეაქციულ წრეს ეკუთვნოდა. მოგეხსენებათ მაშინდელი ბრიტანეთის ხელისუფლების დამოკიდებულება ოქტომბრის რევოლუციისა და მისი ბრძენი ბელადის ლენინის მიმართ.

ბრიტანეთის ენციკლოპედიას დავით მირსკისთვის, როგორც ნიჭიერი კაცისთვის, შეუკვეთია ლენინის შესახებ წერილი. ისიც გულდაგულ ჩაჯდომია ლენინის ცხოვრების და ნააზრევის შესწავლას. ჩაჯდომია და მსოფლიო რეაქციის იმედი გაუცრუებია. მას ისე შეუსწავლია ლენინის ცხოვრება, რომ მისი აზრების მონა გამხდარა, მის გენიას მოუხიბლავს და ბრწყინვალე წერილიც დაუწერია.

— წერილი ისე მოეწონათ, რომ, თქვენ წარმოიდგინეთ, უცვლელად დაბეჭდესო, — გვითხრა მაშინ დავით მირსკიმ. ამ წერილმა მსოფლიო რეაქციულ მოაზროვნეთა ქარიშხალი გამოიწვია. დავით მირსკი ლენინის ჯამუშად მონათლეს. საქმე იქამდე მისულა, რომ ეს ამბავი საერთაშორისო სასამართლოს მსჯელობის საგანი გამხდარა.

აი, სწორედ ეს დავით მირსკი ჩამოიყვანეს პაოლომ და კონსტანტინე ლორთქიფანიძემ იმერეთში. ზესტაფონიდან დაშირეკეს და მეც ჩავედი. კონსტანტინეს მისი მეუღლე მერი ნიჟარაძე თან ახლდა.

ზესტაფონში დიდი შეხვედრა მოაწყვეს. პაოლო და კონსტანტინე ლექსებს კითხულობდნენ. დავითმა ბრწყინვალე სიტყვა თქვა, რომელსაც პაოლო ხელდახელ თარგმნიდა. ორი დღე დავრჩით ზესტაფონში. ფეროს მშენებლებს და კოლმეურნეობებს გავეცანით. მეორე საღამოს ქუთაისისაკენ წამოვედით. ზესტაფონში ქუთაისამდე რბილი ვაგონის ბილეთები არ იყიდებოდა, ამიტომ მაგარი ვაგონის ბილეთები მოგვცეს. ორივენი — დავითი და პაოლოც უმადლესი საბჭოს დეპუტატები იყვნენ (დ. მირსკი კავშირის საბჭოსი, პაოლო კი ამიერკავკასიის საბჭოსი).

რბილ ვაგონში შევედით. ზედა საწოლზე ვიღაც უცნაური

კაცი იწვა. იგი მეტად უხეში გამოდგა და პაოლოს შეუტია:

— ვინ მოგცათ აქ შემოსვლის ფულეზა? — აყვირდა იგი.

— კაცო, ჩვენ პოეტები ვართ, საპატიო სტუმრებს ვახლავართ, სადგურ რიონში ჩავალთ, შენ არაფერს დაგიშავებთ, — იბოდნიშებდა პაოლო.

უცნობი გინებაზე გადავიდა. მე და მერი ლორთქიფანიძე ქვედა საწოლზე ჩამოვჯექით, დავითი და კონსტანტინე კარებთან იდგნენ. პაოლო კი ამ გახელებული კაცის წინ იდგა და აშოშმინებდა. ეს კაცი არ იქნა და არ დაწყენარდა. ბოლოს კატეგორიულად მოგვთხოვა — აქედან გაეთრიეთო. პაოლო გაცეცხლდა, წინ წამოიწია და საკმაოდ ხმამაღლა უთხრა: შენ, ძმაო, ვინც შემაკი ხარ, რას გადაგვეკიდევო.

ამის თქმა და ამ უცნობმა რევოლვერი იძრო და ლულა პაოლოს გულზე მიაბჯინა. ყველანი დავიბენით. რადგან ქვემო საწოლზე ვიჯექი, რევოლვერი პირდაპირ ჩემი თავის ზემოთ იყო გამართული პაოლოს გულმკერდისაკენ. არც ვაცეცხლე, არც ვაცხელე, ორივე ხელით ჩამოვკარი და რევოლვერიც ხელებში შემრჩა. ამ კაცს, ალბათ, ეგონა მომკლავენო და აყვირდა: — მიშველეთ, ავაზაკები დამესხნენო. მე რევოლვერი სწრაფად გამოვიტანე და მეორე კუბეში მყოფ სამხედრო კაცს გვარად მაისურაძეს ჩავაბარე. ამ უკანასკნელს დიდი ჩინი ჰქონდა (სამი რომში ეკერა საყულოზე). ვთხოვე მას, შემოსულიყო და ამ გიჟისაგან დაეცხსენით. როგორც შეხედა ამხელა თანადლებობის პირს, ეს ალიაქოთის ამტეხი კაცი მტრედით გახდა. მაისურაძემ იგი სადგურ რიონში ჩაიყვანა და ოქმი შეუდგინა. როგორც მახსოვს, ამხანაგი მაისურაძე მაშინ ა/კ არმიის რეგტრიბუნალის თავმჯდომარე აღმოჩნდა.

ჩვენ რიონში ჩამოვედით. დავით მირსკი ილიმებოდა. ლაპარაკით არავის აწუხებდა, მხოლოდ — ჰმ, ჰმ, იძახოდა გაცეცხებით. ქუთაისში რომ ჩამოვედით, მაშინ იხუმრა:

— ჩემი ბებია ორბელიანის ქალი იყო, კიდევ კარგი, რომ ხმალი არ მეკიდა, თორემ შეიძლება იმ ხულიგნისათვის თავი წამეჭრაო.

სამი დღე დავრჩით ქუთაისში. პაოლო მეტად გახარებული იყო, ლექსებს ამბობდა. სახელდახლოდ საოცარ ექსპრომტებს თხზავდა, თამადაობდა და თავისებური სიღარბაისლით ყველას გვივლიდა და გვეფერებოდა.

## დია ჩიანელი

ქუთაისში, რიონის მარცხენა ნაპირზე, სოლომონ მეფის ცნობილი დიდი ჭადრის ხიდან ოციოდე ნაბიჯის დაშორებით, ზედ თეთრი ხიდის თავში დგას მაგნოლია. ქუთათელები ამ მაგნოლიის ხეს ახლაც „დიას მაგნოლიას“ ეძახიან. მართლაც, სწორედ ამ მაგნოლიის გვერდით იდგა თავის დროის შესანიშნავი მოღვაწის დავით ჩხეიძის (დია ჩიანელის) სახლი. ოცდაათიანი წლების ქართული ინტელიგენციის გამოჩენილი ადამიანები ხშირად იკრიბებოდნენ მის ოჯახში. აქ, ამ სახლის აივანზე, რომელიც რიონის აბობოქრებულ ტალღებს გადასცქეროდა, იმართებოდა იმ დროისათვის მეტად საჭირობოროტო საკითხებზე სჯა-ბაასი, შეპაექრებანი, ლიტერატურული დისკუსიები. ამ ოჯახის მეთაური დია ჩიანელი ქართული ინტელიგენციის ერთ-ერთი შესანიშნავი წარმომადგენელი გახლდათ. იგი ყოველთვის შუბლგაშლილი და მუდამ მღიმარე სახით უმასპინძლებოდა სტუმრებს. ვის არ ნახავდით მის ოჯახში? იქ თქვენ ხშირად შეხვდებოდით ჩვენი დროის უდიდეს პოეტს გალაკტიონს, კოტე მარჯანიშვილს თუ უშანგი ჩხეიძეს, დემნა შენგელაიას და კონსტანტინე ლორთქიფანიძეს, შალვა დადიანსა და სიმონ ჩიქოვანს, სერგო კლდიაშვილსა და რაყდენ გვეტაძეს, პაოლოსა და ტიციანს, ვანიონ დარასელსა და პეტრე ბახტუარიძეს, ლადო ასათიანსა და ილია ხოშტარიას, მიხეილ ალავეიძეს და დავით თაქთაქიშვილს, ვიქტორ გაბესკირიას და ბონდო კეშელავას, პარმენ შელეგიას და ნიკა აგიაშვილს, ლადო ბზვანელს და ჭაჭუ ჯორჯიკიას, დავით მესხსა და გიორგი სამხარაძეს, ევგენი ფურცხვანიძეს და სევერიან ისიანს, ვლადიმერ იამანიძეს და გიორგი ნაფეტვარიძეს და კიდევ მრავალ სხვას, რომელთა გახსენება ახლა არც თუ ისე ადვილია. იგი თავის

მშვენიერ მეუღლესთან ფაცია გოგოძის ქალთან ერთად საოცარი სტუმართმოყვარეობით ხვდებოდა ამ ადამიანებს. იქ, მის ოჯახში, რიონის მშფოთვარე ტალღების ხმაურში, გალაცტიონს არაერთხელ გაუმხელია დიასათვის (თუ თითონ რიონისთვის) თავისი ჯერ კიდევ დაუსტამბავი ლექსები. ამ ხალვათ აივნანზე კოტეს არაერთხელ გაუნდვია დავით ჩხეიძისათვის თავისი ჩანაფიქრი ამა თუ იმ თეატრალურ დადგმებზე. ამ ოჯახში არაერთხელ უთქვამს უშანგის თავისი განუმეორებელი ხმით სვანეთის კლდეკარებში მომწყვდეული რიონივით გულგამჭოლავი მღელვარე მონოლოგები. აქ, ამ აივნის რიკულიდან არაერთხელ გადაშვებულა მუდამ რიონზე შეყვარებული ახალგაზრდა გიორგი შავგულიძე მის გაავებულ ჩქერებში; ბუნებისგან საოცრად გამოკვეთილი მისი ვაჟკაცური ტანი ძველ ბერძნულ ფრესკასავით ცოცხლდებოდა მის ტალღებში. აქ არაერთხელ წაუკითხავს თავისი პირველი ლექსები ლადო ასათიანს, რომლის ფართოდ გახელილ და საოცრად მეტყველ თვალებში სამყაროს უკიდევანო სიყვარული გამოსჭვიოდა. დიახ აქ, სწორედ ამ მაგნოლიის ტოტებქვეშ დია ჩიანელი არაერთხელ დაგვხმარებია ჩვენ, მაშინ ყმაწვილ კაცებს, ყველაფრით, რითაც კი კარგი და დიდბუნებოვანი ადამიანები ეხმარებიან თავიანთ უმცროს მეგობრებს.

დღისით და ღამით მისი სახლის კარები მუდამ ღია იყო მწერლებისთვის, თეატრის მოღვაწეთათვის, ხელოვნების მუშაკებისათვის. იგი გულწრფელი სიყვარულით და პატივისცემით ეკიდებოდა ყველას, ვინც მის მამულს, ჩვენს საბჭოთა ქვეყანას ცოტაოდენ რასმეს მაინც უკეთებდა.

რასაკვირველია, იმ დროის რუსეთის გამოჩენილი მოღვაწენი და მწერლები თუკი ქუთაისს ეწვეოდნენ, უსათუოდ მათი გულითადი მასპინძელი დია ჩიანელი გახლდათ. იგი იყო მათი მიმღები და გამსტუმრებელი. 1926 წელს პაოლომ და ტიციანმა ბათუმის გავლით საფრანგეთში მიმავალი ილია ერენბურგი გააცილეს, დია რიონის სადგურზე დახვდა მათ, დიდი სუფრა გაუშალა, პატივი სცა და ისე გაამგზავრა გამოჩენილი რუსი მწერალი და საზოგადო მოღვაწე. ოცდაათიან წლებში ქუთაისში თავისი მეუღლით ჩამოსული პავლე ანტოკოლსკი უეცრად ავად გახდა. იგი სასტუმროში იყო. არც დია და არც

მე მის ლოგინს არ მოვცილებივართ. დია დიდი სიყვარულით და პატივისცემით ეპყრობოდა მას და ყოველგვარ მეგობრულ დახმარებას უწევდა. ორ კვირაზე მეტხანს იავადმყოფა ანტოკოლსკიმ. ვიდრე კარგად არ გამოჯანმრთელდა, დიამ არ გაუშვა. ასეთი იყო დია ჩიანელი. ამიტომაც ყველა პატივსა სცემდა, ყველას უყვარდა. აკი.ერთხელ ნიკო ლორთქიფანიძემ საქვეყნოდ განაცხადა: „უმისოდ ქუთაისი ვერ წარმომიდგენიაო“. დიახ, ოცდაათიანი წლების ქუთაისის ნამდვილი მასპინძელი დია ჩიანელი გახლდათ. თვითონ ქუთაისსაც განსაკუთრებულად უყვარდა დავით ჩხეიძე. სხვანაირად არც შეიძლებოდა. შესანიშნავი მწერალი, ადამიანი და მოქალაქე, ბრწყინვალე პედაგოგი და უანგარო მოღვაწე, საოცრად ნაზი სულის პატრონი, ამასთანავე ავი საქმეების დაუნდობელი მტერი — აი, როგორი გახლდათ დია ჩიანელი.

ვისაც ის უნახავს, ან მისი ნაწერები გულდასმით წაუკითხავს, ვერც მის მშვენიერ სახეს და ვერც მის ნაწარმოებთა საოცრად თავისებურ სტილს და ენას ვერ დაივიწყებს. სამწუხაროდ, მისი ცხოვრება არც ისე ხანგრძლივი იყო, ორმოცდახუთი წლის კაცი წავიდა ჩვენგან...

დია ჩიანელი ქუთაისში ცხოვრობდა და მუშაობდა. ცხოვრობდა წყნარად, უმწიკვლოდ, მამულიშვილის დიდი სინდისით და სიყვარულით. შრომობდა, როგორც ნამდვილი საბჭოთა ქართველი მოწინავე ინტელიგენტი. უვლიდა თავის შესანიშნავ სამ ქალ-ვაჟს და მეუღლეს (მისი ერთადერთი ვაჟი, რეზო, ახლა საქვეყნოდ განთქმული კინორეჟისორია), უვლიდა მეგობრებს და ნათესაებს, თავს ევლებოდა თავის ხალხსა და მიწაწყალს. შრომობდა საბჭოთა ადამიანის ნათელი და პატიოსანი შრომით. აღსანიშნავია ისიც, რომ იგი მარტო ლიტერატურული შრომით როდი კმაყოფილდებოდა, აქტიურად იღვწოდა საზოგადოებრივ ასპარეზზე. დია ჩიანელი მთელი თავისი ღრმა ცოდნით და ნათელი გონებით მოღვაწეობდა მამულის ასაყვავებლად, რომელიც სწორედ იმ წლებში იწყებდა ეკონომიურ და კულტურულ დიდ აღორძინებას. ამ ღროსათვის დია ჩიანელს უკვე დაბეჭდილი ჰქონდა მრავალი ნოველა და მოთხრობა. მისი სახელი მთელმა ქართველმა კულტურულმა მოსახლეობამ იცოდა, იგი ქართული ლიტერატურული სამ-

ყაროს განუყრელი წევრი გახლდათ. დია ჩიანელი მონაწილე იყო ყველა იმ ლიტერატურული პაექრობისა, რომელიც მაშინ საქართველოში მიმდინარეობდა. აღსანიშნავია ისიც, რომ იგი ჯერ კიდევ ხარკოვში, სტუდენტობის დროს, მეტად აქტიურად ჩაება ლიტერატურულ და საზოგადოებრივ ცხოვრებაში. დია ქართველ სტუდენტთა სათვისტომოს გამგეობის თავმჯდომარის მოადგილედ იყო და მთელი მაშინდელი უკრაინელი და ქართველი სტუდენტების ჭირ-ვარამის უშუალო მონაწილე. ჭირ-ვარამი კი მაშინ უკრაინელ და ქართველ ახალგაზრდა ინტელიგენციას ცოტა როდი ჰქონდა?! რევოლუციის მძაფრმა და ბობოქარმა წლებმა კიდევ უფრო მეტად დააკავშირა უკრაინელი და ქართველი სტუდენტი-ახალგაზრდობა, ერთ-ერთი მადგანი იყო დია ჩიანელი—დავით ჩხეიძე. ხარკოვის უნივერსიტეტის დასრულებისთანავე იგი ქუთაისში ჩამოვიდა და აქტიურად ჩაება ლიტერატურულ-საზოგადოებრივ საქმიანობაში. მისი პირველი ნოველების წიგნი „შემოდგომის ცრემლები“ ამისი უშუალო დამამტკიცებელია. ბუნებრივია, რომ მასში ჯერ კიდევ არ ჩანს აზრის ის სიმყარე და სიმტკიცე, რომელიც ჩვენ შემდგომ მის ნაწარმოებებში გვხვდება, მაგრამ ამ წიგნით მან უსათუოდ დაამტკიცა თავის გემოვნების სიმაღლე და სიტყვის ოსტატის სახელი. საბჭოთა ხელისუფლების პერიოდში იგი თავის შემოქმედებას კიდევ უფრო ამადლებს და ზრდის. მისი ნაწერები უკვე თითქმის რესპუბლიკის (და მის გარეთაც) ყველა ჟურნალ-გაზეთში გვხვდება. იგი ნამდვილად ხდება მაშინდელი საქართველოს დიდი ცხოვრების აქტიური მონაწილე.

საქვეყნოდ ცნობილია მშენებლობის ის ტემპები, რომლითაც ჩვენი საუკუნის ოცდაათიანი წლები ხასიათდება. დია ჩიანელსაც ხომ სწორედ ამ ხანებში უხდებოდა მუშაობა. დამახასიათებელია, რომ ქუთაისში მშენებლობის ეს ტემპები განსაკუთრებული რელიეფურობით ხასიათდებოდა. ყველამ იცის, ეს ქალაქი მანამდე უმთავრესად ლხინის, დროს ტარების და ვარდ-ყვავილების ქალაქი იყო. ამ სახელოვან ოცდაათიან წლებში კი თითქოს მიწის გულიდან ამოგრიგალდა მძლავრი რევოლუციური სული. ამოგრიგალდა და ქვეყანას დაანახვა რევოლუციის ძალა აღამიანებზე. ამიერიდან ქუთაისი

ზღბა საქართველოს სოციალისტური ინდუსტრიის მეორე ქალაქად. ადამიანები სრულიად გარდაიქმნენ. მათი ენერგია, აზრი და შემოქმედებითი სული გამოხატულებას რევოლუციური მშენებლობის დიდ მასშტაბებში პოულობს. ამ ქალაქის მცხოვრებთა ვაჟკაცობა ამალდა, საოცრად ენერგიული და შემტევი გახდა. დაიწყო გუმბრინის ბარიტის, მიშიაკის წილისეულთა მოპოვებელი წარმოებების შექმნა და აღორძინება, აშენდა მაუდის საქსოვი და აბრეშუმის ძაფსაქსოვი ფაბრიკა-ქარხნები. აშენდა აბრეშუმის საგრენაჟო წარმოება და, რაც ყველაზე მთავარია, დაიწყო მაშინ უდიდესი ელსადგურის რიონპესის მშენებლობა. ამ მშენებლობაზე თავი მოიყარეს ახალგაზრდა ქართველმა საინჟინერო ძალებმა. ისინი აქ დავაჟკაცდნენ, მიიღეს უაღრესად დიდი და საჭირო გამოცდილება. შემდგომში სწორედ ამ ძალებმა თავის კისერზე გადაიტანეს საქართველოში სოციალიზმის დიდი და გაუზზარავი კედლების ამალღების ყველა სიძნელე. რასაკვირველია, ზაგესმა პირველი ნათლობა მიაღებინა ამ სასახლო საქმეში ქართველ ხალხს. და მაინც რიონპესი სულ სხვა იყო. ეს; რასაკვირველია, უფრო დიდი მშენებლობა იყო და ქართველი ხალხის, როგორც სოციალიზმის მშენებელი ერის დამწიფების, დავაჟკაცების და ამალღების დიდი სკოლა გახლდათ. ყოველივე ამან ძალზე გამოცვალა ამ ქალაქის ინტელიგენციის სახე, მისი აზროვნების მიმართულება. თუ მანამდე ამ ქალაქის ინტელიგენცია უფრო ზერელე კამათით, ორატორული ნიჭის გამოჩენით იყო გატაცებული, ახლა იგი მთელი მონღომებით ჩაება ქვეყნის დიდ სასარგებლო საქმეში. იგი მთელ ხალხთან ერთად სოციალიზმის ტიტანური მშენებლობის აქტიური შემოქმედი გახდა. არ შეიძლება არ აღინიშნოს, რომ იმ დროის ქუთაისის ინტელიგენცია, მეტად დიდი განათლების მქონე და შემოქმედებითად აღსავსე, ნამდვილად ერის მოწინავე ინტელიგენცია იყო. ჭერ კიდევ რევოლუციამდე და რევოლუციის პერიოდში, იოსებ ოცხელის მეთაურობით, ხალხის უანგარო სამსახურში ჩაყენებული ნიჭიერი ქართველი ინტელიგენცია თანდათან სულ უჭირო და უფრო დაუყავშირდა მშრომელთა, იღვალეებს, მის ხვალინდელ დღეს და ამდენად ერის დიდ მომავალს. განსაკუთრებით აღსანიშნავია მაღალი დონის აზროვნება

ნების მქონე პედაგოგები. ამ პედაგოგთა შემოქმედებითი შრომები — შესანიშნავი სასკოლო სახელმძღვანელოები — მთელი საქართველოს სკოლების აღსაზრდელთა გონების საფუძველი გახლდათ. მათ შორის არ შეიძლება არ აღინიშნოს: ნიკო ქუთათელაძე, ნიკო მისაბიშვილი, ნიკო ნუცუბიძე, ნიკო მეფისაშვილი, პლატონ წულუკიძე, თეიმურაზ და იასონ ჭუმბურიძეები, ლეო და ვარლამ იმნაძეები, ძმები ოსიკო და გიორგი დევდარიანები, შესანიშნავი უფრნალისტი და მოპაექრე იროდიონ ხანთაძე, ტრიფონ, ნიკო და არჩილ ჯაფარიძეები; დიდი ერუდიციის მქონე მასწავლებელი-მათემატიკოსები: სიმონ ოცხელი, სიმონ შარაშენიძე, გედეონ წერეთელი, კოწია კანდელაკი, სპირდონ ჯორჯიკია, სიმონ ეზიკაშვილი, ტარასი აბზიანიძე და მრავალი სხვანი, რომელთა დასაწელება შორს წაგვიყვანდა. მრავალი მათგანი ღრმა მოხუცებულობამდე ეწეოდა მასწავლებლის მძიმე და ნათელ შრომას. დიდია მათი ღვაწლი ოცდაათიანი წლების კულტურის განვითარების საქმეში. აღსანიშნავია ისიც, რომ ქუთაისში აყოფილი რეალური სასწავლებლის მატერიალურ ბაზაზე შეიქმნა პედაგოგიური ინსტიტუტი. ინსტიტუტის დაარსებამ, რასაკვირველია, ძალზე გააფართოვა ქუთაისის ინტელიგენციის პორიზონტი და აღამაღლა მათი მოთხოვნილება. ქუთაისის ინსტიტუტს იმთავითვე სათავეში ჩაუდგა ლენინურ ტრადიციებზე აღზრდილი მეტად მაღალგონიერი, ნიჭიერი და განათლებული ახალგაზრდობა. ინსტიტუტის რექტორებად პირველად დავით გვაზავა და შემდეგ ალექსანდრე პაპავა დანიშნეს. ორივენი ლენინური კომკავშირის იმ თაობას ეკუთვნოდნენ, რომელნიც ბორის ძნელაძესთან ერთად კომკავშირის ბალავერის ჩაყრის მონაწილენი გახლდნენ. მათ ინსტიტუტში მიიწვიეს ჩვენი ქვეყნის გამოჩენილი პროფესორ-მეცნიერები, რომელნიც შეუდგნენ საბჭოთა ახალგაზრდა თაობების აღზრდას. ქართული ლიტერატურის საბჭოთა პერიოდის ლექტორად დია ჩიანელი იქნა მიწვეული. შემდეგ იგი დაუსწრებელი ინსტიტუტის რექტორად დანიშნეს, მაგრამ მას ერთი წუთითაც არ შეუწყვეტია ლიტერატურული მუშაობა. ამ დროს ქუთაისში შეიქმნა ახალი ლიტერატურული გაზეთი „სიტყვა და საქმე“. უნდა ითქვას, რომ ეს გაზეთი ნამდვილად გახდა ქართული მწერლო-



ბის ღირსეული ორგანო. გაზეთმა თავის გარშემო შემოიკრიბა მთელი ქართული მწერლობის საუკეთესო ნაწილი. მისმა რედაქციამ (პლ. ქიქოძე, კარლო კალაძე, ნიკო ცხაკაია, ნიკა აგიაშვილი, დია ჩიანელი, გიორგი ჭიბლაძე, პარმენ შელევია და სხვა) დიდი ორგანიზაციული და შემოქმედებითი მუშაობა ჩაატარა. განსაკუთრებით უნდა აღინიშნოს გაზეთის შინაარსობლივი და მხატვრული კულტურის დონე. იმ დროს ქუთაისში თბილისიდან ძალზე ხშირად ჩადიოდნენ ჩვენი გამოჩენილი მწერლები და მოღვაწეები. ქუთაისის სასტუმროში არცთუ იშვიათად ნახავდით: მიხეილ ჯავახიშვილს, სიმონ ხუნდაძეს, ვახტანგ კოტეტიშვილს, შალვა დადიანს, კონსტანტინე გამსახურდიას, კონსტანტინე ლორთქიფანიძეს, გერონტი ქიქოძეს, ბენიქო ბუაჩიძეს, სიმონ წვერავას, შალვა რადიანს, სიმონ ჩიქოვანს, სერგო ამალღობელს და სხვებს. კვირაში ერთხელ მაინც იმართებოდა სასიცოცხლო საკითხებზე ლიტერატურული დისკუსიები. ოცდაათიან წლებში ქუთაისმა თითქოს ისევ დაიბრუნა თავისი ლიტერატურული ცხოვრების ის წლები, როცა „ცისფერი ყანწების“ ხელოვნურად დეკადენტურ გზაზე დამდგარი, მაგრამ მეტად ნიჭიერი ახალგაზრდობა დიდი ლიტერატურული კულტურისათვის იწყებდა ბრძოლას, სწორედ ამ ახალგაზრდებს შემდგომში დიდი როლი დააკისრა და გადააწყვეტინა საბჭოთა ლიტერატურის ისტორიამ (პაოლო იაშვილი, ტიციან ტაბიძე, კოლაუ ნადირაძე, შალვა აფხაიძე, ვ. გაფრინდაშვილი, შ. კარმელი, სანდრო ცირეკიძე და სხვები).

რევოლუციური შერყევებით აღტკინებული და აღრეული მემარცხენე განწყობილების ფუტურისტული სულით აფორიაქებული ახალგაზრდობა სააფიშო დარაბებს ეპოტინებოდა და ბალის ყოველი კიდიდან ზაუმური ლექსებით აოცებდა ქუთაისის მცხოვრებთ. შემდგომში სწორედ ამ ახალგაზრდებმა საკმაოდ სასახლო გზა განვლეს საბჭოთა ლიტერატურის დიად ისტორიაში (ბ. ჟღენტი, ს. ჩიქოვანი, ნ. ჩაჩავა, აკაკი ბელიაშვილი, ბ. გორდენიანი და სხვ.).

დიახ, ქუთაისმა ამ დროს თითქოს ისევ დაიბრუნა ის წლები, როცა გამარჯვებულმა პროლეტარიატმა სიხარულით აღტკინებული ახალგაზრდა პოეზიის მეტად ნიჭიერი თაობა

შემოიკრება და ბრძოლა გამოუცხადა ყველაფერ მას. რაც საბჭოთა ლიტერატურის ზრდას შეუშლიდა ხელს.

ღიახ, ქუთაისის ლიტერატურული ცხოვრება ამ წლებში უსათუოდ რელიეფური და საინტერესო გახდა. ლიტერატურულ გაზეთთან ერთად გამოდიოდა ქურნალიც, საოლქო პოლიტიკური გაზეთიც დიდ ადგილს უთმობდა ლიტერატურულ ცხოვრებას. რახაკვირველია, ამის შემდეგ ადვილი როდი იყო ამ ქალაქის ლიტერატურული ცხოვრების მეთაურობა. სწორედ ასეთ პერიოდში მოუხდა ღია ჩიანელს ქუთაისის ლიტერატურული ცხოვრების ხელმძღვანელობა. იგი მწერალთა კავშირის თავმჯდომარედ იქნა არჩეული.

ღია ჩიანელმა ჯერ კიდევ კოტე მარჯანიშვილის ქუთაისში ჩამოსვლამდე დაწერა მაშინდელ დროისათვის მეტად საინტერესო პიესები. ერთი მათგანი („ურაგანი“) დადგა დიდად განათლებულმა ადამიანმა და ცნობილმა რეჟისორმა მიხეილ ქორელმა. მთავარა როლი ითამაშა გრ. კოსტავამ, რომელსაც დიდი მოწონება ხვდა. ეს დრამატული ნაწარმოები რევოლუციური სულის პიესა იყო და ამიტომ ქუთაისის ახალგაზრდობაში საკმაოდ დიდი როლი ითამაშა. შემდგომში შოთა მანაგაძის და ნიკო გოძიაშვილის ერთობლივი მუშაობით დაიდგა დავით ჩხეიძის „ბეთქილი“. ეს პიესა სვანურ ლეგენდაზე იყო აგებული და უთუოდ ლამაზად გაკეთებული წარმოდგენა გახლდათ. ვერც იმას დაევიწყებთ, რომ ღია ჩიანელმა ერთბა პირველთაგანმა მოჰკიდა სვანურ თემას ხელი და დიდი სიყვარულით და რომანტიკით დაგვიხატა საქართველოს ამ ულამაზესი კუთხის ცხოვრება. ყოველივე ამას დაემთხვა ქართული ხელოვნების ისტორიაში დიდი სიახლე. ეს გახლდათ კოტე მარჯანიშვილის ქუთაისში ჩამოსვლა. ეს წლები არა მარტო თეატრალურ ისტორიის, საერთოდ ჩვენი ერის ისტორიის ერთი ბრწყინვალე ოქროს ფურცელი გახლავთ. ღია ჩიანელი იმ დროს ხელოვნების კავშირის თავმჯდომარეც იყო. იგი გულმხურვალედ დაეხმარა კოტეს ახალგაზრდობის შერჩევის და თეატრში მიზიდვის საქმეში. კოტემ დიდი სიყვარულით დადგა შემდეგ ღია ჩიანელის „ბაილი“. დავით ჩხეიძე გყვარდში ამოუდგა ამ დიდ რეჟისორს და დიდად უწყობდა ხელს მთელ მის კოლექტივს. ქუთაისი იმ დროს საოლქო ქა-

ლაქი გახლდათ. ეს კი ბევრს ნიშნავდა. პარტიულ და ხელმძღვანელ ორგანოებში რჩეული, ნიჭიერი და განათლებული ადამიანები მუშაობდნენ. ყველა მათგანი დიდი სიყვარულით და თავდადებით ეხმარებოდა ლიტერატურის და ხელოვნების მოღვაწეებს. არ უნდა დავივიწყოთ ისიც, რომ რიონჰესის მშენებლობას საქართველოში კომუნისტური პარტიის ძველი წევრი, რევოლუციის დიდ ქარიშხლებში გამოვლილი ადამიანი კლიმენტი სულავა ხელმძღვანელობდა. რასაკვირველია, მისი ადამიანური კეთილშობილი თვისებები და რევოლუციური გამობრძმედილობა დადებითად მოქმედებდა ახალგაზრდა ინჟინერ-ტექნიკოსებზე. შემდგომში რიონჰესის მმართველად დაინიშნა ოქტომბრის ერთი გმირთაგანი, ვალოდია ჭიქია. ამ ადამიანს ჰიდრომშენებლობის დიდი გამოცდილება ჰქონდა. მისი მეთაურობით დასრულდა საბჭოთა კავშირში ცნობილი ვოლჰოსტროის ჰიდროკვანძის მშენებლობა და შემდეგ გადმოყვანილ იქნა ქუთაისში რიონჰესის მშენებლობაზე. ვალოდია ჭიქია იყო დიდი დიაპაზონის ადამიანი. იგი არა მარტო უშიშარი მშენებელი იყო, ამავე დროს თავისი ვაჟკაცური და ალლოიანი მოქმედებით განსაკუთრებულ პატივისცემას იმსახურებდა ახალგაზრდა მშენებლებში. მან ხელი მოჰკიდა ქალაქის კეთილმოწყობას, ააშენა შესანიშნავი სასტუმრო „ქუთაისი“, დააგო პირველი ასფალტი რიონის სადგურამდე და გაამშვენიერა ქალაქის ცენტრალური ქუჩები. იგი ყოველმხრივ და დიდი მონღომებით ეხმარებოდა თეატრს, ლიტერატურულ გაზეთს და საერთოდ მწერლობას. მან პირველად განათებინა ბაგრატიის ჩამონქმეული ნანგრევების კედლები, რათა რიონჰესის უმშვენიერეს კაშხალთან ერთად ქართველ კაცს ყოველთვის თვალის სინათლის შუქზე ჰყოლოდა თავისი დიდი წარსულიც, მისი გუშინდელი საამაყო დღეც. იმ დროს რიონჰესის მშენებლობაზე შესანიშნავმა ინჟინრებმა და ადამიანებმა მოიყარეს თავი. გიორგი მიქელაძე, დ. ერისთავი და გ. ზერხელიძე თავიანთი საინჟინერო ნიჭით და დიდი გამოცდილებით არა მარტო რიონჰესის კედლებს აშენებდნენ, ისინი ამავე დროს ზრდიდნენ ახალგაზრდა ინჟინრებს, რომელთა და-

ვაუკაცებაზე მოქმედებდა მათი ცხოვრება და შემოქმედება.

როინჰესის მშენებლობაზე მუშაობდნენ კანდიდ ჩარკვიანი, გიორგი გიორგობიანი, კოტე გაბუნია, შურა მესხი, გ. ცინცაძე, ვ. ბოკერია და სხვები, რომელთა ადამიანობა, პატრიოტული სიმტკიცე და კულტურა უთუოდ სამაგალითო იყო საერთოდ ახალგაზრდობისათვის, ქალაქ ქუთაისის ყოველი მოქალაქისათვის. როგორც ზემოთ აღვნიშნეთ, მანამდე ეს ჩუმი და წყნარი ქალაქი, რომელსაც მოქეიფეთა ხრინწიანი ხმა და ეტლებში ჩადგმული არღნების ზავილი თუ გააღვიძებდა, ახლა ერთბაშად აივსო მანქანებით, ტრაქტორებით და სხვა სამშენებლო ინდუსტრიით. პირველი მიწის მბურღავი „ექსკავატორი“ დაიდგა ე. წ. IV უბანზე. მთელი ქალაქი მოაწყდა სანახავად. მაშინ მიწის ასეთი მანქანით თხრა მეტად გასაოცარი იყო. მანამდე ადამიანები ორ კილოგრამ მიწის ბოლქვს ხელდახელ თუ მოაგლეჯდნენ რკინის ბარით დედამიწას, „ექსკავატორი“ კი ერთბაშად ერთ კუბომეტრ მიწას და ხრეშს მოგლეჯდა და თან მანქანაზე დააყრიდა. დიახ, ასეთი მექანიზმები იმ დროს რწვიათობა იყო და ადამიანებში გაოცებას იწვევდა. კარგად მახსოვს ეს „ექსკავატორი“ მაშინ დიასა და ჩემი თანხლებით სხვებთან ერთად გალაკტიონმა და გიორგი ქუჩიშვილმაც ინახულეს.

აღსანიშნავია, რომ ნიკოლოზ ბლუაშვილის წინადადებით ჯარში სამუშაოდ წავიდა ვანიონ დარასელი, რომ უს შემთხვევა არა, დღეს ქართულ დრამატურგიას „კიკვიძე“ არ ექნებოდა. აღსანიშნავია ისიც, რომ დია ჩიანელი ვანიონ დარასელის ჯარში სამუშაოდ გაგზავნის ერთ-ერთი ინიციატორთაგანი იყო.

სწორედ ამ წლებში საოლქო კომიტეტის ინიციატივით შეიქმნა ე. წ. „ინტელიგენციის აქტივი“, რომელიც უაღრესად დიდ და საინტერესო მუშაობას აწყობდა ოლქში. ამ ინტელიგენციის ერთი მეთაურთაგანი გახლდათ დია ჩიანელი. დია მთელი თავისი გულწრფელი სიყვარულით შეყვარებული იყო ქუთაისზე და მისი კულტურის დიდ ძეგლებზე. ისე, როგორც ყოველი ჭეშმარიტი ქართველისათვის, მისთვისაც ბაგრატიის ნანგრევთა თვითეული ქვა დიდ ეროვნულ სიამაყეს და სულის ამალღებას იწვევდა. იგი, რასაკვირველია, თვითონაც მაღლდებოდა და იწმინდებოდა მათი წმინდა,

იმადლებული სიყვარულით. გელათის ტაძარი და გეგუთის ციხე-სასახლის ნანგრევები, მთელი უქემერიონის მიმონქმეული ბალავერი მისთვის ისეთი ადგილი გახლდათ, სადაც ქართველ კაცს მუხლდაჩოქილი უნდა ელოცა. მართლაც, ეს ასეც იყო. მახსოვს, იმ წლებში საქართველოში ჩამოვიდა იმ დროს საქვეყნოდ სახელგანთქმული კრიტიკოსი და მოაზროვნე დავით მირსკი. თბილისიდან ქუთაისში ის წამოიყვანეს პაოლომ, კოსტანტინე ლორთქიფანიძემ და მერი ნიჟარაძემ (კონსტანტინეს მეუღლემ). იმ დროს მე ქუთაისში ვიყავი და პაოლოს და კონსტანტინეს დეპეშა მივიღე. რასაკვირველია, სტუმრებს ზესტაფონში შევხვდი. იმ დროს ზესტაფონში რაიკომის მდივნად იყო გრიშა გაბუნია, ძველი რევოლუციონერი, მეტად განათლებული ადამიანი. რომელსაც მე ვაცნობე სტუმრების ჩამოსვლა. გრიშამ დიდზე დიდი პატივი სცა სტუმრებს — ზესტაფონის რკინიგზის კლუბში ლიტერატურული სადამოც გაიმართა. პაოლო და კოწია მთელი ღამე საოცარი მგზნებარებით კითხულობდნენ თავიანთ ლექსებს. დიდი სიტყვა თქვა დავით მირსკიმაც. ფიგი მეტად საინტერესო პიროვნება გახლდათ. მისი ბეპია (როგორც თვითონ ამბობდა) ორბელიანის ქალი ყოფილა, მამაკი რომანოვების ცნობილი მინისტრი კნიაზი სვიატოპოლსკი-მირსკი. რევოლუციის დროს საზღვარგარეთ გაქცეულა. შვილიც თან წაუყვანია და დიდი განათლება მიუცია.

მან დიდხანს დაჰყო ინგლისში, იქ კომუნისტური პარტიის წევრი გახდა და მაქსიმ გორკის მოწვევით საბჭოთა კავშირში ჩამოვიდა. აი, სწორედ ეს დავით მირსკი სტუმრად აღმოჩნდა ჯერ ზესტაფონში და მერმე ქუთაისში. მაღალი და ბრგე კაცი იყო. საუბარში არ გამოგყვებოდათ, ოფიციალური სიტყვა წარმოთქვა, მეტად ღრმად და ორატორულად ძლიერი. საქართველო აოცებდა. ღვინოს სიამოვნებით სვამდა და ამბობდა: ქართული ღვინო დედის რძესავით "ნემერგება, მეც ხომ ორბელიანის სისხლის, ქართველთა შთამომავალი ვარო. მისი ქართველობის რა მოგახსენოთ, მაგრამ ღვინოზე კი ნამდვილად სულ მოწყურებული იყო და არც კი ეტყობოდა ისე სვამდა. ქუთაისში მე და ღია ვიყავით მასპინძლები. უნდა გაგახსენოთ, რომ პაოლო სულ სხვანაირი ადამიანი იყო. მე-

ტად ახოვანს და მომხიბლავ ყოფაქცევის ადამიანს საოცრად ვაჟკაცური ელერადი ხმა ჰქონდა. შეუღარებელი მოსაუბრე, რუსული და ევროპული პოეზიის ღრმა მცოდნე და საოცრად ეშხიანი მომლხენი და მესუფრე. ჯოჯოხეთში რომ შეგეყვანათ, უთუოდ სამოთხედ გადააქცევდა და ტირილის მაგივრად სიმღერას ათქმევინებდა მწუხარე ადამიანსაც კი. მის გვერდით ეშმაკიც სასიამოვნო ადამიანად იქცეოდა. იგი ლხინისთვის და ლექსის თქმისთვის დაბადებული კაცი იყო. შეეძლო საათობით სხვისი და თავისი ექსპრომტი ლექსებით შეუსვენებლივ და ლალად ესაუბრა ამქვეყნად. კონსტანტინეც მაშინ ძალიან ახალგაზრდა ვაჟკაცი იყო. მასაც დღე-ღამე შეუსვენებლივ შეეძლო ლექსების ყელმოღერებული თქმა.

იმ საღამოს ქუთაისის რესტორანში „ღიმში“ ვილხინეთ. დიასთან ერთად პეტრე ბახტურიძე და ვანიონ დარჯსელი იყვნენ. ნაშუალამევს ბაგრატიის ნანგრევებზე ავედით. რასაკვირველია, მერი ნიჟარაძე არ წავიყვანეთ, იგი თავისიანებში წავიდა. პეტრე ბახტურიძე ბაგრატიის ტაძრის ახლო ცხოვრობდა, ამიტომ ის მასპინძლობდა. ტაძრის შუაგულში ლორთქ ბალახებში ჩაფლულ მონგრეულ სვეტის თავზე სუფრა გავაწყვეთ. პაოლომ გაბრიელა ბერს (ტაძრის დარაჯი იყო) ოცდაათი ლერი სანთელი გამოართვა და აანთო. თათლის სანთლის ღვეთმა გამაბრუებელი სურნელება მოჰფინა ტაძრის შიგა ეზოს, აციმციმდა და შეირხა ვეება კედლები. პაოლომ სასმისი ასწია და დაიჩოქა. ყველამ ჩავიმუხლეთ. ცისკარი ცის კაბადონს ხსნიდა. ამ უზარმაზარ ტაძრის ნანგრევთა გარშემო დილის საოცარი სიწყნარე და სიგრილე სუფევდა.

პაოლომ თავისი ცნობილი ლექსი „პოეზია“ შეჰლაღადა ცას. კოწიამ თავისი ლექსები დაიბუხუნა, დავით მირსკიო, პეტრემ, ვანიონმა და მეც, ყველამ, რაღაც-რაღაც ვიბურდღუნეთ. ლხინით გაბრუებულები ვიყავით. შეთეთრებულ ცისკარს ტოროლასავით აფეთქებდნენ სიტყვებს. გათენების ჟამს ჩვენს სუფრას იქვე მცხოვრები ვალოდია ორბელი და ჭაბუკი ლადო ასათიანი შემოემატნენ. ჯერ კიდევ უკრმა ლადო პირველად ესწრებოდა პოეტების ასეთ სილაღეს.

- უცებ დიამ სიტყვა დაიწყო და ველარ დაამთავრა. ყელში გაეჩხირა სიტყვა და ცრემლი. იგი მერმე ყველას მოგვეხვია,

დაგვეკოცნა და ხმამაღლა აქვითინდა. ამ შემთხვევის გამო  
ლადო ასათიანი შემდგომში სულ ხუმრობდა: „ღია ჩემს პო-  
ეზიაში შემოსვლას ტირილით შეეგება ბაგრატიზეო“. თან  
უმატებდა: „კნიაზ მირსკი იცინოდა, „ღვარიაინი“ ჩხეიძე  
ტიროდა და პავლე პირველის მომსპობი იაშვილი ილხენდაო“.   
რასაკვირველია, დიას ცხელი ცრემლები დიდი სიყვარულით  
გამოწვეული მღულარე ცრემლები იყო. მართლაც, სად უნ-  
და იცრემლოს ქართველმა კაცმა, თუ არა ბაგრატის ტაძრის  
ნამსხვრევების შემხედვარემ?! სხვათა შორის, იმ დამით დ.  
მირსკიმ თქვა: „ევროპელებმა ომებით ერთმანეთი დაჭამეს,  
გაჟლიტეს, მაგრამ არც ერთი საგულისხმო ნაშენი არ და-  
უნგრევეიათ, არ მოუსპიათ. ეს მსხვრევა თურქების ხელწე-  
რაა, მათი ვილურობის უტყუარი ნიშანიაო“.

ღიახ, სწორედ თურქების ამ ხელწერამ აატირა იმ საღა-  
მოს დავით ჩხეიძე. ასეთი იყო ღია ჩიანელი!

ერთ ზაფხულს ანდრეი ბელი ჩამოვიდა ქუთაისში. ღიამ  
იგი გელათში აიყვანა, გეგუთი ანახა, ბაგრატზე გადაახედა.  
გულაჩუყებული ანდრეი ბელი აქვითინებული ეხვეოდა  
ყელზე ჭაჭუ ჭორჭიკიას, დავით თაქთაქიშვილს და ღია ჩიან-  
ელს.

ასევე უმასპინძლა 1927 წელს ბათუმში მიმავალ ბორის პას-  
ტერნაკს. ასე რომ, ღია ჩიანელი კოლხეთის მთავარი ქალაქის  
ამ დიდ გზაჯვარედინზე თითქოს განგებით მოხვედრილი ადამი-  
ანი იყო, რათა ჭეროვანი პატივი ეცა მწერალთა და ხელოვან-  
თათვის.

თვითონ მეტად წყნარი კაცი გახლდათ, ღვინოს ერიდე-  
ბოდა, მაგრამ მხარის აბმა იცოდა, ტოლს არ დაგიდებდა, თუ  
გინდა ქვეყნის კიდეში წაგყვებოდა. ყველა მწერალი უყვარ-  
და, მაგრამ, ჩემი დაკვირვებით, პაოლო, სერგო კლდიაშვილი  
და კოლაუ ნადირაძე მისთვის მეტად ძვირფასი ადამიანები  
აყვნენ. (რასაკვირველია, დემნას ის ძმად თვლიდა, ისინი ქვის-  
ლები იყვნენ). მათ ხსენებაზე ყოველთვის სახე გაებადრე-  
ბოდა და სიხარულით აუციმციმდებოდა თვალები.

ერთხელ ქუთაისში გალაკტიონი ჩამოვიდა. ამ დღემა  
პოეტმა და სწორედ კაცმა დაჟინება იცოდა. მთელი საქარ-

თველო მოესურვილებოდა, მოგზაურობის ეინი მოუვლიდა და ველარ გააჩერებდით.

— აბა, ბიჭებო, მოვინახულოთ ჩვენი საქართველოო, — გვითხრა ყველას. მე ვერ წავყევი. მაშინ ქუთაისის კომკავშირის გაზეთს ვხელმძღვანელობდი და არ შემეძლო წასვლა. დია ჩიანელმა ვანიონ დარასელი და დავით თაქთაქიშვილი წაიყვანა და ჯერ იმერეთი, მერე მთელი ოდიში მოიარეს. ზუგდიდიდან ცხენებით სოფელ ობუჯში ესტუმრნენ ლეო ქიაჩელს, რომელიც იმ დროს იქ აღმოჩნდა. იქ კარგა ხანს დაჰყვეს და მერმე უკანვე დაბრუნდნენ.

— გენაცვალე, დიასთანა კაცი ახლა სად არის?!. ის მხოლოდ ერთია ამ ქვეყანაზეო! — უქცევდა მისებურად ობუჯიდან დაბრუნებული და გახარებული გალაკტიონი.

დიას ძალზე უყვარდა თავისი სოფელი დიმი. უნდა მართალი მოგახსენოთ, რომ მართლაც მეტად ლამაზი, მდიდარი და ყოველმხრივ შემკული სოფელია. მდინარე ხანისწყალი იქვე ჩამოჩქრიალებს, აიაზმის წვეთებივით სუფთა და კრიალა წყალია, თევზით მდიდარია, ზემოთ (ბაღდადის ზემოთ) ხომ მეტად გემრიელი კალმახითაა სავსე. დიას იქ თავის ძმასთან ვასილ ჩხეიძესთან ერთად სახლკარი ჰქონდა. დიდი სტუმართმოყვარე ოჯახი გახლდათ. დიას ძმისშვილი დათუნა ჩვენი ტოლი ვაჟკაცი, ჩემი სიყრმის მეგობარი, მეტად ნიჭიერი კაცი, ლხინისათვის და სიმღერისათვის დაბადებული იყო. ჩვენ მის სოფელში არაერთხელ ვყოფილვართ. ირაკლი აბაშიძე თუ ლადო ანთაძე, ნიკო აღზაზიშვილი თუ რომან ლეჟავა, ალიო მირცხულავა და გიორგი სუმხარაძე, კონტანტინე ლორთქიფანიძე და პეტრე ბახტურიძე, მიშა იაშვილი და ვალიკო თუმანიშვილი ხშირად ჩავსულვართ იქ და არამც თუ გვილხენია, გვითევზავია კიდევ. იერუსალიმიდან დაბრუნებული ირაკლი ხუმრობდა: „იორდანე რომ ხანისწყალივით სუფთა იყოს, მაშინ, ალბათ, ისრაელებიც და არაბებიც დაიჭერებდნენ, რომ ის მდინარე, მართლაც, ღმერთებისათვის არის გაჩენილი და შეიძლება მოქცეულიყვნენ კიდევცო“.

დიას, დიას მეტად უყვარდა თავისი სოფელი და თავისი ხანისწყალი. აკი მან არაერთი მოთხრობა, ნოველა და რომა-



ნიც კი უძღვნა მათ. საერთოდ, ბალდადის ხსენება სიხარულის ქრუანტელს გვრიდა ხოლმე და დიდად ამაყობდა კიდევ, რომ ის იქიდან იყო. შეიძლება ნაწილობრივ ამით აიხსნებოდა ისიც, რომ ღია განსაკუთრებულ პატივს სცემდა მიაკოვსკების მთელ ოჯახს. მას ახლო ურთიერთობა ჰქონდა მის დებთან: ოლიასთან და ლუდასთან. სწორედ ღიამ გავაცნო ორივე დები თავის სახლში. შემდეგ ჩვენ გავაცილეთ ისინი ბალდადში და მივიყვანეთ კუჭუხიძეების სახლში (ახლა ეს სახლი მუზეუმი), რომელშიაც ოდესღაც თითონ ცხოვრობდნენ. ისინი ვ. მაიაკოვსკის დაღუპვის შემდეგ უფრო ხშირად ჩამოდიდოდნენ ბალდადში. ქუთაისში უსათუოდ ღიას მოინახულებდნენ და ისე გაემგზავრებოდნენ. რაც კი ვლ. მაიაკოვსკის სახელთანაა დაკავშირებული (მუზეუმის გახსნა და სხვა), ყველაფერი ღიას უშუალო ინიციატივით კეთდებოდა.

როცა მაიაკოვსკის დაღუპვის დეპეშა მოვიდა ქუთაისში, ღია რომელიღაც სოფელში იყო წასული კოლექტივიზაციის საქმეზე (მოგეხსენებათ 1930 წელი და სოფლის ამბები). ვ. მაიაკოვსკის ტრაგიკულად დაღუპვამ თავზარი დასცა ყველას. არავინ არ ელოდა ამქვეყნად იმას, რომ ასეთი პოეტი თავს მოიკლავდა. ს. ესენინს ტრაგედია, რასაკვირველია, უფრო გასაგები იყო, ვინემ ვ. მაიაკოვსკის ამბავი. კომკავშირულ ახალგაზრდობაზე ამან დიდად იმოქმედა. სულ რამდენიმე ხნის წინ იგი კრასნოპრესნაიას კომკავშირს თითქოს თავისი პოეტური ვაჟკაცობის ანგარიშს აბარებდა და უცებ ასეთი ამბავი ნამდვილად ტრავმა დიდი იყო. ქუთაისის ქალაქკომმა გადაწყვიტა და დაგვაწავლა ამ საღამოსვე თეატრში მიტინგის მოწვევა. ვინ უნდა გააკეთოს მოხსენება? ან ვინ უნდა გახსნას მიტინგი?!

ჩაჩუ ჭოროციამ განაცხადა: ჩემზე ისე იმოქმედა ამ ამბავმა, რომ ტრავმირებული ვარ. მთელი სხეული და აზროვნება გაოგნებული მაქვს, ენას ვერ ვძრავო. ღია კი ქალაქში არ იყო. მივმართეთ თეიმურაზ ჭუმბურიძეს. თეიმურაზი მაშინ განათლების განყოფილების გამგე იყო. მას მთელი ქართველი ერი იცნობდა, როგორც დიდად განათლებულ ადამიანს, შესანიშნავ ისტორიკოსს და პოლიტიკურ მოღვაწეს. მისი სახელმძღვანელოები ანტიკური ისტორიის და საზოგა-

დოებრივი მეცნიერების საკითხებზე ჩვენს სკოლაში ისწავ-  
ლებოდა. ამავე დროს ის მეტად გამოცდილი და ნიჭიერი  
ორატორიც იყო.

— მე რომელი ლიტერატორი, ან მწერალი ვარ, კაცო?!  
საერთოდ, ვლ. მაიაკოვსკიზე მოხსენების გაკეთება მეტად  
ძნელი რამ არის! — განაცხადა მან. მაგრამ უარი აღარ გაუ-  
ვიდა და დათანხმდა.

სალამოსათვის დიაც გამოიძახეს სოფლიდან და კრების  
გახსნა დაავალეს. სიტყვა კი თეიმურაზმა თქვა.

მართალი გითხრათ, ერთმაც და მეორემაც გააოცა მთე-  
ლი საზოგადოება. ეს იყო უთუოდ მეტად საინტერესო და  
ნიჭიერად თქმული სიტყვები.

დია ჩიანელი თავისი ბუნებით და ლიტერატურული გე-  
მოვნებით ძალზე შორს იდგა მაიაკოვსკის ლიტერატურული  
შემოქმედებისაგან, დია იყო მეტად ნაზი, მაგრამ „შემოდ-  
გომის ცრემლების“ ლიტერატურული სულის მქონე კაცი  
უცებ თითქოს შეიცვალა; ეტყობა, ვლ. მაიაკოვსკის და-  
ღუპვამ ძლიერ იმოქმედა მასზე, დიდი ტკივილები აგრძნო-  
ბინა. მან საოცრად კარგი შესავალი სიტყვა თქვა. თეიმურა-  
ზმაც გააოცა მსმენელები. მართალია, იგი მაშინდელი ინტე-  
ლიგენციის ყოველმხრივ მოწინავე მოაზროვნე ადამიანი გა-  
ხლდათ, მაგრამ იგი, საერთოდ, ყოველთვის ერიდებოდა  
ლიტერატურულ საკითხებზე გამოსვლებს და აი უცებ ასე-  
თი სიტყვის თქმა!

ამ კრებას მაშინ ესწრებოდა მოსკოვიდან ახლად ჩამოსუ-  
ლი ცნობილი თეატრმცოდნე და ბრწყინვალე ორატორი სერ-  
გო ამალლობელი. მან თქვა: „არ ველოდი თუ თეიმურაზ  
კუმბურიძე და დია ჩიანელი ასეთ სიტყვებს იტყოდნენ  
დღეს“.

დიახ, ასეთი იყო დია ჩიანელი.

მიუხედავად იმისა, რომ დავით ჩხეიძე — ჩიანელი ყო-  
ველთვის პროზაში და დრამატურგიაში მუშაობდა, იგი მაინც  
უფრო მეტად პოეტი იყო, ვიდრე პროზაიკოსი. დაკვირვე-  
ბული თვალი ამას მისი ნაწარმოებების გაცნობისთანავე დაი-  
ნახავს. დიას ნოველები, როპანი და დრამატული ნაწარმო-

ებნი უსათუოდ ნათელი პოეტური სულის მქონე ადამიანის ხელით არის დაწერილი.

მართალია, მას შედეგები არ შეუქმნია, არც თუ დიდი და ფართო სოციალური ტილოები დაუტოვებია თავისი შთამომავლობისათვის, მაგრამ მისი ნაწერები ყოველთვის გაუთბობს ქართველ კაცს სულსა და გულს, ყოველთვის ტკბილად გაახსენებს იმ ადამიანს, რომელმაც დაწერა მოკრძალებული, მაგრამ უთუოდ ლამაზი ნაწარმოებები, ყოველთვის ათქმევინებს მის წამკითხველს, რომ ამ სტრიქონების დამწერი უთუოდ სულით და გულით მწერალი იყო.

ეს კი ცოტა როდია?!

ამიტომაც იყო, რომ ქართველმა მწერლებმა დია ჩიანელი 1934 წელს საკავშირო მწერალთა პირველ ყრილობაზე თავის წარგზავნილთა შორის აირჩიეს. იგი ამ ისტორიული ყრილობის ერთ-ერთი დელეგატი გახლდათ.

დიდი აღფრთოვანებითა და აღტაცებით დაბრუნდა დია მაშინ მოსკოვიდან. მართლაც, ეს ყრილობა იყო არა მარტო დიდი საბჭოთა მწერლობის დაფუძნების ყრილობა, იგი განსაკუთრებულად, ორმაგად მნიშვნელოვანი გახლდათ ქართული მწერლობისათვის. სწორედ ამ ყრილობაზე ამალდა პირველად ჩვენი დიდი მოაზროვნის და გენიოსი პოეტის შოთას სახელი. მის საქვეყნოდ ასე დიდებით ოლიმპზე ასვლას და შარავანდედით დაგვირგვინებას ამ ყრილობამ ჩაუყარა საფუძველი.

დია ჩიანელს უხაროდა, რომ იგი საბჭოთა დიდი მწერლობის მტკიცე ბალავერის ჩამყრელი ყრილობის ერთ-ერთი მონაწილე გახდა. ქემშარიტად, ეს დიდად საამაყო მოვლენა იყო. მართლაც, დიდზე დიდია საბჭოთა მწერლობის პირველი ყრილობის სიდიადე და გავლენა მსოფლიო ლიტერატურული აზროვნების სამყაროზე.

ვერავინ ვერ დაასახელებს მსგავს თავყრილობას, რომელსაც თავისი სიბრძნით და რეზონანსით მანამდე ასეთი გავლენა მოეხდინოს სამყაროს ლიტერატურის და, საერთოდ, მთელი ხელოვნების მსველელობაზე. ამ ყრილობამ შეაშფოთა ადამიანთა მტრები, შეამჭიდროვა ადამიანთა მეგობრები.

ამიტომ დია ჩიანელი, რასაკვირველია, კემმარიტად მარტალი იყო, თავისი იქ ყოფნით რომ ამაყოფდა. იგი ჩამოსვლისთანავე აღფრთოვანებით და სიყვარულით შეუდგა შემოქმედებით შრომას. მან რამდენიმე მოთხრობა დაწერა თანამედროვე თემაზე. ეს მოთხრობები მისი შემოქმედების უკეთესი ნაწარმოებებია. დია ჩიანელს უხაროდა ცხოვრება და შრომა, უყვარდა მეგობრები და ამხანაგები, ცოცხლობდა მამულისა და ხალხის სიყვარულით.

## ს ა რ ჩ ი ვ ი

### ლიტერატურა

გეგუთის ძელები	.	7
არწივები ცაში აფრენილი კვდებიან		29
მიაგულის სიყვარული		50
აფხაზური თქმულება		60
თქმულება ქუთაისზე	.	105
სუანური თქმულება	†	117
ზე სიკეთისა და ზე ბოროტებისა		136
ხალდეს ყვავილები	‡	186

### მწერლის ჩანაწერები

დიდ ჰადართან		221
ყურძნის მტევნები	‡	238
გელათის ქრონიკები	•	270
რუსთავის ქვათა დაღადი		286
ღურგალი და პრროფესორი		303
თბილისის ბალავერი და გუმბათი		349
შეხვედრები გალაკტიონთან		387
დიდი რეჟისორი		406
პაოლო იაშვილი		416
დია ჩიანელი		421

Асатиანი Мамია Васильевич  
Гегутские дзелквы  
(На грузинском языке)  
Издательство «Сабчота Сакартвело»  
Тбилиси, Марджанишвили, 5  
1968

რედაქტორი ნ. ინასარიძე  
მხატვარი ი. უთურაშვილი  
მხატვრული რედაქტორი გ. ქუთათელაძე  
ტექნიკური რედაქტორი ნ. ქავთარაძე  
კორექტორი ც. ნიკურაძე

გადაეცა წარმოებას 2/X 67 წ. ხელმოწერილია დასაბუქდად 6/V 68 წ.  
ქილ. ზომა 84×108<sup>1</sup>/<sub>32</sub>. პირობითი ნაბეჭდი თაბახი 23,05.  
სიღარ.-საგამომც. თაბახი 20,09.  
უე 01667. ტირაჟი 30.000. შეკვ. № 11136.

ფასი 78 კაბ.

გამომცემლობა „საბჭოთა საქართველო“  
თბილისი, მარჯანიშვილის 5.

საქართველოს სსრ მინისტრთა საბჭოს ბეჭდვითი სიტყვის  
სახელმწიფო კომიტეტის მთავარბოლიგრაფმრეწველობის სტამბა № 5,  
ქუთაისი, ი. ჭავჭავაძის პროსპექტი, № 11.

Типография № 5 Главполиграфпрома Государственного комитета  
Совета Министров Грузинской ССР по печати,  
г. Кутаиси, пр. И. Чавчавадзе, № 11.